







578-a

ges. Can. - 578-a

4^e J. Can. P. Frölich

377⁵

QUIS EST PETRUS?

SEU

QUALIS PETRI PRIMATUS?

LIBER

THEOLOGICO-CANONICO


CATHOLICUS.



Cum Approbatione.

Handwritten library stamp:
BIBLIOTHECA
MUSEI HIST. NAT.
MUSEI HIST. NAT.

RATISBONÆ, 1790.



Quis est Aaron, ut murmuretis contra eum? Num. XVI, 11.

Bayerische
Staatsbibliothek
München

SANCTO PETRO
APOSTOLORUM PRINCIPI,
ECCLESIAE FUNDAMENTO,
REGNI COELESTIS CLAVIGERO,
FIDELIUM OMNIUM PASTORI,
CHRISTI DOMINI VICARIO,
IN TERRA PLENIPOTENTIARIO.

PIO VI.
S. PETRI VICARIO;
ET IN ROMANA CATHEDRA SUCCESSORI
HOC OPUS JUDICANDUM

SUBMITTIT
DEVOTISSIMUS AUTHOR.

CONSPECTUS TOTIUS OPERIS.

P A R S I.

Fundamenta ex divinis Scripturis.

* * *

ARTICULUS I.

Christi Domini Promissio.

ARTICULUS II.

Christi Domini institutio.

ARTICULUS III.

Petri actuale exercitium.

APPENDIX.

Alia Petri gesta ex Documentis Ecclesiasticis antiquissimis
æque, ac genuinis.

* * *

P A R S II.

Reflexio critica in formam Regiminis divinitus institutam.

* * *

Ostenditur

Regimen Ecclesiæ ex Christi institutione Monarchicum.

EXCURSUS I.

In Doctrinam Gallicanam de superioritate Conciliorum,
& Libertatibus particularibus.

EXCURSUS II.

In Doctrinam hodiernam Germanorum de Concordatis, forma Regiminis
Aristocratica, & falso axioma Neo-Canonistarum.

AP-

APPENDIX.

De Authore libri, cui titulus: Defensio Cleri Gallicani!

* * *

PARS III.

Corollaria ex Divina institutione

Primatus Monarchici factis historicis primæ antiquitatis illustrata.

* * *

COROLLARIUM I.

De Jure leges universales statuendi, & obedientia Papæ debita.

COROLLARIUM II.

De Jure causas majores ad se vocandi, in specie de causis fidei,
& Episcoporum.

COROLLARIUM III.

De Jure dispensandi in legibus universalibus, in specie Matrimonii
impedimentis.

COROLLARIUM IV.

De Jure Adpellationum ad Papam, non a Papa.

COROLLARIUM V.

De Jure Legatos, eosque stabiles mittendi.

APPENDIX.

De Isidori, vulgo Mercatoris Decretalibus.

PRÆFATIO.

Liber hic, quem oculis coram aspicias, manibusque tenes, benevole Lector! duobus typo commissis conspectibus Colonienſi uno, altero Monacenſi anno abhinc jam annuntiatus, nunc demum in lucem editur multorum votis, prout adhuc boni sunt animi, ardenter exoptatus, sed & quorundam conatibus, quod nostra ætate haud mirandum, jam graviter infestatus, multumque retardatus.

Ut nihil de systematico nexu totius dicam, qui satis perspicue omnibus apparet; argumenta singularum partium non quidem a me inventa, attamen vel ex divinis fontibus tam manifesta sunt, vel ex historicis factis tam notoria, ut absque gloriandi formidine (nisi gloriatio in veritate, hoc est, in Deo sit) asserere palam non dubitem, *invincibilia*; quod vero dixi, iterum iterumque dico, non esse mea, sed Catholica.

Cum singulæ partes, partiumque divisiones totidem sint veluti Dissertationes, quæ pro se ipsis unum integrum constituere videantur; ea de *Bosſueto* Dissertatio jam ante annum singulariter impressa, nunc Parti secundæ per modum Adpendicis fuit noviter adjecta. Eruditorum litteræ, quorum nomina orbi Catholico jam publicis monumentis probata sunt, mihi contestantur *), quæſtionem de Authore famosi libri,

Defen-

*) Unicus, isque Monachus ad me rescripsit epistolam (Deus tu ſcis, quanto meo dolore lectam!) contradictionibus, & schismaticis principiis, & forte superbia non vacuam.

Defensio Declarationis Gallicanae non ita pridem Moguntiae ad tantae Sedis dedecus recusæ, demum esse confectam usque adeo, ut detracta larva impostoris facies apertum gerat Quessnellianæ factionis stigma. Sic nempe seculum nostrum XVIII, quod excurrimus, a posteritate sera, si qua adhuc superest, infamiam feret, & execrationem perpetuam. Non unus hodie falsarum mercium fabricator datur, qui Isidorus audiat; sed Bonnenfium ex fabrica, aut fœdere mille jam dicas prodiisse impostores Hedderichianos. Lege, si placet, *Colloquia Ingolstadiensis Doctoris*, Düsseldorfii edita an. 1789.

Propter rerum, quæ hoc opere tractantur, summam gravitatem, materiarum Indicem satis curatum in fine imprimi feci, nec non & alterum Indicem graviorum errorum: leviores enim, præcipue interpolationum tute B. L. facili negotio corriges, atque Authoris absentiae, typique properantiae aliquid spero condonabis.





INTRODUCTIO.

Opera Dei omni suo modo esse quam perfectissima, quibus cogitari melius nihil possit, seu *optima*, dubitare nos sane vel ipsa non finit notio, quam de Divinitate possumus nobis comparare. Hinc sapienter Lactantius scripsit *): „Considerans conditionem rerum intelligo, nihil fieri aliter debuisse, ut non dicam potuisse, quia Deus potest omnia: sed necesse est, ut providentissima illa Majestas id effectuerit, quod erat melius, & rectius.“ Non dissentit a Lactantio M. Augustinus, cujus in eo libro, quem *contra Adversarium legis, & Prophetarum* conscripsit, ea est sententia **): „Usque adeo desipiendum est, ut homo videat melius aliquid fieri debuisse, & hoc Deum vidisse non putet? aut putet vidisse, & credat facere noluisse? aut voluisse quidem, sed minime potuisse? Avertat hoc Deus a cordibus piorum!

§. 2.

Quam ob rem extra omnem controversiam est, missum a Deo Filium, æque Deum, & Patri Consubstantialem in sua, quam fundavit Ecclesia sacri Rëgiminis formam *talem* instituisse, quæ sibi proposito fini quam optime conveniret, id est *optimam*. Una quidem vox omnium est, quotquot catholicam profitentur fidem, a Christo Petrum fuisse institutum ceu universi gregis sui Primatem, debitaque in hunc finem jurisdictione instructum, quidquid contra Febronius obloquatur ab Ecclesia, eaque vel Germanica jam condemnatus ***). Attamen, quod graviter dolendum, hac speciosa fidei professione, sine qua nemo catholicus esse potest, multi nostris, ah quantum excæcatis temporibus tam sibi illudunt, quam aliis. Quælibet sacri hujus Primatus jura ita singillatim constringere, aut verius refecare nituntur, ut demum tota ejusdem jurisdictione inani tantum nomine relicto evanescat, & pereat. Malum paucis abhinc seculis ex Gallia ortum, quod non sine dedecore hujus Ecclesiæ, alias meritisimæ dici potest,

*) De opificio Dei cap. 3. **) Lib. 4. cap. 14. ***) *De statu Ecclesiæ*, 1763.

test, animis, prout fieri solet, plus æquo exacerbatis, & fictitiæ libertatis, quæ aliud, idque gravius onus imposuit, ultra, quam par erat, studiosis. Ibi contra antiquam Patrum fidem, ut erudite Dom. Petididier demonstravit *), supremi Pontificis jura unanimi antea consensu agnita primum fuerunt restricta, negataque.

§. 3.

Pristinæ fidelitatis laus Germaniæ nostræ fere usque ad hujus seculi lapsum constitit; ab annis haud ita multis disceptari inter nos serio ceptum de Papæ suprema authoritate, & infallibilitate. Cum nondum de dogmate manifeste definito lis esset; veteris fidei, sed & fraternæ caritatis tenaces animi recentem tolerarunt non sine dolore quidem doctrinam adeo, ut jam plerique veritatem sibi notam, aliis vero invisam prudenti, ut putabant, silentio apud se retinerent. At vero hac tolerantia more suo sic abusus est error, ut pristina illa fides jam aperta fronte falsitatis argueretur, imo & convitiis quasi ultramontana insipientia, vel mala fraus proscinderetur. Hinc factum, ut impetu semel facto, ruptis jam antiquitatis repagulis temere in sanctissima, divinaque Sedis apostolicæ jura involeretur, Gallia caute quidem pedem retrahente, sed ostensa jam improvide erroris via.

§. 4.

Quod hodiernis diebus deplorandum maxime est, cum altissima Religionis divinæ dogmata plerumque jam sermone vernaculo tractentur, accedente seculi nostri libidine ad scribendum ex plurimorum otio nata; scribatores nostri haud raro theologiarum rerum, imo & principiorum catecheticorum oppido ignari sunt, qui tamen aliqua ecclesiasticæ materiæ lectione sane haud satis decocta jam animantur ad calamus imperite licet manu arripiendum; quo gravissimos contra fidem christianam errores vel inscii per orbem spargunt. Inde enim vero nostra ætate juri ecclesiastico tam lethale vulnus infligi manifestum est, quod Atheologi plerique sint; qui Ecclesiæ sacrerrima jura nihilominus audent censorio naso discutere. Siqui alii ex nostris Cisalpinis, ut nominari amant, & reformationis Canonistis Theologiæ operam dederint; hujus tamen aut despectu, aut saltem neglectu divini eloquii authoritatem ex oculis plerumque di-

mit-

*) *Traité theologique sur l'Autorité, & infallibilité des Papes. 1724.*

mittunt, insuper venerandæ antiquitatis documenta seu parum æstimant, seu in alienum plane sensum pro more Advocatorum, quod venale est hominum genus, detorquent, ampliore sibi præ veteribus peritiam juris vel ideo arrogantes, eo quod historica facta saniore, ut ajunt, crisi ad instabilis suæ rationis, sæpe præjudiciis, & sinistra affectione captæ regulam, normamque exigant. Igitur legitima summi Pontificis jura dignoscere, & æqua lance expendere volenti necesse est ante omnia animum serio ad ea attendere, quæ divinæ Scripturæ eloquia de primatu Petri nos docent. Hinc sit

P A R S I.

Fundamenta ex divinis Scripturis.

ARTICULUS I.

C h r i s t i p r o m i s s i o.

§. I.

Cum Dominus, & Redemptor unacum discipulis suis in partes Cæsareæ Philippi venisset, illorum de se fidem quasi exploraturus, verius autem eosdem in fide instructurus, quid de ipso homines sentirent, interrogavit: *Quem dicunt homines esse filium hominis?* Illi quidem varias, quas audierant, retulerunt hominum opiniones, prædicantem sibi hominem Christum, ceu missum a Deo Prophetam habentium: dicebant enim alii Joannem Baptistam, alii Eliam, item alii Jeremiam, aut unum ex Prophetis. Hæc hominum de Christo fides ut homine. Quam porro Apostoli de se fidem haberent, institit Christus ex ipsis quærere: *Vos veramquam me esse dicitis?* Præ reliquis inspiratus a Deo Petrus, quam humano lumine agnoscere non poterat, divinitatem Christi, quippe qui verus esset, & per naturam Dei Filius, professus est. *Tu es Christus, Filius Dei vivi.* Hanc Petri confessionem approbavit divinus Magister, promisso insuper in tantæ fidei remunerationem adjuncto, Petrum fore ædificandæ Ecclesiæ, contra quam nullæ diaboli vires prævalerent, fundamentum, eidemque regni cælorum claves tradendas, ut quidquid Petrus solverit, aut ligaverit in terra, id in cælo quoque solutum sit, ligatumve. „Beatus es, Simon Barjona, quia caro, & sanguis non re-

„velavit tibi, sed Pater meus, qui in cœlis est; & ego dico tibi, quia „tu es Petrus, & super hanc Petram ædificabo Ecclesiam meam, & „portæ inferi non prævalebunt adversus eam. Et tibi dabo claves re- „gni cœlorum, & quodcunque ligaveris super terram, erit ligatum & „in cœlis, & quodcunque solveris super terram, erit solutum & in cœ- „lis“. Matth. XVI. Verba Salvatoris tam magnifica non fuisse in ven- tum, & inaniter ad Petrum dicta fidelium quisque mihi necessario da- bit: imo quis istorum sensus sit verborum, notione sua tam simplicium, & energia tam potentium indagare superfluum forsitan, nisi necessitas cogeret, videri posset: haud enim disquisitionem requirunt, sed atten- tionem.

§. 2.

Notum est hanc veteribus præcipue in Oriente consuetudinem fuisse, ut novum nomen hominibus inderent ex quodam singulari, ad memoriam conservando eventum. Hujus rei in V. T. ipse Deus exempla instituit Abram, & Jacob nomina in Abraham, & Israel immutâdo, quorum illud Patrem magnæ multitudinis, hoc vero potentem erga Deum significabat, non vano utique & inani signo, sed vere, & reali- ter efficaci. Cum igitur Dei Filius Simoni, Jonæ filio nomen immutat, & vocari Kephâ, seu Petram jubet, rationem quoque indicans, eo quod supra hanc Petram ædificaturus sit Ecclesiam suam, *supra hanc Pe- tram*, ut ait, non supra quamcunque, quæ alia forsitan esse posset, pe- tram; quis est inter fideles, qui adversus Dei Filium blasphemare, eum- que vaniloqui, quin & deceptionis arguere audeat, quasi magna pro- missione, nominisque immutatione nihil singulare Petro dare voluisset ille, cujus verbum omnipotens est, & quod sonat, efficit? Petrus Ec- clesiæ fundamentum; hoc immutabile Dei effatum est; quod non præ- teribit, etsi cœlum & terra prætereant. Sensus hic verborum Christi literalis est, & plane naturalis, atque (cum necesse sit ad mentem SS. Patrum divinas interpretari scripturas) unanimis omnium omnino, ne unico quidem contrario, Ecclesiæ Patrum, vel ipso adeo fatente Fe- bronio, non obscure indicari aliquid præcipuum in Petro præ reliquis Aposto- lis *). Possem inter Græcos Origenem appellare, Athanasium, Grego- rium Naziancenum, Epiphanium, Chrysostomum, Cyrillum, Theophi- lactum, aliosque: inter Latinos Tertullianum, Cyprianum, Hilarium, Hiero-

*) Cap. 2, §. 1, n. 1.

Hieronimum; sed unum audiamus nunc Augustinum de Petro scribentem *): „Solus inter Apostolos meruit audire: Amen dico tibi, „quia tu es Petrus: dignus certe, qui ædificandis in domo Dei populis esset lapis ad fundamentum.

§. 3.

Quod itaque Christus tam aperte dixit, non negavit Augustinus; dum alibi quodammodo diversam, haud tamen contrariam textui S. Matthæi dedit explanationem; asserens in Petro toti Ecclesiæ datas fuisse claves, ut ostenderet, eas non cum Petro cessasse, sed in Ecclesia remansisse. Quod verum est: non enim pro Petri persona, sed pro totius Ecclesiæ bono promissæ, ac datæ sunt claves regni cælorum. Enimvero quod capitis est, cum id cum reliquo corpore unum constituit, hoc totius corporis esse, utique per communicationem intelligitur. Est autem istud toti corpori commune *utilitatis influxus*, non *potestatis exercitio*, quæ in capite residet. Ita e. g. visio toti corpori per influxum predest, etsi a solo capite ope oculorum exerceri possit. Idem de morali quoque corpore sentiendum, e. g. de perfecto Statu politico, in quo suprema jus dicendi potestas ita invenitur, ut ad solum quidem Principem *usus* hujus potestatis, ad totam vero societatem ejusdem *utilitas* pertineat. Hoc utroque sensu cum S. Matthæi textus explicari merito possit, aut de solo Petro, ut capite, aut de tota Ecclesia, ut ex capite participante; prout e re visum fuerit, lectori liberam electionem cum S. Augustino velim relictam: etsi enim quoad concipiendi modum diversitas sit; una est tamen in rei veritate sententia effato Christi innixa, soli Petro pro totius Ecclesiæ bono administrandas cælestis regni claves fuisse promissas: *Tibi dabo claves regni cælorum.*

§. 4.

Cum S. Cyprianum quoque mihi opponas, ita loquentem **): *Hoc erant & ceteri Apostoli, quod fuit Petrus, pari consortio præditi & bonoris, & potestatis*; eundem S. Cyprianum juvat audire fidem catholicam ita profitentem ***): *Petrus, quem primum Dominus elegit, & super quem ædificavit Ecclesiam suam.* Non ergo mihi, sed sibimet ipsi S. Patrem opponis. Credas, si velis, Patrem hunc secum pugnare, mihi non

A 3

*) Serm. 203. in append. nov. edit. T. 5. Col. 338.

) Lib. de unitate Ecclesiæ. *) Epist. 71.

persuadebis, nec quidquam hac, si qua foret, contradictione adversus Ecclesie universalis doctrinam evinces. Cyprianum autem facile secum, uti & mecum reconciliare mihi videor asserendo, omnes Apostolos in munere Evangelium prædicandi cum virtute divina miraculorum, seu in ipso *Apostolatu*, & missionis suæ consortio aliquo modo pares fuisse, secus vero in regimine sacro, sive *Hierarchia* divinitus instituta, in qua primum locum, seu omnium Princeps, præ reliquis Apostolis solus Petrus cum suprema clavium potestate accepit. Et hoc quidem ad mentem S. Cypriani, qui totus in eo est, ut doceat, ad unitatem in Ecclesia servandam a Christo *unum caput* fuisse institutum. Tolle caput, ut omnes Ecclesie Prælatos potestate regiminis æquales facias, & cum Febronio unitatem sustulisti.

§. 5. non arbor in segete sola

Ad divinam vero Scripturam ut redeamus; quid sibi velint claves regni cælorum soli Petro promissæ, amplius discutiendum est. Supremam regiminis potestatem per *claves* inditari sat omnibus hodiecum constat, quæ ipsa jam consuetudo Judæorum fuit. Multa congerie locorum ex judaicis libris Ligfood ostendit*), verba ista *solvere* vel *ligare* in Hebræorum lingua significasse permittere, vel prohibere, id est, auctoritate sua aliquid licitum, vel illicitum declarare. Suprema Filii Dei potestas ita in Apocalypsi describitur **): *Qui habet clavem David, qui aperit, & nemo claudit; claudit, & nemo aperit.* Eandem, sed tamen pro ratione ministeriali, potestatem in Ecclesiam suam Christus Petro pollicetur: *Tibi dabo claves regni cælorum. Tu portabis claves Ecclesie mee, tu aperies, aut claudes pro Auctoritatis tuæ eminentia, nulli hominum rationem redditurus, nisi mihi Domino tuo, & iudici. Tu Curator, & Præfectus regni mei esto, tu Vicarius meus. Hoc jure nititur Petro, ejusque Successoribus inditus a majoribus nostris honoris titulus: Vicarius Christi, & Apostolorum Princeps.*

§. 6.

Nec supremam tantum, sed & illimitatam in terris jurisdictionem Christus Petro pollicitus est. „Quodcumque ligaveris super terram, erit ligatum & in cælis; & quodcumque solveris super terram; erit solutum „& in cælis.“ Quodcumque dixit, nihil rei excipiendo, in terra, qua late

*) Horæ Talmud, ad Matth. 16.

**) Esp. 3. V. 7.

pater, universa nullum excipiendo locum. Quidquid igitur rei, & ubi-
vis terrarum Petrus aut solverit, aut ligaverit, jure suo potest, illimitata
jurisdictione potest, sine cujuscunque Apostoli injuria, aut prajudicio
potest: nullum enim Apostolis est jus datum, quod Petro sit negatum,
immo quod Petro non sit singulariter, & absque ulla limitatione commis-
sum: *quodcumque ligaveris, quodcumque solveris.*

§. 7.

Nec est, quod dicas, si omnia soli Petro sunt commissa, ergo
frustra reliquis Apostolis jurisdictionis, & quidem æque a Christo data est.
Facile enim per te ipsum, si velis, perspicies, in regno bene ordinato
supremam, eamque illimitatam omnia regendi potestatem penes Principem
reipublicæ esse, haud tamen humanam omnia per se præstandi possibilita-
tem: hæc utique in homine non datur, sed illa tamen in Principe. Opor-
tet itaque præter supremum Principem, cui plenitudo potestatis commis-
sa est, & alios dari judices, præpositosque, illi tamen uni subordinatos,
qui singulas, inter se divisas regiminis partes teneant ad bonum, universi
regimen, ceu ad unitatis suæ centrum collimantes. Ita sane regnum
suum spirituale Christus in terra pro hominibus instituere voluit, modo,
qui ipsis conveniret, optimo, ut uno omnium supremo Capite cum pleni-
tudine potestatis constituto regimen singularum partium, etsi plures inter
Rectores divisum ad universi tamen utilitatem conspiraret. Atque hoc
ipsum est, quod S. Cyprianus scripsit: *Episcopatus unus est, cujus a singulis
in solidum pars tenetur.* Certe a singulis Episcopis pars tenetur propterea,
quod suum quisque gregem singularem regat; in solidum vero, seu in
unum totum, eo quod Episcopi legem habeant Ecclesiæ unitatem servan-
di sub uno supremo Capite, quod universo Christianorum corpori præest.
Ergo unus est Episcopatus in toto consideratus, unus totius Episcopus;
sed & partium dantur Episcopi, attamen cum illo uno quasi membra cum
capite, quasi radii cum sole, quasi rivuli cum fonte, quasi muri cum fun-
damento inseparabiliter juncti. *Tu es Petrus, & supra hanc Petram edificabo
Ecclesiam meam.*

§. 8.

Sane cum Apostoli orbem universum inter se partirentur prædica-
tione sua convertendum, nisi omnes sub uno supremo capite, Petro
fuisent dependentiæ vinculo conjuncti, etsi eandem ubique fidem præ-
dicaf-

dicaſſent; ex diverſis tamen regionibus, quæ cuique in ſuam partem ceſſerant, unam haud collegiſſent Eccleſiam, ſed ſinguli ſingulas ſe ſe inter nullo ſocietatis, ſed tantum caritatis vinculo ad tempus, donec caritas refrigeſceret, conjunctas, quippe quarum capita nullam habuiſſent a ſe mutuo dependentiam, e. g. Bartholomæo erga Philippum nulla utique juridiſtione regiminis prædito. Id vero neutiſquam ſapientiſſimo Chriſti conſilio erat conveniens, qui in hanc terram advenerat, ut ex multis populis unum ſibi regnum, perpétuo duraturum, conſtitueret; hinc unum elegit poſt ſuum inde diſceſſum loco ſui Vicarium, ſcilicet Petrum ſumma rerum eidem commiſſa: *Tibi dabo claves regni calorum.*

De Petro

cap. 1. §. 9.

§. 9.

Erunt forſitan, qui §. 7 offendantur paritate ſupremi in regno Principis, aliorumque Reſtorum, eidem tamen ſubditorum, quaſi ſicut hi non niſi Principis vices gerunt, ita Apoſtoli tantummodo Petri, non vero ipſius Chriſti Vicarii fuiſſent. Quodſi hanc ſimilitudinem (non equidem perfectam) indigne ferant; certe haud in me, ſed in Chriſtum ipſum indignatio recidat neceſſe eſt, qui ſupremam, eamque pleniſſimam, quippe illimitatam regiminis poteſtatem apertis adeo verbis, atque energicis Petro promiſit, *Tibi dabo claves regni calorum, quodcumque ligaveris, aut ſolveris in terra, erit & in calo ligatum, aut ſolutum.* Quidquid ligaveris, ergo & in tuis, ſi opus fuerit, Coapoſtolis; in terra, ergo & in locis aliorum Apoſtolorum prædicatione converſis, eorumque curæ immediate ſubditis. Hanc univerſalis juridiſtioneis plenitudinem in Petro tu forte poteſtatem dices *mediatam*, & *extraordinariam*? Si de prudenti æconomia uſus id intelligas, manus tibi meas do; ſi de *jure* vero, Chriſto contradicis, qui Petro, ceu univerſali ſui Vicario, hanc *illimitatam* poteſtatem proprio ore contulit, hinc ſane *ordinariam*, & *immediatam*. Epicoſpus imprudenter ſua uteretur, vel potius *abuteretur* juridiſtione, ſi Parochis inſuperhabitis pleraque, & more ſolito per ſe ipſum ordinaret; poteſtas tamen juridiſtioneis quoad ſingulas Parochias ordinaria, & immediata in Epicoſpo reſidet, quam etiam *jure* exercere poteſt gravi ratione id exigente. Hinc certos caſus, aut certas perſonas, e. g. Moniales merito Epicoſpus ſuis in Parochiis reſervat. Adplicationem penes te ipſum æqua lance pondera, mi optime Leſtor! Ceterum ex illa ſupremi Principis paritate nondum ſequitur, quod ad invidiam conſtandam quidam extrahunt: non enim ſicut mundi Principes *proprio Nomine*, ita Petrus

2201b

in

in Ecclesia principatum tenet, sed & ille, & ceteri Apostoli sunt Christi, qui proprie Princeps est, *Vicarii*, hoc tamen discrimine, ut Principi-Vicario, id est Petro, subditi sint reliqui omnes Apostoli. Vin tibi rem denuo exemplo illustrari? Quilibet inferioris ordinis curatus sacerdos jurisdictione divina est Christi Vicarius ad suam plebem, nihilominus jurisdictioni superioris Vicarii, qualis Episcopus est, subjectus.

§. IO.

Nonne vero *eandem*, quam Petro promissam legimus Matth. XVI potestatis plenitudinem, clavesque cælorum Christus omnibus dedit Apostolis Matth. XVIII. „Amen dico vobis, quæcunque alligaveritis super terram, erunt ligata & in cælo, & quæcunque solveritis super terram, erunt soluta & in cælo „? Nonne & reliquos Apostolos S. Paulus vocat fundamenta Ecclesiæ Ephes. II. „Superædificati super fundamentum Apostolorum, & Prophetarum ipso summo angulari lapide Christo Jesu „? Nonne in Actis Apostolorum XX. scriptum est: „Spiritus sanctus posuit Episcopos regere Ecclesiam Dei „?

§. II.

Hæc quidem, & similia contra S. Petri primatum, sed & contra ipsius Christi clarissimum effatum a viris A catholicis opponi satis omnibus notum est. Res mira vero, & dolenda merito videtur, si simile quid ex ore Catholicorum resonat, queis Papæ primatus in universum orbem cum jurisdictionis plenitudine a Christo institutus sanctissimum dogma, in Conciliis Lateranensi IV, & Florentino jam definitum, fide divina credendum esse debet. Itane vero, qui Catholicos se dicunt, Dei Filium inanis eloquii, quin & falsi arguere non verentur, ut dum magno apparatu, & nominis immutatione singulare privilegium *soli* Petro promiserit, idem postea dans reliquis Apostolis, revera nihil *singulare* Petro dederit? Consilia Dei absque pœnitentia sunt: Si cælum & terra prætereant, ut M. Bossuetus dixit, verbum Domini ad Petrum non præteribit inane. Dicant ergo illi, ubinam Christus Andreæ, aut Jacobo, aut Joanni, aut cuicunque Apostolorum *in singulari*, æque illimitatam dederit, sicut Petro promisit, regiminis potestatem? Cuinam ex Apostolis præter *solum* Petrum conceditæ sunt claves regni cælorum? Ligandi, solvendive potestas Apostolis data, inquires, est ipsa jam clavium potestas. En! quanto tibi ex fundamento id negem: per illam clavium Matth. XVI supremam regiminis

giminis potestatem denotari jam supra §. 5. ostensum a me est. Christum vero Matth. XVIII Apostolis non illam supremi *regiminis*, sed aliam *sacerdotii* potestatem omnia peccata remittendi, aut retinendi promississe vel ex ipso contextu colligitur, ubi expresse de peccatis commissis, & apud Deum solvendis, ligandisque sermo est. Hoc suo promisso Christus stetit, dum Joan. XX sacerdotalem ordinis potestatem *pro foro interno* peccata remittendi, & retinendi Apostolis contulit. Solvere, & ligare omnia peccata posse communis est ergo sacerdotii potestas, *ut ordinis* omnibus etiam secundi gradus sacerdotibus competens, qui hac in re Apostolorum Successores sunt, & in hoc sacro tribunali Christi Vicarii. Hujus tamen potestatis usum in regno Christi haud esse illimitatum, sed a superiore e. g. Episcopo in Presbyteris restringi posse, aut ampliari Catholicorum nemo inficias iverit. Nisi hac responsione contentus sis, dicas mihi, obsecro, ubinam promissum suum Matth. XVIII præterquam Joan. XX Christus impleverit?

§. 12.

Si vero nihilominus obscuri textus aliam præoptes explicationem, eamque de regiminis potestate; neque me etiam invitum habebis. Memineris tantum non *singulis* Apostolis, sed *omnibus* a Christo promissam fuisse quæcumque ligandi, aut solvendi potestatem. Apostolis, immo toti Ecclesie *in corpore* id promittitur, utique a suo *capite* non disjungito; igitur in promissione Apostolis data haudquaquam excluditur, sed enimvero includitur Petrus, neque *disjunctim* a Petro Apostolis, sed tantum *conjunctim* cum Petro Apostolis convenire promissio potest. Sensus est, illimitatam regiminis spiritualis potestatem in Ecclesia residere, sicut si tibi dicerem, in perfecto Statu politico illimitatam dari regendi potestatem. Quid inde? an quia in toto statu suprema potestas; hinc minus in solo Principe, seu corporis politici capite supremæ potestatis exercendæ jus residet? an potestas totius politici status illi capitis potestati opponitur? an non in hac potius illa collecta invenitur, & ab hac in alia quoque membra, quasi in ramos dilatatur? Ita sane! quæcumque solvendi, & ligandi potestas in corpore Pastorum cum suo capite conjunctorum inest; hoc tamen neutiquam obstat, quo minus in capite solo omnis ecclesiasticæ potestatis plenitudo resideat, in alios, prout e re fuerit, communicanda, id quod divinus Institutor Christus apertissimis verbis Petro promisit: *Tibi dabo claves regni cælorum, quodcumque ligaveris, quod-*

quodcumque solveris super terram, erit ligatum, solutumve in caelo. Qui Patrum quorundam voce mutuata ex illo textu: *Quaecumque ligaveritis, quaecumque solveritis*, dicunt omnibus Apostolis regni caelorum claves fuisse datas; noverint sibi integrum ex SS. Patribus sensum esse profendum, addendumque claves fuisse ceteris per Petrum communicandas, hoc est, regiminis potestatem in Apostolis saltem ab illa Petri fuisse dependentem. Ita Optatus Milevitanus *): „Bono unitatis B. Petrus & „præferri omnibus Apostolis meruit, & claves regni caelorum communicandas ceteris *solus* accepit.“

Eadem quoque responsio ad alterum textum §. 10 quadraret, si tamen ibi ratione *regiminis*, & non potius *doctrinae* Apostoli, quemadmodum & Prophetae fundamentum Ecclesiae vocarentur.

§. 13.

Quod vero ad tertium jam spectat textum, *Episcopos esse positos ad regendam Dei Ecclesiam*; nihil plane frequentius, quam hæc vetus cantilena in ore hodiernorum ex Febronii schola hominum resonat; eadem siquidem chorda plerique oberrant. Hic ipse locus vero insigne testimonium est contra atheologos plerosque, prout nostra ætas fert, Jurisconsultos, quantum inscitia sua abripiantur; adeo ut proprio se se gladio incauti confodiant: non enim, nisi solum nomen *Episcoporum* est, quod causæ suæ possit patrocinari, sensus vero ipse allegati textus A&XX. quam maxime potestatis *episcopalis*, prout hodie extenditur, amplitudini adversatur. Res quippe comperta est, quod primis Apostolorum temporibus appellatio *Episcopi*, sicut & *Presbyteri* omnibus seu primi, seu secundi ordinis sacerdotibus communis fuerit, ita, ut vel nota critica erudito sit Bagnio **), documentum apostolica ætate recentius esse, si in eo jam non promiscue, sed cum discrimine ad nostrum sensum nomina illa *Episcopus*, & *Presbyter* occurrunt. Hinc S. Paulus, ubi Episcoporum officia describit 1. Timoth. III, & Tit. I, aut ubi salutem Episcopis dicit, ut Philippenſibus I. eosdem nullibi a Presbyteris distinguit, sed tantum a Diaconis. Insuper autem id allegato ex loco eo clarius elucet, quod iidem, qui nunc v. 28 Episcopi, & Ecclesiae Rectores dicuntur, supra v. 17 Presbyteri, id est, Majores natu Ecclesiae vocantur. Certe Ecclesiam regere cujuslibet sacerdotis est, qui hodie in ipsa ordinatione sua *præesse* jubetur. Quid ergo? Presbyter, ut gregem sibi

B 2

com-

*) Lib. 1, contra Parmenianum.

**) Contra Epist. S. M. Ignatii.

commiffum regeret, divina jurisdictione præditus ab Epifcopo non dependeat, ejusdem mandatis, prout vifum fuerit, refragari queat, *ordinariam*, & *immediatam*, feu fi fas eft, invidiofa hac voce uti, *concurrentem* potestatem fuo Superiori, hoc eft, Epifcopo, in oviculas fibi demandatas abneget? Væ Epifcopis, fi clamore noſtrorum Reformatorum excitati Presbyteri ad vindicanda ſua jura divinitus conceſſa, & antiquitus habita (injuſte quidem id fieret) evigilarent! Jam nihil illis poſteſtatis propriæ præter ſolam ordinationem, nihil autem jurisdictionis propriæ forſitan remaneret, & hoc quidem ex primævis Juribus: *Quid facit excepta ordinatione Epifcopus, quod Presbyter non faciat?* quærit S. Hieronymus. Sane quifquis in antiquitate eccleſiaſtica totus non eſt peregrinus, facile animadvertat, ſi compilatis veterum teſtimoniis in priſtina ſua jura reſtitui contra Epifcopos Presbyteri poſtulerent, ſicut hodie contra ſummum Pontificem quorundam Epifcoporum advocati clamitant, (ut nihil de Archiepiſcopis dicam, qui aliunde divinæ institutionis non ſunt, ſed tantum ab hominum voluntate ſuam habent exiſtentiam) multo pejorem cauſam Epifcoporum fore, quam nunc Papæ cauſa undique aſſurgentibus adverſariis eſſe videatur. Diſcant ergo intempeſtivi noſtrorum Epifcoporum contra Pontificia jura advocati cautius ad priſci ævi jura provocare, & in ſpecie ab illo textu Aſt. XX, quo tam frequenter abutuntur, ſibi cavere, *Epifcopos eſſe poſitos, ut regerent Eccleſiam Dei*: quippe quo textu, niſi ſalvis ſuperioris ſedis juribus, & quoad partem regiminis ſuæ curæ commiſſam explicetur, Epifcopi ſua ſuperioritate erga Presbyteros exciderent *). Æqua lance ponderantur ſicut Presbyterorum jura, & Epifcoporum; ita quoque Epifcoporum, & ſupremi Pontificis. Filii hominum juſte judicate!

§. 14.

*) In originali græco textu non tantum vox *regere*, ſed magis propria *pſcere* ΠΟΛΛΟΙΣΙΝ legitur. Impleri ſcripturam oportet. Ego autem experientiam teſtem invoco, quinam ſint chriſtianæ plebis Paſtores, certe a Deo ad hoc poſiti, qui verbo tum privato, tum publico, in rebus arduis conſilio, in aſſiſtis ſolatio, in periculis animæ ſubſidio, in ipſa demum morte aſſiſtentia, & ordinaria Sacramentorum miniſtratione ſinguli quidem oves Chriſti ſingulares, univerſum autem gregem univerſum paſcunt; an potius primi ordinis Sacerdotes ſunt, an ſecundi? Certe inquam, a Deo poſiti ſunt, qui etiamnum hodie populum Dei non ſine propriæ vitæ diſcrimine paſcendi officium exercent. In his ergo S. Scriptura hodieſum ſingulari quodam modo impletur: his, id eſt, Presbyteris æque, ac Epifcopis S. Petrus ſcripſit: *Pſcite, ſeu regite, qui in vobis eſt, gregem Dei.* 1. Pet. V. 2.

§. 14.

Incaſſum aliqui præſtendunt nullam Presbyteris juridiſtionem eternam competere, nec proinde illos Episcopis, ſicut hos Papæ oppo-
nere ſe poſſe. Facile enim erit Presbyteris, ſi volupe fuerit, hujus
aſſerti falſitatem vel ex antiqua praxi, vel ex iſtis divinis Scripturis
oſtendere. Unde enim Episcopi ſuam, quam habent externam juridi-
tionem, clarius ex SS. Litteris probabunt, quam ex memorato textu;
Episcopos eſſe poſitos, ut regerent Dei Eccleſiam? Atqui cum certum ſit ex
Scripturis Presbyteros quoque Episcoporum nomine deſignari; vel hoc
fortiſſimo argumento adverſus Episcopos illi roborabuntur, externum re-
gimen, quo ab initio gaudebant adeo, ut etiam excommunicare poſſent,
& in conciliis decidere, ſibi revindicaturi. Vide doctiſſ. Selvaggium *).
Utquid vero ad extrema deviandum, media via, in qua veritas, & pax
ambulant, ſequæ mutuo oſculantur, relicta? Ita enimvero! Episcopi,
nec non & Presbyteri a Spiritu ſancto poſiti ſunt, ut regerent Eccleſiam
Dei, ſed ordine ſuo; ſicut in corpore bene ordinato, quale Corpus Chri-
ſti myſticum, ſeu Eccleſia eſt, diverſa membra diverſis præſunt officiis,
ſed omnia tamen ab uno, eoque ſupremo Capite dependentia. Presby-
teri in portionem aſſignati ſibi gregis regimen tenent, ſubordinatum tamen
ſuo Superiori, id eſt Episcopo, cui & ipſi obedire tenentur, a quo ipſo-
rum etiam poteſtas, etſi juris divini ſit, nec fixis a Chriſto limitibus cir-
cumſcripta, quoad actuale exercitium vel reſtringi, vel ampliari, vel
etiam concurrenter adjuvari, emendarive, atque ſuſpendi poteſt, prout
aut utilitas exigit, aut neceſſitas. Et hæc quidem eadem juſta propor-
tione dicta ſunt Episcopis, qui & ipſi clavibus Petri, ceu ſupremi Capitis;
& univerſalis in terra Chriſti Vicarii ſubjecti ſunt. Ita Eccleſia tam in
gregariis militibus ſuis, quam in ipſis Ducibus ſub uno ſupremo Imperan-
te bene ordinata eſt acies. Sicut in exercitu generatim Ducibus ſuprema
imperandi poteſtas eſt, ſingillatim autem uni omnium Principi; ita omni-
bus Apoſtolis generatim data eſt Eccleſiam regendi illimitata poteſtas;
quidquid ligaveritis, quidquid ſolveritis, ligatum ſit, ſolutumve: ſingulariter
vero ſoli Petro, omnium Apoſtolorum Principi, cui dictum eſt: *Quid-*
quid tu ligaveris, aut ſolveris, ligatum ſit, aut ſolutum. Itaque in omnibus
Apoſtolis illimitata poteſtas ſacra eſt, ſed non in ſingulis, præterquam in
ſolo Petro. Quodſi Petrum excipias, truncatum corpus Eccleſia eſt
absque capite, cui ſi membra reſiſtant, ſchiſma faciunt, ordinem a Chri-

B 3

ſto

*) Antiq. Chriſt. tom. 2. cap. 1. §. 2.

sto institutum turbant, & a capite se separando in proprium ruunt exitium. De membris quibusdam id dico, quæ capiti repugnant: numquam enim in omnibus, seu toto in corpore id continget ex divina promissione, quæ Ecclesiam inseparabiliter suo fundamento, quod Petrus est, conjunctam usque ad finem mundi stabilem conservabit. *Tu es Petrus, & super hanc Petram ædificabo Ecclesiam meam, & portæ inferi non prævalebunt adversus eam.* En manifestam, & infallibilem veræ Ecclesiæ notam pro perturbato schismatis tempore! *Verum est Christi corpus, quod cum Capite Petro conjunctum.*

§. 15.

Falsum autem insuper est illud inter seculi nostri Canonistas sac commune præjudicium, Episcopos nullo cum discrimine, sed eadem potestatis amplitudine Apostolorum esse Successores. Haud ita sane! Episcopi quidem *generatim* in Apostolici Corporis jura perpetuo duratura subintrarunt, non tamen *singuli* in jura singulorum. Hanc a Christo potestatem Apostoli singillatim acceperunt, ut cuilibet sua jurisdictio per orbem extenderetur uniuersum, id quod pro temporis illius circumstantiis necessarium fuerat mundo nondum ad fidem Christi converso, sed primum per paucos homines convertendo. Verum hæc apostolicæ Missionis pro toto orbe illimitata potestas in Ecclesiarum particularium, ubi semel erectæ erant, Rectores, seu Episcopos ab Apostolis constitutos jam tunc transfusa non fuit: Apostoli enim cum assignata gregis portione, sicque constricta jam regiminis potestate Episcopos instituerunt, uti S. Paulus suum discipulum Titum Cretæ reliquit, Tit. I. Etiam Apocal. I. legimus in septem Ecclesias Asiam fuisse divisam, & septem Episcopis, seu Angelis suum cuique candelabrum conceditum. Neque quoad *subiecta* tantum, verum etiam quoad *objecta* ab Apostolis restricta fuit particularium Pastorum, quos instituerant, potestas. Sic apud Corinthios disciplinam ordinare sibi ipsi Paulus reservaverat: *Cetera, cum venero, disponam*, 1. Cor. XI. Hinc falso laborant præjudicio, qui, ut illam Apostolorum, ita hanc Episcoporum jurisdictionem æque illimitatam esse sibi persuadent. Sua cuique Episcopo jurisdictionis portio primitus aut ab Apostolo quodam, aut prout nunc sunt Episcopi, a Petri Vicario, id est, Romano Pontifice fuit concessa. Illa igitur apostolicæ Missionis amplissima, atque illimitata jurisdictio neutiquam in Episcopos nostrōs transiit, quippe cum nulli jam illorum sint in Apostolatu successores.

res. Solius jam nunc apostolica Sedes hæc prærogativa est, ut cum eadem potestatis plenitudine Petrus adhuc in suo Vicario, seu Successore toti christiano orbi præsideat. *Tu es Petrus, & super hanc Petram ædificabo Ecclesiam meam, & tibi dabo claves regni caelorum.*

§. 16.

Non contemnenda est, etsi haud ita evidens sit, S. Matthæi cap. XVII narratio de didrachmate, quod Christus pro se tantum, & pro Petro solvit, quo facto privilegium Petri præ reliquis Apostolis præsignasse videtur. Dignum est, ut in hunc locum S. Joannis Chrysostomi expositionem audiamus *): „Humanum quidpiam passi discipuli sunt, quod & Evangelista significat, dicens: *In illa hora*, quando plus, quam ceteros omnes illum (Petrum Christum) honoraret. — Hinc pudore affecti animi sui commotionem confessi sunt, neque aperte dicunt, *cui Petrum nobis prætulisti? Num ille major nobis est? Non audebant enim; sed indefinite interrogant: Quis major est? Nam cum tres viderunt præferri ceteris, nihil simile passi sunt: cum autem unus tantum honorem tulit, tunc dolore sunt affecti.*“ Animadvertēbant igitur Apostoli magnum Petro honorem a Domino fuisse delatum, cum pro se, & solo Petro didrachma solvi jussisset, quasi jam appropinquante regno suo Petrum sui Vicarium designare voluisset. Hinc sine limitatione dici non potest, omnes Apostolos pari honore cum Petro fuisse a Christo honoratos.

§. 17.

Aliud insigne promissum præ reliquis Apostolis Petro, & quidem, ut cum schola loquar, *exclusive*, seu *soli* datum habetur Luc. XXII. Orta enim contentione inter Apostolos, *quis eorum videretur esse major*, optimus Salvator dominandi superbam ambitionem, quæ in illis erat, pro sua mansuetudine redarguens, non sic eos, uti mundi Principes, fastu scilicet externo, & cum tyrannide in regno suo dominaturos docuit, sed cum humilitate, & beneficentia, qua major debeat minori inservire, sui ipsius exemplo proposito, utpote qui illis ad mensam recumbentibus ministraverit. Etsi itaque fastuosum illum dominatum cum inani pompa, & tyrannidis horrore conjunctum Christus in suis discipulis reprobaverit; haud tamen omnem vel inter ipsos discipulos dominatum abstulit, sed potius in-

*) Homil. 58. in Matth.

insinuando confirmavit illi, qui ceteris dominaretur, humilem, & mi-
tem potestatis usum exemplo suo commendans: *Qui major est in vobis,
fiat sicut minor.* Porro Christus omnibus Apostolis propter fidelitatem
in tentationibus sibi præstitam in regno suo, quod disposuerat, primas
sedes promisit unacum judicandi alios potestate: *Sedebitis super thronos ju-
dicantes duodecim tribus Israel.* prævidens autem diaboli conatus, & vehe-
mentiam persecutionum, quæ vexandi essent Apostoli, ad unum Petrum
conversus, quem iterato nomine ad majorem sermonis energiam com-
pellat, quasi in hunc unum totius suæ erga omnes sollicitudinis onus ef-
fundens ait: *Simon! ecce Satanas expetivit vos, ut cribraret sicut triticum.*
Ita cum Apostolis omnibus, quas a dæmone experturi essent, tentatio-
nes prædixisset; illorum tamen insuperabilem stabilitatem in Petro fun-
dandam pollicitus est divinus Magister, sermonem cum Petro, veluti to-
tum cum eo negotium perficiens: *Ego autem rogavi pro te, ut non deficiat
fides tua.* Hæc Petri fides a Christo stabilita, quæ post lapsum suum num-
quam amplius defectura esset, ceu quædam petra est, qua ceterorum
omnium Apostolorum fides firma teneretur: *Et tu aliquando conversus con-
firma fratres tuos.*

§. 18.

Præclare in hunc locum noster Eckius commentatur *): „Arrige
„aures, quæso, sincere Lector! & perpende, quoniam aliis Apostolis
„præsentibus ad solum Petrum dixit Christus: *Rogavi pro te, ut non defi-
„ciat fides tua:* & hoc perpenso, quod alii Apostoli fuerunt præsentibus,
„statim invincibiliter concludes, Petrum primatum omnium habuisse,
„cui specialiter hoc dixit. Expendas, quæso, quod primo nominatim
„eum adpellat, *Simon!* quasi ex aliis eum vocando, & discretim allo-
„quendo, *Simon,* ait. Dein quod communem futuram prædixit eorum
„tentationem, *Satanas expetivit vos.* Dein tertio revertitur specialiter
„dicendo, *ego rogavi pro te,* non dixit *pro vobis:* & iterum, *ut non defi-
„ciat fides tua. Tua* dixit, non *vestra.* Et ne aliquid debitationis sub-
„esset, addit, *& tu* in præsentia aliorum Apostolorum. Et ut indubi-
„tatissime ab aliis esset distinctus, addit, *confirma fratres tuos,* qui erant
„discipuli, & Apostoli. Ac si apertissime diceret Christus: *Ego tui, tu
„aliorum curam habebas.*“ Si ergo Apostoli adhuc in Episcopis vivunt, si Petrus
adhuc in suo vivit Successore, vivit autem certe, eoquod fundamen-
tum

*) Contra Lutherum de Primatu Petri Lib. 1. cap. 45.

tum est Christi Ecclesiæ, quæ interire non potest; noverint Episcopi unicam suæ fidei firmitatem in Petri fide, seu Petra stabiliri; timeant ab hac alienari, secus fundamento destituenti, & instante diaboli tentatione haud perstituri, nisi a Petro confirmentur. Siquis tranquilla mente, & præjudicio, aut malevola adfectione non corrupta hunc S. Scripturæ locum apud se perpenderit; sane is de Sedis apostolicæ inerrantia, pro qua singulariter Christus Patrem rogavit, necessario convincetur. Inde etiam perspicitur, non *singulis* tantum Apostolis, sed *universis* omnibus congregatis Petrum fuisse præhabitu, pro quo solo, non pro reliquis perseverantiam in fide Christus a Patre non solum rogavit, sed quam certissime etiam impetravit. Denique ex eo apparet, quam necessaria sit singulorum Pastorum a Petro dependentia; a quo in arduis rebus, ne a dæmone in errorem inducantur, & a fide recta deficiant, illos confirmari necesse est. Nugas loquantur contra divini eloquii expressam veritatem, qui plenam Ecclesiæ suæ sollicitudinem cuilibet Episcopo attribuant, illam *concurrentem* Papæ, eamque superioris ordinis eversuri.

§. 19.

Christus, inquit, etiam omnibus Apostolis, eorumque Successoribus, id est, Episcopis suam promisit assistentiam, ne a fide aberrerent: *Ecce ego vobiscum sum omnibus diebus usque ad consummationem seculi.* Matth. XXVIII. Bene dicis id omnibus Apostolis fuisse promissum. At cogita, non *singulis*, sed *omnibus*; utique in universitate Petro, seu Capite incluso. Quod totius per communicationem privilegium est, id enim vero unius singularitati non derogat. Sic ipsa æterna Veritas totum hominis corpus *lucidum* dixit, etsi luminis sedes, seu oculus, in solo capite fixa sit. Igitur Pastores Ecclesiæ errare non possunt in corpore cum suo Capite, quod Petrus est, conjuncti, unde indefectibilis fides Christi precibus impetrata illis communicanda est. *Ego rogavi pro te, ut non deficiat fides tua, & tu confirma fratres tuos.*

§. 20.

Sunt inter hodiernos quidam, qui improvide contendunt, id privilegii scilicet indefectibilitatis in fide ita *soli* Petro fuisse promissum, ut in Successores non transierit. Hi improvide inquam in scyllam incidunt; dum vitare carybdin volunt; siquidem infirmo licet hoc effugio causam Episcoporum non meliorem faciunt, sed deteriorem. Si enim

vel ipsa adeo Apostolis, ne in fide deficerent; necessaria fuit à Petro dependentia, à quo in fidei firmitate tenerentur; quanto amplius sequioris ævi Episcopos nulla jam (sicut de Apostolis ab Ecclesia creditur, quorum singuli proprio Christi ore instructi, & Spiritu sancto perfusi, ac in gratia fuerant confirmati) quanto amplius Episcopos nullo jam *personalis* inerrantiæ privilegio præditos, ne a fide aberrant, supremo Ecclesiæ Capiti subesse oportebit? Si vel toti apostolico Corpori ita præpositus fuit Petrus, ut omnes, non singuli tantum ab eo debuerint confirmari, in quo uno *singulariter* inerrantiæ donum fuit collocatum; quis hodie non Episcoporum cætui amplio rem tribuat auctoritatem; aut fidei infallibilitatem? Verbo quis neget Petri Vicarium & Successorem id hodie adhuc supra omnes esse Episcopos, quod Petrus supra Apostolos fuit universos, eumque etiam in concilio *supremam* habere in omnes auctoritatem, & extra concilium in se ipso, cæu fidelium Christi Capite *fidei infallibilitatem*? Gallicana, inquires, Ecclesia id negat. Neget pace mea, sed quisquis neget, contra divini eloquii veritatem negat. Tantum tolerata est, seu nondum ecclesiastico fulmine condemnata hæc opinio, ab ipsis Gallis solidissime jam impugnata, atque etiam confutata. Heu quam miserum solatium *tolerant*, nondum *condemnati*! Sancta, & optima Mater Ecclesia non vult infligere vulnera, nisi ex necessitate.

ARTICULUS II.

Christi collatio.

§. I.

Sed & promissis suis fideliter stetit veracissimus, quippe divinus Ecclesiæ fundator, Deus-homo, Jesus Christus. Cum enim optimus Pastor, qui animam suam pro suis ovibus tradiderat, a morte redivivus jam tertio Apostolis se manifestasset; Simonem, quem antea Petrum vocaverat, interrogavit, num aliis discipulis, quos ad litus properando fide prævenerat, etiam caritate erga se præcelleret. *Simon, Joannis diligis me plus his?* Joan. XXI. Petro amorem suum ex ipsius divini Magistri scientia contestante: *Domine! tu scis, quia amo te*, eidem pascendos suos agnos tradidit: *Pasce agnos meos.* Hæc quæstione repetita Christus idem respondenti Petro pascendos agnos iterato commisit. Cum autem tertio Christus eadem quæstione instaret; tum vero contristatus est

est Petrus; haud dubie in memoriam revocans trinam Magistri sui negationem post illam fidei praesumptionem; qua omnes alios sibi postposuerat: *Si omnes scandalizati fuerint in te, ego nunquam scandalizaber.* Ergo jam in se diffidens; nec amoris prerogativam praeter ceteris sibi arrogans; communi doloris omniscio Magistro sui amoris conscientiam resignat: *Domine! tu opinia nesci, tu scis, quia amo te.* Christus vero nunc jam tertio totum gregem suum Petro pascendum committit; *pasce oves meas*; ita discipuli hujus ampliore praeter reliquis caritatem remunerans; universi gregis Pastorem instituendo; sicut antea sublimiorem praeter aliis fidei remuneratus, eundem totius Ecclesiae fundamentum constituendo. Quae duae sunt supremi Pastoris praecipuae dotes; excellior fides, & uberior caritas, eas in Petro ambas videmus, hinc Petrum supremo Pastore totius gregis donatum.

§. 2.

Certum est usque adeo, ut evidens sit soli, & ut ajunt, *indiviso* Petro cum aliorum omnium exclusione id officii, *Pastoris universalis* fuisse commissum, utpote quem solum in praesentia aliorum Apostolorum rigoroso adeo examine Christus probaverat, an praeter reliquis se plus diligeret: *Diligis me plus his?* & ait Petro, *pasce agnos meos, pasce oves meas.* Haec immediata & universalis Christi missio est soli Petro propria, nec alteri cuicunque Apostolo; nec universo Apostolorum collegio communis, nisi ut sub Petro & ipsi pascant. Non *suprema* tantum haec jurisdictionis potestas est, sed & *universalis*, quippe in totum gregem. Nullus hic distinctioni scholasticae locus in jurisdictionem *immediatam*, & *mediatam*: una enim Christi voce totus grex pascendus Petro immediate fuit traditus: *Pasce agnos meos, pasce oves meas.* Non pastores magis, quam grex, non minus agni, quam oves, sed & matres, & filiae, id est, fideles singuli, & universi uni Pastori omnium, Petro fuerunt & immediate quidem a Christo subiecti. Deus locutus est, si caelum, & terra praetereant, haec filii Dei verba non praeterebunt: *Pasce agnos meos, pasce oves meas.* Sileant ranæ, dum caelum tonat!

§. 3.

Ita Patres nostri crediderunt, hoc eodem sensu textum Joannis XXI. intellexerunt, quo sensu Catholicos oportet S. Scripturam interpretari. Origenes nullo facto discrimine inter agnos, & oves ita pronun-

ciat. *) : „Petrò cum summa rerum de pascendis ovibus traderetur, & supra ipsum velut petram fundaretur Ecclesia; nullius confessio alterius virtutis ab eo, nisi caritatis exigitur.“ S. Chrysostomus de Petro ait **): „Sic abluit illam abnegationem, ut primus Apostolorum factus sit, et que totus terrarum orbis commissus fuerit.“ S. Epiphanius totum Christi ovile Petro fuisse creditum testatur *3): „Hic est, qui audivit, pascite agnos meos, cui creditum est ovile.“ S. Ambrosius Petrum vocat propter præcipui amoris sui confessionem ipsius summi Pastoris, Christi Vicarium *4): „Quem elevatus in cælum amoris sui Vicarium, relinquebat, — quia solus proficitur, ex omnibus antefertur.“ S. Augustinus ita loquitur *5): „Quid incongruum, si Petrus post peccatum factus est Pastor Ecclesiæ, sicut Moyses post percussam Aegyptum factus est Rector Synagogæ? An Moyses forte non nisi *mediatim* in populum habuit jurisdictionem? aut minus forte, quam Moyses in Synagogam, Petrus in Ecclesiam potuit, cui voce dominica æque ac illi totus grex fuit concreditus? S. Leo M. hæc scribit *6): „De toto mundo unus Petrus eligitur, qui & universarum gentium vocationi, & omnibus Apostolis, cunctisque Ecclesiæ Patribus præponetur, ut, quamvis in populo Dei multi Sacerdotes sint, multique Pastores, omnes tamen *proprie* regat Petrus, quos principaliter regit & Christus.“ Theophilactus ait *7): „Finito prandio præfecturam ovium totius mundi Petro commendabat, non autem aliis, sed huic tradidit.“ S. Eucherius Lugdunensis in l. c. sic commentatur *8): „Dicit ei Jesus, *pascite oves meas*, prius agnos, deinde oves commisit ei, quia non solum Pastorem, sed Pastorum Pastorem eum constituit. Pastorem igitur Petrus agnos, pascit & oves, pascit filios, pascit & matres, regit subditos, regit & Prælatos. Omnium igitur Pastor est, quia præter agnos, & oves in Ecclesia nihil est.“ S. Gregorius M. eum de re omnibus fidelibus explorata scribit *9): „Cunctis Evangelium scientibus liquet, quod beatissimo omnium Apostolorum Principi Petro dominica voce *totius* Ecclesiæ cura commissâ est.“ Demum S. Bernardus agmen claudat illa Christi verba expendens, *pascite oves meas* *10): „Cui, non dico, Episcoporum, sed etiam Apostolorum sic *absoluite*, &

in-

*) In cap. 6. epist. ad Rom. **) Orat. 8. advers. Judæos. ***) In Ancorat.
 *) In cap. ult. Lucæ. **) Contra Faustum lib. 22, cap. 70.
 *) Serm. 3. de assumptione sua ad Pontific. *) In cap. ult. Joan.
 *) Serm. in vigili. SS. Apost. *) Lib. 4. epist. 32.
 *) De consid. l. 2, c. 8.

„Indiscrète totæ commissæ sunt oves? Si me amas, Petre! pascere oves
 „meas. Quas? illius, vel illius populos civitatis, aut regionis, aut
 „certi regni? oves meas inquit. Cui non platum, non designasse al-
 „quas, sed assignasse omnes? Nihil excipitur, ubi distinguitur nihil.“
 Quis ergo fidelium audeat exceptionem, distinctionem, restrictionem
 facere, ubi Christus nihil exceptit, nihil distinxit, nihil restrinxit, sed
 totum quantum gregem immediata, & illimitata potestate Petro pas-
 cendum dedit: *Pasce agnos meos, pascere oves meas?* Sicut unus grex Christi,
 ita Petrus totius gregis unus Pastor, sub quo plures quidem divisarum
 inter se portionum Pastores sunt, iique vel superioris Ordinis, vel in-
 ferioris, quorum illos nunc Episcopos, hos vero Presbyteros vocamus;
 quibus omnibus a Petro illud dictum est: *Pascite, qui in vobis est, gre-
 gem Dei.* 1. Pet. V. Hæc optimi Pastoris, Christi optima institutio est,
 qua per unum, & universalem sui Vicarium totum ovile, id est, una-
 cum ovibus ipsos etiam Pastores regit, & gubernat. Væ Pastoribus,
 qui subordinationis a Christo institutæ everso ordine non jam ad Chri-
 stum, sed ad se tantum oviculas trahunt! de his M. Augustinus scri-
 bit *) „Qui hoc animo pascunt oves Christi, ut suas velint esse, non
 „Christi, se convincuntur amare, non Christum, vel gloriandi, vel
 „acquirendi cupiditate, non obediendi, & subveniendi, & Deo placen-
 „di caritate.

§. 4.

Insanit recentior quidam anonymus Scriptor**), qui novam sanè,
 & inauditam verbis Christi, *pascere oves meas*, affinxit expositionem. Verba
 illa non vult de omnibus ubique terrarum gentibus, quæ fidem christia-
 nam amplecterentur, sed de solis Judæis, ad quos missus erat Messias,
 intelligenda. Movetur autem I. ex eo, quod ipse Christus dixit
 Matth. XV. 24. *Non sum missus nisi ad oves, quæ perierunt, domus Israel.*
 Idcirco tantum Judæos suas oves vocat inquit Joan. X. 14: *Ego sum*
Paster bonus, & cognosco oves meas, & cognoscunt me mea. Ergo oves,
 quas Christus Petro pasceñas tradidit, non nisi Judæi fuerant. II. Idem
 probatur ex præcepto paullo posteriori, quod Christus omnibus Aposto-
 lis,

C 3

*) In Joan. Tract. 123.

**) De Primatu Rom. Pontificis. Opus, cujus Scopus est demonstrare primatum
 Rom. Episcopi inter alios Episcopos nullum, nisi honorificum esse, nec divi-
 num, nec jurisdictionis, Londini 1770.

his, consequenter & Petro dedit, ut irent, docerent omnes gentes, his, quæ Evangelium prædicarent. Ut quid idem mandatum paucos ante dies Petro decesset, si oves ejus alii quoque fuissent, quam Judæi? Ergo solos Judæos voluit Christus Petro commendare his verbis: *pascere oves meas.* III. Ab Apostolo Paulo discimus Judæorum Apostolum modo speciali fuisse Petrum, sicut & ipse Gentilium fuerat; ita enim scribit Galat. II. 8: *Qui operatus est Petro in Apostolatam circumcissionis, operatus est & mihi inter Gentes.* Item vers. super. *Creditum est mihi Evangelium præputii, sicut & Petro circumcissionis.* Ergo Petrus tantummodo pascendarum ovium domus Israel peculiare mandatum a Christo acceperat hisce verbis: *pascere oves meas.*

§. 5.

Hæc quidem scriptor ille, si fides titulo libri est, Anglus, cujus infantiam doctus. Lupoli Juris ecclesiastici Professor Neapolitanus solidissime jam refutavit *), & quidem ad id: Christus ovium suarum nomine non unam certe Hebræorum gentem, quam Evangelio imbuendam suscepit, designavit: siquidem Hebræos Evangelium audientes, sed minime credentes ex numero esse suarum ovium negavit. Joan. X. 26. *Sed vos non creditis, quia non estis ex ovibus meis.* Contra vero Gentiles per orbem dispersos, nondum quidem audientes, sed postmodum tamen ad fidem convertendos, oves nihilominus suas esse affirmavit ibidem V. 16: *Et alias oves habeo, quæ non sunt ex hoc ovili: & illas oportet me adducere, & vocem meam audient, & fiet unum ovile, & unus Pastor.* Erant igitur oves ejus propriæ non solum Judæi, quibus primum lux Evangelii splendebat, sed omnes etiam illi ex gentibus, qui Evangelium audirent, & amplecterentur. Equidem Christus dixerat se non esse missum, nisi ad oves, quæ perierant ex domo Israel, salvandas, quo suam erga Judæos prædilectionem, eorumque prærogativam, utpote quibus ipse propria voce sua prædicaverat, volebat ostendere; attamen istorum quoque rejectionem propter incredulitatem, & gentilium ad fidem electionem prædixit, quos oves suas pariter vocavit, sed alias, quæ non sunt ex hoc ovili, sed tamen ad illud adhuc adducendas. Ita Dominus Chananaeam mulierem pro filia rogantem primum quidem durius allocutus est, quasi a sua gratia exclusam, postea tamen propter fidem suam eidem gratiam valitudinis suæ filiæ contulit: quo ostendit non sanguine, sed fide filios Abraham,

*) Juris ecclesiastici Praelectiones. Neapoli 1777.

raha, & jam Christi oves constituit. Bonus ille Pastor, Christus animam suam dedit pro ovibus suis, non certe pro Judæis tantum, sed pro quibuscumque in mundo fidelibus sanguine suo redemptis, ex quibus omnibus unum fecit ovile, cui unum Pastorem præfuit, PETRUM.

§. 6.

Ad II^{um} Christus, dum Joan. XXI pascendas suas oves Petro tradidit, eundem omnium suorum fidelium Pastorem instituit; quinam autem essent ad fidem vocandi, ibi quidem non declaravit: hinc non superflue factum, ut postea omnibus Apostolis unacum Petro dixerit, gentibus quoque Evangelium esse prædicandum. Quæ duæ sunt planè diversæ res, & non immerito diversis in locis, atque ad diversas personas a Christo dictæ, primum scilicet illud ad solum Petrum, in quo duplex persona sensu morali omnino distinguenda est, altera qua simplex Apostolus, cui cum ceteris dictum est, *entes docete omnes gentes*: altera qua Choripheus Apostolorum, & supremus omnium fidelium Pastor, cui singulariter, & soli dictum est: *Pasce oves meas*. Ceterum, quod Judæa tantum sit Petro singulariter a Christo commendata, id oppido falsum est, nam S. Jacobus, quoad vixit, Hierosolymorum fuit Antistes, & omnes Apostoli, antequam se ad gentes verterent, solis Judææ finibus se continebant, & Petrus ipse, ut mox videbimus, primus ad gentiles Evangelium deportavit.

§. 7.

Ad III^{um} singulis Apostolis tamquam Doctoribus omnium indiscriminatum nationum, quocumque terrarum Evangelium ferre, ubique gentium Ecclesias condere, & Episcopos creare jure licebat: siquidem cum tradita Apostolarum dignitate muneris quoque Apostolici potestas tradita divinitus fuerat. Quod autem certi quidam Apostoli ad unam potius, quam aliam gentem migraverint, uno, aut altero loco diutius subsisterint, id non nisi ipsorum consilio factum est, movente quidem interno Dei spiritu, sed monente etiam ipsa populorum necessitate. Quam ob rem Paulo, & Barnaba ad Apostolatam eveclis conventio quædam inter Apostolos inita fuit, ut ambo illi præcipue ad gentes convertendâs proficiscerentur; Jacobus autem, Cephas & Joannes salutis circumcisorum potissimum providerent. Ita ipse S. Paulus Gal. II, 9. *Cum cognovissent gratiam, quæ data est mihi, Jacobus & Cephas, & Joannes*

nes,

nes, qui videbantur columnæ esse, dexteræ dederunt mihi, & Barnabæ societas, ut nos in gentes, ipsi autem in circumcissionem. Id vero minime prohibuit, quo minus Paulus etiam Judæis prædicaret, & Petrus Gentibus, præsertim cum Judæi evangelicæ gratia fere jam indignos se fecissent. Hinc Petrus ipse testatur se ad omnes gentes Evangelii præconem esse divinitus missum Act. XV, 7. *Viri fratres! vos scitis, quoniam ab antiquis diebus Deus in nobis elegit, per os meum audire Gentes verbum Evangelii, & credere.* Frustra igitur, & contra divinæ Scripturæ veritatem monstruose contorquentur verba: *Pasce oves meas*, quasi iis cura duntaxat Hebræorum Petro demandaretur. Nec vero quidquam contrarii eruitur ex alatis Pauli testimoniis: ibi enim non asserit Apostolus, se jure privative ad ministerium Gentium, & Petrum ad Hebræorum esse deputatum, sed totus in eo est Paulus, ut Galatis persuadeat, se quoque verum esse Christi Apostolum ceteris hoc in munere æqualem, signis divinis comprobatum, & a Petro omnium Apostolorum Principe confirmatum, proinde æque ac aliis apostolis sibi credendum tanquam gentium Apostolo, quem ad modum a circumcisis credebatur Petro, quibus hic præcipue prædicabat. Galatæ quippe ab evangelica doctrina, quam a Paulo hauserant, se facile abduci sinebant, coquod minus in eo autoritatis esse putabant, qui non sicut ceteri Apostoli ex ipso ore cælestis Magistri Evangelium acceperat. Ad Petrum vero ut revertamur, proprio ipsius testimonio edocemur, se esse præ reliquis Apostolis a Deo electum, ut per os ipsius Gentes Evangelium audirent, & crederent. Atque hinc Romam inter Gentes profectus Gentilium Ecclesiæ factus est fundator, in qua hodie dum per suum Vicarium, & Successorem præsidet. Ita videmus verba Christi compleri: *Pasce oves meas.* Apud eundem Neapolitanum Doctorem Lupoli invenies etiam Claudium Salmasium, Isaac Casaubonum, Joannem Prideaux, & Benedictum Pictetum, nec non Calvinum egregie vapulantes *).

§. 8.

Quid vero jam Febronius, quid tota cohors Febronianorum? Et ipsi ad sacram Scripturam provocant, quasi hæc sibimet contraria foret, & quam Petro prærogativam magno verborum apparatu attribuit, eandem alio in loco iterum destrueret. Itaque non soli Petro, sed & reliquis Apostolis, eorumque successoribus, scilicet Episcopis sacræ potestatis

*) Jur. eccles. Prælect. Tom. 1. cap. 4. §. 4. &c.

statis plenitudinem in suos subditos jurē divino concessam fuisse ex textu S. Joan. XX. persuadere conantur: *Sicut misit me Pater, & ego mitto vos — accipite Spiritum sanctum, quorum remisistis peccata, remittuntur eis, & quorum retinueritis, retenta sunt.* Textu hoc mirum, quantum gloriantur, sibi que applaudunt recentiores quidam *), sed responderi facillime æque, ac solidissime potest, textum illum plane extra oleas versari. Christus enim ubi ait, Apostolos a se mitti, sicut ipse a Patre missus est, non illam Apostolorum *inter se* Authoritatem, quam Matth. XVI & iterum Joan. XXI indicavit, sed *suam* propriam, eamque divinam Authoritatem præ oculis habuit, indicans, sicut ipse a Patre Deo missus est, ita Apostolos quoque a se divina Authoritate ablegari. Cum itaque, ut Patres intelligunt, Christus hoc loco Apostolos tanquam Legatos suos, & Vicarios instituit, *absolute* quidem apostolicæ missionis divinitas inde erui potest, neutiquam vero *relative* Apostolorum inter se æqualis, & æque ampla jurisdictio regiminis, de qua ibi omnino non fuit sermo. Accedit eandem divinam missionem a quolibet Ecclesiæ catholicæ Missionario, etiam si simplici Presbytero continua inde ab Apostolis successione, in apostolica Sede conservata, hæreditari; quis tamen sana mente concludat, propter hanc apostolicæ missionis dignitatem cuilibet Presbytero utpote Christi Legato, & Vicario plenitudinem jurisditionis in plebem suam competere? Certe ibidem Christus Dominus non *præcise* regiminis ecclesiastici formam, seu Regentium inter se relativam Authoritatem, sed *generativam* Ordinis sacerdotalis divinam potestatem instituit: atque hoc sensu ipsa sancta Mater, catholica Ecclesia textum Joan. XX intelligit, dum quemlibet, licet simplicem Presbyterum in Apostolorum successorem his ipsis Christi verbis ordinat: *Accipe Spiritum sanctum, quorum remisistis peccata, remittuntur eis.* His inquam verbis, quibus Ordinis potestas, seu interna in conscientias jurisdictio potius, quam illa *externa* regiminis significari videtur, non soli Episcopi, sed omnes etiam Presbyteri Apostolorum successores, Christique Vicarii constituuntur. Anne vero hi æque, ac illi cum plenitudine potestatis seu sine *restrictione*, & subjectione erga Superiorem? Apage!

*) e. g. Der Verfasser der kurzen Beleuchtung der Embserpunktion. 1787.

Hinc colligere licet, quid de prima positione Emblianæ Punctationis sit: „Christus sanctæ Ecclesiæ nostræ fundator Apostolis, eorumque successoribus, Episcopis *illimitatam* dedit potestatem ligandi, solvendive pro omnibus illis casibus, ubicunque id necessitas, vel utilitas Ecclesiarum, aut fidelium ad illas pertinentium exigat.“ Quæro in primis ex DD. Punctatoribus, quare solos Episcopos Apostolorum Successores nominarint omissis Presbyteris, quos certum est, pariter esse vi Ordinis quoad potestatem conscientias ligandi, solvendive, eamque *illimitatam*, prout est a Christo data, Apostolorum successores. Nonne hodie hęc eadem *illimitata* in conscientias potestas in ipsa Ordinatione cuilibet Presbytero ab Ecclesia datur? Quid ergo? Nonne sacerdotalis potestas, etsi *institutione* sua *illimitata*, *usu* tamen suo, & *exercitio* subordinata est superiori Potestati, a qua restringi possit, & limitari, aut tota suspendi? Nonne in Ecclesia, quæ bene, immo optime a Deo homine ordinata est, datur potestatum subordinatio? Dicant, quoniam ex fundamento plenitudo potestatis, & independentia a Superiore quoad *usum* sit potius in Episcopis, quam Presbyteris, cum *quoad institutionem* his æque, ac illis potestas sua *illimitata* a Deo sit concessa? Ah iterum dico, væ Episcopis, væ sanctæ Hierarchiæ, si quæ arma illi adversus Papam adhibent, eadem Presbyteri in Episcopos convertant!

Deinde vero superfluum est, quod de casu necessitatis dicunt: notum enim est omnibus, in necessitate, sed *vera*, nullam dari spirituales potestatis restrictionem, sed *illimitatam*, prout divinitus instituta est, potestatem exerceri posse, sicut ab Episcopis, ita & a Presbyteris. Hinc in casu necessitatis a quibuscunque peccatis absolvens potest, quilibet, simplex licet, sacerdos, cui jurisdictio Ordinis ab Episcopo restricta, aut plane suspensa est. Reverentia tamen Superiori debita videtur exigere, ut eidem extraordinarium, & suo modo irregulare, quippe contra Ecclesiæ regulas, hujus generis factum ab inferiore cum quadam excusationis specie notificetur; ita non curatus sacerdos, qui in casu necessitatis absolvit, summe laudabiliter coram Superiore suo, seu Episcopo hac super se sese purgabit. Plura æquus Lector sibi cogitet. — Ilud vero, quod de utilitate Ecclesiarum, vel etiam fidelium particularem asseritur, plerumque falsum est, nisi forte manifesta, & urgens sit utilitas, adeo, ut verius necessitas videatur: constat quippe *commu-*
nem

non utilitatem, quæ obedientia obtinetur, particulari utilitati esse præponendam; minus enim bonum cedere majori debet. Præterea si quod oriatur dubium, quid veræ utilitatis sit, a Superiore potius, quam ab inferiore, qui forsitan obedire nolit, definiendum est. Sic certe æquo animo haud ferrent Episcopi, si utilitatis prætextu ab obedientia Presbyteri se eximerent, & potestate sibi restricta, suspensione uti vellent. Viden, mi hope! quam diversa, partim quidem vera, partim autem falsa, prout sit, a male causæ defensoribus, in illa Emblematica prima Propositione fuerint commixta?

§. IO.

At inquit, ipsa adeo Ecclesia *supremam* Episcoporum potestatem, seu *plenitudinem* jurisdictionis agnovit, dum in fidei definitione *) de Hierarchia divinitus instituta primo omnium loco Episcopos, non Papam, secundo Presbyteros, & demum ultimo Diaconos, seu Ministros reposuit. Hæc, siqua videri possit, difficultas, mox dispārebit Concilii Tridentini caput 4^{um} Sessionis 23 legenti: manifeste siquidem elucet factam fidei definitionem tantum de potestate Sacramenti Ordinis contra Hæreticos, qui Christianos promiscue novi Testamenti Sacerdotes esse, & omnes pari inter se potestate spirituali præditos affirmarunt. Idem vel ipse canonum titulus indicat, de *Sacramento Ordinis*. Itaque de gradibus hierarchici Ordinis ex Sacramento Ordinationis loquens sacrosancta Synodus merito Episcopos primo, summæque gradu reponit, quia Papa ratione Ordinationis suæ *sacramentalis* non aliam accipit, quam *episcopalem* potestatem. Attamen id nullatenus obstat, quò minus ratione Episcopatus sui *Romani*, seu quod idem est, successione in S. Petri locum ampliorem, eamque supremam regiminis ecclesiastici potestatem Papa *immediate* a Deo vi Privilegii Petro, ejusque Successoribus dati, et si non *mediate* Sacramento obtineat.

§. II.

Denique contra episcopalis jurisdictionis restrictionem a Papis factam conqueruntur, eo quod hujusmodi restrictionis nulla in S. Scripturis exempla occurrant. Ego vero vel ex ipsis S. Scripturæ exemplis ostendam, ne ab initio quidem penes particularium Ecclesiarum Episcopos, et si vi ordinationis suæ *illimitatam* ligandi, solvendique potestatem

*) Conc. Trid. Sess. 23. can. 6.

æque, ac Apostoli acceperint; plenum fuisse, & independens sine *concurrente* Apostolorum jurisdictione exercitium suæ potestatis. Ita haud dubie S. Paulus, aut forte Petrus, sicut aliis in locis ab Apostolis factum, Corinthi Episcopum instituerat *); nihilominus incestuosus ille 1. Cor. V. non a proprio Episcopo; sed a Paulo excommunicationis sententiam tulit, & 2. Cor. II. a Paulo, non a proprio Episcopo indulgentiam nactus est. Idem Apostolus ne modum quidem cæremoniarum, & liturgiæ ordinem Corinthiorum Episcopo disponendum permisit, sed sibi reservavit. 1. Cor. XI. Quod Paulus fecit, num facere hujusmodi data occasione Petrus non potuit, cui claves regni cælorum singulariter traditæ, cujus curæ universæ oves fuerunt a Christo commissæ? Num Paulus jura violavit episcopalia, quæ vi divinæ institutionis sunt *illimitata*? Num *concurrente* sua jurisdictione, & episcopali restrictione ordinem evertit hierarchicum? At vero, amplior Episcopis post mortem Apostolorum tamquam illorum Successoribus potestas accessit? Id mihi quo argumento probaveris? Neque enim Episcopi nostri in Apostolatu *universali*, sed tantum in portione gregis sui *particulari* sunt Apostolorum Successores. Solius Romanæ Sedis hæc est prærogativa per continuam inde a Petro Apostolorum Principe successionem in *apostolica* potestatis plenitudinem intrasse.

§. 12.

Saltem, inquires, nullibi legitur Apostolorum potestatem fuisse a Petro restrictam. Quid hac objectionem velis, non video, nisi velis, ut ostendatur S. Petrum suprema sua regiminis potestate fuisse abusum, quod æque absurdum est fingere, ac illud, Apostolos Spiritu S. plenos officio suo defuisse, & restrictione, vel etiam suspensione indignis. Enimvero abusus potestatis, prudente quocumque homine, ne dicam Petro, indignus fuisset illo tempore Apostolorum ad gentes convertendas peregrinationis, Ecclesiæ in dissitis regionibus plantationis, & sævientis Tyrannorum persecutionis apostolicam restringere jurisdictionem, quam pro ipsa temporis necessitate oportuit esse amplissimam. Tunc vero a *non usu* potestatis ad ejusdem carentiam concludes? extensam per orbem universum jurisdictionem sicut singulis Apostolis, ita cuilibet in singulari ex nostris Episcopis tribues? æque parum hos, atque illos ad præcaven-

dos

(*) S. Hieronymus, & Theodoretus existimant primum Corinthi Episcopum fuisse Apollinem.

dos potestatis abusus correptione, aut restrictione indigos declarabis? disciplinam regiminis non aliam nostris temporibus, quam illis primævis esse debere judicabis? — Presbyteri non curati, seu simplices, id est, quibus jurisdictio ordinis sui, & *illimitata* quidem in animas, ab Episcopo restricta est, aut suspensa, in prima antiquitate nulli inveniuntur; num audebis asserere, Episcopos posterioris ævi in Presbyteris illam divinæ institutionis potestatem restringere, aut impedire non potuisse? Paritas rationis quid dicat, attende. Ceterum quali Petrus honoris, & potestatis prærogativa etiam actuali in exercitio gavisus fuerit, jam nunc indagabimus.

ARTICULUS III.

Petri Exercitium.

§. I.

Quotquot nullum Petro præ reliquis Apostolis aut honoris, aut potestatis fuisse privilegium contendunt, eos sane, si novi Testamenti scripturas vel a limine salutarint, ad lucem splendidissimam non sine visibimet oculos occludere dicendum est: præter clarissima enim, quæ jam adduximus, Christi Domini testimonia Ss. Scriptores seu in Evangeliiis, seu in Actis, Epistolisque apostolicis constanter, & singulari quidem cum distinctione Petrum præcipuo loco nominant. Ita Mathæus IV, 18. XIV, 28. XV, 15. XVII, 1 & 23. XVIII, 21. XIX, 27. XXVI, 37, 40. Marcus III, 16. VIII, 29. IX, 1. XIV, 33, 37. XVI, 7. Lucas VI, 14. VIII, 45, 51. IX, 20, 28, 32. XII, 41. XVIII, 28. XXIV, 12. Joannes I, 42. XII, 6. XX, 2. XXI, 2. Acta Apostolorum I, 13. II, 14, 37. III, 1. IV, 8. V, 3. VIII, 14. IX, 32. X, 2. XI, 2. Denique S. Paulus Gal. I, 18. Immo & Gal. II, 9, ubi in medio Jacobum inter, & Joannem (nisi forsitan honoris loco) Kephas nominatur, haud levibus argumentis doctus. Mamachius defendit*), antiquis in Codicibus, quibus usi sunt Chrysostomus, Ambrosiaster, Hieronymus, & Augustinus, Petrum in primo loco fuisse positum: Ipsa antiqua Versio itala, ut observat Petrus Sabatier**), sic habebat: *Cum cognovissent gratiam, quæ data est mihi, Petrus, & Jacobus, & Joannes, qui videbantur columnæ esse.* In pervetusto quoque Alexandrino

D 3

*) Origin. & antiquit. Christ. tom. 5, pag. 101, Romæ 1755.

**) Bibl. sac. lat. vers. antiq. tom. 3 edit. Rhemenf. 1743.

drino Codice, eoque celeberrimo Petrus ante Jacobum legitur, ut in hunc locum eruditiss. Grotius testatur. Tam accurate observata distinctione Petri ab aliis Apostolis certe aliquid significare voluerunt SS. Evangelistæ, non utique ut pro mundi more Petro vani honoris officium exhiberent, a quo vanitatis sensu toti erant alieni, sed ut ampliorum in Petro, seu Apostolorum Principe Authoritatem sacram darent observandam. Neque vero primum a me excogitata hæc est, sed Patrum traditione firmata ratio, id quod ex Chrysostomi, Epiphani, Augustini, & Ambrosiastri testimoniis laudatus Mamachius ostendit.

§. 2.

Sed quod amplius ad rem pertinet, an, & quomodo Petrus præ reliquis Apostolis sacræ potestatis eminentia fuerit, discipiendum est. Præmonere autem denuo velim, quod quis illæ Ecclesie incunabula pacato animo considerans facile per se ipsum animadvertat, generali, & illimitata institutione a Christo acceptam Petri jurisdictionem non sese totam exerere pro singulis casibus potuisse, quippe qui tunc tempora nondum contigere. Hinc cum Apostoli ab ipso Christo in mundum universum emissi, & singulari Providentia ab errore custoditi officio suo nulla ex parte deciderent, nec Petro sua in illos Authoritas ad destruendum, sed ad ædificandum, non ad temeri abusum voluntatem, sed ad boni usus utilitatem esset data; hinc locus esse non poterat ulli apostolicæ Missionis restrictioni, aut suspensioni. Enimvero singularia hæc Apostolorum privilegia in nostros Episcopos haud amplius quadrant, hi siquidem illis non in apostolicæ Missionis amplitudine, sed tantum in particularis cujusdam Ecclesie restrictio, & prout ratio unitatis exigit, subordinato Pastoratu succedunt, quales inde jam ab initio fuerant Episcopi ab Apostolis pro certis tantummodo locis, & quidem cum potestatis restrictione instituti, utpote quibus nec disciplinam suo arbitratu ordinare per S. Paulum licuerit: *Cetera, cum venero, disponam.* Cor. XI, 34. Meminerint hodierni Episcoporum contra Ecclesie Caput advocati, & nunquam obliviscantur, nullos in Apostolatu ample sumto, seu cum universalis jurisdictionis amplitudine, sed tantum in particularum Ecclesiarum Episcopatu Successores ab Apostolis fuisse relictos. Quis enim Andree, ut universalis Apostoli, quis Jacobi Successor est, aut unquam fuit, nisi in sola, & particulari e.g. Hierosolymæ Ecclesia? Falsum est ergo plurimorum hodie præjudicium, in quod etiam non

ita

ita pridem Scriptor quidam Spirensis *) incidit, episcopalem potestatem, divina institutione sua, sicut generaliter sacerdotalis est, illimitatam etiam intuitu cujusque *Diaceſeos* quasi illimitatam posse considerari. Licet enim Episcopi in corpore Apostolorum choro succedant, *Singuli* tamen Episcopi haud quaquam singulis succedunt Apostolis in illorum illimitata potestate, sed particularium Episcoporum potestas semper jam inde ab initio quoad actuale jurisdictionis exercitium erat constricta, id quod Ecclesiae suae dispositioni Christus reliquit, qui tantum generaliter Sacerdotii potestatem tunc temporis adhuc vagam, & indeterminatam, seu illimitatam instituit.

Unica est autem apostolica Sedes, illa Petri, in qua hereditario jure Clavium suprema, & illimitata potestas eadem cum amplitudine, seu potius plenitudine a Petro non interrupta serie ad hodiernum usque illius Successorem transfusa est. Atque hoc non casu aliquo, non solum humana conventionē, sed divino plane consilio factum, ut propagata semel per Apostolos fide, & institutis gregum particularium, Pastoribus totius Ecclesiae perpetuo duratura unitas cum suo universali Capite in melius conservaretur; decuit enim optimum Pastorem, qui Christus est, ut gregis sui unitati *optimo modo* consulere, qui voluit unum fieri ovile, & unum hujus Pastorem: *fiat unum ovile, & unus Pastor.*

§. 3.

Unus ille totius domici gregis Pastor, Christi quae post suum ex hac terra discessum generalis, & universalis Vicarius fuit Kephas, seu Petrus. Is quidem ab humilitatis Magistro non nisi humiliter de se sentiente, omniumque, quibus praesset, servus fieri didicerat, quam longissime ab illo sibi, omnibusque Apostolis prohibito factus, & superbiae dominatu remotus; nihilominus tamen, utut summa animi modestia, & simplicitate, prout res ipsa, & tempus exposerent, quanta pra reliquis Apostolis sacra potestatis Auctoritate praestaret, & dictis ostendit, & factis. Etsi pauca admodum supersint eorum, quae Petrus gessit, monumenta potissimum in Actis Apostolorum contenta; si tamen vel illa attentius pensitemus, sufficientia nobis eminentiae, quae in Petro erat tanquam Apostolorum Principe, argumenta praebunt. Ut rem ordine persiciamus, a primo Actorum capite initium esto.

§. 4.

*) Dissert. in fasc. 3 ad conc. Nat. Germ. integ. pag. 264.

§. 4.

Cum Domino in cælum assumpto unanimiter discipuli unacum mulieribus in oratione perseverassent, præ reliquis a Deo inspiratus surrexit in medio fratrum Petrus, abs dubio sui memor, cui Dominus dixit, *tu aliquando conversus confirma fratres tuos, & viris simul centum viginti congregatis grave, quod incumberet, negotium NB. non pro consilio, sed definitiva, quod Capituli est, sententia enunciavit, inquit: Oportet impleri Scripturam, quam prædixit Spiritus sanctus per os David de Juda, qui fuit dux eorum, qui comprehenderent Jesum. — Episcopatum ejus accipiat alteri. Oportet ergo ex his viris, qui nobiscum sunt congregati, — testem resurrectionis ejus nobiscum fieri unum ex istis.* En non singulorum dumtaxat Apostolorum, sed totius apostolici Collegii Præsidem cum autoritate proponentem, seu si malis, imperantem, oportet fieri: sed en etiam a fastuoso dominatu remotum, quippe qui non per se virum nominavit Judæ proditori substituendum, etsi forsitan & illud potuisset. Ne tamen aliquid sibi temere arrogaret, aut alienæ invidiæ locum daret, vel de plebe viris liberam cum Apostolis eligendi facultatem permisit. Quid est, quod multi hodie cum molestia a nobis exemplum exigant imperii a Petro exerciti? aut num forte dominatu hoc Petri electionem fieri jubentis offensi sunt Apostoli? conquestive, quod votis suis antea non numeratis, imo ne auditis quidem, quid faciendum sit, præscribere attentaverit? Ita forsitan Petrus, si apostolico collegio unus, alterve principiis Canonistarum, vel Publicistarum nostri ævi imbutus assedisset, experiri debuisset. At secus Apostoli æque humilitate, ac ipsorum Caput instructi promptam obedientiam Petri mandato exhibentes absque tergiversatione duos in medio statuerunt, & fufis ad Deum precibus orarunt, ut quem elegerit ex duobus unum, ostenderet in locum proditoris Judæ, quod Petrus jufferat, subrogandum.

§. 5.

Varia sunt cavillationes, quibus aliqui vim hujus loci eludere conantur. Dicunt itaque 1^{mo}: si præ reliquis inspiratus est Petrus, ut id proponeret; tunc non ut collegii caput id fecit, quod simili cum gratia quilibet alius facere potuisset, 2^{do}: Petrus divinam Scripturam adduxit, quam sane impleri oportuit, hinc non sua sed illius autoritate consensum aliorum obtinebat, 3^{to}: Apostoli, ut in electionem consentirent, propriam & ipsi inspirationem habere poterant; non ergo quasi

quasi ex Petri præcepto id factum. 4^{to}: Denique Petrus non denominare ausus est Judæ substituendum, sed collegio fidelium electionem relinqui debere agnovit. Respondeo has argutias jam inutiles esse, postquam ex allatis supra S. Scripturæ testimoniis constat, Petrum ut supremum, & universale Ecclesiæ Caput a Christo fuisse institutum: quæstio enim nunc tantum de eo est, an, & quomodo Petrus suprema sua auctoritate sit usus. Analogia ergo fidei, quæ una est ex optimis S. Hermeneutices regulis nunc a nobis exigit, ut actiones Petri secundum divinam institutionem explicemus. Hisce præmissis ad singula dico, & quidem

Ad primum. In medio apostolici Collegii assurgere ad negotium proponendum, id Capitis erat, & licet quilibet alius singulariter inspiratus idem facere potuisset, tamen ut Petrus præ reliquis inspiraretur, id eidem tanquam Capiti ex ordine divinitus instituto conveniebat.

Ad secundum. Principes etiam seculares sæpe decretorum suorum rationes dant omnino evidentissimas, quod illorum Auctoritati adeo non officit, ut eandem tantum faciat amabiliorem. Ceterum nisi Petrus adductum Davidis textum de Juda explicasset, nemo forsitan ex ipsis Apostolis ita intellexisset, minus illi cogitassent, a se potius, quam immediate a Deo surrogandum esse Judæ Successorem. Hac super re nulla sibi consultatione permessa Petro prompta obedientia consentiunt.

Ad tertium. Apostolis singulari inspiratione non erat opus, cum ex Domini promissione scirent, se cum Petro, seu fundamento suo conspirantes errare non posse.

Ad quartum. Petrus pro sua modestia usus non fuit plenitudinis potestatis, ne eadem forte abuti videretur. Sic Apostoli quoque Diaconorum electionem laicis permiserant. Act. VI.

§. 6.

Altera, quæ Act. II narratur, historia non minus memoranda venit. Ubi diebus Pentecostes completis Spiritus S. de cælo tamquam ignis descendit, seditque supra singulos Apostolorum, qui variis linguis loquebantur; stupentibus omnibus, & quid sibi hoc vellet, quærentibus;

E

bus; fuere tamen inter Judæos irrisores, christiani nominis inimici, qui ebrietati tantum adscribere miraculum non vererentur. Tum vero Petrus inter reliquos undecim Apostolos *solus* levavit vocem suam. Unicus contra Christi adversarios causam veritatis defendendam, sui que & collegarum patrocinium in se suscipit, etsi Apostolorum singuli Spiritu S. repleti essent. Utquid omnes silent alii præsentē Petro, nisi quod caput omnium purgationis sermonem, seu apologeticum enunciare nomine omnium oportuit? In tanta hominum multitudine tunc congregata cum solus Petrus omnibus loquitur; nonne sibi præ reliquis excellentiam vindicat? Nonne eandem agnoscunt reliqui omnes nunc obmutescētes, qui antea ambitione tacti sollicitè quæsierant, quis eorum videretur esse major? At nondum satis! Judæis sermone hoc Petri compunctis, & Apostolos interrogantibus, quidnam sibi faciendum esset, illico Petrus loco omnium respondet, sententiamque per se solum pronunciat, poenitentiam esse illis agendam, & Baptismum in nomine Jesu suscipiendum ad remissionem peccatorum, & ut donum Spiritus S. ipsi quoque acciperent. Dignum hic notatu est, quæstionem a Judæis non soli Petro, sed omnibus Apostolis fuisse propositum: *Dixerunt ad Petrum, & ad reliquos Apostolos.* Solus ergo omnibus tacentibus Petrus eum loquitur, nisi quia omnium caput? Non proprio ore ceteri Apostoli præsentē Petro, sed illius ore loquuntur: hinc merito Petrus os Apostolorum à S. Chrysostomo vocatur *): *Quid igitur os Apostolorum Petrus? Semper fervens chori apostolici Coriphæus omnibus interrogatis ipse respondet.* Ita sane! vox Petri omnium Apostolorum vox est, totius Ecclesiæ vox. Qui Petri vocem non audit, is gregis dominici ovis non est. Ubi Pastor Pastorum loquitur; tacendum vel ipsis Pastoribus est, & consentiendum. Sic uno Petri ore omnes loquuntur. Qui contra loqueretur, jam unius gregis Pastor non foret, sed gregem is divideret: unum autem est Christi ovile, & unus Pastor omnium, ille, cui à Filio Dei dictum est; *pasce oves meas.*

§. 7.

Astorum III & IV bigam Apostolorum nobilissimam invenio: *Petrus & Joannes ascendebant in templum ad bordem orationis nonam.* Insigne hoc loco miraculum a Deo parabatur ad fidem Judæis prædicandam, plurimosque, qui electi fuerant, apostolica prædicatione convertendos.

Dies

*) Homil. 54 in Math.

Dies haud dubie festiva fuit, quod patet ex ingenti hominum affluentia in templo, & homo quidam claudus ex utero matris suæ, quem ponebant pro more ad portam templi, ut ab ingredientibus eleemosinam acciperet, preces suas in accessu Duumvirorum emisit. Comes Petri, dilectus ille Christi discipulus erat, qui in sinu Domini solus requiescere meruit propter singularem castitatem hac dilectionis prærogativa dignus, gratia tamen apostolici muneris, quæ hoc loco insigniter apparuit, Petro plurimum posthabitus.

Mendico utrumque rogante Apostolum, Petrus subito Spiritus S. motu impulsus, ut illi valetudinem corporis restitueret, dixit: *Argentum, & aurum non est mihi, quod autem habeo, hoc tibi do.* Apprehensa igitur ejus dextera allevavit eum in nomine Jesu fergere iussit, qui exiliens stetit, & intravit cum illis in templum alta voce Deum magnificans. Cum frequentis populi concursus fieret omnibus ad rei novitatem stupentibus, opportunam Petrus occasionem capiens Christi fidem populo prædicavit. Dicas hoc loco in præsentia Petri apostolicum Joannis munus quasi cessasse. Ita S. Lucas totum Petri sermonem refert, ut nihil de iis memoret, quæ Joannes utpote minori authoritate ad populum dixerat, nisi forte solius Petri verba huic quoque, vel tacenti attribuantur: *Loquentibus illis ad populum.* Hac Petri prædicatione plurimis Judæorum ad fidem conversis postridie Principes Hierosolymæ congregati in medio duos Apostolos statuerunt, quos & interrogarunt, quâ virtute, quoque nomine hoc facerent. Tunc iterum Spiritu S. repletus non Joannes, sed Petrus respondit: *Principes populi, & seniores audite!* Solus denuo Petrus est, qui Spiritus S. instinctu eorum Judæorum supremo concilio Christum prædicavit, sententiamque tulit totius christianæ Religionis fundamentalem: *Non est in alio aliquo solus: nec enim aliud nomen est sub cælo datum hominibus, in quo oporteat nos salvos fieri.* Totum hunc sermonem ad Synagogæ Principes solus habuit Petrus adstante, & silente tantum Joanne, nisi quod tamquam eorum, quæ Christus gesserat, contestis cum Petro pauca iudiciis dixerit, ne amplius de Jesu loquerentur, prohibentibus: *Si iustum est vos potius audire quam Deum, iudicate: non enim possumus, quæ vidimus, & audivimus, non loqui.* Quisquis hæc duo legerit Actorum capita, ubi in Petri præsentia quasi evanescere Joannis apostolatam viderit; intelliget, quantum a vero illi aberrarent, qui vel in apostolico munere ita omnes Apostolos fuisse Petros æquales contendunt, ut nullam absolute honoris, & potestatis excel-

lentiam in Petro velint agnoscere. Palpabile est ergo duriores, & forsitan adfectu humano profectam esse illam de omnium Apostolorum æqualitate, toties jam recoctam S. Cypriani expressionem, eamque mitigari debere.

§. 8.

Præ ceteris adhuc memorabile videtur Actorum cap. V, ita enim Petrum inter Apostolos, sicut antea Christum inter discipulos exhibet, tanta scilicet autoritate eminentem, ut Christi Vicarium, & corporis apostolici Caput non possis, utcunque velis, diffiteri. Cum Ananias, & Saphira de pretio venditi agri aliquid fraudassent, & partem ad pedes Apostolorum attulissent; non ab aliis præsentem Petro iudicium latum; hic vero inconsultis ceteris sententiam tulit, suamque divinam jurisdictionem magna cum eminentia, horribili etiamnum modo exercuit, infidelem increpando virum, ut *superno iussu exanimis in terram caderet: Cur tentavisti Satanas cor tuum? — Non es mentitus hominibus, sed Deo.* Similiter & ad mulierem: *Ecce pedes eorum, qui sepelierunt virum tuum — & efferent te.* Miraculum hoc fuisse dices, Fuit certe, id quod amplius observes, vel miraculum, quo divinitus concessa Petro jurisdictione ligandi, solvendive pro ratione illius temporis comprobaretur. Et si alii quoque Apostoli sparsim habuerint donum miraculorum; eo tamen in Petri, ceu capitis sui præsentia caruisse videntur ad manifestandam singularem Petri prærogativam.

Hinc factum, ut fideles infirmitatibus pressi sanationis suæ fiduciam, sicut olim in Christo cum discipulis suis ambulante, ita posthac in solo Petro collocarent, ita ut in plateas ejicerent infirmos, & ponerent in lectulis, ac grabatis, ut veniente PETRO saltem umbra illius obumbraret quemquam illorum, & liberarentur ab infirmitatibus suis.

Eodem adhuc capite v. 29 Petrus tamquam Apostolorum Princeps sollicitè a reliquo choro apostolico distinguitur: Respondens Petrus, & Apostoli dixerunt: Edic, obsecro, cur non simpliciter legitur Apostolos respondisse, sed Petrum, & Apostolos? Ad quid distinctio hæc, nisi ut Caput a corpore distinguatur, aut eo quod solus Petrus nomine aliorum Apostolorum illis tacentibus denuo responderit?

§. 9.

§. 9.

Actorum VIII Petrus & Joannes ab Apostolis tamquam illorum præcipui ad Samaritanos mittuntur, ut illis Spiritum S. darent. Cum Simon eundem vellet pecunia sibi comparare; scelus hoc non Joannes præsentem Petro, sed ipse Petrus pro sua judicandi Superioritate, quam unacum clavibus a Christo acceperat, castigavit sententiam edicens: *Pecunia tua tecum sit in perditionem*. Nec obstat, quod legitur hoc loco, S. Petrum cum Joanne ab Apostolis fuisse missum. Placet hac super re gallicum Scriptorem, Papæ non nimis addictum Calmetum audire, qui ita commentatur *): „Hoc minime intelligendum est, quasi Petrus illis paruerit, atque ipsi in illum, tamquam inferiorem supremam suam auctoritatem exercuerint. Scimus S. Petrum in Ecclesia, tamquam Apostolici Collegii Caput habitum fuisse. Semper Apostolis omnibus præponitur, pro illis loquitur, verbo: semper agit tamquam Caput, & Princeps Apostolorum. Hic autem mittitur, ut assolet, in aliquam civitatem, vel communitatem, quo legatur ille (consilio, & caritate, non imperio) qui Princeps est, & Caput ad rem amplissimam, gravissimamque agendam, atque transigendam. Ita Ecclesia antiochena mittit S. Paulum, & Barnabam Hierosolymam, ut de rebus maximi momenti consulerent Apostolos: & Judæi hierosolymitani Romam miserunt sacerdotem Ismaelem, atque nationis Principes, qui coram Nerone Agrippam, & Festum accusarent.

§. 10.

Plura de Petro observatu dignissima referuntur Act. IX. Persecutio in morte Stephani excitata non diu per Palæstinam sæviit providente Deo, ut cito pax redderetur, quo facilius Evangelium Judæis prædicaretur. Cum itaque Ecclesia per Judæam, & Galilæam, & Samariam, hoc est, per totam Palæstinam ab Apostolis jam propagata pacem haberet; factum est, ut Petrus, qui durante persecutione semper Hierosolymæ permanerat, inde egrederetur, & dispersos undique fideles *pertransiret universos*. Omnem late regionem peragravit tamquam Imperator suas copias recensens, ut videat, utrum omnia se bene habeant: ita S. Chrysostomus exponit **). Quæ igitur ordinanda circa disciplinam fuere, abs dubio Pe-

E 3

trus

*) Comment. littéral. tom. 7.

**) Homil. 21 in Acta.

trus ubique disposuit. Agite, hæc adeste seculi nostri Hypercritici! qui ut sacram Petri Monarchiam impugnare possitis, nihil singulare, quod Monarchicam Potestatem proderet, in actis Petri posse inveniri contenditis. Palæstinæ Ecclesias variis in locis per Apostolos fundatas Petrus pertransiit *universas*, ipsas adeo Apostolorum sedes visitans. Cuiam alteri ex Apostolis tanta autoritas? Nonne hæc visitatio universalem ubique locorum Petri, seu supremi *Ordinarii* jurisdictionem prædicat? Aut num forte reliqui Apostoli gravamina adversus Petrum moverunt de concurrente secum aliena in greges sibi proprios, hoc est in fideles a se conversos potestate? Sane peregrina hæc Apostolis, & incognita lingua foret, illam Petri *concurrentem*, & *ordinariam* quidem, sed superiorem jurisdictionem *alienam* vocare. Superi! quam dissona vox, & Patribus inaudita est, quæ *alienam* Petri vocem appellat, Petri, cui totum ovile Christi dominico ore commissum est! Væ ovibus, quibus audire universalis omnium Pastoris vocem non liceat! Non certe Pastores forent, sed lupi rapaces, qui ab uno Pastore omnium oves segregarent. Et si plures sunt Pastores ovium singularium; at unus tamen est omnium Pastor, supremus ubique Ordinarius, quippe cui totus grex *illimitate* sine ulla restrictione, & *immediate* proprio ore Pastoris divini traditus est: *Pasce oves meas.*

§. II.

Petrus visitans universos per Palæstinam fideles fratres (ad gentes enim regnum cælorum nondum erat dilatatum) devenit ad Sanctos, qui habitabant Lyddæ. Hac generali visitatione non solum Petrus suam, quam habuit, supremi Ecclesiæ Capitis autoritatem exercuit, sed & Deus ipse insigni præ reliquis Apostolis miraculorum gloria ubique locorum fecit manifestam. Homo quidam Aeneas nomine, jam octo annis in lecto jacens, quem priores viri apostolici per loca illa fidei præcones nondum sanaverant, subito Petri jussu sanus surrexit. Hujus rei fama cito ad Joppen non procul a Lydda sitam adventum Petri nunciavit, quod ubi discipuli fideles audiverant, Petrum prope adeste, fiducia pleni erga Principem Apostolorum miserunt, qui illum mox adducerent ad vitam defunctæ Tabithæ optimæ mulieri restituendam, quam ille voce sua resuscitavit. Qua re per totam Joppen divulgata multi in Domino crediderunt. Nostra hic iterum animadversione dignissimum est, quod, etsi singuli Apostoli dono miraculorum essent præditi, illud tamen donum, ubi

ubi Petrus aderat, fere unice in hanc aut plane insigni cum eminentia ab ipsa S. Scriptura referatur, qua etiam teste fideles undique dispersi longe majorem in Petro, utpote post Christi de hac terra discessum Apostolorum Principe, quam in aliis Apostolis fiduciam posuerunt.

§. 12.

Præcipuum est Act. cap. X, unde apostolici adeo muneris illustra prærogativa in Petro effulget. Persuasi sibi adhuc erant Apostoli tantum filios Israël a Deo electos esse, qui prædicatione sua in ovile Christi congregarentur, margaritas autem Evangelii non ante porcos, id est, gentiles esse projiciendas. Soli Petro præ ceteris divina revelatio facta est, jam non discrimen fore Judæum inter, & Græcum, sed ipsis quoque infidelibus populis regnum Dei esse adaptum. „Ascendit Petrus in superiora, ut oraret, circa horam sextam, & cum esuriret, voluit gustare. „Parantibus autem illis cecidit super eum mentis excessus, & vidit coelum apertum, & descendens vas quoddam, velut linteum magnum quatuor initiis submitti de cælo in terram, in quo erant omnia quadrupedia, & serpentina terræ, & volatilia cæli: & facta est vox ad eum, surge Petre, occide, & manduca: ait autem Petrus, absit Domine! quia numquam manducavi omne commune, & immundum, & vox iterum secundo ad eum, quod Deus purificavit, tu commune ne dixeris. Cum Petrus secum hæsitasset, quidnam sibi hæc visio vellet, advenientibus viris a Cornelio Romanorum Centurione missis, interno spiritus instinctu didicit, sibi jam esse cum gentibus communionem intundam. Quare cum quibusdam fratribus ex Joppe Cæsaream ad Cornelium profectus dixit: *Mibi ostendit Deus neminem communem, aut immundum dicere hominem.* Magnum hoc mysterium soli Petro immediate a Deo, non in aliquo Apostolorum conventu ostensum fuit, sed omnes reliqui hanc tanti momenti veritatem, seu apostolici officii regulam primum a Petro addiscere debuerunt. Ita vel ipsi Apostoli in sui Apostolatus munere a Petro dependebant instruendi, quo illud spectat Christi essatum: *Tu aliquando conversus confirma fratres tuos.* Primus ergo, qui divina revelatione sibi soli facta Evangelium in gentes propagavit, fuit Petrus: ipse fundator est christianæ inter Ethnicos Ecclesiæ, quæ nostra hodie Ecclesia est regno Dei a perfidis Judæis ablato, nobisque donato. Ipse est, in quo Christus promissionem suam implevit: *Tu es Petrus, & super banc Petram ædificabo Ecclesiam meam.*

§. 13.

§. 13.

Non minus notandum venit Act. cap. XII. Manum miserat Herodes Agrippa ad Ecclesiam Christi persequendam: Jacobo, qui major dicitur, jam occiso, ut amplius placeret Judæis, consilium iniiit illis adeo invisæ sectæ ipsum e medio tollendi Caput; hinc & sacer textus ait: *Apposuit, ut apprehenderet & Petrum.* Hoc apprehenso, & in carcere servato, ut post Pascha populo daretur interficiendus, summa erat totius Hierosolymitanæ Ecclesiæ pro Petro sollicitudo, & fideles toto Paschatis octiduo indefinenter suas preces pro Petri, Capitis sui liberatione ad Deum effuderant: *oratio fiebat sine intermissione ab Ecclesia ad Deum pro eo.* Tantum sibi in Petri salute positum existimabant Christiani! Ducas non immerito illum fuisse precibus fidelium a Deo donatum, propterea magno miraculo per angelum e carcere educum. Potuisset Deus Jacobum quoque a morte liberare; sed permisit hunc celeri martyrio coronari, nec adeo fideles pro illo leguntur fuisse solliciti. Petrus vero adhuc erat necessarius, qui ad ampliora servabatur, non tantum Judæorum, sed & Gentilium Ecclesiæ Princeps. Hunc oportuit non Hierosolymæ, sed Romæ, in civitate orbis capite Christum glorificare, ejusdemque Ecclesiam inter gentes martyrio suo ædificare. Una est Christi Ecclesia sub vicario capite, Petro. Qui non Petri est, neque Christi est: *unum ovile, & unus Pastor.*

§. 14.

Huc usque nascentis Ecclesiæ historia per XII Act. capita sic a S. Luca descripta est, ut cum veritate illam *Regiminis Petri historiam* dixeris, honoris, & potestatis prærogativa inter Apostolos semper Petro attributa, immo aliorum Apostolorum gestis aut penitus neglectis, aut non nisi occasione Petri, & quasi pertransennam recensitis. Petrus per se solum sine præhabito Apostolorum concilio mandata dat e. g. pro Juda proditore Successorem in illius locum eligendi. Solus Petrus nomine aliorum Apostolorum in ejus præsentia tacentium loquitur, omniumque causam in se suscipit defendendam. Solus est Petrus, qui inter alios Apostolos præsens miracula patrat, & verbum Dei ex singulari inspiratione prædicat. Errantes solus Petrus inter reliquos Apostolos cum autoritatis eminentia redarguit, & miraculorum gloria præ aliis iustis a toto apostolico choro solus, ceu caput distinguitur. Singulas diversis in locis per alios Apostolos plantatas Ecclesias solus Petrus cum ordi-

ordinaria Superioris jurisdictione tanquam suas visitat, divinae omnipotentiae virtute ubique locorum suffultus. Revelatio plane singularis de gentibus ad regnum Dei vocandis extra Apostolorum concilium soli Petro datur, a quo omnes reliqui hanc praecipuam apostolici officii spartam debent addiscere. Demum pro Petri periclitantis vita extremum afflicta Ecclesia eundem suis precibus impetrat Judaeorum manibus ab angelo ereptum, sed ampliori gloria per Gentiles coronandum. En fundamentum Romano-Catholicae Ecclesiae, quae sola Christi est, supra Petrum aedificata, quam diabolicae potestates numquam poterunt expugnare. *Tu es Petrus, & supra hanc petram aedificabo Ecclesiam meam, & porta inferi non praevalerunt adversus eam.*

§. 15.

Porro Petrus est, ad quem, utpote Columnam Ecclesiae praecipuam, seu supremum Rectorem S. Paulus ab ipso Christo post mortem vocatus Apostolus proficiscitur Gal. I, 18, licet non discendi studio, ut S. Hieronymus ait, sed tamen honoris priori Apostolo deferendi gratia. Ceterum, quod sacer textus, praecipue graecus insinuat *ad consulendum* Petrum invisit Paulus: *ἰστορήσας* enim significat *percontandi gratia visere* teste Erasmo, ut antiquorum etiam exemplis Scapula in suo Dictionario ostendit.

Idem sensus ex ipso Paulo colligitur Gal. II, 2, ubi denuo cum Apostolis, qui videbantur Columnae esse, Evangelium, quod jam ante praedicaverat, tamen adhuc se contulisse testatur, ne forte in vacuum curreret, id est, ne in alienam viam aberraret. Id quidem pro se, S. Paulus non timuit, quippe a Domino ipso instructus; agendum tamen erat de Authoritate apud alios praedicationi suae concilianda; uti ex Act. IX, 26 apparet; cum enim fratres ex Judaeis conversis ab illo sibi timerent, Sauli conversionem aut ignorantes, aut non facile credentes, a Barnaba adductus est ad Petrum, quocum Jacobus minor, ut vulgo dicitur, Hierosolymae Episcopus fuerat. Ita Paulus conversionis suae, & conversationis in Evangelio, & quod praecipuum, apostolici sui muneris immediate a Christo suscepti rationem Petro exposuit, ob eamque causam ad conferendum cum Petro, non ad *curiose*, prout vulgi sensus est, videndum Petrum Hierosolymam profectus est, ut cum unitatis centro communicaret, ostenderetque, se a vinculo unitatis non dissociari,

ciari, ne forte alias Evangelium suum fidem perderet, & ipse in vacuum curreret, aut cucurrisset.

§. 16.

Leve est, & inane, quod tamen non raro opponitur: Paulum nulla ratione Petro subiectum fuisse, sed potius eodem superiorem, quippe quem in faciem correxerit. Gal. II, 11. Enimvero quod Paulus in Petro supremum Ecclesiæ Caput respexerit, satis ex eo, quod ad Petrum suscepit percontandi, seu rationem reddendi causa, itinere colligitur. Qualis autem correctio fuerit illa Cephæ, ex ipsa historia sacra breviter explanabimus. Petrus Antiochiæ cum fratribus ex gentilitate manducaverat, subito autem advenientibus Hierosolyma neo-conversis Judæis metuens, ne illorum infirmitati scandalum præberet, a mensa Gentilium se subtraxit, quam cum hoc genere hominum conversationem dissimulaturus, cujus exemplum ceteri quoque discipulorum, inter quos Barnabas, imitabantur. Actio quidem Petri in se mala non fuit, ratio autem facti etiam laude digna; noxios tamen parere effectus poterat, & majori scandalo Gentilium persuasionem excitare, quasi legis Mosaicæ jugum in christiana adhuc esset portandum. Quare non immerito Paulus reprehensibile hoc factum judicavit, & cum publico esse posset offendiculus, pro fraterna, quæ inter Apostolos erat, libertate loquendi, publice corrigendum. Hæc, inquam, fratris, etsi ordine inferioris erga fratrem libertas neutiquam Superioris potestati officit. Quamvis igitur in hoc officiorum conspectu Petrus per imprudentiam peccaverit (quippe nec Apostoli plane impeccabiles erant, utpote homines, & ipse Paulus timebat, ne reprobus fieret prædicans) culpa tamen alia, nisi levis improvidentiæ non fuit, quæ ipsa humilitate, & charitate Petri in majus meritum cessit. Major certe virtus in Petro fuerat propter improvidum actum, & charitatis quidem humiliter culpari, quam in Paulo absque tolerantia audacter culpæ.

§. 17.

Inde ab Act. cap. XIII S. Lucas Pauli apostolatam, cujus in itineribus comes fuerat, describit: & hac quidem occasione factum, ut de novo de Petro, seu Hierosolymitani Concilii Capite mentionem faceret, insigni prærogativa (quod alibi semper in S. Luca observatur) a reliquis Apostolis Petrum etiam hic distinguens. Act. XV. Cum Antiochiæ Pa-

lo,

lo; & Barnabæ a quibusdam falsis fratribus Judæis contentio orta esset de circumcissione; totaque Moysis lege etiam Gentilibus ad Christum conversis imponenda; Paulus, ut ipse testatur Gal. II, divina revelatione Hierosolymam, NB tunc adhuc temporis matricem Ecclesiam, ubi & Caput Petrus aderat, ascendit super hac questione Columnas Ecclesiæ consulturus. Apostolis hunc in finem unacum Presbyteris, aliisque fratribus congregatis magna hinc inde facta est disquisitio. Tum vero lite adhuc pendente Petrus tamquam apostolici confessus Præses surrexit; & primus omnium etiam in præsentia Jacobi Hierosolymitanæ Ecclesiæ Antistitis pro sua auctoritate sententiam protulit, quam reverenter omnes, a tumultu nunc cessantes in silentio exceperunt: *Tacuit omnis multitudo.* Petri autem sententiæ hic erat ingressus: *Se jam pridem a Deo fuisse electum, ut per os suum gentes Evangelii verbum audirent, & crederent.* Hæc verba Petri hodieum a nobis summam merentur attentionem. Se, ait, a Deo esse electum, & consultum, ut gentes per os suum verbum Dei audirent. Quamvis Paulus ex quadam conventionē humana Apostolus gentium magis, quam Judæorum deputaretur Gal. II, 9; Petrus tamen effatur, per se gentes esse ad fidem vocatas, & per os suum oportere illas audire Evangelii verbum. Quæ præfatione suam in gentes, eamque divinam auctoritatem in Evangelio non solum annuntiando, verum etiam exponendo declaravit, ut pateret, quam mox profaturus esset, sententiam non jam dubitationi subjiendam, sed communi assensu amplectendam: *Non debere Gentilibus intolerabile Moysis iugum imponi.* Postquam Petrus elocutus est, una omnes in Petri sententiam abire, tamquam concilii totius regulam, & ea, quæ ille dixit, suis quoque dictis comprobare, atque confirmare. Ita, quod Petrus judicavit, narrationibus suis Barnabas, & Paulus confirmarunt, & Jacobus quoque sua oratione, qua expresse ad Petri auctoritatem provocavit v. 14, & reliqui demum viri apostolici, ac Presbyteri cum omni Ecclesia: *Non inquietari eos, qui ex gentibus convertuntur ad Deum.*

Hæc norma fere omnium posthæc conciliorum fuit, ut causâ rei vel in concilio, vel jam antea diligenter discussa primus omnium ex ore sui Vicarii Petrus loqueretur, cujus voci reliquorum Patrum vox semper consensit. Aut si subinde vox Petri non antecessit, sed subsecuta est, tunc primum sententia Patrum auctoritatem consecuta est. Nostra repudiatis jam Judæis Ecclesia gentium est, hanc oportet per os Petri divinam verbum audire. Petrus enim hodieum non cessavit ex

ore sui Vicarii, aut Successoris loqui. Dum os Petri loquitur, taceat tam Apostolorum, quam fidelium omnis multitudo. Quisquis voci Petri contradicere attentaverit; is non tantum a capite, sed etiam a corpore alienum se fecerit. Petrus enim, & Ecclesia duo sunt, quæ a se mutuo separari ex verbi Dei promisso nequeunt: ille siquidem fundamentum est, hæc ædificium: *Tu es Petrus, & super hanc petram ædificabo Ecclesiam meam.* Falsa foret Christi promissio, si Ecclesiam suo fundamento destitui, hinc labilem fieri permetteret, & *Portæ inferi non prevalebunt adversus eam.*

§. 18.

Vana est igitur, & inutilis quæstio magis ad obnubilandam veritatem, quam dilucidandam excogitata: An in *solo* Papa, an in *universa* Ecclesia infallibilitas resideat? Ita tu quærendo falsa cogitatione separas, quæ rêvera separari divino ex instituto numquam possunt. Petrus est fundamentum, supra quod suam ædificavit Ecclesiam. Hæc Dei Ecclesia portis inferi insuperabilis numquam a suo fundamento, id est, a Petro scindi, & avelli poterit. Sed illa est vera Christi Ecclesia, quæ cum Petro, suo fundamento conjuncta. Si omnes Germaniæ, aut Galliæ, aut Italiæ, immo si omnes Europæ, si omnes Asiæ, si omnes Africæ, si omnes Americæ particulares Ecclesiæ, quæ nullum datum est, singulare promissum de sua in fide perseverantia, & si omnes illæ una simul suis in capitibus a Petri fide deficerent; numquam tamen in hac quoque, absurda licet hypothesi sua Petro Ecclesia deerit, aut secum in uno loco collectorum fidelium, aut per orbem universum disperforum, ex quibus novos sibi creare Pastores in partem sollicitudinis poterit. Hæc enim est ipsa Christi Ecclesia, ad quam pertinent, quotquot cum Petro communicant. Foris sunt, & a vivo corpore sejuncti, quotquot ab uno capite scissi. Una est Christi Ecclesia, cujus Petrus fundamentum est. Petrus dum ergo loquitur, numquam sui unius, sed Ecclesiæ fidem enunciat, id est, divinam fidem, a qua ne deficeret, Christi precibus impetratum est: *Ego rogavi pro te, ne deficeret fides tua.* Luc. XX, 32.

§. 19.

Ad quid ergo, inquires, Concilium illud Hierosolymitanum, si sola Petri sententia jam decretoria fuit, & aliarum omnium regula? Ad quid ceterorum Apostolorum vota? Nonne & illa decisiva fuerunt, & talia

talía etiámm sunt Episcoporum? Uno verbo responsum habet: concilia propter errantes, eosque pertinaces rem utilitatis esse, non necessitatís. Hierosolymitanum illud appello, quippe præcipuam omnium posteriorum normam. Paulus Apostolus falsis ex Judaismo fratribus, in specie Phariseis, qui legem Mosaicam volebant Christianis etiá ex gentilitate imponere, toto nisu resistit: ille, qui se quoque Spiritum Dei habere senserat, haud ambigebat de liberatione Christianorum a gravi jugo Judæorum; sed propter litigantium tamen contumaciam, ut suæ doctrinæ major ab externo autoritas accederet, matricem Ecclesiam cum præcipuis Apostolis, quorum Caput Petrum jam agnoverat, consultare decrevit. Quod decidere per se ipsum Paulus contra suos adversarios potuisset, id sane potuisset & Petrus; attamen pro sua prudentia simul, & modestia sine publica discussione noluit, ne temere quidquam agere adversariis videretur. Hinc indicta fratrum consultatio ipsis quoque contradicentibus ad causæ suæ defensionem admissis; motivis in utramque partem productis, tunc primum sententiam Petrus effatur, cui, quippe Capiti, & fundamento suo tota Ecclesiæ collectio jam consentit, non quasi cæco modo, aut forte simulato, sed prolatis etiá a ceteris Apostolis in confirmationem argumentis, ut ostenderet propriam fidem suam cum fide sui Capitis vere esse conjunctam. Sic decisiva sunt cum Petro aliorum quoque Apostolorum vota ad totius Ecclesiæ fidem profutenda, *decisiva*, inquam, sed prout cum Petro in unitatem sententiæ conspirantia, non pro hypothesi dissensionis, sive, si ita loqui fas est, in partes itionis, quasi tunc major numero pars votantium contra ipsum Caput prævaleret. Ea sit fors, misera certe, profani corporis, cujus unitas facile scindi potest: at melius Magister divinus suo mystico corpori providit, inseparabili nexu Ecclesiam supra Petrum fundando, ut nunquam alia sit Ecclesiæ, quam ipsa Petri fides. Usque ad finem mundi una semper cum Capite suo conjuncta Christi Ecclesia est. Postito casu, eoque tristissimo, quod major numerus Episcoporum in concilio sententiæ a Papa definitæ contradiceret, minore tantum eidem adherente; isti quidem cum Petro, seu corpus cum capite, ædificium cum suo fundamento, conjuncti veram efficerent Christi Ecclesiam; illi vero, etsi numero plures, ab unitatis centro separati, a capite, eoque ipso a Christi corpore avulsi extra Ecclesiam forent; schismatis rei, a veritate fidei, nec non a salute, alieni. Falsum est multorum hodie præjudicium in Ecclesiæ concilio ex votantium numero sententiam pen-

dere. Vota cum capite consentientium sola valent, si res fidei est; alia in contrarium non admittuntur, sed suis cum authoribus ab unitate corporis exclusa sunt. Quicumque in fide a capite dissentiant, jam non ad unam Christi Ecclesiam pertinent, sed ad aliam cujuscunque Antichristiani sectam. *Unum ovile, & unus Pastor.*

§. 20.

Dices vero, saltem confirmari ab aliis Apostolis Petri sententia debuit, uti ex historia concilii Hierosolymitani discimus. Ergo Episcopi in concilio Papæ superiores sunt; cum jus confirmandi superiorem erga alterum potestatem denotare videatur. Sed si velis, ambigua vocis *confirmare* discrimen facili negotio tute senties. Est enim aliud confirmare, seu debitum alteri consensum præstare, quod *subjectionis* est; & aliud confirmare, seu potestate præditum esse, alterius sententiam vel approbandi, vel reprobandi, quod *supremæ* Authoritatis est. Hoc posteriori modo solus Papa erga Episcopos etiam in concilio generali congregatos jus habet confirmandi, utpote cui in Petro dictum est: *Tu confirma fratres tuos.* Illo priori modo obligatio Episcopis incumbit cum unitatis centro sese conjungendi, hoc est, in capitis sententiam consentiendi, eamque hoc sensu confirmandi. Si locus hic foret, utrumque hoc ex historia ecclesiastica luculenter posset demonstrari, sed dante Deo de his quoque dicendi occasio erit.

§. 21.

Nec est, cur timeant Episcopi, si necessario sibi cum Papa sentiendum, se libertate sentiendi, loquendique privari. Dicat enim Episcopus quilibet, & libere quidem, quod sentit; sed meminerit simul suam nonnisi sui unius, aut particularem esse opinionem. Quodsi vero Pastor omnium universalis semel fuerit locutus, & definitivam dederit sententiam; notum jam Episcopis sit, debere se a Petro confirmari, non posse a fundamento suo Ecclesiam avelli, nec unitatem Caput inter, & membra discindi: vocem ergo capitis ex divino promisso non aliam esse posse, nisi ipsum communem sensum Christi fidelium, verbo: Ecclesiæ catholicæ doctrinam, cui quilibet particularis Pastor cum reverentia assurgere, seque submittere tanquam divinæ veritati debeat, a qua ne ullo unquam tempore Petrus aberraret, aliosque secum fideles sibi subditos in errorem inducat, specialiter suis precibus Christus & Patre

Patre impetravit. *Ego rogavi pro te, ne deficeret fides tua, & tu confirma fratres tuos.*

§. 22.

Hierosolymitana Apostolorum Synodus profecto omnium posteriorum norma sit, oportet. Hinc singularem animi reflexionem merentur, quæ in illa observatu digna occurrunt. 1^{mo}. Concilium nonnisi *solis* seditione non minima fuit congregatum, cum falsi quidam fratres ex Pharisæis contenderent circumcisionis, & totam Moysis legem adhuc obligare, 2^{do}. Quæstio mota non erat ejusmodi, de qua Paulus dubitaverat, quippe qui nihil a sua sententia cessit, nec Titum gentilem circumcidit. 3^{ta}. Paulus tamen ampliori matricis Ecclesiæ Authoritati divina ex revelatione id tribuendum censuit, ut Hierosolymam ad Petrum iterato se conferret. 4^{to}. Gravior causa, quam præsens de circumcidendis gentilibus, & in qua hæc ipsa comprehendebatur, jam antea soli Petro a Deo fuerat revelata, gentes quoque regni cælorum participes fieri posse: *Mihi ostendit Deus, neminem immundum dicere hominem.* 5^{to}. Appellato matricis tunc Ecclesiæ judicio non Jacobus, tamquam proprius Episcopus, sed Petrus præfuit, quippe Caput universale, & disquisitione ultro, citroque facta primus decretoriam edixit sententiam, quam omnes in silentio abrupta sua contentione exceperunt. 6^{to}. Hanc eandem pro regula ceteri assumerunt Apostoli, suoque pariter judicio confirmarunt, Petri authoritate persuasi: *Simen narrauit, quemadmodum primum Deus visitavit, sumere ex gentibus populum Nomini suo.* 7^{mo}. Demum hujus Concilii, *N.B. N.B.* quod non universale omnium Apostolorum, sed tantum matricis Ecclesiæ cum supremo Capite Petro fuit, tanta authoritas agnoscebatur, ut ejusdem decreta ad absentes fratres nomine divini Spiritus perscriberentur: *Visum est Spiritui sancto, & nobis.* Ex quo tam celebri concilio, cujus judicio vel ipse S. Paulus se submisit, præclare denuo elucet suprema Petri in Apostolorum quoque consensu authoritas, quippe qui præmissa disquisitione primus decretoriam fert sententiam, quam amplecti omnes fideles submissis animis conspiciuntur, suoque amplexu contra obloquentium pertinaciam roborare. Siqua enim inter fratres etiam dubitatio oritur, siquod periculum fidei obstat; Petri est, cujus fides numquam deficit, suos fratres confirmare. *Tu confirma fratres tuos.*

§. 23.

Et hæc quidem, quæ ex actis Apostolorum adduxi, supremæ jurisdictionis, ejusdemque universalis a Petro exercitæ testimonia plane divina sunt, quæ a fidelium nemine salva sua fide, animæque salute negari possunt. O utinam a plerisque seculi nostri Canonistis, vel Publicistis hæc theologia ponderarentur momenta! His siquidem aut ignoratis, aut forsitan despectis, unde christianam juris doctrinam purissime possent, atque haurire deberent, fontes plerumque limosos, immo & venenatos hæreticorum, aut hominum schismaticorum adeunt, unde pro novaturientis ingenii sui gustu bibunt, inanem apud homines hodiernos gloriolam sectantes, & magno fidei, animæque suæ discrimini se se exponentes. Sunt insuper & alia primævæ antiquitatis documenta de gestis Petri, quæ, licet divinam non habeant authoritatem, omni tamen historica fide indigna haud videntur. Hinc sequitur

APPENDIX

EX

Documentis mere ecclesiasticis.

§. I.

Dantur adhuc hodie, quos pace mea Ultramontanistas voces; sic enim vocari, & esse, quippe cum Capite conjunctus, potius velim, quam ab hujus sensu alienus pessima distinctione inventa, & specioso prætextu tantum a Curia romana dissentienti colorata *Cisalpinus*. Dantur, inquam, qui cum Joanne de Turrecremata *) & Bellarmino **) existiment, solum Petrum a Christo ordinatum fuisse in Episcopum, eumque universalem, ceteros autem Apostolos a Petro episcopalem jurisdictionis ordinationem accepisse. Et merito quidem distingui potest inter apostolicum, sacerdotale, & pastorale, quod vi nominis idem est, ac regiminis, seu episcopale officium. Primum, id est, *apostolicum*, consistit in propagatione fidei per prædicationem divini Verbi, & Regenerationis Sacramenti administrationem. Hoc officium Christus immediate per se instituit suos discipulos emittendo in terram universam: *Euntes docete omnes gentes, baptizantes*

*) Summ. de Eccles. Lib. 2, cap. 32.

**) Dissert. de contro. Christ. Fid. Tom. I, contro. 3, Lib. I, cap. 23.

antes eos in nomine Patris, & Filii, & Spiritus Sancti. Matth. XXVIII, 19. Eo ipso, quod quis Apostolus fuerit, nondum jam Episcopus, immo nec Sacerdos erat. Sic Dominus Luc. VI elegit duodecim discipulos ad regnum Dei prædicandum, quos & Apostolos vocavit, antequam vel Sacerdotes eos faceret, nedum Episcopos. Alterum est *sacerdotale* munus, quod complectitur potestatem Sacrificium offerendi, & peccata remittendi, quæ mere interna sacri Ordinis potestas est in corpus Christi reale, & mysticum. Hanc utramque Christus per se immediate Apostolis contulit, primam quidem Luc. XXII: *Hoc facite in meam commemorationem*, & alteram Joan. XX: *Accipite Spiritum S., quorum remiseritis peccata, remittuntur eis, & quorum retinueritis, retenta sunt.* Hæc Ordinis potestas communis est omnibus Presbyteris, non solum propria Episcopis, & eatenus illi æque, ac isti sunt Apostolorum successores. Tertium est, & hoc quidem *episcopale* officium pascendi non tantum verbo, & sacro ministerio, sed etiam regiminis potestate, seu externa in subditos jurisdictione. Hanc Christus (nempe, quod notandum, pascendi, sive regendi potestatem) non aliis Apostolis, quam soli Petro immediate, & per se ipsum commississe legitur, sed huic soli, nec ulli alteri claves regni cælorum promisit, eidemque oves suas pascendas tradidit. Similem regendi potestatem videtur quidem Dominus omnibus Apostolis unacum Petro congregatis in corpore promississe per potestatem ligandi, solvendi que Matth. XXIII; sed quod nova attentione dignum, nullibi invenitur Apostolis, præterquam singulariter Petro immediate, seu per se ipsum tradidisse, nisi citatum Matthæi textum unice ad peccata remittendi, aut retinendi potestatem Joan. XX æque omnibus Presbyteris datam restringere velis, quod vereor, an velis. Qua præmissa observatione, certe fundamento suo non deslituta, colligitur, regiminis, seu externæ jurisdictionis potestatem Apostolis tantum *mediate* a Christo, *immediate* vero per Petrum fuisse collatam. Hoc sensu SS. Patres nostri scripsisse videntur: *claves cælorum omnibus Apostolis, sed per Petrum* communicatos fuisse.

§. 2.

Itaque nunc ipsa veterum testimonia audiamus. Tertullianus ita scribit *): „Si adhuc claufum putas cælum, memento claves ejus Dominum Petro, & per eum Ecclesiæ reliquisse.“ S. Optatus Milevitanus **): „Bono

*) Scorpiac, cap. 10.

**) Contra Parmenian, lib. 7.

„Bono unitatis B. Petrus, cui satis erat, si, postquam negavit, solam veniam consequeretur, & præferri omnibus Apostolis meruit, & claves regni cælorum communicandas ceteris *solus* accepit.„ Nugas Dupinius loquitur, dum *claves communicandas ceteris* non ad Petrum, sed ad Christum refert. Quod Optatus adjecit, verbum *solus* manifeste in textu Petrum indicat: si enim Christus ipse ceteris claves communicasset, dici non posset, quod Petrus easdem solus acceperit. Claves ergo, quas solus Petrus accepisse legitur, non a Christo, sed a Petro ex mente S. Optati erant communicandæ. Ceterum plures Dupinii errores, in specie de *Papa* jam doctis. Bossuetus detexit, & refutavit, qui porro de similibus Pseudocriticis ita differt *): „Ces granets critiques sont peu favorables aux „superiorités ecclésiastiques, & n' aiment gueres plus celles des Evêques, „que celle du Pape.„

§. 3.

S. Cypriani, quo præcipue adversarii gloriantur, summe memorabilem locum, etsi longiorem placet hic describere **). Postquam S. Pater diaboli fraudes enumeravit, quibus de Ecclesia homines rapere consuevit, ita mox pergit: „Hoc eo fit, fratres dilectissimi! dum ad veritatis „originem non reditur, nec Caput quæritur, nec Magistri cælestis doctrina servatur. Quare si quis consideret, & examinet, tractatu longo, „atque argumentis opus non est. Probatio est ad fidem facilis compendio veritatis. (Quale ergo Caput, quod quærendum est? en contextum) loquitur Dominus ad Petrum: *Ego tibi dico, inquit, quia tu es Petrus, & super banc petram ædificabo Ecclesiam meam, & portæ inferorum non „vincent eam. Et tibi dabo claves regni cælorum, & quæ ligaveris super terram, „erunt ligatæ & in cælis, & quæcunque solveris super terram, erunt solutæ & in „cælis.* Et iterum eidem post resurrectionem suam dicit: *Pasce oves meas.* „Super illum unum ædificat Ecclesiam suam, & illi *pasendas* mandat oves „suas. Et quamvis Apostolis omnibus post resurrectionem suam „rem potestatem tribuat, & dicat: *Sicut misit me Pater, & ego mitto vos: „accipite Spiritum sanctum. Si cujus remiseritis peccata, remittentur illi, si cujus tenueritis, tenebuntur.* (Parem potestatem hic vides, scilicet Apostolatus, & Sacerdotii) tamen ut unitatem manifestaret, unitatis ejusdem originem *ab uno incipientem* sua autoritate disposuit. Hoc erant „utique

*) Oeuvres posthumes, Tom. II, pag. 531, edit. Amstel. 1753.

**) Lib. de unitate Ecclesiae.

„utique & ceteri Apostoli, quod fuit Petrus, pari consorcio prædici & „honoris, & potestatis (intellige hic quoque par consorcium Aposto- „latus & Sacerdotii) sed exordium *ab unitate* proficiscitur, & primatus „Petro datur *), ut *una* Christi Ecclesia, & cathedra *una* monstratur, „Et Pastores sunt omnes, & grex *unus* ostenditur, qui ab Apostolis „omnibus unanimi consensione pascatur, ut Ecclesia Christi *una* mon- „stratur.

„Quam *unam* Ecclesiam etiam in Cantico canticorum Spiritus S. „ex persona Domini designat, & dicit: *Una est columba mea, perfecta „mea, una est matri suæ, electa gentrici suæ.* Hanc Ecclesiæ suæ *unita- „tem* qui non tenet, tenere se fidem credit? Qui Ecclesiæ renititur, „& resistit, qui *Cathedram Petri*, super quem fundata est Ecclesia, de- „serit, in Ecclesia se esse confidit **)? — Quam *unitatem* firmiter te- „nere, & vindicare debemus, maxime EPISCOPI, qui in Ecclesia præ- „sidemus, ut episcopatum quoque ipsum *unum*, atque *indivisum* probe- „mus. Nemo fraternitatem mendacio fallat, nemo fidei veritatem per- „sida prævaricatione corrumpat. Episcopatus *unus* est, cujus a singu- „lis *in solidum* (hoc est, in unum totum) pars tenetur ***). Ecclesia „quoque una est, quæ in multitudinem latius incremento sæcunditatis „extenditur. Quo modo *solis* multi radii, sed lumen unum, & rami ar- „boris multi, sed robur unum *tehaci radice* fundatum, & cum de *fonte „uno* rivi plurimi defluunt, numerositas licet diffusa videatur exundan- „tis copię largitate, unitas tamen servatur *in origine.* Avelle radium „solis a corpore; divisionem lucis unitas non capit. Ab arbore frange „ramum; fructus germinare non poterit. A fonte præcide rivum; præ- „cisus arefcet. Sic & Ecclesia Domini — *unum Caput* est, & *origo „una*, & *una mater* sæcunditatis successibus copiosa. Illius sætu nasci-

G 2

„mur,

*) Ita in antiquissimis codicibus jam seculo sexto fuisse lectum, confecta res est. Vide Mamachium *de antiq. Christ.* tom. 5, pag. 71. Si tamen Criticis verba hæc displicent, pace mea omitantur: iusticiæ *exordium ab uno* proficisci, qui *Caput* est.

**) Non possum non pro nota nostro seculo necessaria S. Cypriani verba repetere: *Qui Cathedram Petri, super quem fundata est Ecclesia, deserit, in Ecclesia se esse confidit?* Jam puto, cessabunt recentiores nostri Canonistæ ad S. hunc Patrem appellare.

***) Pars a singulis Episcopis teste Cypriano tenetur: non ergo illimitata, ut in Apostolis erat, jurisdictio in Episcopis est. Ad quid ergo Episcopi, nisi in partem sollicitudinis pastoralis, quæ tota, & plena in Petro est?

„mur, illius lacte nutrimur, spiritu ejus animamur. Adulterari non potest sponsa Christi, incorrupta est, & pudica: — Hæc nos Deo servat, hæc filios regno, quos regeneravit, assignat. Quisquis ab Ecclesia segregatus adulteræ jungitur, a promissis Ecclesiæ separatur. Nec perveniet ad Christi præmia, qui relinquit Ecclesiam Christi. Alienus est, prophanus est, hostis est. Habere jam non potest Deum patrem, qui Ecclesiam non habet matrem. — Et quisquam credit hanc unitatem, de divina firmitate venientem, sacramentis cœlestibus coherentem scindi in Ecclesia posse, & voluntatum collidentium divortio separari? Hanc veritatem *), qui non tenet, Dei legem non tenet, non tenet Patris, & Filii fidem, vitam non tenet, & salutem.“ Ita S. Cyprianus unum caput agnoscit, a quo exordium proficiscitur, unam cathedram, quam Petri vocat, super quem fundata est Ecclesia, & unitatis originem ab uno incipientem, unumque Episcopatum, cujus a singulis Pastoribus pars in solidum, id est; in unum totum, non quasi solitaria tenetur; demum Ecclesiam unam in multitudinem quidem dilatatam, sed ex una origine, ex una radice, ex uno fonte profectam, sicut sunt radii solis, arboris rami, & aquarum rivi. Ut omnia paucis complectar, caput hoc, fundamentum hoc, origo hæc, unde Episcopatus unus oritur, solus Cypriano PETRUS est.

§. 4.

Nihil de Anacleti duabus dicam epistolis, quæ dubiæ fidei sunt, haud tamen, quidquid Hypercritici audaſter aſſerant, certo falsæ. Idem tamen a Clemente Alexandrino apud Eusebium traditur **); scilicet Jacobum minorem a Petro, & Jacobo majore, & Joanne Hierosolymorum Episcopum fuisse ordinatum. Pariter id Hieronymus testatur ***): *Jacobus statim post passionem Domini ab Apostolis Hierosolymorum Episcopus ordinatur.* S. Gregorius Nyſſenus ait ****): *Per Petrum Episcopis dedit claves cœlestium bonorum.*

§. 5.

Sed & genuinæ veterum Pontificum epistolæ superſunt, quas apud Constantium videas. Julius I ita ſcribit *****): „Quam culpan incurrere-

*) Legendum, ut videtur, *unitatem*. **) Hist. eccles. l. 2, c. 1.

***) De viris illust.

****) Tract. adv. eos, qui castigationes ægre ferunt.

*****) Epist. 1 ad Orient.

„currere non potuissetis, si unde consecrationis honores accipitis, inde legem totius observantiæ fumeretis, & B. Apostoli Petri sedes, quæ nobis sacerdotalis *) mater est dignitatis, esset ecclesiasticæ magistra rationis.“ Notatu dignum est, hæc Iulium non ad Occidentales Episcopos, sed Orientales scripsisse, consecrationis suæ honores illos a Petro accipere, & huius sedem sacerdotalis matrem esse dignitatis. Innocentius I in epistola ad Patres Carthagenenses ita ait: „Scientes, quid debeatur apostolicæ Sedi, cum omnes hoc loco positi, ipsum sequi, desideremus Apostolum, a quo ipse Episcopatus, & tota Autoritas nominis huius emerit.“ Idem epistola ad Milevitanos Patres **): „Quoties fidei ratio ventilatur, arbitror omnes fratres, & Coepiscopos, nostros nonnisi ad Petrum, id est, sui nominis, & honoris Authorem, referre debere, velut nunc retulit vestra dilectio.“ Denique S. Leo M. ***): „Magnum, & mirabile, Dilectissimi! huic viro (B. Petro) consortium potentiæ suæ tribuit divina dignatio. Et si quid cum eo commune ceteris voluit esse Principibus, nunquam nisi per ipsum dedit, quidquid aliis non negavit.“ Atque iterum ****): „Huius munus Sacramentum ita Dominus ad omnium Apostolorum officium voluit pertinere, ut in B. Petro Apostolorum omnium summo principaliter collocaret, ut ab ipso, quasi quodam capite dona sua velut in corpus omne diffunderet.“ Tot, & tanta summe venerandæ antiquitatis testimonia, quibus & doctrina SS. Thomæ, Bonaventuræ, Antonini, & plurimorum usque ad recentioræ ætatem Theologorum accedit, majoris saltem ponderis sunt, quam Facultatis Parisiensis placita, quæ sententiam damnaverit asserentem: Episcoporum jurisdictionem non immediate a Christo, sed a Petro esse. Aut num forte arundineo Febronii equo & hic infidebis, ut asseras, veteres illos tam Patres, quam Pontifices falsa merce Isidori fuisse deceptos? Cum id vix ausurus sis, finge, & calumniare illos tanquam isidorianæ deceptionis fabricatores. Lectio nostris Febronianis notanda, scilicet jam fatis nota esse, & ad nauseam usque ipsorum artificia.

*) Sacerdotalis dignitatis nomine passim apud Veteres Episcopalis veniebat.

) Inter Augustinianas 93. *). Serm. 3 de assumptione sua ad Pontificatum.

****) Epist. 89 nunc 30 ad Episc. Provinc. Viennens.

§. 6.

Multi sunt, qui persuasum sibi habeant in Apostolatu *κατεχον* Episcopatum fuisse inclusum, quibus ne simpliciter assentiar, ipsa S. Evangelii historia obstat, qua docemur missionem Apostolorum ad prædicandum præcessisse vel ante ipsam consecrationem ad Sacerdotium. Hinc *ratione objecti*, seu muneris pure apostolici, quod est, evangelizare, & baptizare nondum inclusus intelligitur episcopatus. Hunc ab illo distinguimus, non tamen separamus, sed ultro fateamur conjunctum fuisse utramque potestatem *ratione subiecti*, prout nempe in personis Apostolorum extitit. At quæstio redit, an suam pascendi, hoc est, regendi jurisdictionem Apostoli *immediate* a Christo, an vero *mediante* Petro acceperint. Enimvero non ab hominibus, sed ab ipso Domino S. Paulus apostolatam habuit; nihilominus tamen ab hominibus consecrationem accepit Aët. XIII. Arator sexti seculi Scriptor ipsum a Petro fuisse ordinatum in Episcopum refert, quod etsi non per seipsum Petrus fecerit, per alios tamen facere jam a se ordinatos potuit. Satis est, Apostolatam ab Episcopatu distingui.

§. 7.

Qui ex S. Scriptura opponi solent textus, sunt Aët. XX. a Spiritu S. Episcopos esse positos, ut pascere Ecclesiam Dei. Item Ephes. IV. quosdam a Deo datos Apostolos, quosdam autem Prophetas, alios autem Pastores & Doctores. Sed præterquam, quod prior textus jam accurate explicatus sit Art. I, §. 13, tantum hic observo, non legi, a Christo, sed a Spiritu S. Episcopos esse ad pascendum positos. Nonne vel ex eo forsitan colligi posset, Spiritus S. instinctu, sicut alia multa, etiam hoc a Petro fuisse factum, qui ad omnes generatim Presbyteros scripsit: *Pascite, qui in vobis est, gregem Dei!* Alter autem textus, etsi minus adversariis faveat, eoquod Apostolos a Pastoribus distinguit, neque tamen etiam asserit, sicut Apostolos a Christo, ita etiam Pastores *immediate* institutos, sed tantum a Deo datos. Verum est sane a Deo esse, quod divina autoritate Petrus, aut Apostoli fecerint. Quamobrem divina fuit, licet a Petro aliis communicata *pascendi* jurisdictio, & hoc sensu vere a Deo positi sunt in Ecclesia tam primi, quam secundi Ordinis Pastores. Ita quoque certum est divinæ institutionis esse Diaconos, etsi non *immediate* a Christo, sed ab Apostolis institutos. Cetera, quæ vulgo asseruntur, leviora sunt, quam ut hic nobis moram faciant. Tantum dis-

simula-

simulare non possum injuriam, qua nostra hæc sententia vulgo difamatur, quasi Episcopos tantum ut Petri, non vero ut Christi *ministros* confideremus: expresse enim, & publice profiteamur, divinam esse pastorem Episcoporum jurisdictionem, tametsi a Petro primum Apostolis communicatam, scilicet ut cum S. Cypriano loquar, velut radium ex luminis corpore, velut ex arbore ramum, velut ex fonte rivum. Cum insuper Petrus ipse non nisi Minister Christi sit, ejusque nomine, non proprio regat Ecclesiam; etsi Ministrorum supremus sit; consequens est, non utique Petri, sed Christi nomine præesse Episcopos, divina ad regendam plebis suæ portionem jurisdictione præditos, ea tamen Petro subordinata.

§. 8.

Interim utut ponderosa sint momenta, quæ persuadeant, Clavium potestatem, seu jurisdictionem pastorem non *immediate* a Christo, sed *mediate* Petro Apostolis fuisse commissam; id tamen pro certo non asum afferere divinis eloquiis non admodum hac super re claris, & judicio Ecclesiæ nondum enunciato. Duo sunt autem, quæ sibi quam optime notent simulati plerumque Episcoporum contra apostolicam Sedem advocati. Primum, idque certissimum, & fide divina tenendum inter Catholicos est, jurisdictionem episcopalem, etsi non a Petro sit, sed *immediate* a Deo; tamen ex ipsius voluntate Dei sub Petro esse debere, ita, ut pro Ecclesiæ utilitate vel augeri, vel minui, vel etiam suspendi, quoad actualis exercitii usum a supremo in terris Clavigero, & Pastori Capite possit. Deinde ea, quæ *immediatam* a Deo jurisdictionem Episcoporum probant, siquid probant, eandem quoque Presbyteris evincunt: ex quo consequitur; potestatem subordinatam, quamvis divinitus acceptam, haud quaquam opponi posse superiori potestati, seu hæc episcopalis sit, seu papalis.

§. 9.

Absit a me, ut Episcopis Presbyteros dignitate, aut potestate pares faciam, cum certus sim, divina dispositione hos illis inferiores esse; sed hoc contendo, eam, quam Presbyteri habent potestatem, æque divinam esse, ac illam, superiorem licet Episcoporum. Sunt enim Presbyteri quoque in plerisque Apostolorum Successores: & ipsi vi Ordinationis suæ missionem habent apostolicam ad prædicandum, & baptizandum:

dum: & ipsis peccata remittendi, aut retinendi potestas cum Apostolis communis est; ad Hierarchiam divinitus institutam & ipsi pertinent, *ut praesint*, quod exteriorem denotat jurisdictionem, primis seculis multo ampliorem in illis, quam hodierno more, ita, ut Presbyteri antiquitus cum suo Episcopo in uno consensu Ecclesias rexerint, vota in conciliis dederint non tantum consultiva, sed etiam decisiva, immo & auctoritate sua excommunicarint. Vide doctiss. Selvaggiu*).

Quanta confusio in domo Dei, si Presbyteri moderno tumultu excitati jurium suorum exercitia, prout olim erat, sibi revindicarent! Hæc non ad discordiam dicta sint, sed potius ad concordiam, ut appareat in Ecclesia Dei, ceu bene ordinato exercitu, diversos esse regiminis gradus, eosque divinitus ita sibi subordinatos, ut omnis demum plenitudo potestatis in uno supremo corporis totius Capite resideat. *Unum ovile, & unus Pastor*. Quam suavis institutio, divina sane, Deoque digna! Dic tu, sodes, *meliozem* te optare; & non jam nobiscum, sed cum Deo disputare, hanc institutionem reformandam esse secundum illustrationem, magisque philosophica nostri temporis principia. Aut num forte isidorianam fraudem & illud sapit Verbi divini effatum: *Unum ovile, & unus Pastor*?

§. IO.

Memorabilis adhuc prærogativa Petri est, quod super omnes Ecclesias aliis ab Apostolis fundatas, super ipsam matricem omnium Hierosolymitanam, cui S. Jacobus præsedet, ampliorem Auctoritatem, seu *patriarchalem* inde ab exordio illæ solum tres Ecclesiæ obtinuerint, quas B. Petrus fundavit, & erexit, scilicet Romana, Alexandrina, & Antiochena **). Tres illæ præ reliquis omnibus jam ante Nicænum Concilium primariæ cathedræ, utpote Petri, fuerant: Romanam quippe per se ipsum usque ad gloriosam martyrii mortem gubernavit, ad Antiochenam, cui aliquamdiu ipse præfuit, loco sui Evodium substituit, Alexandrinam non quidem per se ipsum, quod tamen Nicephorus testatur, sed per S. Marcum, discipulum suo nomine ablegatum rexisse creditur. Unde patet, quanta vel legatorum Petri primævis illis temporibus auctoritas fuerit,

Et

*) Antiquit. Christi. tom. 2. cap. 1. §. 2.

**) Notent sibi hoc moderni *dilucularii*, qui incessanter diluculum annuntiant, plena autem meridie crecutiunt, *patriarchalem* jurisdictionem, quam omnino volunt a *papali* distinctam, non nisi huius, ceu fontis esse rivulum, humana dispositione derivatum.

Et harum quidem sedium ordo hic est, ut sicut major fuit Petrus Apostolus Marco Evangelista, & Marcus major Evodio, qui nec Apostolus, nec Evangelista fuerat; ita Romana quoque Ecclesia Alexandrinam, & Alexandrina Antiochenam dignitate praecederet. Quarta primum inter patriarchales Ecclesias per annos fere quingentos habita est Hierosolymitana, & hoc quidem nomine potius, seu honore quodam memoriae S. Jacobi debito, quam realis potestatis prerogativa: siquidem Alexandrinus Patriarcha non solum secundo loco, proxime post Romanum in conciliis sedebat, verum etiam praeerat omnibus Episcopis, & Archiepiscopis Aegypti, & Lybiae: & Antiochenus non tantum tertio loco sedebat, sed etiam omnibus Archi- & Episcopis Orientis praeerat. At Hierosolymitano quarto quidem loco sedere licuit, sed nulli Episcopo, minus Archiepiscopo praeesse: immo teste S. Hieronymo subiectus erat Archiepiscopo Caesareensi, Palaestinae Metropolitano, & praeterea, ut dictum est, Antiocheno Patriarchae: His postea primum accessit Patriarchatus Constantinopolitanus, isque ad secundum locum promotus, sed non ante Justiniani tempora: tunc nempe post annum Domini quingentesimum Imperatoris opera, & Pontificum permissione Episcopi Constantinopolitanus, & Hierosolymitanus caeperunt in Patriarcharum numero nemine amplius reclamante haberi *).

§. II.

Unde hoc contigerit, si critice disquiras, cur tres solum, & hoc praecise ordine sedes patriarchales jam ab initio fuerint; non amplius cum Calvino miraberis. Si enim antiquitatem spectes; Hierosolymitana Sedes, utpote matrix primo omnium loco poni debuisset, non quarto demum, vel potius nullo. Si nobilitati regiae ipsarum civitatum id honoris tribuas; jam suo tempore huic figmento summi Pontifices Leo M. & Gelasius contraxerunt, eoquod alia sit potestas regni secularis, alia ecclesiasticarum distributio dignitatum. Praeterea cur a Concilio Nicæno tres tantum illae Sedes patriarchales fuerint agnitae, cum imperatoria Sedes tunc temporis in Oriente esset Nicomedia, in Occidente vero Trevis, & Mediolanum? Cur postea ex hoc eodem titulo constantinopolitanus Episcopus ægre admodum, & tarde ejusmodi sibi praecedentiam acquisivit? Restat igitur, ut a dignitate primi Reëtoris, & Fundatoris repetas, cur ante Hierosolymitanam Jacobi sedem, & ante Ephesinam a Paulo fundatam Alexandrina,

*) Vid. sup. cit. Bellarm. cap. 24.

drina, & Antiochena præminentiaæ honorem obtinuerint, eoquod ambæ hæ sedes, & solæ quidem post Romanam singulariter Petri Authoritate gloriarentur. Hæc sane vera est causa dignitatis illarum patriarchalium Sedium, ipsa scilicet Petri dignitas, qui illas tam fundavit, quam vel per se, vel suo nomine per alium gubernavit. Id nisi Anacleto credas, quod Patres nostri crediderunt, ita scribenti *): „Secunda Sedes apud Alexandriam B. Petri nomine a Marco ejus discipulo consecrata est. Tertia autem Sedes apud Antiochiam ejusdem B. Petri Apostoli nomine, habetur honorabilis.“ Huic ni credas testi, aliorum veterum testimonia apud Thomasinum collecta reperiæ **), uti Ss. Chrysostomi, Nazianzeni, Innocentii, item Theodoret, & Eusebii, qui potissimum eo diligentiam suam commendavit, quod Episcoporum, maxime illarum trium patriarchalium Sedium, perpetuam seriem contextuit.

§. 12.

Sed cum doctiss. Selvaggio mihi piaculo ducerem, præclarum S. Leonis locum præterire, ubi Sedium Alexandrinæ, & Antiochenæ authoritatem a S. Petro defluxisse disertè scribit ***): „Nihil Alexandrinæ Sedi, ejus, quam per S. Marcum Evangelistam, B. Petri discipulum meruit, pereat dignitatis, nec Dioscoro impietatis suæ pertinacia corrumpente splendor tantæ Ecclesiæ tenebris obscuratur alienis. Antiochena quoque Ecclesia, in qua primum prædicante Apostolo Petro christianum nomen exortum est, in paternæ constitutionis ordine perseveret, & in gradu tertio collocata numquam fiat inferior.“ Easdem Ecclesias superiorem jurisdictionis authoritatem præ omnibus aliis inde a Petro transisse Gregorius M. testatur, qui sic ait ****): „Cum multi sint Apostoli, pro ipso tamen Principatu sola Apostolorum Principis Sedes in Authoritate convaluit, quæ in tribus locis unius est. Ipse enim sublimavit Sedem, in qua etiam quiescere, & præsentem vitam finire dignatus est, ipse decoravit Sedem, in quam Evangelistam discipulum misit: ipse firmavit Sedem, in qua septem annis, quamvis discessurus, sedet. Cum ergo unius, atque una sit Sedes, cui ex authoritate divina tres nunc Episcopi præsident, quidquid ego de vobis boni audio, hoc mihi imputo.“ Porro ad eundem Eulogium Alexandrinum: *Ille mihi de Petri Cathedra locutus est, qui super Petri Cathedram sedet.* Denique rem

*) Epist. 3.

**) Vetus, & nova Ecclesiæ disciplina P. 1, l. 1, c. 7 & 9.

****) Epist. 53.

*****) Lib. 6, epist. 27 ad Eulog. Alexand.

rem omnem Hincmarus Rhemenſis paucis complectitur, dum Sedes Eccleſiarum, Romanæ, Alexandrinæ, & Antiochenæ idcirco ſpeciales Sedes vocat, quoniam Sedes ſunt, quin potius una Sedes magni Petri, Apoſtolorum Principis. Videant jam noſtri Videntes in Iſrael, Archiepiſcopales adverſus Petri Sedem Curialiſtæ, vel illam primævam Patriarcharum authoritatem a S. Petro ſuam originem derivare, & Petrum pro fundamento habere. Unde ergo fons fictitiæ juridiſtionis, quam ab illa Petri ſeparatam noſtro ævo quidam ſibi vindicare nituntur? Si primitivam cupiunt diſciplinam reſtaurari, adeo nihil lucrantur, ut potius omnia perdant: ita enim oportebit Archiepiſcopos noſtros a Petro ſicut olim Marcum diſcipulum, & Petri legatum dependere, ut ne ſuo quidem, ſed Petri nomine juridiſtionem exerceant: noſtros dixi Archiepiſcopos, quorum tamen in eccleſiaſticis documentis multo reſtrictior, & inferior juridiſtio ſemper fuiſſe invenitur, ac antiquitus illa fuit Patriarchalis, quam in toto Occidente unica ſemper retinuit Romana Sedes. Noſtri hac ætate tam fervidi diſciplinæ veteris æmulatores putantne, inconfulto, aut plane invito Occidentis Patriarcha nationale concilium poſſe celebrari? Quanam pro hac ſua recentiſſima opinione ex priſco ævo exempla producent? Quid hoc aliud eſt, niſi ſeparatos habere conventus ſine legitimo Capite, hoc eſt, *Schiſmaticos*? Si lis eſt inter Nationis Germaniæ Præſules, & totius Eccleſiæ Caput; heu quam triſtis diſcordia! Heu quam triſtior exitus, ſi ſententiam ferre, quod Capitis eſt, neceſſe fuerit! *Quidquid Petrus ſuper terram ligaverit, erit ligatum & in cælis.*

§. 13.

Specialem adhuc attentionem meretur Romana Sedes, quam totius mundi primariam Apoſtolorum Princeps Petrus haud dubie divino conſilio ſibi elegit, & ſanguine ſuo ſecundavit. Roma tunc gentium univerſarum Caput fuerat, ibi ſedem ſuam erigere oportebat Caput Eccleſiæ, quæ reprobatis Judæis univerſas ſinu ſuo gentes complecteretur. Id more ſuo præclare S. Leo explanat *): „Cum duodecim Apoſtoli „accepta per Spiritum S. omnium locutione linguarum imbuendum Evangelio mundum diſtributis ſibi terrarum partibus ſuſcepiffent; beatiſſimus Petrus Princeps apoſtolicæ Ordinis ad arcem Romani deſtinatur Im-

H 2

perii,

*) Serm. 1 de natal. SS. Petri & Pauli.

„perii, ut lex veritatis, quæ in omnium gentium revelabatur salutem; „efficacius se ab ipso Capite per totum mundi corpus effunderet.“

§. 14.

Nec obstat, Paulum quoque Romæ simul Apostolum, aut forte etiam Episcopum fuisse; ita enim Paulus, & Petrus Apostolorum Principes fuerant, ut tamen huic salva maneret sua divinitus accepta, eaque suprema regiminis jurisdictio, utpote cui totum ovile pascendum Domini voce commissum est: *Dei dona sine penitentia sunt.* Rom. XI. Quidquid itaque potestatis vel Paulo, vel aliis Apostolis sit posterius traditum, nihil Petro diminui potuit de clavium autoritate in universam Ecclesiam sibi promissa, collataque. Claves cælorum omnibus quoque Apostolis, imo toti Ecclesiæ fuisse datas cum quibusdam Patribus facile admittam, scilicet Apostolis per communicationem seu a Petro, seu certe sub Petro, fidelibus vero universis non quidem pro usu & administratione propria, sed tantum pro communi omnium utilitate. Vide Art. I, §. 3. Miror sane plurimos nostro tam illustrato seculo æquivocis vocibus tam libenter & sibi, & aliis velle imponere.

§. 15.

Ut vero ad Petrum redeam, Simonem, vulgo Magum, Hæresiarcham, & patrem omnium Hæreticorum, ut S. Irenæus scribit, oportuit per Ecclesiæ Principem non solum detegi, & damnari, ut patet ex Act. VIII, verum etiam triumphari, & extingui: quam gloriosissimam victoriam super Simonem arte diabolica in aëra raptum Romæ solus per seipsum Petrus insigni cum miraculo retulit. Hujus historię *γνησιότητα* vir summa eruditione Mazochius ex veterum Patrum testimoniis quam invictissime demonstravit. Vide Selvaggium *).

§. 16.

Denique ultimo loco memorabile est, quod antiquissimus liber a quodam fidelissimo Petri discipulo conscriptus sub nomine *Prædicatio S. Petri* testatur: cujus mentio fit apud Clementem Alexandrinum, Origenem, Eusebium, & S. Hieronymum. Christus digredienti Roma Petro sub finem vitæ apparuit, qui cum divinum Magistrum cognosceret,
ex

*) Antiqu. Christ. l. I, p. I, c. 3, excurs. I.

ex illo quæsit: *Domine, quo vadis?* At Christus: *Vado Romam iterum crucifigi.* Unde vaticinium imminentis suæ mortis Petrus intellexit: nobis vero ex eo intelligendum est, quid Dominus significare voluerit, cum se in Petro iterum crucifigi diceret. Quid? Nisi Petrum in terra suum esse Vicarium, sibi que fieri, quidquid Petro fieret. Cogitemus, sicut antea Samueli a Domino dictum, eandem a Christo sententiam in cœlis adversus eos enunciari, qui divinæ Petri auctoritati sese opposuerint: *Non te abjecerunt, sed me, ne regnem super eos.* I Reg. VIII, 7.

§. 17.

Quis ergo fuit Petrus? Ille *beatus* voce Domini prædicatus discipulus, qui speciali divinæ inspirationis gratia omnium Apostolorum primus naturalem Dei Filium agnovit, & confessus est; quem propterea Simonis nomine in Petri nomen mutato Dei Filius ceu *Petram*, & fundamentum suæ Ecclesiæ instituit a portis inferi numquam expugnandæ; cui Claves regni cœlorum cum omnis potestatis plenitudine *soli* promisit, tradiditque Art. 1. §. 1. &c. Quis fuit Petrus? Ille inter Apostolos, quem omnibus congregatis Christus *solum* compellavit, tamquam *omnium* contra diabolicas tentationes fulcrum; pro quo, ne umquam a fide deficeret, *solo* Deum Patrem rogavit; cui *totum* Apostolorum collegium in corpore tamquam Capiti subiecit, *soli* curam *omnium* imponens, fratres suos in fide confirmandi. Art. 1. §. 17. &c. Quis fuit Petrus? Ille universi gregis dominici Pastor, qui propter fidei suæ firmitatem, & charitatis præcellentiam meruit, ut totum Christi ovile *pascendum* sibi soli committeretur; cujus vocem non oves tantum omnes, & singulæ, sed & ipsi Pastores ovium reverenter audire, eidemque obedientiam præstare tenerentur. Art. 2. §. 1. &c. Quis fuit Petrus? Ille Apostolorum Princeps, quem omnes Ss. Scriptores, tam Evangelistæ, quam ipse Paulus ab Apostolis aliis utpote primarium sollicitè distinguunt, & constanter primo honoris loco memorant. Art. 3. §. 1. &c. Quis fuit Petrus? Ille, in quo antiqui Patres, & Concilia non minus generalia, quam particularia unanimi consensu totius Ecclesiæ Fundamentum, regni cœlestis Clavigerum, in terra *Plenipotentiarium*, Apostolorum Caput, universalem Christi fidelium Pastorem, controversiarum supremum Judicem, unitatis in fide Centrum, quo perfidia non possit accessum habere, agnoscunt, & venerantur. Art. 1. §. 2. &c. Art. 2. §. 3. Item Reflex. critic. §. 18. Quis fuit Petrus? Ille, cujus non supremam modo, sed & *illimitatam*

regiminis Authoritatem S. Scriptura magnifice describit; qui gloria revelationum, & miraculorum supra alios Apostolos singulariter eminuit; qui *per se ipsum* mandata Apostolis dedit; qui contra christiani nominis adversarios *solus* pugnavit omnibus Apostolis in ejus præsentia tacentibus, & sententiam inconsultis aliis enuntiavit; quo præsente aliorum Apostolatus quasi ad tempus cessasse, & suspendi videbatur. Art. 1. Art. 2. Art. 3. §. 4. &c. Quis fuit Petrus? Ille summus Christi Vicarius, qui velut antea divinus Magister inter suos discipulos, post illius mortem tanta fere Authoritate miraculis illustrata inter Apostolos præsulsit? Art. 3. §. 8. 11. 13. Quis fuit Petrus? Ille omnium, & singularum ovium non supremus tantum, sed & *immediatus*, seu *ordinarius* Pastor, qui nullatenus veretur in messem aliorum Apostolorum, quasi *aliena* esset, suas manus immittere, sed universas, ubi ubi collectas, dispersasve oves, ut *suas* respicit, & tranquillo tempore fideles visitat *universos*, potestatis suæ illimitatæ memor, quam a Christo acceperat, *quæcumque*, prout visum fuerit, solvendi, ligandive. Art. 3. §. 10. Quis fuit Petrus? Ille, cui Deus, & *soli* quidem revelavit, neminem amplius immundum dicere hominem, sed tempus adesse, quo gentiles quoque regno cælorum digni habeantur; ille divina Authoritate gentilium Ecclesiæ, quæ nostra est, fundator, a quo oportet gentes verbum fidei audire, & credere; ille est, a quo reliqui *omnes* Apostoli non expectatis antea ipsorum votis præcipuam sui apostolici muneris spartam debent addiscere, gentilibus prædicandi. Art. 3. §. 12. Quis fuit Petrus? Ille apostolici confessus Præses, qui discussione rationum utrinque facta *solus* e medio assurgit, & omnibus jam silentibus sententiam *irrefragabilem* enunciat; ad cujus Authoritatem postea Jacobus Apostolus provocat; cui una voce omnes Concilii assessores adstipulantur. Art. 3. §. 17. &c. Quis fuit Petrus? Ille, ad quem ceu præcipuam, & fundamentalem columnam Ecclesiæ S. Paulus proficiscitur, si non ab illo fidei doctrinam percepturus, saltem propriæ doctrinæ rationem illi redditurus. Art. 3. §. 15. 16. Quis porro fuit Petrus? Ille, in quo *una* tota spiritualis jurisdictio fundata est, a cujus plenitudine potestatis quælibet singularis Episcopatus portio, teste S. Cyrilliano, velut radius ex sole promanat, velut ex arbore ramus dependet, velut rivulus ex fonte defluit. Append. §. 3. Quis fuit Petrus? supremus universæ Ecclesiæ Vertex, a quo jam inde a primæva antiquitate Alexandrina, & Antiochena Sedes supra omnes alias (tantum Romanam excipe) supra ipsam Jacobi, eamque matricem sedem suæ Authoritatis

tatis prerogativam desumerant. Append. §. 10 &c. Quis fuit Petrus? Ille Romanæ Sedis Fundator, quam utpote omnium Nationum Caput divino certe Consilio supremum Caput Ecclesiæ universas gentes comprehensuræ sibi elegit, ut lex veritatis inde ad salutem dominaretur, unde mendacii, & erroris dominium in gentes universas ad perniciem fuerat dilatatum. Append. §. 13 &c. Quis denique fuit Petrus? Ille ex Apostolorum choro *unice* electus, ut Sedis suæ singulari privilegio per continuam successione seriem ad nos usque propagatam adhuc in modernæ hujus sedis hærede Pio VI vivat, & regnet, & *indefectibilitate* fidei divinitus, obtenta hodieum, & usque ad mundi finem universos fratres in fide confirmet, id quod experientia XVIII seculorum demonstrat, & ego dante Deo ex historia ecclesiastica amplius demonstrabo. En tibi! hic hic — — — fuit! — Atque etiamnum est PETRUS.

P A R S II. REFLEXIO CRITICA

In formam Regiminis ecclesiastici a Deo institutam.

§. I.

Mirum, hodiernis diebus inter Catholicos disceptari, quam formam ecclesiastici regiminis Christus instituerit: certe enim Deus homo elegit *optimam*: „Cum summa illum & cognitione rerum, & bonitate præstare constet; viderit quidem necesse est, quod est, sapientiæ delegeritque, quod est bonitatis, *optimam*, præstantissimamque administrandæ, regendæque Ecclesiæ rationem.“ Ita merito doctiss. Mamachi *).

Deus enim, qui-quamlibet aliam rem sui suo convenientissimam fecit, seu *optimam*, haud minorem sane rationem habuit suæ Ecclesiæ sibi pretiosissimæ, quam proprii filii sui sanguine acquisivit.

§. 2.

Quis vero finis est regiminis in Ecclesia constituti si quæras, en tibi clarissimam æque, ac certissimam responsionem ex divino eloquio, omnium-

*) Orig. & antiq. Christ. tom. 5, part. 1, cap. 1.

omniumque Catholicorum unanimi consensu, ut *unum* esset corpus omnium Christi fidelium. Jam non potes non agnoscere finem regiminis in Ecclesia instituti: *Unitas est Corporis*. Potesne adhuc de medio dubitare, eoque optimo? Tuum proprium corpus, quod *physicum* est, aliaque corpora, quæ *moralia* sunt, interroga. Quid dicunt tibi? Quid? Nisi ut unum sit corpus, medium aptissimum, optimumque: *Unitas est capitis*. Ubi ergo unum corpus, ibi unum caput, unus, isque supremus Regens, seu Imperans, verbo: *Monarcha*. Tunc amplius de forma regiminis dubitas, eaque optima, hoc est, *Monarchica*?

§. 3.

Si in hac humana ratione, utut fere omnibus communi nondum satis fiduciæ ponis, en, quod majus est, divini verbi autoritatem! Christus *unum* Simonem, quem & Petrum vocavit, ceu Ecclesiæ suæ fundamentum constituit; huic *uni* claves regni cælorum promisit, id est, supremam gubernandi potestatem, eamque illimitatam, ut posset *quæcunque* aut ligare, aut solvere. Porro unum sibi gregem fidelium Christus elegit, unum voluit esse suum ovile, cui *unum* loco sui Pastorem præfecit, qui est Petrus. Denique ut una fides, quæ vera, & divina est, firmiter in Ecclesia conservaretur, Christus omnibus Apostolis in corpore congregatis *unum* præposuit Petrum, ceu caput, cui curam totius corporis imposuit, omnes scilicet fratres in fide conservandi, seu confirmandi. Hunc ergo, qui solus supremam, & illimitatam accepit potestatem, cui soli totum ovile ad pascendum, sive regendum est commissum, a quo solo ceteri in fide sunt roborandi, ut firma permaneat, hunc tu adhuc dubitabis *unum Regentem*, eumque supremum, & universalem dicere, Monarcham?

§. 4.

Quam naturalis sit, sinceraque hæc nostra S. Scripturæ interpretatio, vel ex ore acatholici viri, eruditione longe celeberrimi addisce. Hugo Grotius est, qui ita scribit *): „Sicut exercitus, sicut navis regi, non potest, nisi per gradus Præfectorum, qui gradus in *unum* desinant, ita nec Ecclesia. Etiam si omnes, qui sunt in Ecclesia, essent dilectione summa præditi; tamen tali ordine esset opus, Deus non amat facere semper miracula, sed ad res optimas, etiam *optimas* monstravit
„vias,

*) In animad. Riveti. tom. 4. P. 641. edit. 1679.

„vias, qualis est ad unitatem Ecclesiae certus ordo. Hic ordo quis esse deberet, monstravit in Petro Christus: ei enim claves regni caelorum dedit pro toto Collegio tamquam Collegii Principi. Locus Cypriani, „cujus particulam citat Rivetus, aperte dicit, quod volumus *). Loquitur Dominus ad Petrum, ego dico tibi: inquit, quia tu es Petrus, & super illam Petram aedificabo Ecclesiam meam, & porta inferorum non vincunt eam. Et tibi dabo claves regni caelorum, & quae ligaveris super terram, erunt ligatae & in caelis, & quaecunque solveris super terram, erunt soluta & in caelis. Et iterum idem post resurrectionem suam dicit: Pasce oves meas. „Super illum unum aedificat Ecclesiam suam, & illi pascendas mandat oves.“ Quod ille A catholicus tam aperte in S. Scripturis, & SS. Patribus vidit, & sincere fassus est; id Febronius multo suo studio non viderit? Aut forte isidorianis Decretalibus etiam ipse Hugo Grotius fuit deceptus? Næ! Sanctos Evangelistas principiis istarum Decretalium, adeo nostris diluculariis maledictarum, jam occupatos fuisse dicendum est: Quis autem illos hisce occupavit, quis tam malitiose, si fides Febronio est, decepit? —

§. 5.

Ita sane antiquitus crediderunt, & locuti sunt Patres nostri, quos magno possem tibi numero compellare **). Nemo hactenus impune monarchicum Ecclesiae regimen impugnare est ausus, quin a catholicae fidei defensoribus reprobatus fuerit, rejectusque. Id elapso primum seculo expertus est Edmundus Richerius vel ipsius Sorbonae decreto abjectus teste Defensore Declarationis Cleri Gallicani ***). Hodiedum ita credunt, ita loquuntur omnes, quotquot Catholici, qui falsam vocem Febronii abominantur asserentis ****), *formam Ecclesiae non esse monarchicam*. Item *****): „Nondum in naturam Primatus sollicite (etiamne sincere?) inquirimus, eam in statu monarchico, huiusque juribus nullatenus deprehendimus: hunc siquidem statum ab Ecclesia penitus exulare — probavimus. (Ubi?) Sed ne unicum quidem effectum juris „monarchici in sacro nostro Primatu, qualis a Christo institutus, & ante „falsas

*) Ita de Cypriano Grotius, & nostri hodie Catholici?

**) Vide Manschii Orig. & antiq. Christ. tom. 5, cap. 1, §. 3, praecipue §. 5.

***) Defens. Decl. Cong. Cler. Gallic. Part. 2, lib. 6, cap. 24.

****) De Stat. Eccles. tom. 1, c. 1, §. 5. *****) Ibid. c. 2, §. 4.

„falsas decretales (equus arundineus Febronii) exercitus est; in Ecclesia deprehendi — demonstrabimus.“ Apologista ejus, aut si malis, suus hoc punctum ut *fundamentale* respicit *), vere monarchicam negans rogininis formam, quippe non *absolute* monarchicam. Nisi astute duas res diversas in unam confunderet Scriptor ille; a Duumviris inter Protestantes jurisperitos præstantissimis errorem suum posset dedoceri, a Grotio **), & Puffendorffio ***), qui satis adcuratum faciunt discrimen inter *absolutam*, & simpliciter *summam*, quæ adhuc vera est, Monarchiam. Hæc est, ubi unus, & universalis, atque supremus in republica, etsi & ipse certis regendi regulis adstrictus, Imperans est, quem Galli *Souverain* nominant; illa adest concipitur potius, quam revera inter homines adsit, dum supremus Imperans tam absolutus est Dominus rerum, personarumque sibi subditarum, ut pro solius voluntatis suæ liberrimo arbitrio disponere omnia, quæ voluerit, de rebus, personisve sibi subditis possit, nulli alteri, quisquis ille fuerit, rationem redditurus. Enimvero hoc plebissimo sensu nullus in terris Monarcha datur præter solum Deum. Reges enim, & Principes nostri non pro mero voluntatis suæ placito dominari in subditos possunt, sed totius salus reipublicæ & ipsis norma debet esse, & regula, ad quæ observantiam obligati sunt, etsi non ab hominibus, certe autem a Deo judicandi. Jus hoc absolutum in Ecclesiam dominandi, prout placuerit, nemo Pontifici concesserit, sed tantum cum dependentia a lege absoluti Domini, prout decet Vicarium, & submissione, non quidem erga hominum, attamen erga Dei judicium. Hoc est, quod sibi vult illud axioma Catholicorum saltem sæculo jam quinto, adeoque ante Isidori decretales in Ecclesia vulgatum, uti patet ex Symmachi P. causa; atque etiam falsi sunt Episcopi cum Proceribus Francorum in causa Leonis III: *Summa Sedes a nemine judicatur* ****).

§. 6.

Sed & operæ pretium est, Gallorum hac super te doctrinam, quæ tam Febronius, quam nostri Febroniani plenis buccis gloriantur, atten-

*) Ibid. tom. 2. Flores sparsi §. 2. Hinc facile apparet, quid de toto Febroniano edificio judicandum sit, si tale est fundamentum.

**) De jure belli, & pacis l. 1, c. 3, §. 16.

***) De jure naturæ, & gentium l. 7, c. 6, §. 7.

****) Vide Ludov. Thomass. in Concil. Dissert. 15.

attentius nonnihil, & adcuratius perscrutari. A duobus principibus Gal-
liæ hominibus incipiam: primus, qui nos doceat, sit S. Bernardus, vel
apud ipsos adversarios, prout videri volunt, æstimandus. Sic autem
loquitur *): „Tu es, cui claves traditæ, cui oves creditæ sunt. Sunt
quidem & alii cæli janitores, & gregum Pastores, sed tu tanto glorio-
sius, quanto & differentius utrumque præ ceteris nomen hereditasti:
habent illi sibi assignatos greges, *singuli singulos*, tibi universi crediti,
unus unus. — Nonne si causa extiterit, tu Episcopo cælum clau-
dere, tu ipsum ab Episcopatu deponere, etiam & tradere Satanae po-
tes? Atque iterum **): „Plenitudo potestatis super universas orbis
Ecclesias singulari prærogativa Sedi apostolicæ donata est. Qui igitur
huic Potestati resistit, ordinationi Dei resistit. Potest, si utile judica-
verit, novos creare Episcopatus, ubi hæcenus non fuerunt, potest
eos, qui sunt, alios deprimere, alios sublimare, prout ratio sibi di-
ctaverit, ita, ut de Episcopis creare Archiepiscopos liceat, & e con-
verso, si necesse visum fuerit.“ Nihil hic de meo addam.

§. 7.

Angelicus Doctor S. Thomas ita scribit ***): „Sicut in uno speciali
populo unius Ecclesiæ requiritur unus Episcopus, qui sit totius populi Ca-
put; ita in toto populo christiano requiritur, quod unus sit totius Ecclesiæ
Caput. Item ad unitatem Ecclesiæ requiritur, quod omnes fideles in fide
conveniant. Circa vero ea, quæ fidei sunt, contingit quæstiones moveri.
Per diversitatem autem sententiarum divideretur Ecclesia, nisi in unitate
per unius sententiam conservaretur. Exigitur ergo ad unitatem Ecclesiæ
conservandam, quod sit unus, qui toti Ecclesiæ præsit. Manifestum
est autem, quod Christus Ecclesiæ in necessariis non defecit, quam
dilexit, & pro ea sanguinem suum fudit. — Non est igitur dubitan-
dum, quin ex ordinatione Christi unus toti Ecclesiæ præsit. Ad hæc
nulli dubium esse debet, quin Ecclesiæ regimen sit *optime* ordinatum,
utpote per eum dispositum, per quem Reges regnant, & legum Con-
ditores iusta decernunt. Optimum autem regimen multitudinis est, ut
regatur *per unum*, quod patet ex fine regiminis, qui est pax. Pax
enim, & unitas subditorum est finis regentis. Unitatis autem con-
gruentior causa est *unus*, quam *multi*. Manifestum est igitur, regimen
„Eccle-

I 2

*) Ad Eugen. de confid. l. 2, c. 8.

**) Cont. gent. lib. 4, cap. 76.

**) Epist. 131.

„Ecclesiæ sic esse dispositum, ut unus toti Ecclesiæ præsit.“ Itane etiam & traditioni conformiter Concilii Constantiensis decreta sess. 4. & 5? Si tamen hæc decreta extra schismatis tempus de certo, & indubitato Papa intelligenda forent. Sed amplius eundem S. Thomam audiamus ad ipsorum adeo Græcorum doctrinam provocantem *): „Habetur ex Græcorum Doctorum Autoritatibus, quod Romanus Pontifex habeat in Ecclesia plenitudinem Potestatis. Dicit Cyrillus Patriarcha Alexandrinus in loco Thesaurorum: *Sicut Christus accepit a Patre sceptrum Ecclesiæ gentium ex Israel egrediens super omnem principatum, & potestatem, super omne, quodcumque est, ut ei cuncta curventur; sic & Petro, & ejus successoribus plenissimam Potestatem plenissime commisit; uti etiam nulli alii, quam Petro Christus, quod suum est, plenum ipsi soli dedit.*“ Num etiam Græci Doctores, num ipse Cyrillus Alexandrinus quinto Ecclesiæ seculo decepti jam fuerant falsis Isidori decretalibus? Febroniani respondeant!

§. 8.

Ad primum nostrorum Cisalpinorum Antesignanum, Pontificiæ Authoritatis haud sane adulatorem, ad Parisiensis Universitatis celeberrimum Cancellarium, quem Constantiensis Concilii animam jure dixeris, ad Gersonium transeamus. Ita docet **): „Status Papalis est institutus a Christo supernaturaliter, & immediate tanquam Primatum, habens monarchicum, & regalem in ecclesiastica Hierarchia — quem statum quisquis impugnare, vel diminuire, vel alicui ecclesiastico statui coæquare præsumit, si hoc pertinaciter faciat, hæreticus est, schismaticus, impius, atque sacrilegus. Cadit enim in hæresin toties expresse damnatam a principio nascentis Ecclesiæ, usque hodie, tam per institutionem Christi, quam per traditionem totius Ecclesiæ in sacris eloquiis suis, & generalibus Conciliis.“ Hoc loco prævie Gersonius explicare videtur, quod postea Florentini Patres definierunt, *Petro gubernandæ universæ Ecclesiæ a Domino plenam potestatem traditam fuisse*, in confirmationem addentes, *quemadmodum etiam in gestis Conciliorum œcumenicorum, & SS. Canonibus continetur.* Patres non simpliciter dicunt *quemadmodum*, quasi restrictive, sed confirmative, *quemadmodum etiam καὶ ὡς τροπον καὶ*.

§. 9.

*) Cont. errores Græcorum c. 32.

**) De statu Ecclesiæ Confid. 1.

§. 9.

De episcopali quoque jurisdictione dignus est, qui audiatur Gersonius *): „Status praelationis episcopalis in Ecclesia quoad sui collationem primariam fuit immediate a Christo datus primis Apostolis, sicut status papalis Petro: licet postmodum talis collatio fieri potuit, & facta sit in successoribus per homines.“ Porro de usu, & exercitio potestatis episcopalis ita se exprimit **): „Status praelationis episcopalis habuit in Apostolis, & successoribus usum, vel exercitium suae potestatis sub Papa Petro, & Successoribus ejus, tamquam sub habente, vel habentibus plenitudinem fontalem episcopalis Auctoritatis. Unde & quoad talia minores Praelati, scilicet curati subsunt Episcopis, a quibus usus suae potestatis quandoque limitatur, vel arcetur. Et sic a Papa fieri posse circa Praelatos majores ex certis, & rationabilibus causis non est ambigendum.“ Atque iterum alibi ***): Status episcopalis quoad acquisitionem istius personae, & quoad exercitium subest rationabili Papae voluntati ad utilitatem Ecclesiae. — Nullam aliam politiam instituit Christus immutabiliter monarchicam, & quodammodo regulam, nisi Ecclesiam. Et oppositum sentientes in Ecclesia, quod fas est, esse plures Papas, aut quod quilibet Episcopus est in sua Diocesi Papa, vel Pastor supremus, aequalis Papae Romano, errant in fide, & unitate Ecclesiae. — Et si pertinaces maneant, judicandi sunt haeretici, sicut Marsilius de Padua, & quidam alii. Ita Patres nostri constanter, etiam Concilii constantiensis tempore crediderunt. Quid ad hæc, & similia Febronii Apologista? Responsum dat cordato viro indignum, quod vel adduxisse jam refutasse est. Sic habet ****): „Si crude omnino, generaliter, & prout sonant, accipi velint Gersonis verba; prudenter (imprudenter) dici potest, eum non loqui ex fonte juris ecclesiastici, & plena notione Ordinis episcopalis, sed animo quodam præoccupato ex usu, & disciplina.“ Qualis hæc responsio viri ad tuendam opinionis suae novitatem Gersonii auctoritatem implorantis, nunc autem eandem, ubi sibi contrariam videt, vilipendentis! Quid sentiendum de illis, qui homines appellant, quæ ipsi fidem non tribuunt? Si vel Gersonius a falsis præjudiciis liber non extitit Febronianorum iudicio, dicant aperte, quod sentiunt, totam Christi Ecclesiam errore fuisse involutam, atque a primæva fide defecisse. Respondeant mihi cum do-

I 3

ctis.

*) Confid. 2. **) Confid. 3. ***) De ascribilitate Papæ. Confid. 8.
****) De statu Eccles. tom. 2. Apol. p. 282.

Etis. Authore de *duabus Potestatibus* *) ex illis quærenti, ubinam ergo ecclesiasticam illius temporis doctrinam de re tam gravi, qualis est papalis, & episcopalis potestas, quærere debeamus, nisi apud Catholicos minime Pontifici addictos? An forte apud Hussitas? — Sed videant, quomodo illis Concilium constantiense patrocinetur, cujus tamen patrocinio gloriantur.

§. IO.

Cum Magistro suo Gersonio constanter sensit Universitas Parisiensis, quam Febronius pariter, ceu doctrinæ suæ patronam invocat. Anno 1542 Facultas theologica contra Lutheri errores ita se declaravit **): „Nec minus certum est, *unum* esse jure divino summum in Ecclesia christiana militante Pontificem, cui omnes Christiani parere tenentur.“ Eandem doctrinam postea in censuris pluries repetitis tradidit. Anno 1617 Marci Antonii de Dominis doctrinam, omnes Apostolos potestate æquales fuisse, tamquam hæreticam, & schismaticam rejecit, eo sensu, quo intelligitur de *jurisdictione apostolica, ordinaria, quæ in solo divo Petro subsistebat*. Notandum hic, quod Parisiensis Facultas jurisdictionem Apostolorum per universum orbem *extraordinariam*, scilicet pro necessitate illius temporis judicaverit, solius autem Petri *ordinariam*, quæ hodie dum Petri Successoris jurisdictio est, *apostolica*, eaque *ordinaria*. Ejusdem Antonii aliam propositionem, qua negavit, quod Christus immediate formam *monarchicam* instituerit, celeberrima Facultas sequenti censura repudiavit ***): „Hæc propositio est hæretica, schismatica, Ordinis hierarchici subversiva, & pacis Ecclesiæ perturbativa. Quem Primatum (NB. *formæ monarchicæ*) quisquis impugnare &c.“ Sequuntur verba formalia Gersonii supra §. 8 relata, ibi meam desuper vide animadversionem. Nonne pœniteat nostros Febronianos ad gallicanas sententias adpellasse?

§. II.

Unum ex præcipuis Galliæ Prælatiis, M. Bossuetum audiamus adulationis erga Papam haud merito suspectum, immo vel ab ipsis adversariis admodum commendatum, qui in sermone coram conventu Cleri gallicani habito ita perorat ****): „Roma, ut esset Caput Religionis, prædestinata, „vel

*) De l'Autorité des deux Puissances, tom. 2, p. 242.

**) Vide d'Argentré Collect. jud. tom. 1, part. 2.

***) Apud d'Argentré l. 2.

****) Serm. sur l'Unité de l'Eglise.

„vel ideo propria Petri Ecclesia debebat fieri: sic stabilita, fixaque Ro-
 „mae S. Petri aeterna Cathedra. Hæc est Romana Ecclesia, quæ per S. Pe-
 „trum, ejusque Successores instructa nullam noscit hæresin. — Ita semper
 „virgo est Romana Ecclesia, & fides Romana semper Ecclesiæ fides est.
 „Semper creditur, quod olim creditum fuit. Vox eadem ubique resonat,
 „& Petrus manet in suis Successoribus fundamentum fidelium. Jesus Chri-
 „stus hoc dixit: Cælum, & terra citius, quam ejus verbum transibunt.“
 Si Romana fides semper Ecclesiæ fides est, quis illam dicere fallibilem
 audeat? Quid juvat infallibilem dicere per accedentem Ecclesiæ consen-
 sum, cum necesse sit ex Verbo Dei hunc consensum accedere? Si fun-
 damentum Petrus est, quis dicat Petrum a fidelibus posse reformari?
 Nonne hoc pacto fideles forent Petri fundamentum, utpote qui ab illis
 in fide confirmaretur? De Bossueto speciali disquisitione, si Deus dede-
 rit, hoc adhuc anno disseram, an Declarationis Cleri gallicani famosa
 Defensio sub nomine tanti Viri edita ab ipso Authore sit.

§. 12.

Præclarissimum Petrum de Marca Febronius adpellat. Sic autem
 Præsul ille Parisiensis, etsi libertatum Gallicanarum defensor docet *):
 „Cum Ecclesia gallicana inter præcipua, & illustria Ecclesiæ universalis
 „membra censeatur, totius vero Corporis Caput in Ecclesia Romana sit
 „constitutum, fieri non potest, ut veræ Ecclesiæ libertatibus fruatur;
 „nisi Capituli hujus Communioni inserta sit. Retineri autem illam Commu-
 „nioni non posse, ni officiis illis Caput excolatur, quæ principatui Apo-
 „stolicæ Sedis debentur, nemo sapius umquam negaverit. Docendum
 „itaque est, Gallos ab illis Ecclesiæ primordiis usque ad nostram ætatem,
 „& Communioni Ecclesiasticæ originem in Cathedra Petri constituisse,
 „& supremam Ecclesiæ Authoritatem huic Sedi collatam semper coluisse,
 „NB. juxta varios illos gradus, quibus eam pro bono publicæ disciplinæ,
 „temporis ratione habita Pontifices Romani explicare consueverunt.“
 Præclare idem Præsul scribit **): „Commune hoc officium Communionis
 „cum Ecclesia Romana, cui impendendo cum ceteris Provinciis Gallia
 „adstringitur, cognoverat ante omnes vetustissimus ille Lugdunensium
 „Antistes Irenæus, qui utrius scripsit; quod omnes sentiebant, ad Roma-
 „nam Ecclesiam propter potentiorum Principalitatem necesse est omnem convenire
 „Ecclesiam; quasi diceret juxta sinceriores illorum verborum interpreta-
 „tionem,

*) Concord. Sacerd. & Imp. lib 1, cap. 2. **) Ibid. 1, 2, c. 2.

„tionem, eam esse vim unitatis, quæ principatum, & originem a Petri Sede trahit, ut cum ea sentiendi *necessitatem* ceteris imponat.“ Ita S. Irenæus ex sinceriore interpretatione, ut de Marca testatur; & fides Petri *reformabilis*, aut *fallibilis* sit, cum qua convenire *necesse est*? Quo modo *reformabilis* possit esse iudex, cum quo *necessario* sentiendum est? Datur & alius Petri de Marca locus hodiernis nostris Canonistis summe notabilis, ubi ita ait *): „In septima Synodo primatus Romani Pontificis emicuit: & enim non solius *confessus* **) prærogativa, dignitasque Sedis Apostolicæ, sed etiam *summa* illa Authoritas admixta est, quæ conventibus ecclesiasticis *Conciliis œcumenicis* robur conferre debeat.“ Si in synodo universim jam recepta, eaque græca hoc agnitum, Papæ non tantum prærogativam confessus convenire, sed summam Authoritatem, quæ Conciliis œcumenicis suum robur det; quis est Catholicorum, qui neget ipsis Conciliis Papam esse superiorem? Ceterum non nego Petrum de Marca etiam talia scripsisse, quæ Pontificiis Juribus iniqua sunt, quippe qui tam Regi, quam Papæ placere voluit. At Deo sit laus, pœnitentem habemus, & confitentem, siquidem teste Stephano Balutio ***) ultimo opus suum paulo ante mortem edidit pro asserenda Papæ infallibilitate in fidei quæstionibus decernendis. Quid? quod & publico instrumento coram Notario, & testibus anno 1677, die 19 Augusti omnia revocavit, quæ in præjudicium supremæ Jurisdictionis Pontificiæ, & immunitatis ecclesiasticæ scripserat. Cum tam multi sint hodie, qui Petrum & Febronium secuti sunt peccantes; quid est, quod tam pauci sequantur pœnitentes??

§. 13.

Denique inter primarios Galliæ Theologos celeberr. P. Natalis Alexander loquatur, qui tam fortis est divinum Petri Primatum contra hæreticos defendendo; quam infirmus sacra jura hujus primatus inter Orthodoxos deprimendo. Dogmaticam is tractans quæstionem multis probat Ecclesiæ regimen ex institutione Christi esse *monarchicum* ****): 1^{mo}, quia *optima* regiminis forma est monarchica, omnibus aliis antecellens ipsa natura teste, quæ unum Regem apibus, gregibus Ducem, armentis unum Rectorem præficit: ipso etiam naturæ Authore id demonstrante, qui in cœlestibus

*) Ibid. l. 5, c. 14.

**) Ita habet editio Neapolitana A. 1771, alibi loco *confessus* legitur *consensus*.

) In vita Petri de Marca n. 26. *) Hist. eccles. Sec. I, Dissert. 4, §. 2.

stibus Hierarchiis unum Angelum constituit ceterorum Ducem, ac Præsidem. 2^{do}, quia in Ecclesia veteris Testamenti ab Aarone unus semper summus Pontifex præfuit, seu sacerdotum Princeps, idque ex divinæ legis decreto Deut. XVII. Cum vetus Synagoga fuerit Ecclesiæ Christi figura; ratio postulat, ut, sicut in illa præter Deum invisibilem semper unum fuerat caput visibile, ita & in hac præter Christum adhuc alius, & aspectabilis esset Rector, NB. ne societas Ministrorum V. T. magis ordinaretur. 3^{io}, Idem probatur ex similitudinibus, quibus in S. Scripturis designatur Ecclesia. Dicitur castrorum acies ordinata: atqui in acie ordinata præter inferiores ordinis Duces unus debet esse supremus Imperator. Ecclesia navis est, in qua per Baptismum salvamur: atqui unus Nauclerus, qui singulis nautis sua munia præscribat, navi præesse debet. Ecclesia ovile est; numquid vero in ovili præter minores opiliones non est aliquis summus Pastor, cujus est universim oves regere? Ecclesia domus est: nonne vero unus Dominus, aut fidelis, & prudens Oeconomus domui præest, qualem Christus in Petro significavit? Demum Ecclesia unum Corpus est: quemadmodum igitur in membrorum multitudine Caput unicum datur, cujus est singula membra, & totum corpus dirigere; ita in Ecclesia Christi unum Caput supremum esse oportet.

§. 14.

Dum alibi Natalis Alexander Pontificiam Potestatem deprimit, & Ecclesiam esse supra Papam contendit; ipse viderit, quomodo secum se conciliet. Quid respondere posset, si quæreres, an Christus *optimam* regiminis formam, quæ ipso Natali teste *monarchica* est, vere instituerit? Aut an *perfectior* Ordo inter Sacerdotes Synagogæ, quam Ecclesiæ a Deo fuerit constitutus? An castrorum acies suum Imperatorem saltem *collella* regere possit? An nautæ, si *simul omnes*, sint suo Nauclero superiores? An ovium turba *universa* viam suo Pastori ostendere possit, & præscribere? An domus incolæ *omnes* autoritate prævaleant Domino, vel ejus Vicario? An corporis *totius*, sive membrorum *universim* sit caput suum dirigere? An non denique ædificium suam firmitatem a fundamentum habere debeat? Cur enim, & ad quid Christus præ aliis Apostolis Petrum Ecclesiæ fundamentum esse voluit, si ipse ab Ecclesia firmandus est? Nonne ita quilibet alius homo, ne dicam Apostolus, firmus in fide stat, si ab Ecclesia sulcitur? Nonne in eodem sensu quilibet alius

K

Apo-

Apostolus Ecclesiæ fundamentum dici poterat, & reipsa fuerat? Cur Christus singulariter ad Petrum dixit, ab ipso in fide confirmandos esse Apostolos *NB.* tunc in Corpore collectos: *Confirma fratres tuos?* Cur non in verso sermone ad Corpus Apostolorum dixit: *Vos confirmate Simonem vestrum fratrem?* Nonne ineptus, sibi que repugnans sermo fuisset, si Christus Apostolis dixisset: *Vos Petrum, qui vestrum fundamentum est, confirmate?* Anne hic sermo sine blasphemia Christo assigni posset? Nonne ergo saltem idem sensus apertissime falsus est? Præterea, si Romana Ecclesia Mater, & Magistra veritatis est, ut omnes Catholici ex ore plurimorum Conciliorum profitentur; si ad hanc Ecclesiam propter suam principalem Doctore S. Irenæo necesse est omnibus convenire fideibus; fierine potest, ut errorem doceat, & accedente consensu Ecclesiarum *indigeat*, cum istæ dissentire *non possint*, si catholicae maneant? Fierine potest, ut pontificia definitio, si in se fallibilis sit; interno mentis assensu tamquam veritas divinæ fidei credatur, quod tamen vel ipsi Galliæ Doctores, quin & Episcopi in causa Jansenianæ hæresis confessi sunt, homini catholico esse necessarium? Si dogma fidei non alia sit auctoritate, quam per *universalem* Ecclesiarum consensum; nonne sic impossibile est dogma fidei definiri, si una, alterave, aut plures Ecclesiæ particulares in errorem incidant, quod jam tempore S. Cypriani factum; imo si totæ regiones, aut amplior mundi pars a fide deficient, quod tristi Orientalium, & Græcorum schismate jam contigit, vel ante alterum Christi adventum adhuc contingeret? Ubicum in simili casu infallibile iudicium? In Ecclesia universali? Hujus autem consensus non adest, si, ut ponitur, particulares Ecclesiæ dissentiant. Quis est ergo iudex, qui particularem Ecclesiam erroris, aut hæresis ream damnare, præsumat, si nulla sit fidei certitudo, nisi per *universalem* Ecclesiarum consensum? Fingas, si velis, pluralitatem Ecclesiarum recte creditum; ubinam vero scriptum est, traditumve numerum majorem particularium Ecclesiarum a fide non posse deficere? Forte quod tu ponis fieri non posse, actu jam est factum, aut fiet postea. Numquid rogavit Christus Deum Patrem, ne *plurium* Ecclesiarum fides deficiat? Nonne *tantum* rogavit pro Petri fide indefectibili? Quid? Si in tua hypothesi Pontifex erraret, majorque pars Ecclesiarum ab illo dissentiret; hæcne major pars, corpus capite truncatum, corpus Christi foret, qui unum instituit corpus cum *uno* Capite conjunctum, unam ædificavit domum a *fundamento suo*, quod Petrus est, inseparabilem? Nonne adversus Christum

stum blasphemaret, qui diceret, ad eo ita improvide institutam fuisse Ecclesiam, ut in confusione quasi babylonica fuerit relicta? Hisce respondeant, si possint, Pontificiæ Præminentia adversarii! Nos simplici Verbo Dei credimus: *Fiat unum ovile, & unus Pastor*, quod idem est, ac *unus Regens*.

§. 15.

Plurimi adhuc forent celebres ex Gallia Theologi, atque Juris-consulti, quorum egregia testimonia pro *monarchica* Pontificis potestate possem producere, nisi brevitati studerem: Siquis illa pro historia potissimum litteraria nosse desideret; adire poterit Petrum Ballerinium *): item librum gallice scriptum *de duabus Potestatibus* **): præcipue autem anonimi Authoris doctissimi opus Faventia A. 1779 editum, cui integer tractatus *de Isidorianis decretalibus* eruditione præstans annexus est ***). Unicum tamen, idque decretorium gallicanæ doctrinæ testimonium non possum non adhuc commemorare, unde manifeste apparebit, quid vel ipsi Galli de Basileensibus decretis contra Summi Pontificis Authoritatem senserint. A. 1441 Caroli VII Francorum Regis nomine ad Eugenium IV legatus Meldenfis Episcopus Petrus, prout in mandatis habuit, post seriam consultationem Prælatorum, aliorumque multorum Regni sapientum peroravit, quod documentum integrum dat Reinaldus ****). Ante omnia Eugenium Papam, ceu alterum Petrum *naufragio scissimæ* periclitantis navis Patronum invocat, tum vero ita pergit: „Nam tuum Principatum *monarchicum* esse a Deo, nedum secundum communem universi providentiam, sed etiam speciali institutione inter opera Restaurationis mundi a Christo institutum, teque vera, legitimaque successione illum possidere patet, iam recognoscimus, & confitemur. Ipsam Potestatem *monarchicam* suppressimere conati sunt Basileenses, & nimio fervore resistendi ad hanc vesaniam devenerunt, quod *supremam* Potestatem in uno supposito consistere denegant, sed etiam in multitudine, quæ cito in diversa scinditur, collocant, & sic pulcherrimam *Monarchiam* Ecclesiæ, quæ Christianos hucusque tenuit in unitate fidei, in una professione Religionis christianæ, in uno ritu Sacramentorum, in una observantia man-

K 2

„dato-

*) De vi, ac ratione Primatus R. P. cap. 14. §. 2 &c.

**) De l'Autorité des deux Puissances tom. 2. cap. 2. art. 4.

***.) Romani Pontificis summa Authoritas, jus, & præstantia, lib. 2 per totum.

****.) Ad an. 1441 ex Codice Vaticanæ 4177.

„datorum, in eisdem cæremoniis divini cultus, atque pacem, & tranquillitatem asseruit, nunc abolere, & supprimere contendunt, nobisissimam politicam, quæ beatitudinem cœlestem habet pro fine, ad *Democraticam*, vel *Aristocraticam* redigentes. — — Hoc animadvertens, præfatus christianissimus Rex Franciæ vehementi dolore ingemiscit, & condolens Ecclesiæ remedia ubique perquirat. Concilium olim Basileense veritatem de suprema Põtestate *in uno* extinguere pertentavit. Concilium autem Florentinum hanc veritatem bene quidem lucidavit, „ut patet in decreto Græcorum.“ Tunc ad conterendam obstinatorum pertinaciam, non quasi ex rei ipsius necessitate suadet Pontifici novum universale Concilium, „quod ad relevandam summæ Sedis, & Curiæ Authoritatem a Papa rite celebretur, reguletur, & modificetur secundum mores Patrum, & antiquorum Conciliorum, ubi non audiantur tumultuosi clamores.“ Sicut antea in Conventu Constantiensi, & Basileensi factum.

Porro Meldenensis Episcopus affert exemplum Dathan, Core & Abiron, „qui nolentes obedire Aaron summo Sacerdoti dicebant, *omnis multitudo Sanctorum est, & in ipsis est Dominus*, & non attendebant „ad Moysen clamantem pro obedientia, & eam superexaltantem, dum eis diceret, *quid est Aaron, quid est Aaron, ut murmuretis contra eum!* „Ideo in exemplum, & terrorem omnium inobedientium terra ipsos vivos absorbit. Itaque omnis multitudo, quæ Dei legibus frenatur, „*Monarchiam*, tamquam legationem Dei omnipotentis pro obedientia „complectitur, & veneratur, et maxime *in spiritualibus*. — Quid quæso magis posset in perpetuitatem schismatis tendere, quam *Monarchiam* „Ecclesiæ, quæ Christianos tenuit in unitate, tollere, & abolere; quam „Authoritatem *supremam* multitudini, quæ cito scinditur, tribuere; quam „potestatem judicandi superiores inferioribus dare? Et sic de multis „aliis, quæ in practica, & doctrina Basileensium concurrunt, quibus semel junctis, & stantibus non est pax in Ecclesia Dei possibilis. — — Hæc autem dicta sunt in publico, ut omnibus innotescat pia, & sancta Regis nostri christianissimi intentio. Non enim in hac causa adhæret carni, & sanguini, sed tantummodo revelationes Dei Patris, „qui in cœlis est, sequitur, secundum quas revelationes, prout ad eum „pervenerunt per doctrinam Sanctorum, & Ecclesiæ, Te summum Pontificem, Te Principem Ecclesiæ, Te Vicarium Christi recolit, & venera-

„neratur.“ Si hodierni Galli Constantiensibus, & Basileensibus decretis quasi extra schismatis tempus valituris applaudunt; nonne vel hoc testimonio Præfulum suorum convincuntur, a fide Patrum se discedere, & jam in via novitatis, seu quod idem est, erroris incedere? At enim vero absit hoc de Galliæ Clero credere! Alia illius & gesta, & dicta ante oculos habemus.

EXCURSUS I.

In doctrinam Gallicanam de superioritate Conciliorum, & libertatibus, quas prætendunt, particularibus.

§. I.

Quid vero ad hoc gallicanæ Nationis testimonium, quod sane decretorium est, Defensor Declarationis gallicanæ respondet? Potesne negare, quod Odoricus Reinaldus voluit, Monarchiam, id est, *supremam in uno* potestatem, adeoque *supra universam Ecclesiam* sive dispersam, sive congregatam a gallicana Præfulum legatione fuisse agnitam, defensamque? Quisquis fuerit Defensor ille, ipse fatetur *), „ecclesiasticam Monarchiam tamquam pæcis, unitatisque conciliatricem ab *omnibus Catholicis*, „præsertim vero Parisiensibus Theologis laudari.“ Habemus ergo jam vel ab ipso adversario *catholicam* Gallorum confessionem de Monarchia ecclesiastica. Sensum autem genuinum hujus confessionis in sua Responsione misere detorquet, quasi *summa ipsa* cum Parisiensium recentiore doctrina conveniret. Expresse enim a Petro Gallorum Legato talis Monarchia defenditur, quæ est *suprema in uno* potestas, & non in multitudine, id est, consensu plurium. Itane Parisienses Doctores? Expresse iterum Basileensibus objicitur, quod *Monarchiam* abolere conati fuerint, & *Aristocratiam* introducere in multitudine Præfulum *supremam* potestatem ponendo. Quid est hoc, nisi ipsa Parisiensium doctrina, in *concilio Præfulum supremam esse potestatem*? Hinc etiam manifeste elucet, in illa gallicana Legatione non tantum *posteriora*, sed etiam *priora* Concilii Basileensis fuisse rejecta, quia vel initium, & totum fundamentum Basileensium fuit, ut verbo Legati utar, *ex insania*, qua supremam authoritatem non *in uno solo*, sed *in multitudine* collocarunt. Hanc eandem cum Basileensibus doctrinam

K 3

ctinam

*) Defens. Decl. gall. P. 2. l. 6. c. 16.

Strinam esse Parisiensem Scriptor ille in tota Responsione sua ad Petri Meldenfis Episcopi Legationem caute, verius autem callide dissimulat, quasi sicut sermo Petri tantum de *moderno usu* supremæ Potestatis Pontificiæ tractabat; ita etiam, & non alia doctrina foret Declarationis gallicanæ, quæ tamen Pontifici ipsam *supremam potestatem* satis clare Propos. 2 & 4 negavit, & *irreformabilem* Authoritatem in Concilio œcumenico, proh pudor! etiam a Papa diviso constituit. Hic verus est quæstionis, & controversiæ status, quem ille astute hoc loco abscondere studet, cum tamen alibi nostræ sententiæ Patronis audenter imputet, ab ipsis statum quæstionis inverti. Reliqua, quæ adhuc respondet, tam infirma sunt, ut prudenter contemnantur; ridicula forent, si tantæ rei gravitas risum indulgeret: fingit enim politicam artem in Meldenfi Episcopo, & Gallicæ Legato, qui ad restaurationem salutis a Christo factam, & non ad carnis vel sanguinis respectum, sed ad Revelationes Dei Patris, ad traditionem Sanctorum, & Ecclesiæ, ad finem beatitudinis cælestis provocat. Item vuculas *nunc & olim* contra manifestum contextus sensum ridicule ad ea detorquet, quæ persuadere vult. Ita totus ille liber aut falsitatibus historicis, aut artificiosis veritatis detorsionibus plenus est. Authorem interim Pseudo-Bossuetum dicam, dante Deo autem ostendam.

§. 2.

Quid ergo, inquires, duorum Conciliorum generalium, Constantinensis, & Basileensis decreta fidei, item celeberrima Cleri gallicani declaratio erroris arguantur? Verbo tibi dicam, decreta illa utriusque Concilii jam sua in radice esse vitiata, nec ab Ecclesia catholica pro œcumenicis, aut *conciliaribus* umquam fuisse admissa, sed a Pontificibus rejecta, neque ab ipsis Gallis pro fidei dogmate agnosci, neque demum extra schismatis tempus ullum habere posse valorem, quippe quæ aperte nimis contra S. Scripturæ veritatem, & contra totius ecclesiasticæ antiquitatis traditionem pugnant. Ceterum jam non est locus (erit autem suo forsan tempore) hanc materiam densissimis spinis involutam adcuratius discutiendi. Quod vero ad famosam spectat Cleri gallicani Declarationem, qua summum Pontificem generalibus Conciliis *inferiorem* esse asseritur, ejusque judicium in fidei quæstionibus non *irreformabile*, nisi saltem per accedentem Ecclesiæ consensum; respondeo nihil nos quidem hac particulari, & catholicæ Ecclesiæ sensui contraria Declaratione moveri: argumenta siquidem nil probant, & Authoritas deest. ^{imo} enim illa Gallo-
rum

rum quorundam Præfulum Declaratio apud nos Germanos communi Doctorum calculo usque ad novissimos vix amplius viginti annos fuit rejecta. In Hispania vero ab officio Inquisitionis anno 1683, die 10 Julii decretum fuit emissum, quo assertio hæc: *Concilium est supra Papam, erronea, & schismatica declaratur.* Item Archiepiscopus Strigoniensis, & Regni Hungarici Primas Georgius dictus Zelepechimus per litteras encyclicas ad universos Christi fideles in Hungaria existentes anno 1686, die 24 Octobr. Declarationis gallicanæ propositiones, ut *absurdas, & plane detestabiles, a Satana ministris disseminatas* abjecit, proscripsitque; easdem Episcopi confutarunt, & censuris confixerunt. 2do, Summi etiam Pontifices, Innocentius XI, ejusque Successor Alexander VIII, & Innocentius XII Comitia hæc a Clero gallicano anno 1682 habita reprobarunt. 3tio, Ea ipsa demum internis, externisque laborant vitiis: pugnant enim contra constantem ipsius Ecclesiæ gallicanæ doctrinam, quæ adhuc seculo XVII viguit, uti patet ex edicto, quod in conventu de anno 1626 editum, & ad omnes Regni Episcopos fuit directum, ubi Papa expressis verbis dicitur *Ecclesiæ universalis Caput visibile, Deique in terris Vicarius, Episcopus Episcoporum, & Patriarcha Patriarcharum. Successor Petri — super quem Christus Ecclesiam suam fundavit, quando illi claves regni celorum, atque infallibilitatis donum in causis fidei reliquit.* Ejusdem seculi dimidio idem adhuc testabantur Galliæ Præsules in duabus litteris ad Innocentium X datis, in quarum una legitur, *in Sede apostolica fidem Petri nunquam deficere:* in altera vero hæc: *Judicia pro sancienda regula fidei a summis Pontificibus lata super Episcoporum consultatione divina æque, ac summa per universam Ecclesiam Autoritate mitti.* Interim quis crederet? post paucos annos inter Papam, & Regem excitata gravi dissensione non plures, quam 34 Episcopi in Comitibus, non in quodam nationali Concilio congregantur, aliis, qui jure suffragii potiebantur, in re tanti momenti nequidem vocatis. Ubique exilia personant, spolia contra illos intentantur, qui jam præordinata declarare recusent, & sic sine votorum libertate, vi & metu Declaratio extorquetur. Postea quoque Academiæ Parisiensi violentia inferitur, ita ut Senatu incassum convocato, & turbis inter Doctores excitatis, illorum consensu non expectato Notarius jussus sit academicæ tabulæ Declarationem affigere. Non multo tamen postea illi ipsi Præsules, inter quos M. Bossuetus, prænitentia ducti anno 1692 ad Innocentium XII litteras dederunt, quibus contestati sunt, se ex animo dolere, & ultra id, ac dici possit, quod in Comitibus statuta fecerint, quæ Sanctitati Sux displicerent, adeo, ut ipsi-

met, quæcumque in suis Comitibus sive circa ecclesiasticam Potestatem, & Pontificis Auctoritatem, sive in præjudicium jurium Ecclesiarum decreta sint, pro non decretis haberent, serio insuper spondentes, ita in posterum se gessuros, ut nihil penitus de vera sua erga summam Sedem obedientia desiderandum superfit. Ipse adeo Rex Ludovicus XIV eidem Innocentio XII rescripsit, se velle edictum, quo hæc Comitia confirmaverat, revocare, ut omni jam effectû careat. *)

§. 3.

Siquis ex recentioribus Galliæ Comitibus de *Pontificia, & Episcopali* potestate doctrinam velit addicere; talia nobis offert eximius Florentiæ Archiepiscopus, nomine Franciscus Cajetanus Icontri, ex quibus duo tantum producam præclaris laudibus celebranda. Prima sunt Comitia A. 1685 habita, in quibus de Romano Pontifice hæc proferuntur: „Ca-
put est Ecclesiæ, & Centrum unitatis. Obtinet ille in nos Primatum
„authoritatis, & jurisdictionis sibi a Christo in persona S. Petri colla-
„tam. Qui ab hac veritate dissentiret, schismaticus, imo hæreticus
„esset.“ Longe alia hæc Gallorum doctrina, quam Febronii. Secunda
extraordinarie celebrata Comitia hæc fuere de anno 1728, quæ de
episcopali Potestate ita statuunt: „Jesús Christus ipse *sua institutione* li-
„mites præscripsit huic Potestati, quam subjecit Sedi Petri, in qua po-
„suit plenitudinem apostolicæ Potestatis.“ Ceterum supra Cleri galli-
cani Auctoritatem plurimum nobis prævalet universæ Ecclesiæ Autho-
ritas, quæ post illa duo Concilia, scilicet Constantiense, & Basileense
quam firmissime Potestatis Pontificiæ *plenitudinem*, atque *supereminentiam*
stabilivit; in Florentino primum Concilio, ubi definitum fuit **): „Ro-
„mano Pontifici in B. Petro pascendi, regendi, & gubernandi *universam*
„Ecclesiam a Domino *plenam* potestatem traditam fuisse, quemadmodum
„*etiam* in gestis Conciliorum œcumenicorum, & SS. Canonibus conti-
„netur.“ Particula *etiam*, sive &, quæ hoc loco eundem sensum dar,
manifeste denotat, hanc clausulam in confirmationem Pontificiæ Autho-
ritatis ex antiquis Ecclesiæ documentis, non vero ad ejusdem restrictionem
fuisse adjectam. Quomodo enim per œcumenica Concilia ipse Euge-
nius IV in Florentino prædens intellexerit Constantiense, & Basileen-
se, quæ a se ipso adeo pro œcumenicis agnita non fuerant, ut etiam
expresse rejecta; tantum ea si excipias, quæ in Constantiensi contra
Hære-

*) Gravelon Tom. 8, fol. 49. **) Sess. 25.

Hæreticos unanimi Præfulum consensu, nempe *conciliariter*, acta Martianus V approbaverat? Præterea si Patres Florentini Pontificis potestatem ex antiqua doctrina SS. Conciliorum, & Canonum *restrictam* judicassent, & sibi ipsis in eadem sententia contradixissent, & nobis imposuissent, (quod nefas cogitatu) *plenam* vocando Pontificis potestatem gubernandi *universam* Ecclesiam. Concilium autem Lateranense V clarissime declaravit *) : *Romanum Pontificem Auctoritatem super omnia Concilia habere.*

§. 4.

Haud sane inutile fuerit, ipsorum etiam Græcorum de Pontificia Auctoritate confessionem percipere. Bessarion Patriarcha Constantinopolitanus antea Græcorum schismate involutus, in Synodo vero Florentina errorem suum dedotus epistolam encyclicam ad omnes sui Patriarchatus Archiepiscopos dedit hujus tenoris: „Si Doctorum nostrorum libros evolveritis, invenietis Romanam Ecclesiam supra ceteras „omnes potestatem habere, & ita *universa* præesse Ecclesiæ, ut absque „ejus auctoritate nulla prorsus ecclesiastica quæstio solvi, nullum dogma concludi possit, aut debeat. — Hæc est, quæ fidem Petri tenet, „& prædicat: hæc sola est, adveniens quam portæ inferi non prævalent „bunt.“ Alter Græcus, qui pariter Florentiæ Concilio interfuit Josephus Methonensis Episcopus in Responsione ad libellum Marci Ephesini eum ita alloquitur: „A te porro emendari Romanam Ecclesiam nil opus „erat. Nam illa cunctarum est gubernatrix Ecclesiarum, & ægrotantibus Ecclesiis peritissime medetur, cum potestatem a Christo accepit regendi alias, & gubernandi, non ut ipsa confirmetur ab aliis. Et tu, „inquit Salvator ad Petrum, aliquando conversus confirma fratres „tuos: non dixit, *confirmare* a fratribus tuis, sed *confirma*.“ Ita vel græci Doctores cum latinis conveniunt in textu hoc interpretando. Revera autem sacer textus in alium sensum sine manifesta vi, vel fraude detorqueri nequit. O si plerique Doctorum nostrorum voluntatem non haberent, sed tantum intellectum; per caput hoc meum cælum obtestor, non unum fore aliquem, cui divina ad Petrum eloquia satis clara non forent, ut adeo naturalem nostram, & communionem interpretationem inficiaretur. Ah! Sublimis illa cogitatio Paschalis, gallici Scriptoris

*) Sess. 10.

ptoris hic mihi in membra recurrit *): *Veritas sat luminis habet, ut cum ratione cor bonum credat: sat obscuritatis, ut malum rer voluntario prætutu excacetur.*

§. 5.

Hac forsan occasione molestam mihi, & odiosam plane questionem facies, quid ergo de *libertatibus* Ecclesiarum particularium sit sentiendum, quas Galli adeo aestimant, ut non nisi pro vita, & sanguine darent? Scio, quantum humanis auribus blandiatur captiosum illud nomen *libertas*, quo multi adeo decipiuntur, ut falsæ libertatis prætextu a via veritatis, & salutis aberrant. Si tu mihi particularium Ecclesiarum certa, quæ gratiarum sunt, privilegia, aut stabilitas inter se invicem prærogativas, aut publica pacta, & Concordata cum Supremo Ecclesiæ Rectore inita, atque ab eodem confirmata libertates nomines; ego quidem proprio nomine illa potius dicerem, id quod revera sunt, scapham enim oportet scapham vocari; attamen res illas omnes probo, seu privilegia sint, seu prærogativæ, seu demum pacta, & Concordata: omnia illa salva sint, & integra maneat. Verum enimvero non hoc est, quod nomine præsentis libertatis adversus Papam solet intelligi. Antequam hac de re meam ego dicam sententiam, velim tu mihi respondeas, quid de exemptione ab obedientia cuicumque legitimo Superiori præstanda tute sentias? Si illam quibusdam in casibus licitam putes; nonne saltem fundamentum firmum requires hujus exemptionis? Quid tu cogitares de subito generatim quidem obedientiam suo Principi præclaris verbis spondente, in specte vero mandata Principis, nisi placeant, prætextu libertatis recusante? Edic porro, an humanum valere possit quodcumque privilegium se eximendi ab obedientia supremo Capiti ab ipso Deo immediate instituto debita? Edant Galli, si possunt, libertatum suarum legitimam auctoritatem, quarum vel notionem claram, & constantem dare nequeunt, hinc merito reformidant. Ego vero pauca nunc de putativæ ipsorum *libertatis* notione, origine, & auctoritate, item extensione, ac demum utilitate dicam.

§. 6.

Inprimis quidem si apud ipsos Gallos decantatæ suæ libertatis definitionem claram, & completam requiras, e. g. apud Renatum Chopin-
num

*) Penées sur la Religion. Chap. 18.

num a), Guidobem Coquillum b), Chrystoporum Justellum c), Petrum etiam de Marca d), aliosque; tam parum inde luminis hauries, ut natura & indoles hujus libertatis, quæ antea latebat, jam studiosius tibi occultata videatur. Jacobus Leschasserius in Senatu Parisiensi Præfidentis tractatum edidit *adversus omnes exigentes, ut Francia iudices libertatum suarum notitiam exponant, & auctoritatem assignent*; quo pariter scripto Gallis insinuat, se non teneri ad molestas ejusmodi quæstiones respondere. Communior tamen Gallorum doctrina videtur cum illa Petri de Marca convenire *): *Vera & genuina definitio hujus libertatis ex sensu Ecclesiæ gallicanæ est usus antiqui juris communis*. Obscuritatem, seu notionis claræ defectum vel ipse de Marca hoc loco inspexit: hinc addidit, aliud esse jus commune antiquissimum, quod aliquos Canones, & decreta Pontificum complexitur; aliud jus antiquum commune, quod illis ipsis Canonibus, atque etiam decretalibus Pontificum recentioribus constat, prout in Gallia usu recepto temperatæ sunt: hoc ultimo jure ait libertates suas contineri. Mihi vero eadem adhuc caligo præ oculis esse videtur. Usus receptus Canonum ipsa sit Gallorum libertas? Si id de libertate ab antiquis Canonibus pro tua Patria non datis, aut in ea nunquam receptis, & Superiore quidem consentiente intelligas; tecum sentio. Hinc Galli antiquorum Canonum collectiones e. g. Apostolorum, Dionysianam, Isidorianam, Gratianam, aliasve merito poterant recusare, aut pro suo juris usu temperare. At contra, si legem spectes actualem, & recentiorem, cujus proin antea usus non erat, postea tamen usu receptam; tunc hunc receptæ legis usum vocabis *libertatem*? Ego sane non aliter possum nominare, quam continuatam fideliter legis observantiam, sive *obedientiam*. Dic, obsecro! cum recentior lex quædam apud Gallos reciperetur; sane usus antiquior, utpote novæ legi contrarius, non poterat causa esse hujus receptionis: quænam ergo fuit causa? An denovo Gallorum libertas, an legis ipsius obligatio? Si primum; non ergo *usus* est, quo Gallorum libertas nititur, sed propria illorum vel utendi lege, vel non utendi *voluntas*. Quam misera hæc libertas omnibus peccatoribus communis! Sin vero alterum; ergo quod falso Galli libertatem vocant, vera est legis obligatio: ergo, hodieum tanta est vis novæ legis ad obligandum Gallos, sicut olim ipsorum Patres ad obediendum se crediderunt obligatos.

L 2

a) De secul. Politia. b) Instit. tit. *de jure regio*. c) Epist. ad Leschasser.
d) Concord. inter Sacerd. & Imper.

*) Conc. l. 3. c. 1.

gatos. Ecce enim hodie minus sit autoritatis in Petri Vicario, quam antiquitus? Illa antiquissima saltem Pontificum decreta vim legis sua ex origine habuisse, vel ipsi Galli testantur. Quid est, quod temporis lapsu pontificia autoritas perdiderit? Antiquus usus, inquit, fortissima Gallis lex est, quæ novis decretis prævalet. Bene jam nunc quidem loqueris *legem* vocando antiquum morem, quem antea perperam *libertatem* vocasti: est enim libertas naturali sua significatione non lex, sed immunitas a lege. Satis interim de improprio sermone; nunc de infirmis fundamentis gallicanæ libertatis.

§. 7.

De origine, & autoritate libertatis gallicanæ si quæras; sunt, qui cum Fleurio existiment, ne quidem nomen illius ante Seculum XIII notum fuisse. Equidem Petrus de Marca contendit *), praxin gallicanæ libertatis nova decreta ecclesiastica examinandi, admittendi, rejiciendi, temperandi antiquissimam esse, ejusque primum exemplum ad Seculum V refert. Verum Author Operis *de libertatibus Ecclesiæ gallicanæ*, qui fuisse creditur P. Antonius Charles S. J., invictis rationibus Marcam confutavit, ostenditque, prætensas libertates initio Seculi XIV originem traxisse a magno illo dissidio inter Papam Bonifacium VIII, & Regem Philippum pulchrum; porro incrementum accepisse a tristissimo schismate ejusdem seculi, usque ad Gallorum pragmaticam sanctionem, veluti thesaurum, & promptuarium Galliæ libertatum. Harum itaque vel ipsa origo vitiosa fuit: ut enim duobus verbis omnia complectar, ex una parte fuit Principum in jura ecclesiastica invasio; ex altera parte Sacerdotum erga Principes adulatio, utpote quibus magis cordi fuerat studium data occasione se amplificandi, quam firma obedientia, eaque aliquoties durior, quod non diffiteor, centro unitatis adhærendi. O utinam turbidis illis temporibus subordinati Ecclesiæ Pastores justa, & æqua sibi levamina, non autem etiam iniqua, & impossibilia obtentu petissent! Utinam obedientiæ magis memores, quam independentiæ studiosi sese uni supremo totius corporis Capiti æquiparare, atque etiam præferre, & sic ordinem pro unitatis bono a Deo institutum magno dissensionis scandalo pervertere non attentassent!

§. 8.

*) Concord. l. 2. c. 17.

§. 8.

Quænam vero Autoritas est, qua Gallorum prætenfa libertas nitatur? Mirum! si Petro de Marca credimus, vel ipsa hæc Pontificia Autoritas est, ita enim loquitur *): „Ecclesiæ Gallicanæ libertatem antiquitus eo præcipue fundamento niti, ut *supremam* Apostolicæ Sedis „Autoritatem & profiteatur, & omnibus officiis colat.“ Hæc sane teste de Marca antiquitus Gallorum gloria fuerit, uti revera fuit, Apostolicæ Sedis *supremam* Autoritatem agnovisse, & omnibus debitæ submissionis officiis coluisse. Hæc inquam antiqua submissionis gloria Gallis debetur. Agnita enim Papæ suprema Autoritas fundamentum erat antiquitus gloriose submissionis. Sed prò dedecus! De eo jam quæritur, unde *recentior* Gallorum erga Autoritatem Apostolicam non submissionis, immo & renitentia libertas? Heu quantum ab illa antiqua gloria supremam Papæ Autoritatem omnibus officiis colentium, distat recentior quorundam Gallorum gloriatio summi Pontificis Autoritatem infra subditos deprimentium! Non ergo, ut fucum vult facere de Marca, Pontificia Autoritas, sed potius Pontificiæ Autoritatis depressio primum est iactatæ libertatis fundamentum. Sed & ipse Petrus de Marca sincerius adhuc mentem suam aperit, ubi ait **): „Supereft, ut alterum non „minoris momenti fundamentum aggrediamur, quod in *suprema* Regis „christianissimi per Gallias Autoritate situm est.“ Fateantur tantum, quod diffiteri non amplius possunt, Gallicani illi Doctores, se Ecclesiam suam, ne serva Papæ videretur, servam Regis, immo non tam Regis, quam Parlamenti effecisse. Qui ferat hoc catholica auris, ubi de Regimine ecclesiastico divinitus instituto, sive de Apostolico animarum Pastoratu sermo est, Regis politici *supremam* dici Autoritatem! Hanc Ecclesiæ gallicanæ duram servitutem, quam falso nomine libertatem vocant, avertat Deus a Germanis nostris, ne ignominiose ambiant! Antiqua Patriæ gloria nobis maneat, *regnum obedientiæ* esse erga Christi Vicarium; non illam Gallis invidemus, *regnum* dici *libertatis*. Numquid enim non vera est descriptio hujus fictitiæ libertatis, quam gallicus Author fecit illam vocando ***)) *oppressionem jurisdictionis ecclesiasticæ a laica, & depressionem Autoritatis Romani Pontificis a Clero gallicano?*

L 3

§. 9.

*) Conc. 1. 4. c. 2. n. 1.

**) Conc. 1. 2. c. 1.

***) De libert. Eccles. gallic. lib. 1. cap. 13.

Cum prætenſa contra ſummum Pontificem libertas aperte nimium omni authoritate externa deſtituatur; hinc plerique illius Patroni interno illam niti fundamento contendunt; antiquo ſcilicet more, & uſu recepto. Hanc libertatem magno verborum apparatu commendant, hanc omni jure Eccleſiis particularibus convenire volunt, quæ eſt libertas *veterem Canonum, aut conſuetudinis diſciplinam contra Pontificias innovationes ſervandi*. Ipſam hanc utut ſpecioſam aſſertionem in *theſi*, ſive generaliter falſam eſſe, facile demonſtravero. Notum quippe omnibus eſt, qui vel a limine legiſprudentiæ ſtudio ſalutarunt, eam debere eſſe rationem ſicut legum civilium, ita Canonum quoque eccleſiaſticorum, ut perſonis, locis & temporibus ſint conformes; adeoque pro diverſis circumſtantiis perſonarum, locorum, & maxime temporum leges quoque eſſe variandas, atque hinc antiquas cedere recentioribus debere. Nonne enim cum primi Canones ſtatuerentur, circumſtantiis illorum temporum fuerunt accommodati? His ergo immutatis nonne & illos mutari oportet? Aut num eadem non amplius authoritas Eccleſiæ eſt pro diſciplina canones ſtatuerendi, ſicut olim fuerat quarto præcipue, & quinto ſeculo? Numquid non Canones antiqui (quod dolendum) per ſolam non obſervantiam uti in Gallia, ita & in Germania fere omnes jam aboliti? Si vel per ſubditos potuerunt aboleri; cur a Superiore, ſi expediens fore judicet, non poſſint? Heu quantum hodiernæ libertates, quæ prætenduntur, ab antiquis Canonibus diſtant! De conſuetudine quid dicam? Nonne omnis conſuetudo etiam bona expreſſæ legi Imperantis cedere debet? Quid vero, ſi plerumque malæ ſint, non bonæ conſuetudines, quæ per nova decreta emendantur? Quodſi Eccleſiis liceat conſuetudinis prætextu pontificia decreta in irritum mittere; nonne idem licitum eſt quoad episcopalia? Quid ergo ſi Parochi, immo ſi & laici contra Episcopos ſui diocæſana ſtatuta conſuetudinis ſuæ libertatem prætenderent? Ex his abunde patet, in *theſi* falſam eſſe eam aſſertionem, quæ in veteri uſu ſubditorum jus agnoſcat contra Superioris recentiorem legem excipiendi. De uſibus vero quibusdam in *hypothefi*, ſeu plane ſingularibus ſi loquamur, quorum mutatio cum *notabili* jactura, vel forte ſcandalo conjuncta eſſet; haud negaverim hos manuteneri poſſe, immo & debere, NB. ſalva tamen debita Superiori reverentia. Hinc ne tum quidem audacter, aut potius contra Legislatorem licet rēni; ſed ea, qua par eſt, ſubmiſſione eidem motiva in contrarium ſunt exponenda, atque etiam illius adhuc

huc iudicio standum, si majus bonum *generale* minori bono *particulari* præferendum judicaverit. Non est, cur multum huic regulæ immorer; satis eam Curialistæ Archi- vel Episcopales norunt, si quis inferior Pastor audeat illis resistere. Pone pontificiam legem in particularibus Ecclesiis adhuc episcopali *Placeto* indigere; nonne sequeretur, quemlibet particularem Episcopum, quippe qui Papæ sententiam saltem pro sua Ecclesia diducare, eandem approbare, vel rejicere posset, ipso Pontifice esse in sua Diœcesi superiorem? Quid, si hoc Parochus contra episcopale decretum sua in Parochia attentaret? Quænam tunc unitas seu in particularibus Ecclesiis, seu in universali?

§. IO.

Multas adhuc gratias Petro de Marca debemus, qui extensionem prætenfarum Galliæ libertatum sincere nobis, & aperte declaravit in-quiens *): *Libertates perinde tuemur, si de Concilio generalis novis decretis, ac si de Romani Pontificis constitutionibus agatur.* Ex quo apparet, Gallos quosdam tam firmiter, verius dicas, tam perfracte suis libertatibus plane fictitiis adherere, ut ne generalis quidem Concilii velint Authoritati asfurgere. Quam tamen sic dictam libertatem nolis credere penes Episcopos esse, sed penes regios Magistratus. Servi sunt illi, isti Domini. Hinc factum, ut Concilii Tridentini Canones ad disciplinam spectantes in particularibus Galliæ Ecclesiis valorem non haberent, nisi postea primum per accedentem *regiam*, seu *Parlamenti* adprobationem. Quanta ergo inscitia, vel malevolentia in plerisque nostris est canonici juris, ut dici volunt, Reformatoribus, qui toties decantatas Galliæ libertates Pontificiæ potius, quam totius Ecclesiæ Authoritati solent opponere! Ecclesiasticas leges, æque *Conciliares* ac *Pontificias* Galli suæ regię Authoritati, quæ potissimum in Parlamento residet, submittunt. Sive Papa infallibilis sit, sive non; vel Superior Conciliis, vel inferior; nihil hoc ad prætenfas pertinet libertates, vel ipso iterum de Marca l. c. fatente. „Non est, quod hæreamus in ea regulâ, quæ Romanis stomachum movet, & quæ rebus nostris non prospicit, ut par est. Fruatur summus Pontifex æquo jure cum Conciliis generalibus, aut superiori. Illud unum in foro expendetur, an nova Constitutio, vel novum Rescriptum rebus Gallicis consulat, vel noceat.“ Nulla est igitur apud Gallos ullius Potestatis ecclesiasticæ attentio, si nova lex utilitati profanæ, & caducæ proficua

*) Conc. l. 3. c. 7.

cua a Regis Magistratu non censeatur, utpote ejus in rebus etiam ecclesiasticis suprema est Autoritas. Mala quidem omnino, & contra Ecclesiæ libertatem a Christo donatam *theoretica* hæc doctrina est; sed & in laudem celebratissimi Cleri Galliæ fatendum, longe meliorem ejusdem *prædicam* esse, id quod omni fere ævo Gallia prompta sua erga summam, & apostolicam Sedem obedientia fecit manifestum.

§. II.

Ut demum etiam de gallicanæ libertatis utilitate pauca dicamus; fructus ejusdem est a suavi jugo Ecclesiæ exemptio, sed sub longe graviore onere secularis dominationis oppressio. Enimvero in Gallia Magistratus laici rerum, & negotiorum ecclesiasticorum fere omnium sibi judicium arrogant sub prætextu conservandæ libertatis, corrigendi abusus, tuendæ possessionis, & similibus. Res eo devenit, ut Clerus fuerit coactus gravamina sua Regi præsentare dicendo *): „Gallicana Ecclesia, o Rex! „a tuis iudicibus in suis libertatibus non levamen, protectionem & fructum retulit, sed oppressionem & incommoda.“ Hæc fuit æqua licet, lucrosa tamen merces, quam, ut suis obsecundarent figmentis, gallicani quondam Præsules retulerunt, nulla ipsis accedente utilitate, quin subito inclinata Nationi magno dedecore, & summo tam particularis suæ, quam universæ Ecclesiæ dispendio. Ut enim Scriptor quidam pereruditus ait, supremo fidelium Pastori, & Christi Vicario vestem detrahere conati sunt pretiosissimam, nempe supereminentiam jurisdictionis, & inerrantiæ, pro qua, ut integra maneret, & splendida, tot illorum Prædecessores virtute, & scientia spectatissimi pro viribus defudarunt. Longe aliam, eamque veram, ac multo meliorem Ecclesiæ libertatem, præ recentioribus Gallis agnoverunt Sancti quidam Angliæ Præsules, quam cum Apostolica Sede filiali obedientia conjuncti gloriosissime usque ad exilium, & sanguinem propugnarunt. — Sed neque Galliæ defunt exempla optimorum Præsulum — neque etiam defunt, ne hodiernis quidem diebus, Germaniæ nostræ. — Æquum nunc judicium ferri poterit, quid de particularium Ecclesiarum libertatibus adeo nostris diebus deprædicatis sit sentiendum. Non satis ego quidem mirari possum, & dolere, Scriptores germanos, qui tanto amaritudinis zelo æstuant adversus exemptionem ab ordinaria potestate Archi- vel Episcoporum, etiamsi legitima Autoritate suffultam; tanto in contrarium fervore defendere ænigmaticam, ne-

*) Cahier du Clergé présenté au Roi, Ao. 1614.

nescias quam, particularium Ecclesiarum libertatem, sive quod idem est, exemptionem ab obedientia supremo Pontifici, totius Ecclesiæ Capiti, & Christi in universa terra Vicario præstanda, atque ab omnibus, quotquot publico Ecclesiæ ministerio adscripti sunt, solemniter jurata. —

§. 12.

Antequam finem huic cum Gallis disceptationi faciam; haud abs re fuerit magni momenti Reflexionem ex doctiss. Petiti didier hoc loco describere; est autem hæc *): „Quod omnes Ss. Patres, omnes Autores „ecclesiastici, & omnes scholastici Doctores, qui de primatu Papæ, ejus „dem absoluta Autoritate in Ecclesia, & infallibilitate scripserunt, hæc „privilegia Petri in vulgatis textibus S. Evangelii fundata existimaverint; „*Tu es Petrus &c. Ego rogavi pro te &c. Pasce oves meas.* Sive enim ex „presse hos textus allegarunt, sive si minus expresse, eosdem saltem „aperte supposuerunt, & per ea, quæ dixerant, clare insinuarunt. Illi „non particulares sunt Patres, quibus alii contradixerint. Non simpli- „citer doctrina est unius, aut duorum seculorum, sed in una serie om- „nium; non tantum occidentalis Ecclesiæ, verum etiam orientalis. „Æque Græci, ac Latini hac super re sese explicarunt in Conciliis etiam „universalibus: uno verbo hæc tota Ecclesiæ traditio est. Et cum num- „quam permissum, immo expresse a Patribus Tridentinis prohibitum fue- „rit, Scripturas divinas in sensu Ss. Patribus, multoque magis toti tradi- „tioni contrario interpretari; videant illi, qui hodiernis diebus contra „dixerunt, hæc apostolicæ Sedis privilegia in allegatis textibus fundari, „videant, an defendi possit ipsorum contentio, an non e contrario per „Tridentinum Concilium jam condemnata sit.“ Nec est, cur dicant, unice Primatum Petri fuisse a Ss. Patribus defensum; ita enim Ss. Patres nostri Primatum Petri ex allatis Scripturæ textibus deduxerant, ut eosdem sicuti nos in naturali, & obvio sensu intellexerint, adeoque in eo sensu, qui supremam Petri in universalem Ecclesiam jurisdictionem, & infallibilitatis privilegium manifeste comprehendit. Enimvero quod a multis Theologis jam observatum fuit, animis suis DD. adversarii perpendant: si prædictos textus pro suo, & maxime Febroniano more in sensum adeo alienum a litterali detorqueere licet; jam ipsum Ecclesiæ dogma de *Primatu Petri*, quem nemo Catholicorum salva fide, & salute sua negare potest,

*) *Traité theolog. Chap. 13.*

potest, omni suo fundamento destituunt, & firmum jus Hæreticis in manus tradunt pro negando Petri Primatu eundem in sensum S. Scripturam detorquendi. Demum & hoc mihi sincero corde dicant: si talem in Ecclesia sua Primatum Christus instituit, qui limitibus circumscriptus sit, iisque non determinatis usque in hodiernum diem, immo nunc maxime controversis; idne sapienter Christus fecerit, & fini suo conformiter, unitatem in Ecclesia, pacem & tranquillitatem conservandi? Non mihi peto, optime Lector! sed proprio cordi tuo responsum.

§. 13.

Dubium tibi forsân adhuc superest circa quorundam Patrum interpretationem, qui *Petram*, supra quam fundata est Ecclesia, fidem Petri, seu confessionem Christi Divinitatis fuisse putarunt, aut qui *claves cælorum* toti Ecclesiæ in Petro traditas docuerunt. Si qua tibi cum SS. Patribus familiaritas; non credam id serio a te opponi: neque enim vel unicus inter illos est, qui nostram planè naturalem verborum Christi interpretationem aut neget, aut omnino contrariam defendat; sunt tantum aliqui, qui doctrinæ moralis gratia figurato in sensu verba Christi explicant. Id quippe est Patribus usitatum, prætermisso sensu litterali, haud tamen negato, impropriam aliquam, pro suo autem ædificationis scopò aptam S. Scripturæ dare explicationem. Sic e.g. Parabolam de decem Virginibus multiplici in sensu *moralis* Patres explicant; nihilominus verissimum manet, & innegabile, in sensu proprio & *litterali* Christum voluisse nos ad vigilantiam propter subitaneum Domini adventum adhortari. Ita & Patres illi, uti S. Hilarius in libris *de Trinitate* ad commendandam fidem in Dei Filium, eandem nostræ salutis fundamentum, seu *Petram*, qua christiana Ecclesia nititur, jure merito vocarunt. Hic autem *tropicus* sensus contra *proprium*, & naturalem nullatenus pugnat, quem nemo antiquorum in Ecclesia negare umquam ausus est. Pace igitur mea tu *Petram* dicas fidem, quam Petrus confessus est: ita dum *objectum* potius, quam *subiectum* firmitatis Ecclesiæ nominas; meminisse tamen te oportet, hæc duo separari non posse, sed standum esse in fide Petri, qui non frustra a Domino hoc nomen accepit, & pro quo, ne a fide deficeret, non frustra Dei Filius Patrem rogavit. Porro ad litteralem sensum necesse est te reduci per *claves regni cælorum* ita manibus Petri assignatas, ut nequeant ad fidei abstractam professionem detorqueri: & tibi dabo *claves regni cælorum*, Christus dicebat Petrum alloquens, non utique fidem Petri quasi personificans. §. 14.

§. 14.

Hujus loci aliam quoque, figuratam, quæ S. Augustini est *), interpretationem libenter admitto: „Petrus Apostolus propter Apostolatus sui primatum *Ecclesiæ* gerebat figurata quadam generalitate personam. Quod enim ad ipsum proprie pertinet, natura *unus* homo erat, gratia *unus* Christianus, abundantiore gratia *unus*, idemque *primus* Apostolus. At quando ei dictum est, *tibi dabo claves* &c. universam significabat Ecclesiam.“ Ita omnino, subtiliter licet pro more Augustini, veraciter tamen! Petrus unus, idemque primus inter Apostolos supremam clavium potestatem accipiendo totam repræsentabat Ecclesiam. Quid inde concludas? Non soli Petro, sed *universæ* Ecclesiæ jus clavium administrandarum esse concessum? ergone & Laicis? Sed vide! qui Episcopis, quos defendendos suscipis, sua jura, ne dicam, amplifices, tantum facta & integra conserves. Vide, ne in hæresin jam damnatam incidas laicorum quoque manibus Ecclesiæ claves committendo. Vel solam rationem, si malis, potius, quam fidem attende, & magni Magistri Augustini sententiam facile assequeris. Princeps reipublicæ non suam *unius*, sed *populi totius* personam gerit, quippe in quo non sua tantum, sed omnium conjuncta potestas est. Quid inde? Anne dices universum regnum administrandi jus esse penes omnes? Nonne vel ideo, quia in una figurata totius populi persona, id est, in Principe, conjuncta omnium potestas est, consequitur administrationis *jus* penes unicum, *fructum* vero penes omnes esse? Velim etiam, ut observes cum doctis, Cerboni **) propter hæresin Montanistarum nonnullos Patres asseruisse, Petro fuisse claves collatas ut Ecclesiam repræsentanti. Montanistæ enim peccata graviora in Ecclesia dimitti posse negantes suum inde tuebantur errorem, quod ligandi, solvendive potestatem ita soli Petro datam existerent, ut cum eo interierit.

Tertullianus jam ex secta istorum hominum in libro *de pudicitia* contendit, Petro personaliter, non vero Ecclesiæ posteriori claves a Christo traditas fuisse. Quapropter ad refellendos hæreticos S. Augustinus cum aliis quibusdam Patribus defendit claves regni cælorum non unice Petro, sed toti Ecclesiæ perpetuo duraturæ datas fuisse in Petro

M 2

Eccle-

*) *Tractat. 224. in Joan.*

**) De jure, & legum disciplina tom. 2. lib. 18. cap. 1. §. 5.

Ecclesiam representante *): „Si hoc Petro tantum dictum est, hoc non „facit Ecclesia: si autem in Ecclesia sit: — Petrus quando claves accepit, Ecclesiam sanctam significavit.“ Tunc ex hisce verbis colliges, toti Ecclesiae jus esse claves caelorum administrandi? Quid putas, an populus totus supremam in regno potestatem exercendi jus habet? Nonne id soli Principi omnium subditorum nomine proprium est? Eodem sensu quo Princeps est quasi *universalis* persona totum populum representans, cujus est suos subditos regere; ex mente S. Augustini Petrus universam Ecclesiam, quam regendam susceperat, significabat, quippe ad cujus perpetuam utilitatem claves caelorum fuerint Petro, ceu Ecclesiae Principi a Christo commissae. *Tu es Petrus, & super hanc petram aedificabo Ecclesiam meam: — & tibi dabo claves regni caelorum.*

EXCURSUS II.

In doctrinam bodiarnam Germanorum de concordatis, forma regiminis mixta, & falso axiome Canonistarum.

§. I.

Missis jam Gallis video ingentem quasi exercitum recentissimorum Germaniae Publicistarum adversum me, tantum non patriae proditorem, & Concordatorum violatorem elatis júbis assurgere. Ita certe editores libelli admodum mihi, antequam ipse monumenta historica maturius librarem, commendati **) casibus, quibus Concordata infringuntur, N. 4. annumerant, *si vel disputari superioritas Concilii in Papam praesumeretur*. Unde subito tanta lux nostris diluculariis orta est, ut post trecentos, & amplius annos ea nunc videant, quae ab origine Concordatorum ipsi Germaniae Doctores non viderint? Notum est enim, quod communi Theologorum nostrorum, immo teste Zalweinio etiam Canonistarum consensu, & quidem ad Germaniae nostrae gloriam Papae superioritas supra Ecclesiam fuerit defensa ***). Primus, quantum scio, fuit doctissimus alias Barthelius, qui singularitate doctrinae, prout morbus est doctorum, forsitan allectus praëminentiam Conciliorum quasi pacto Germanis

*) Tract. 50. in Joann.

**) Concordata Nationis Germanicae integra variis addidamentis illustrata. 1771.

***) Principia juris ecclesiastici, Tom. 4. Quæst. 3. cap. 3.

Germanis a Papa concessam defendere tentavit *), sed infelici Marte: Præterquam enim, quod scire Theologum oportuisset, rem illam natura sua ejusmodi esse, de qua inter homines nequaquam transigi posset, quippe cum non de *usu*, sed de ipsa *Potestate* Pontificia, eaque divinitus instituta ageretur; etiam tale pactum de Eugenio IV cogitari non potest, qui constanter usque ad mortem in Basileensibus reprobavit, quidquid contra apostolicæ Sedis auctoritatem attentaverant. Quid? quod expresse in epistola Francisco Foscari Venetiarum Duci professus est **): „Potius paratum se apostolicam dignitatem, & insuper vitam ponere, „quam vellet esse causa, & initium, ut pontificalis dignitas, & Sedis „apostolicæ auctoritas submitteretur Concilio contra omnes canonicas „sanctiones, quod numquam antea neque aliquis Prædecessorum fecerit, „neque ab ullo fuerit requisitum.

§. 2.

Jam vero ipsas artes, & cavillationes juristicas discutiamus. Falso præjudicio factum est, inquiunt, ut pro integris Nationis germanicæ Concordatis sola illa Aschaffenburgensia de ao. 1448 haberentur: sed huc quam maxime spectant prævii tractatus cum Papa Eugenio IV habiti, & ab eodem initi. Immo isti *regulam* pacti constituunt; illa vero Aschaffenburgensia tantum a regula *exceptionem*, utpote in quibus Papæ promissa recompensatio tandem actu sub Nicolao V fuit præstita. Hoc stabilito principio jam sic argumentantur: ao. 1439 Moguntia sub Alberto Rege Romanorum a Principibus acceptata fuerunt decreta Concilii Basileensis, in specie illud *de auctoritate, & potestate sacrorum generalium Conciliorum*: item ex Sess. 31 decretum *Placuit*, in quo expresse Synodorum universalium jurisdictio ita asseritur, ut nulli relinquatur ambigendi occasio, universale Concilium habere auctoritatem, cui quilibet, etiam si papalis sit dignitatis, obedire teneatur. Insuper ao. 1446 Electores Imperii fœdere inter se inito præminentiam Conciliorum a Basileensibus decretam ita stabiliverunt, ut data mutuo fide se obligarent, non aliter; nisi sub hac conditione velle se Pontifici obedientiam præstare. Hanc porro utramque Germanorum acceptionem Eugenius Papa ratam habuit, & confirmavit duabus Bullis a. 1447 Non. Februar. una quæ incipit: *Ad ea ex debito*; altera: *Ad tranquillitatem*. Itaque hæc

M 3

Basile-

*) Tractatus historico - canonico - pragmaticus: c. 1. §. 13. &c.

**) Rainald, ad a. 1433. n. 19.

Basileensium decretorum acceptatio ex parte Germanorum; & ejusdem ex parte Pontificis approbatio firmissimam germanici Concordati regulam efficiunt, cui etiam Aschaffenburgenfis excepto in præfenti materia de Conciliorum Præminetia adeo non officit, ut & novum inde robur accedat. Præmissis enim ab illa priori regula quibusdam exceptionibus in fine novo addidamento regula generalis stabilitur per hæc verba, *in aliis jam permissis nihil fuisse immutatum*. Ita fere plerique magno cum applausu hodierni Publicitæ. Hinc plenis buccis gloriantur *integra Germania Concordata* per clar. Horixium fuisse feliciter inventa *).

§. 3.

Principio illorum pacis, & brevitatis gratia interim omisso, si ita velis, germanici Concordati regulam vocaveris prævios tractatus, Aschaffenburgensem autem a regula exceptionem. Nihil jam istud moror: falsum tamen esse suo loco ostendam. Quæ vero ex historica rerum veritate nunc sophistica argumentationi opponam, duo sunt. Primum: *Multo probabilius est, quod Natio germanica doctrinam de Præminetia Conciliorum numquam acceptaverit*. Alterum: *Res certa est, quod in banc doctrinam nec Eugenius IV, nec Nicolaus V unquam consenserint*. Et primum quidem satis aperte colligi potest ex ipso Acceptationis instrumento, ubi Principes anno 1439 quædam Concilii Basileensis decreta, salvis tamen declarationibus, modificationibus, & limitationibus acceptarunt, &, quod rei caput est, expressa cum protestatione contra omnia ea, quæ adversus Eugenium a Basileensibus fuerant statuta; ubi non solum actualis suspensionis decretum Principes germani exceperunt, sed & alia, quæ illam suspensionem concernunt, vel quomodolibet respiciunt. Quænam vero sint illa alia, quæ suspensionem Eugenii magis respiciebant, nisi toties illa recocta Basileensium crambe, *universali Concilio etiam Papam esse subiectum*? Nonne posito hoc principio Basileenses Eugenium sibi refractarium jure, & legitima potestate deponere potuerunt? Huic ergo principio contradixisse Germanos juste colliges. Amplius id vel ex ipso, siquis aliis, Papis summe infenso Fleurii Continuatore patet**). Cum enim Basileenses Deputati in conventu moguntino a Principibus exigenter, ut nisi Eugenius statutis Concilii pareret, ejus obedientiam abdicarent, Conchenfis Episcopus.

*) Horixius ille a. 1758 librum de *fontibus juris canonici* adeo perniciosum edidit, ut ipsemet lætator Moguntinus eundem anno posteriori condemnare debuerit.

**) Tom. 27. ad a. 1439. §. 52.

seopus coram publico conventu protestatus est, *quomodo conditionem nē a summo Pontifice acceptari posse, nec unquam Germaniā Principes aequitatis amantiores in eam consensuros.* Hoc sermone repulsi Basileenses præcipuo legationis suæ effectu frustrati sunt. Is ergo tunc fuit Germanorum sensus, ut nec ipsi quid vellent, in quod viderent, Papam consentire non posse: nihil autem erat dignitati Pontificis, ejusdemque consensui magis repugnans, quam sui erga Concilium subjectio.

§. 4.

Quæ autem ex Basileæ decretis Germani acceptarunt, ea unice referebantur ad suorum gravaminum levamen, in specie quoad electionum libertatem, nominationem ad beneficia, nec non & annatas. Hinc tantum quæ sibi pro usu disciplinari, & *practico* inservire videbantur, ex Basileæ decretis amplexi sunt, non vero singula eorundem argumenta, totamque *theoriam*. Sic, quod DD. Adversariis bene fuisset observandum, cum decretum *Placuit* circa gratias expectativas, beneficiorum reservationes, & collationes ad viros litteratos & graduatos varia disposuerit, hæc *practica* statuta fuerunt in levamen gravaminum a Germanis assumpta, hoc est, illorum decretorum Basileensium *Resultata*, non vero omnes *speculative* illorum rationes, nec illa in decretum *Placuit* introductio, quam si Germani adoptassent, neutrales erga Concilium se gerere non potuissent, eoquod damnationis sententiam erga non obtemperantes Concilio, hoc est, erga se ipsos approbassent. Demum & hoc nota dignum, quod Principes Germaniæ in illa acceptance *generaliter* tantum Authoritatem universaliū Conciliorum, non vero *specificè* illam odiosam, & Papæ oppositam Præeminentiam memoraverint: immo expresse tantum in Concilio Constantiensi capitulum *Frequens*, ubi de *practica* Conciliorum celebratione agitur, adoptarunt; non vero nota illa sess. 4 & 5 decreta, ubi *theoretica* de Conciliorum superioritate doctrina continetur. Ita semper germanica Natio, quod hactenus in ipsius laudem cesserat, cum summo Pontifice mitius agebat, & moderatius, iis, quæ in Basileensium decretis nimium erant odiosa, expunctis.

§. 5.

Quod vero ad postulatam Conventionem Francofordiensem de anno 1446 spectat, notandum duo hoc anno Comitibus ibidem fuisse, quorum prima non totius Nationis, sed tantum sex Electorum fuerant. Hos inter duo

duo Archiepiscopi, Trevirensis, & Colonienfis, aperte schismatici, & iuste a Papa depositi, reliqui vero partium studio abrepti iniquo pacto adversus Eugenium se mutuo obstrinxerunt; invito, & reprobante Imperatore. Postulatum igitur Electorum, ut Papa constantiense decretum de *Conciliorum præeminentia* in sensu a Basileensibus depravato profiteretur, haud integræ fuit Nationis, sed potior Germanorum pars neutralitati addicta una cum Cæsare Friderico III tantum declarationem ab Eugenio expectebant, quod *Autoritatem Conciliorum colat*, N.B. *sine Pontificæ Autoritatis injuria*: schismatici enim ipsum de contemptis conciliis, etiam rite celebratis invidiose criminabantur, suisque mendaciis jam plures in errorem traxerant, ut apud Rainaldum legitur *). Ceterum illius historiæ testem, quo certe nemo melior, Æneam Sylvium, totius tractationis præcipuum Authorem ex Kollario adducam **). Cum Principes Electores sua Secreta per legatos Cæsari indicassent, is eadem Æneæ suo Secretario aperuit, eumque ad Papam misit, ut illi consulta Principum, & Cæsaris mentem exponeret, quæ non alia fuit, quam ut pacis gratia Pontifex tantum hæc tria concederet. 1^{mo} Archiepiscopos depositos restitui, 2^{do} Nationi quoad gravamina opportune provideri, 3^{tio} decretum *Frequens* esse recipiendum. Ita Æneas seorsim ab aliis Principum legatis ad Papam vocatus, eidem pacis consilia Imperatoris nomine suavit, non illam, nimium Papæ odiosam propositionem de subjectione sua erga Concilium faciens, sed tantum, ut generatim Conciliorum generalium autoritatem fateretur. Reversus Roma Francofordiam Æneas jam in altero conventu Principes invenit congregatos, animosque ab Eugenio admodum alienos. Magna tamen arte sua id effecit, ut conditiones antea ab Electoribus positas, nimiumque asperas novis emolliret, quas *Notulas* vocavit. Notulæ istæ eadem tria puncta, jam prius Eugenio Cæsaris nomine proposita continebant, scilicet ut Archiepiscopi depositi restituerentur; ut Nationis gravaminibus opportune provideretur; ut demum autoritas Conciliorum salvaretur, quippe quam Germani ex falsis schismaticorum criminationibus a Pontifice contemni, & opprimi credebant. Hæ conditiones tam æquæ, & iustæ, prout revera fuerant, Moguntino Electori videbantur, ut ab inito antea Electorum fœdere jam discedere paratus esset, inquires: „Bona fide se intrasse fœdus, sibi dictum fuisse, nihil Electores ab Eugenio velle, quod „non

29. *) Ad an. 1446, p. 243 & 244 xj.

**) *Analecta Monumentorum omnis ævi Vindobonensis*, Tom. 2, p. 120 &c.

„non esset honestum. At si jam his non contentarentur, ab honestate recederent. Placere igitur sibi, ut Notulæ in publico legerentur, quærenturque vota multitudinis.“ Cum autem ad concionem ventum esset, major pars Notulas approbavit, etsi invitis quibusdam; maxime schismaticis. Hæc ex Manuscripto Æneæ Sylvii a Kollario in lucem edito, & Concordatis Germaniæ integris haud satis provide adjuncto.

§. 6.

Itaque pax sub hisce conditionibus jam fere erat perfecta; nihilominus Æneas missus denuo ad Papam Germanorum legatus, ut votis omnium satisfaceret, & forsitan ut haberet, quod cedere posset, coram Eugenio publice petitionem suam ampliavit, quartamque ad tres illas superiores addidit conditionem de agnoscenda Concilii Præeminentia. Quam tamen, ut ex dicendis mox patebit, cum Eugenius non admisisset, sed tantum Francofordienses Æneæ Notulas acceptasset, nemo Germanorum amplius in conventu publico urgebat, nisi forsitan posteriora quorundam, uti Mayeri gravamina, eaque privata hic velis recoquere. Sed cum jam non sit locus specialiter de illis disputandi; tantum in genere velim nostris Scriptoribus consulere, ut ab hac recollectione, quæ Patriæ nostræ in honorem haud vertitur, in futurum cautius abstineant, ne & ipsi simile Responsum, quod Æneas Sylvius Mayero Moguntiae Cancellario dedit, referant *). Ceterum aliunde jam certo constat, famosissima illa centum gravamina in odium Catholicorum, præsertim Romanæ Sedis a Protestantibus, Goldasto, aliisque maximam partem fuisse conficta: alia vero, eaque, ut merito videri possent, justiora quam maxime Episcopos, totumque Clerum spectabant, non vero tantum Romanos Pontifices, qui tamen plus reliquis ex parte sua contulerant ad Germanorum gravamina, quoad æquum erat, sublevanda. Id pro viribus suis præstiterunt Hadrianus VI, Clemens VII, Pauli III & IV, & demum SS. universalis Tridentina Synodus. Hac de re consule novissimam, solidissimamque Dissertationem in sermonem vernaculum translata, in qua pro suis meritis Anonymus Scriptor, satis tamen jam notus de Legatis, & Nunciis Pontificum iustissime castigatur **).

Notum

*) Vjd. Rainald ad a. 1457. n. 43. &c.

**) Frage: Ist die Gerichtsbarkeit der päpstlichen Nuntien in Deutschland den Reichsgesetzen, und der Reichsverfassung zuwider? 1787.

Notum insuper est, *gravamina*, quæ ab una tantum parte, eaque jugi impatiente proveniunt, non pro *juribus* valere; secus vix nobis Catholicis! contra quos etsi summis injuriis affectos innumera DD. Protestantes gravamina euderunt, quæ nos opprimerent, ita ut in proverbium abierit: *Dum verberant, lamentantur. Sie schlagen, und klagen.* Itane nostri Episcopi erga summum suum Pastorem se gerant, ut de ipsis quoque idem dici, aut cogitari posset?? Quid, si gravaminibus Pontifex gravamina, eaque forsitan numero plura, sed & pondere graviora opponeret? — Aut num forte decreta Basileensia, quæ adeo jactantur, apud nos amplius in usu sunt? Nonne si umquam valuerunt, jam desuetudine abrogata fuisse dicendum est? Quid, si eadem Papa, & quidem ex pacto urgeret? — Certe ad dedecus nostrum sit, si quis nobis Germanis hodie Basileensia illa decreta pro disciplina restauratione in memoriam revocet.

§. 7.

Alterum erat, quod dixi: *Certa res est, quod in doctrinam de Præminentia Conciliorum nec Eugenius, nec Nicolaus P.P. umquam consenserint.* Atque hoc ita certum, ut Eugenius imminente morte sua sollicitus, ne forsitan nimia erga Germanos conniventia quidquam indulgisse videretur apostolicæ Sedis dignitati contrarium, in eum finem confici Bullam, quam *salvatoriam* vocant, curaverit, in qua coram Deo, & mundo sua sententia purgaret, contestans: „Numquam se doctrinæ SS. Patrum, aut Pontificiæ authoritati derogare voluisse, irritumque esse, atque a se revocari, si quid ejusmodi in ægritudinis infirmitate contigerit emanasse.“ Sed ut plena in meridie veritas elucescat, ipsa apostolici indulti instrumenta lustremus. Cum nempe quatuor essent conditiones, quas pro obedientia Pontifici præstanda nomine Nationis germanicæ Aeneas legatus publice proposuit, 1^{mo} ut generale Concilium tempore, locoque designando convocetur, 2^{do} ut Conciliorum generalium Authoritas, & Præminentia adprobetur, 3^{to} ut gravaminibus opportune provideatur, 4^{to} demum, ut duo Electores Archiepiscopi restituantur; ad singula hæc puncta tribus Bullis Pontifex respondit, ita, ut duo prima, utpotè inter se connexa, de Conciliorum authoritate complexus una, eademque Bulla fuerit. Ad primum igitur, ut generale Concilium celebretur; suo id consensu totum probavit. In altero duæ partes continebantur, ut non solum authoritas Conciliorum, sed etiam præminentia approbaretur.

Prior

Prior pars petiti iusta, & æqua, prout erat, ab Eugenio iudicabatur, qui Legatis suis Francofordiam missis eam probandi facultatem jam antea dederat, dicens: „Se vestigiis Patrum inherere, & non dubitare, generalia Concilia cum omni reverentia, & devotione suscipere, ac venerari, NB. dummodo rite instituta, & canonice celebrata sint.“ Quo sensu tantum Concilia cum summo Pontifice conspirantia intelligi manifestum est *).

§. 8.

Ejusdem petiti altera pars odiosam, immo & schismaticam inter Papam, & Concilium oppositionem involvit: hanc Eugenius mori potius, quam Concilio se subdere paratus, nequidem ad transactionem admisisset, nisi jam *privatim* instructus fuisset Gobelino, ipsoque Aenea teste, mitiora esse Caesaris, aliorumque Germanorum sensa, tantum ea duriora ex acerbis paucorum Electorum animis proficisci. Quare pro sua moderatione, & prudentia Pontifex hac parte omissa, *indirecte* autem rejecta propositionem ad justum sensum reduxit asserens, Conciliorum (rite, & canonice celebratorum) a se agnosci, recipique summam auctoritatem, & eminentiam.

Et hoc quidem verissime asseruit, siquidem in Ecclesia eminenter summa auctoritas hæc est, ubi totius Ecclesiæ cum suo Capite consensus in universali conventu expressus est. Præeminentiam vero illam, quæ inter caput, & membra oppositionem indicat, caute omisit Papa, sed & *indirecte* rejecit hæc adjecta clausula, ita se venerari Concilia, sicut ceteri antecessores eadem venerati sint, a quorum vestigiis deviare haud velit. Nihil ergo novi hæc in parte Pontifex concessit; immo quod notabile insuper est, ex Constantiensi Concilio tantum decretum *Frequens* in specie admisit; alia quidem ejus decreta, & totum Constantiense in genere, sed ita tamen, ut cetera alia Concilia, quæ nisi a Pontifice fuerint approbata, semper in Ecclesia pro illegitimis, nulliusque auctoritatis fuere habita. Igitur neque Constantiensis Concilii decreta Eugenius IV aliter, quam Martinus V approbavit, id est, tantum, & restrictive, ut dici solet, conciliariter facta.

*) Rainald. ad a. 1446. n. 2. 3.

Is sane genuinus sensus est Pontificis in Bulla: *Ad ea ex debito*, quem ipse adhuc ante mortem suam, ut omne dubium auferret, declaravit: En autem Bullæ propria verba: „Concilium generale Constantinense, decretum *Frequens*, ac alia ejus decreta, sicut cetera alia Concilia catholicam militantem Ecclesiam representantia, ipsorum potestatem, autoritatem, honorem, & eminentiam *), sicut & ceteri antecessores nostri, a quorum vestigiis deviare nequaquam intendimus, suscipimus, amplectimur, & veneramur.“

§. 9.

Sed in Bulla: *Ad tranquillitatem*; Basileensia decreta de superioritate Conciliorum approbaverit Eugenius? Mirari non satis possum, id a doctis viris serio proponi, ut sibi fidem haberi velint. Quid enim, si in decretis illis sub Alberto Rege a. 1439 acceptatis nihil aliud Germani, nisi *prædicum* levamen suorum gravaminum, quoad electionum libertatem, beneficiorum collationem, & annatarum sublationem quæsierint? Hoc ipsum est, quod supra §. 33 tantis argumentis ostendi, ut tranquillum animum, veritatis magis, quam disputationis amantem facile possint convincere. Certe, ut ex ipsa Aenæ legati postulatione patet, tertio illo puncto, cui Papa per dictam Bullam respondit, nihil Germani voluerunt, quam *prædicum* levamen, quo suis gravaminibus in specie, circa electiones, beneficia, & annatas opportune provideretur. Verum enimvero, quod omnibus adversariis una simul os obstruit, ipsa est Pontificis hac super re expressa declaratio. Cum enim decreta illa Basileensia a Germanis acceptata præter ea, quæ ad disciplinæ, verius politiæ *praxin* spectabant, alia continerent circa *theoriam*, e. g. de summa Conciliorum autoritate; hæc Pontifex data opera, & expresse ab illis separavit hisce verbis: „Per alias nostras litteras (superioris Bullæ) nonnulla circa Concilium Constantinense, ejusque decreta, nec non futuri convocationem Concilii mentem nostram concernentia declaravimus, prout in ipsis litteris plenius continetur.“ Postest etiam Pontificis instructio ad suos legatos hic intelligi, quæ apud Rainaldum ita legitur **): „Ad imitationem SS. Patrum prædecessorum nostrorum, quorum vestigiis inhærentes gratum divinæ Majestati obsequium,

*) In quibusdam impressis exemplaribus, uti apud Barthelium loco *eminentiam* legitur tantum *reverentiam*.

**) Ad a. 1446. n. 3.

„quium præstare non dubitamus; sicut illi generalia Concilia suis temporibus rite instituta, atque canonice celebrata recipere, amplecti, & venerari consueverunt; sic generalia Concilia Constantiense, & Basileense ab ejus initio ad translationem per nos factam NB. absque tamen præjudicio juris, dignitatis, & præeminentia S. Sedis apostolicæ, & potestatis sibi in eadem canonice sedenti in persona B. Petri a Christo concessæ, cum omni reverentia & devotione suscipimus, amplectimur, & veneramur“ His, inquam, theoreticis caute separatis, atque ad priora responsa remissis jam quoad practica Germanorum levamina se declarat Pontifex: „Sed, per alios autem decretis Basileæ editis, & per claræ memoriæ quondam Albertum Romanorum Regem acceptatis, ex quorum observatione Natio germanica ex pluribus gravaminibus dicitur relevari, contenti sumus“ &c. Ita in hac Bulla Pontifex, quasi futuram Juristarum cavillationem prævidisset, suam concessionem expresse ad alia Basileæ decreta, id est, practica Germanorum levamina restrinxit.

§. IO.

Denique ut Aschaffenburgensibus Concordatis a Nicolao V probatis multum hic immorer, opus haud est, eoquod ipsi DD. Adversarii in iis parum fiduciæ ponant, hæc sibi odiosa esse palam profitentes, hinc ad priora ab Eugenio concessa provocare soliti. Quare cum jam demonstraverim ex Basileensis Concilii decretis nonnisi practica levamina Germanis ab Eugenio fuisse indulta, eandem necessario restrictionem habent Instrumenti Aschaffenburgensis verba: „In aliis autem, quæ per felicis recordationis Dominum Eugenium Papam quartum pro Natione præfata usque ad tempus futuri generalis Concilii permixta, concessa, indulta, atque decreta, & per memoratum sanctissimum Dominum nostrum Papam Nicolaum confirmata fuere, in quantum illa Concordiæ præsentis non obviant, ista vice nihil extitit immutatum.“ En dilectissime Lector! quam leviter evanescat, & in nihilum recidat, quod contra summi Pontificis præeminentiam a pluribus abhinc annis inflare plenis buccis solent hodierni nostri Juris publici Reformatores, plerumque falsis Protestantium præjudiciis obæcati, aut quod pejus est, voluntarii præ hodiernis DD. Protestantibus Romani Pontificis adversarii.

§. II.

Unum adhuc hoc loco de Barthelio dicendum restat, quod præsentis quæstionis statum de *Conciliorum Eminentia*, secus ac in mente Basileensium, atque etiam fœderatorum Germaniæ Principum fuerat, aut ex inadvertentia, aut ex composito inverterit. Ita enim scribit*): „Ex eo, quem hætenus præ manibus habuimus textu Concordatorum — omnino confectum est, summum Pontificem in vim pacti se eo obligasse, ut iam posterum Conciliorum autoritas, potestas, honor, & eminentia firma stet, neclisdem tam facile, & pro libitu possit, vel censeatur etiam tacite derogari. Sane hisce verbis & Basileensium decreta, & Pontificis concessa haud genuine referuntur, sed duo inter se oppido diversa, quasi unum forent, male confunduntur. Basileenses quippe tale Concilium ponebant, quod a Papa, etiam legitimo dissentiret, cui proin subjici debere & Papam volebant. Ejusmodi concilium, ceu corpus a suo capite divisum numquam in Ecclesia aliquam autoritatem habuit, neque talem vi pacti Pontifex admisit, sed potius ad antiquam Patrum doctrinam provocans rejecit. De canonicis vero Conciliis, id est, cum supremo & Capite in unum conspirantibus in Responso suo non quidem novi quidquam pro futuro tempore Papa adpromisit, ut male insinuare vult Barthelius, sed mentem tantum suam ex SS. Patrum doctrina declaravit, a se Concilia universalis (rite scilicet, & canonice celebrata) ipsorum potestatem, autoritatem, immo & eminentiam agnosci, recipique. Hæc certe longe alia est, ac illa Basileensium sententia, nec nova quædam Pontificis concessio, sed antiqua Ecclesiæ doctrina. Quis enim umquam negavit, Concilio universali legitimo summam esse in Ecclesia autoritatem, qua vel ipse Papa, saltem *directiva* vi, licet non *constitutiva*, teneatur? Canonibus enim ecclesiasticis Papa, sicut legibus etiam suis Princeps obligatur. Febronii dumtaxat mala ars est ad invidiam Papæ conficiendam, ut *arbitrariam* vocet illam, quam nos *supremam*, & *illimitatam* dicimus Pontificis potestatem. Hæc potestas etsi illimitata, haud tamen propterea arbitraria est, sed divinis, atque etiam ecclesiasticis legibus quoad usum ligata. De bono usu, malove suæ supremæ in terra potestatis Pontifex rationem Deo reddere, non vero hominibus debet: nostrum autem est supremam, quam Dominus suo Vicario, & totius sui corporis Capiti dedit, potestatem agnoscere, & venerari: *Qui enim potestati resistit, Dei voluntati resistit?* Hæc interim ad præsentem scopum de

*) Traët, hist. Canon. pragmat. Cap. I. §. 16.

de Germaniæ Concordatis : plura vide Parte III , Corollario 4,
Artic. 5.

§. 12.

Monarchiam vero ecclesiasticam, inquires, non Germanorum tantum, sed omnium fere Catholicorum auribus nostro seculo tam odiosam esse vocem, ut vix a quoquam amplius tolerari possit. Ita nimis nihil nostro seculo intolerantius est, aut forte nihil intolerabilius. Scio equidem inde a Bellarmino, qui ut alter Homerus, quandoque dormitat, vulgarem esse eam in scholis doctrinam, quæ monarchicum Ecclesiæ regimen Aristocratia temperet. Hac super re cum jam locus sit sensa mea declarandi, observo diversi generis esse homines, qui iisdem vocibus, at mentibus plane contrariis loquantur. Sunt (& hi quidem jam plurimi) qui pro more politici nostri seculi non dubitant externam hanc officii speciem dignitati pontificiæ exhibere, ut ejus regimen appellent monarchico-aristocraticum. Sed præter vocis appellationem jam nihil monarchici juris Papæ relinqui ex ipsorum doctrinis, immo & factis facile apparet. Quidquid enim Papa ordinaverit, nullus esse valoris docent, suamque denegant obedientiam, nisi Papæ ordinatio per Episcopum, quem solum vocant Ordinarium, antea discussa fuerit, & adprobata. Hi quidem particularis adeo Episcopi judicio pontificiam subjiciunt auctoritatem aperte jam a catholico dogmate alieni, ab omnibus Christi fidelibus Papæ obediendum esse. Alii vero cautius sibi agere videntur, dum non particulares Episcoporum sententias, sed generale judicium Episcoporum, e. g. in Concilio congregatorum superius esse papali contendunt. Atqui & hi manifeste convincuntur, dum monarchico-aristocraticum regimen verbis adstruunt, Monarchiam re ipsa destruere, & meram Aristocratiam inducere: supremam enim regendi potestas necessario vel in uno quodam, vel in pluribus residet: in priori casu Monarchiam efficit, in posteriori Aristocratiam. Illi ergo, qui Concilium Papa superius esse docent, supremam potestatem ab uno auferentes, vere Monarchiam destruunt, illamque in pluribus collocantes propriam Aristocratiam inducunt. Est autem Catholicorum, ipsorum adeo Gallorum cum suo Gersonio constans doctrina, sicut hac in Parte II ostensum a me est, veram a Christo Monarchiam in Ecclesia fuisse institutam, immo, ut unum esset Christi ovile, ita a Deo institui oportuisse. Præclara in hanc rem sunt S. Gregorii Nazianzeni ver-

ba *): „Quod sine Principe est, ordine caret; quod autem multos „Principes habet, dissidiis obnoxium est, adeoque tum principatus, „tum ordinis expers. Eodem enim utrumque tendit, ad perturbatio- „nem nimirum, quin imo ad dissolutionem.“ Anne ipsorum quoque Conciliorum dissidia DD. Adversariis nostris incognita esse possunt? Anne Christus Ecclesiam suam dissidiis exposuerit? Ipse dixit optimus Pastor, & verba ejus in aeternum manent, *unum esse ovile, & unum Pastorem*: quisnam vero ille? Hic est, cui dictum est, *pasce oves meas*!

§. 13.

Sed & alii dantur *meticulosi*, ne Monarchia Pontificis in despotismum, & tyrannidem degeneret, hinc ajunt cum Zalweinio**), regimen a Christo institutum non ejusmodi esse, quod dominandi libidinem foveat, sed potius humilitatis, & mansuetudinis legibus temperetur: hunc autem finem obtineri per regimen *monarchico - aristocraticum*, ubi non ex unius voluntate omnia dependeant, quod superbiam aleret; sed aliorum quoque Præsidium ecclesiasticorum consensus ad ultimam rerum decisionem requiratur, quod Primatem in humilitate retinere, immo & subditis obedientiam allevare possit. Quare pro hoc hominum statu hanc optimam esse judicant, quam *mixtam* dixeris sacri regiminis formam. Cur vero non & politici, siquid adducta illorum momenta sua ex natura valeant? — Sed hisce ecclesiastico-politicis directe respondeo, plura in hac ipsorum hypothesi falsa latere quibusdam speciosis involuta veris. Verum est quidem non superbum dominatum, sed humilitatis potius obsequium a Christo Domino fuisse Petro præscriptum. Nonne autem sicut Petro, ita & reliquis Apostolis prohibita fuit a divino Magistro superbia, & humilitas præcepta? nonne Episcopi in suæ particularis Ecclesiæ, sicut Papa in universalis regimine æque sibi a despotismo, & tyrannide cavere debent? Quid ergo? an Episcopi ordinatio pro sua Ecclesia ab aliorum, licet inferiorum Præsulum, & Pastorum consensu dependeat? an Episcopus erga suæ Diœcesis subditos non monarchicam, sed tantum aristocratica mixtam possideat jurisdictionem? Nonne enim æque periculosum est Episcopo, ac Papæ monarchica potestate abuti ad superbiæ dominatum? Itaque falsum ante omnia præjudicium est, Monarchiam ex *natura sua* cum dominandi fastu esse conjunctam: dabantur certe, vel adhuc dantur Monarchiæ etiam terrestres, qui ex christianæ humilitatis, & mansuetudinis legi-

*) Orat. 35.

**) Principia jur. eccles. Tom. I. Q. 4. C. I. §. 4.

legibus supremam, quam habuere, potestatem moderabantur non hominum tribunal, sed Dei reverentes. Equidem haud negarim, potestatis abusum sicut interdum a Principibus hujus seculi, ita etiam ab Ecclesiæ Præsulibus committi: sed hoc *per accidens* ex infirmitate humana contingit, quod monarchicæ regiminis formæ suam præ omnibus aliis præstantiam diminueri haud potest, minus auferre. Immo in simili quoque casu melius est subditis unum habere superbum Principem, quam multos non minus superbos, & inter se divisos, totiusque corporis unitatem dilacerantes. Verum est etiam summos Ecclesiæ Præsules, ne temere, ac despotice quidpiam suscipiant, præmissis antea deliberationibus, & aliorum rationibus, sententiisque auditis ad ordinationes suas sanciendo progredi debere. Sed falsum est, regulas pro bono potestatis usu datas, etiam limites esse, quibus ipsa potestatis amplitudo circumscribatur.

Ergo prævia illa consultatio non ad hoc requiritur, ut *valida* sit Superioris ordinatio, & vim obligandi subditos habens, sed ut *legitima*, & *iusta* coram Deo inveniatur. Denique & hoc verum est amplius humiliari, atque a superbia removeri Ecclesiæ Prælatos, si nihil sine aliorum inferiorum consensu possint. Sed quam maxime falsum est præjudicium, ita unitati, & obedientiæ subditorum melius esse provisum. Quanto enim magis autoritas unius debilitatur, tanto amplius unionis vinculum relaxatur; & quidquid potestatis uni auferatur, id inter plures divisum, iisdem dissensionis, superbiæ, & arrogantiae fit objectum. Igitur ad humilitatem summorum Ecclesiæ Præsulum (etiam Episcopos intellige) conservandam medium a Deo ordinatum nullatenus est ipsorum potestatis ab inferioribus dependentia, quæ unitatem corporis facillime destrueret; sed est ipsa suprema in cælo Majestas, quæ a servis suis omnium actionum distinctam exigit rationem: verbo divinum, non humanum est tribunal.

§. 14.

Sunt insuper & alii, qui cum Bellarmino *) Monarchiam Aristocratiam mixtam, ceu optimam pro hac vita regiminis formam ita vindicant, „ut sit quidem in republica summus aliquis Princeps, qui & omnibus imperet, & nulli subjiciatur; Præsides tamen provinciarum, vel „civi-

*) Controv. 3. de summo Pontifice L. 1. C. 3.

„civitatum non sint Regis Vicarii, sive annui Iudices, sed veri Principes, qui & Imperio summi Principis obediant, & interim provinciam, vel civitatem suam non tamquam alienam, sed ut propriam moderentur.“ Sic in Ecclesia præter summi Pontificis Monarchiam esse contendunt Episcoporum, qui veri Principes, & Pastores proprii gregis, non tantum Papæ Vicarii sunt, Aristocratiam. Hoc sensu Bellarminus uti omnes facile catholicos Doctores, ita me sane habet consentientem. Nolim de verbo disputare, seu *puram* hanc Monarchiam, seu *mixtam* Aristocratiam dixeris; sufficit, & necesse est, ex Bellarmini sententia summum Pontificem posse omnibus imperare, & nulli esse subiectum, sed omnes etiam provinciarum Præsules ejusdem Imperio obedire debere. Neque tamen hoc obstat, quominus Episcopi veri, & proprii sint gregum suorum Pastores, non Papæ, sed Christi Vicarii, quamvis summo illi Vicario Christi, qui Papa est, subordinati. Hanc Aristocratiam in provinciis *singularibus* relative ad subditos existentem nemo negaverit, sed ea tamen summi Pontificis per totam Ecclesiam *universali* Monarchiæ haudquaquam opposita est, hinc neque video, quare pontificium totius Ecclesiæ regimen relative ad Papam Aristocratia *mixtum* dici oporteat.

§. 15.

Lata a Domino sententia, *unum ovile, & unus Pastor*, finita lis est; utinam finiretur & error! Sed nondum errorum satis. Pervulgatum hodie, ac tantum non universale inter nostros Canonistas axioma est, idque oppido fallax, & æquivocum: *Cum primatus propter unitatem Ecclesiæ sit, nihil Primatem posse, quod ad unitatem non sit necessarium.* Hoc axiomate, ut ajunt, indubitabili, certissimoque assumpto sequelas inde plurimas derivant, quæ totam quantam summi Pontificis potestatem aut arctissime contrahere, aut penitus enervare, irritamque facere allaborant. Cum enim ex una parte circa dogmata fidei, morumque Papæ sententiam negent esse infallibilem, nisi per accedentem, & quidem universalem Episcoporum consensum; cum insuper ex altera parte nihil concedant a Papa statui, & imperari posse, nisi quod *absolute* necessarium sit ad conservandam Ecclesiæ universalis unitatem, ad hanc vero nulla sit necessaria lex circa disciplinam, utpote quæ pro varietate locorum varia esse possit; consequitur pontificiam autoritatem tam quoad res fidei, & morum, quam & disciplinæ per se ipsam nihil amplius vale-

valere, sed sine omni jam efficacia esse, irritamque, ac nullam. Ita juris episcopalis restauratores hodierni (si Superis placet) scopum consiliorum suorum attingisse sibi videntur, magnoque sibi plausu adjubilant. Sed triumphi præana ante victoriam canunt.

§. 16.

Satisne bona fide vel primum jam principium ponitur verbis hæc indeterminatis, & æquivocis: *Primatus est propter unitatem?* Quæro ex ipsis, quam unitatem intelligant, an fidei tantum, an duplicem illam, quæ a Christo in sua Ecclesia instituta est, tam fidei, quam & obedientiæ unitatem? Si primum illud tacite intendant, eo ipso manifesta jam ipsorum fallacia est: Christus enim non solum ejusdem fidei, sed etiam ejusdem obedientiæ suam voluit esse dilectam sponsam unius viri, seu unum corpus sub uno Capite, unum ovile sub uno Pastore. In altero, eoque integro tantum sensu firmum stat hoc principium: *Primatus a Christo institutus est, ut una in fide, & obedientia Christianorum sit Ecclesia.* Jam vero principii veritate pleno in lumine posita, nonne in aprico est nuda consequentiæ falsitas, ergo *Papa nihil potest, quod ad unitatem non necessarium?* Quam hæc inania & fallacia verba! Ita potius debuisset fieri conclusio, ergo, cum Papa imperat, necessario obediendum est. Ipsa enim obedientia ad unitatem a Christo institutam necessaria est: hinc omnes suas fideles oviculas Petro subditas esse voluit, cui soli jus totum ovile pascendi dedit: *Pasce oves meas.*

§. 17.

Miseret me hominum, qui nostro illustrato seculo perspicaces præ cornicum oculis videantur, circa res tamen divinas hebeti adeo visu, & myopes sint. Nonne Princeps est propter bonum reipublicæ statum? Quid, si quis ex hoc principio sequens vellet axioma statuere, ergo Princeps nihil imperare potest, sine quo bonus reipublicæ status adhuc subsistere potest. Næ! iste consequentarius insanire videretur. Sanæ autem rationis homines ita argumentantur: „Cui finis committitur, huic & jus ad media datur. Cum „ergo unus sit Princeps in republica, cum unus sit Papa in Ecclesia, ut hac „unitate capitis ille reipublicæ bonum commune, hic Ecclesiæ procuret; „utrique jus est ad media imperanda, eaque non tantum absolute necessaria, sed & quocumque modo utilia.“ Potestatem Principis restringe tantum ad ea, quæ pro bono status totius necessaria subditis videantur; &

non jam Principem, sed inanem Principis larvam, & umbram habebis. — Quis hominum, quæso, ita ratiocinetur: Alimenta sunt homini a Deo data ad vitam conservandam; ergo tantum jus habet homo ad vitam *necessaria* accipiendi alimenta, e. g. panem nigrum, & nudam aquam? Nonne & alia, etiam *commoda* & *utilia* licet adhibere vitæ remedia? nonne, inquam, ab humana ratione probatum, justumque axioma est: *Cui finis committitur, huic jus est ad quæcumque, dummodo vera sint, media?* Finis porro, cur uni Petro totum gregem pascendum Christus dederit, non simpliciter propter se ipsam unitas fuit, sed & hæc altiorem adhuc habuit finem, cui tamquam medium inferviret, videlicet ut ad spiritualem salutem totus grex *optimo modo* per unum pasceretur: prævidit enim divinus Salvator, ad bona pascua vitæ spiritualis fideles suos melius ab uno pastore omnium supremo dirigi, quam per plures æquales, facile inter se dividendos, & ovile una secum direpturos. Igitur æterna animarum salus omni meliori modo, scilicet per unum supremum Christi Vicarium procuranda proprius est, dignusque Deo finis, cur Pontificis primatus institueretur: hinc ad media quæcumque pro animarum salute adhibenda jus habet, & illimitatum quidem summus Pontifex: *Cui enim finis, huic & media committuntur.* Ita fane docet Philosophia, ita & Jurisprudentia, atque quod summum est, ita & sancta Dei Religio. *Tibi dabo claves regni cælorum: quidquid ligaveris, quidquid solveris super terram, erit & ligatum, solutumve in cælis.*

§. 18.

Vere igitur, ac proprie monarchicum esse, atque esse debere regimen a Christo Dei Filio in sua Ecclesia institutum jam nunc evicisse mihi videor, magnaue animi confidentia adversarios argumentis, non convitiis pugnaturus in arenam provoco. Ab optimo siquidem Pastore non alius poterat, nisi *optimus* pascendi, seu regendi modus institui. Eam ipsam vero, quæ *monarchica* est, regiminis formam omnium esse *optimam* res ipsa, tota natura, propria experientia, Sapientum dicta, & exempla, Ss. Patrum testimonia, demum, quod maximum est, divina adeo autoritas acclamant. Ut enim unio plurium adsit, in uno aliquo convenient necesse est: ubi corpus unum, ibi unum caput: monstrum naturæ foret, & portentum cum duplici capite unum corpus. Unius regimen societati convenire, vel bruta animalia instigante natura cognoscunt: rex unus apibus, unus dux gruibus, & in armentis pastor unus. Humana quoque huc tendit ratio, & nostra idem docet experientia

rientia: in qualibet domo ad unum patremfamilias pertinet gubernatio conjugis, filiorum, fervorum, rerum denique ceterarum. Maximæ terræ regiones a suis singulæ Regibus gubernantur, & antiquiora, felicioraque in toto regna sunt, quam respublicæ sine uno Principe *). Longum foret veteres appellare Philosophos, Platonem, Aristotelem, Isocratem, Plutarchum, Senecam, ex Historicis Herodotum, aliosque: unicum audiamus illorum Principem: „Unius dominatio bonis conjuncta constitutionibus, quas leges vocavimus, illarum omnium optima est. — „Gubernationem vero eam, in qua non multi imperant, mediam censere debemus. — Ceterum multorum administrationem per omnia debilem — propterea quod magistratus ad exigua redacti sunt, in multosque divisi.“ Ita Plato **). Ex hebraicis, & græcis, atque latinis Patribus Philonem, Justinum, Hieronymum, Cyprianum, plurimosque possem producere; sed unus loco omnium S. Athanasius loquatur ***): „Ut multitudo deorum nullitas est, ita quoque necesse est multitudinem Principum id efficere, ut nullus esse Princeps videatur. Ubi autem Princeps non est, ibi prorsus disturbatio nascitur.“ Atque quod majus omnibus est, sub unius Dei dominio totus mundus est positus. Institutio humani generis ex uno facta est ita, ut ab uno omne genus hominum dependeret. Deus unus dilecto populo suo Israël dignatus est ipse fieri illorum omnium Rex: in rebus extraordinariis, negotiisque difficilibus unum loco sui Vicarium, seu *Ducem* instituit: pro sacro ministerio unum elegit ex familia Aaron, qui inter omnes Sacerdotes summus esset Pontifex. Ipse Dei Filius se unum constituit Caput, totius corporis sui, quod proprio sanguine sibi acquisivit: sed & suo hinc discessu in cælum nobis invisibilis factus, visibilis in terra Sui Vicarium, Caput unum totius Ecclesiæ, universalem omnium Pastorem reliquit S. PETRUM. Cæli, & terra præteribunt, verba autem Domini, & facta non præteribunt: *Tu es Petrus, & super hanc petram ædificabo Ecclesiam meam. — Tu confirma fratres tuos. — Pascere oves meas.*

*) Tristissimo exemplo id hodie docet a suis devastatum illud olim Galliæ regnum.

) In Politico. Edit. Bipont. de anno 1784. pag. 100. *) Orat. adv. idola.

APPENDIX.

An M. Bossuetus vere sit Author Libri,

CUI TITULUS:

Defensio gallicanæ Declarationis?

CAPUT I.

Historia Declarationis gallicanæ.

§. I.

Notissima sunt tristi fato Galliæ comitia anno 1682 jussu Regis Ludovici XIV habita, in quibus plures ex Episcopis, & Clero ad restringendam romani Pontificis auctoritatem quatuor Declarationis articulos confecere tantum non ab Innocentio XI, ut primum inaudierat, pro hæreticis damnatos. Hujus famosæ Declarationis summa est: I. Ecclesiæ potestatem nullo modo, ne indirecte quidem ad temporalia se extendere, ita ut Principes in his nulli Ecclesiæ potestati divina ordinatione subjiciantur. II. Sic inesse S. Petri Successoribus plenitudinem potestatis, ut simul valeant, immotaque consistant decreta constantiensis Concilii Sess. 4 & 5, tamquam a Sede apostolica comprobata, ipsoque romanorum Pontificum & totius Ecclesiæ usu confirmata; neque tantum pro schismatis tempore, ac dubio Papa existente, sed etiam uno Capite legitimo Ecclesiam gubernante. III. Apostolicæ Potestatis usum esse moderandum per sacros Ecclesiæ Canones, ac Mores, & Instituta Regni Galliæ. IV. In fidei questionibus præcipuas quidem esse partes summi Pontificis, ejusque decreta ad omnes & singulas Ecclesias pertinere, nec tamen irreformabile esse judicium, nisi postquam Ecclesiæ consensus accesserit.

§. 2.

In ipsam hujus Declarationis originem indagare haud abs re fuerit Lectori veritatis studioso. Gravia tunc exarserant Regem inter, & Pontificem dissidia in causa Regaliæ ultra, quam par erat, per Galliæ provincias noviter extensæ. Anno 1681 Parisiis extra ordinem convocatus Cleri conventus, in quo res pro Rege decisa aulici favoris gratia, etsi aperte contra libertatem gallicanam, universalis Concilii Lugdunensis II. decreto firmatam, prout scilicet, quod dolendum, tantæ infirmitatis exemplum

empla haud infrequentia in Ecclesiæ Prælatiſ tam vetus, quam recens hiſtoria exhibet. Ex adverſo immotus pro Eccleſiarum immunitate ſtetit romanus Pontifex, omnia ab Episcopis in cauſa Regalium acta nullius roboris, & irrita declaravit, modicam illis conſtantiam, nimiamque cimi-ditatem, ſecus ac veterum Patrum exempla docerent, objiciens. Præſules gallicani ſequenti anno iterum ad comitia convenientes, ut præviſa Vati-cani fulmina vel averterent, vel hebetarent, poteſtatem Pontificis ener-vandam, vel ſaltem deterrendam prædicta ſua Declaratione cogitarunt, cui quidam ex illis id dandum politiæ rati, alii vero metu adaſci ſubſcri-perunt. *)

§. 3.

Quantum ab avita Patrum fide hac Declaratione receſſerint Galli-cani, ut antiquis oſtendam documentis, meus, quem intendo, ſcopus jam non permittit: id alia ocaſione quam proxima Deo dante ſum præ-ſtiturus. Ante me autem inviſte præter alios Galliæ Doctores idem jam præſtitit doctiſs. Abbas Petitiſdier in Tractatu theologico de *Auſoritate, & Infallibilitate Pontificum*, ab Archiordinariatu trevirenſi, & duobus Gal-lis Theologiæ Profeſſoribus adprobato Luxemburgi anno 1624. Præter-ire tamen hoc loco non poſſum, poſt conſtantiënſe Concilium adhuc ſe-culi decimi ſeptimi initio ipſos Galliæ Præſules de pontificia Authoritate longe alia ſenſa foviffe, ac publice declaraffe. Ita anno 1626 generalia Cleri comitia in Epistoſa ad omnes Regni Archi. & Episcopos ſtatuunt. „Magnum eſt, teſtimonium amoris erga Deum, obſervare, & honorare „eos, qui ſunt in hoc mundo conſtituti, ut illum repræſentent, & loco „illius ſint, hominumque neceſſitatibus pro ſalute animarum viſibiliter „præſint. Quod cum ſit ſingulariter ſummis Pontificibus ſupra omnes „Episcopos conſeſſum; plane convenit, hos ſe inferiores agnoſcendo „tantum illis honorem, obſervantiam, & reverentiam exhibere, ut omnes „reliqui iſtorum exemplo idem faciant. Admonendi ſunt ergo Episcopi, „ut S. Sedem apoſtolicam honorent, & Eccleſiam romanam infallibili „Dei promiſſione fundatam in ſanguine Apoſtolorum, & Martyrum, Ma- „trem Eccleſiarum, quæ, ut S. Athanaſius loquitur, quaſi ſacratum Caput „eſt, reliquæ Eccleſiæ, a quo ejus membra reguntur, cuſtodiantur, con- „ſervantur. Obſervent quoque S. Patrem noſtrum Papam, ceu viſibile „Caput univerſæ Eccleſiæ, Vicarium Dei in terra, Episcopum Episcopo-
rum,

*) Vide Fleur. contin. ad ann. 1681, & 82.

„rum, & Patriarcharum, uno verbo S. Petri Successorem, a quo Aposto-
 „latus, & Episcopatus originem acceperunt, & super quem Jesus Christus
 „suam fundavit Ecclesiam, ei tradendo claves cœlorum cum *infallibilitate*
 „*fidei*, quam miraculoso modo videmus in suis Successoribus usque ad ho-
 „diernum diem immobilem permanisse. Et cum fideles Orthodoxi tene-
 „antur *N.B. omnis generis obedientiam* illis præstare, sanctisque illorum De-
 „cretis, & Statutis conformiter vivere; Episcopi sint admoniti, ut hanc
 „continuari faciant obseruantiam, & quantum in ipsorum viribus erit,
 „reprimant incredulos (libertinos) spiritus (les esprits libertins) qui in du-
 „bium revocare, & minuere volunt sanctam hanc, & sacratam Authori-
 „tatem tot legibus divinis, & ecclesiasticis confirmatam: atque ut Episco-
 „pi aliis viam ostendant, ipsi hac obseruantia primi procedant.“

§. 4.

Nondum ejusdem Sæculi dimidio sua sensa Gallicani Patres mu-
 taverant, cum in Epistola ad Innocentium X an. 1650 propter Janzeni-
 starum turbas, & periculosa molimina Episcopi 85 ita se exprimerent:
 „Majores causas ad Sedem apostolicam referri solemniter Ecclesiæ mos
 „est, quem *fides Petri numquam deficiens* perpetuo retineri pro jure suo
 „postulat. Æquissimæ huic legi obsequentes — — Intercludendum
 „autem penitus speramus effugium, si ut precamur, Sanctitas tua, quid
 „hac in re sentiendum sit, clare, distincteque definiat.“ Ergo tantam
 adhuc in Pontificis definitione Authoritatem agnoverant, quæ effugium
 excluderet, effugium inquam postea primum excogitatum universæ Ec-
 clesiæ consensum expectandi, quasi isthæc a fide Petri, hoc est, apo-
 stolicæ Sedis numquam deficiente aliena esse posset. Adhuc clarius,
 quis crederet! iidem Galliæ Episcopi, & Clerus an. 1653 emanata Pon-
 tificis constitutione rescripserunt. „Quo in negotio illud observatione
 „dignum accidit, ut quemadmodum ad Episcoporum Africæ relationem
 „Innocentius I pelagianam Hæresin damnavit olim, sic ad gallicanorum
 „Episcoporum consultationem Hæresin ex adverso pelagianæ oppositam
 „Innocentius X autoritate sua proscripserit. Enimvero vetustæ illius
 „ætatis Ecclesia catholica SOLA cathedræ Petri communione, & au-
 „thoritate fulta pelagianæ Hæresis damnationi absque cunctatione sub-
 „scripsit. Perspectum enim habebat non solum ex Christi D. N. polli-
 „citatione Petro facta, sed etiam ex actis priorum Pontificum — —
 „judicia pro facienda regula fidei a romanis Pontificibus lata super
 Episco-

„Episcoporum consultatione, sive suam in actis relationis sententiam ponant, sive non ponant, prout illis collibuerit, divina æque, ac summa per universam Ecclesiam autoritate niti, cui Christiani omnes ex officio ipsius quoque mentis obsequium præstare tenentur. Ea nos quoque sententia, ac fide imbuti romanæ Ecclesiæ præsentem, quæ in summo Pontifice Innocentio X viget, auctoritatem debita observantia colentes.“ — Nihil clarius hac fidei suæ professione, quam Galliæ Episcopi triginta circiter annis ante famosam Declarationem fecerant: Ecclesiam catholicam *sola* Cathedræ Petri communione, & auctoritate fulciri, judicia a summis Pontificibus pro sancieuda regula fidei lata divina auctoritate niti, quæ ipsius mentis obsequium ab omnibus Christianis debeatur, hoc est, esse infallibilia.

§. 5.

Quam ob rem posterior Gallorum Declaratio, utpote pristinae fidei opposita auctoritate destituta sit, necesse est. Accedit, quod nec totus Galliæ Clerus huic Declarationi consensum dederit: namque ex centum triginta Episcopis, quot Gallia numerat, tantum triginta quatuor huic conventui intererant, ceteri non vocabantur omnes, & ab absentibus deputati auctoritatem nullam acceperunt, de quacumque fidei doctrina iudicandi, ac definiendi. Hinc non sine injuria toti Ecclesiæ gallicanae hæc Declaratio imputatur. Quid, quod vel ipsa adeo Academia Parisiensis teste Hiacintho Serry Sorbonæ Doctore, qui circa id tempus licentiæ stadium decurrebat, in acceptandam hanc Declarationem non sponte sua consenserit, sed vim non modicam passa sit: Cum enim Præfectus Curiae cum regiis Consiliariis, & Procuratore generali ad Universitatem accederet, ut sanctos doctrinæ articulos a Doctore accipi, & in publicas referri tabulas curaret; tanta sunt orta dissidia, ut re infecta redire debuerint. Post aliquot dies non expectata Magistrorum deliberatione, nulloque illorum assensu quæsito in supremam Senatus cūriam vocatus Academiae Notarius, missisque inscriptionis formulis Declarationem, ut ajunt, registrare jussus est. Quod vero postea Candidati pro Gradu theologico eosdem articulos in suis thesibus propugnarint, id nullo Sorbonæ statuto factum, sed in obsequium Regis, qui solemnī edicto ad preces gallicani Conventus obtento ita mandaverat. Vide Billuartum *). Unde patet,

*) Curs. theolog. T. 7. Dissert. 4. Art. 5. §. 8.

tet, quam tenax avitæ doctrinæ de pontificiis Juribus vel Academia adhuc an. 1682 fuerit.

§. 6.

Haud mirum igitur, tot tantosque adversarios tam intra, quam potissimum extra Galliæ provincias in dictam Declarationem vix editam mox insurrexisse certissimo argumento, pristinam Catholicorum fidem fuisse contrariam: neque id dissitetur unus ex ejusdem conventus principariis, Gilbertus de Choysseul, Episcopus Tornacensis in Proëmio Epistolæ ad Steyartium: „Magna Gallorum catholicorum pars, ac totus, vel ferme totus extra Galliam orbis christianus contra sentire videtur.“ Ipse cameracensis Archiepiscopus comitiis præfens testatus est, *se in sententia contraria educatum*. Profecto grave bellum Declarationi gallicanæ indicebatur in Germania, Italia; Hispania, Belgio, Polonia, & Hungaria. Inter plurimos, qui calamum strinxerunt Viros, eruditione, ac dignitate præstantissimos duo erant Archiepiscopi, unus Poloniae Gnesnensis, alter, cui nomen Georgius Zelepechimi, Strigoniensis, Hungariæ Primas. Is Synodo nationali hac super re habita gallicani Cleri decreta discussit, propositiones illas interdixit, proscripsit, & prohibuit, *ut quæ christianis auribus absurde ac plane detestabiles, atque a Satana Ministris disseminatæ blanda pietatis specie schismaticum virus instillent*. Ex Doctoribus eminet Nicolaus du Bois primarius S. Litterarum in Lovaniensi Universitate Professor, qui librum edidit sub titulo: *Disquisitio theologico-juridica super Declaratione Cleri gallicani*, in qua demonstratum ibat ab Episcopis gallicanis minime fuisse Patres, & Canones, ad quos tamen provocarent, discussos, sed simplici persuasione allegantibus creditum. Apud nos Germanos usque ad pauca abhinc lustra communis sententia de suprema Pontificis autoritate, & infallibilitate dominatum obtinuit. Verbo hæc erat doctrina ubique recepta paucissimis exceptis extra Galliam teste Benedicto XIV in quadam epistola an. 1748, die 13 Julii.

§. 7.

Quam fortissime autem, & constantissime huic novitati sese tota autoritate apostolica opposuerunt summi Pontifices. Innocentius XI per litteras in forma *Brevis* eodem anno 1682, die 11 April. datas omnia in gallicano Conventu acta rescidit, & perpetuo irrita esse declaravit,

vit, nec ulli post hoc tempus a Rege ad Beneficium nominato confirmationis diploma concessit, adeo ut plus, quam triginta Ecclesiæ in Gallia suis Pastoribus obeunte hoc Papa orbatæ essent. Hujus Successor Alexander VIII solemniori constitutione, quæ incipit, *inter multiplices* an. 1690 eandem Declarationem rejecit, & nullam esse coram Deo protestatus est. Innocentius XII a primis Pontificatus sui auspiciis omni nisu laboravit, ut injuria Sedi apostolicæ per gallicanos Articulos illata repararetur: propterea Episcopis a Rege promotis, qui illis Comitibus interfuerant, apostolicas Confirmationis litteras constanter denegabat, nisi prius Parisini conventus decreta revocarent, quod & feliciter obtinuit. Plures quidem ex Episcopis acta in Comitibus privatim retractarunt, quos inter & Bossuetus fuisse narratur, atque ex præclaro sermone *de unitate*, quem in Episcoporum conventu habuit, plane credibile est. Hinc forsitan factum, ut a certis hominibus tamquam *romane Curie adulator* diffamaretur. Perdemissæ autem sunt publicæ deprecantiæ, & revocantiæ litteræ ad Papam, quas alii suo saltem silentio adprobarunt, in quibus profitentur, „vehementer quidem, & supra omne id, quod dici potest, ex corde dolere, ac quæcumque in præfatis Comitibus sive circa ecclesiasticam Potestatem, & pontificiam Auctoritatem decreta, sive in præjudicium jurium earundem Ecclesiarum deliberata, pro non decretis, nec deliberatis habere, & habenda esse, serio insuper spondentes, se ita in posterum gesturos, ut nihil penitus de vera eorum erga sanctam Sedem obedientia, ac debito pro jure ipsarum Ecclesiarum defendendis zelo desiderandum supersit.“ Ipse Rex christianissimus edictum suum antea pro Cleri Declaratione *politiciis ex motivis* emissum nullius roboris fore missis Romam Litteris pollicitus, & publice testatus est *).

§. 8.

Ut igitur historiam nostris diebus tam celebratæ Declarationis gallicanæ a capite repetamus, ea sane in ipsa radice sua jam vitiatæ est, quippe ex politia humana, ex studio complacendi, ex metu, aliaque passione profecta, nec doctrina etiam sua antiquitati conformis, sed vel apud Gallos novitia, atque a pristina fide aliena, neque totius gallicanæ Ecclesiæ in sacra Synodo decisio, sed paucorum, si cum absentibus compares, in Comitibus opinio, non nisi per violentiam Sorbonæ

*) Contin. Fleur, ad an. 1692, & 93.

obtrusa, a plurimis vero Orthodoxis tam intra Galliam, quam universum per orbem impugnata, rejectaque, a summis Pontificibus constanter reprobata, ab Episcopis, suis Authoribus revocata, ab ipso demum Rege christianissimo abolita, & annihilata. Hæc sunt dictæ Declarationis natalitia, hæc fata, hic exitus tanto apostolicæ Sedi gloriosior, quanto ex ipsa oppugnatione veritas manifestior. Nec refert post retractionem Episcoporum adhuc in Gallia quatuor Articulos ab eruditis plerumque defendi: præterquam enim, quod a gallicis etiam Doctoribus iidem Articuli graviter sint impugnati, parum nos movent facta hominum a norma legitimæ Authoritatis aberrantia. Non ii sumus, qui Regulam ab hominibus, sed a Regula homines dijudicemus.

§. 9.

Ab sit autem, ut historica hac narratione nostra quidquam atri stigmatis præstantissimo Galliarum Clero inurere velle videamur. Inerantiam donum ex divina promissione solius apostolicæ Petri Sedis, seu romanæ Ecclesiæ privilegium est. Eorum etiam, qui lapsi in errorem sunt, humana id fuit infirmitas, & conditio; resipuisse autem ab errore, hæc virtus est, atque gloria. Incassum ergo gallicanæ Ecclesiæ doctrinam toties nobis FEBRONIUS deprædicat, qui pessimus liber, non pœnitens Author, ab apostolica Sede, nostraque Germaniæ Ecclesia, singulariter a præcipuis Imperii Archiepiscopis jam damnatus est*). Disceant Febroniani vel a Galliæ Præsulibus, quanta summo fidelium Pastori, Christi que Vicario reverentia sit debita. Ex S. Avito viennensi Bossuetus Meldensis laudato sermone *de unitate* summe memorabile dictum adducit: *Dum Papa, & Caput omnium Episcoporum impugnatur, non unus solum Episcopus est, sed totus universum Episcopatus, qui periclitatur.*

§. 10.

In laudem tantæ Ecclesiæ, qualis Gallicana est, recentissima quædam hujus primum seculi exempla proferam, quibus posteriora illis elapsi seculi comitiis sensa sua manifestavit. Cum anno 1706 occasione Bullæ: *Vineam Domini* in Cleri conventu dictum fuisset, constitutiones pontificias tunc habere vim obligandi, postquam a corpore Pastorum fuissent acceptatæ, hancque acceptionem fieri ab Episcopis per viam judicii; Cle-

*) Weismann's neue Bemerkungen über das Resultat des Emserkongresses 1788. S. 120.

Clémens XI hac clausula S. Sedis auctoritatem violari conquestus est. Igitur anno 1711 data ad Papam epistola Galliæ Præsules ita se explicant, „per id non se intellexisse acceptationem, quæ sit *solemnis*, neque „ut Episcoporum conventus, velut *judex* constitutionum suo illas tribu- „nali subiceret, sed ut suæ doctrinæ conformitatem cum apostolica signi- „ficaret, simulque omne Janfenistis effugium præcluderet.“ Quam optima hæc est Cleri gallicani declaratio, pontificiæ constitutioni Episcoporum acceptationem esse jungendam, non tamen *solemnem*, quasi sine hac auctoritas ad obligandum fideles Pontifici deesset, aut hujus sententia Episcopis quasi ejusdem *judicibus* esset subjecta, quam suo judicio vel approbare possent, vel reprobare; sed propter adversarios ad superandam eorum proterviam, ut tanto majore auctoritate, vel externa apud homines obloquentium ora comprimantur, dum unacum capite membrorum, seu corporis consensum vident manifestatum, omni jam præcluso humani prætextus effugio. Ita nimirum non *juris*, sed *facti* necessitate sæpe Concilia universalia convocabantur, ut totius orbis christiani expressa condemnatio refragarios opprimeret tanto auctoritatis visibilis, atque externæ pondere, cui nemo hominum se opponere, & contradicere auderet, vel si quidam pauci id fuerint ausi, ob tantæ temeritatis notam apud omnes aversionem excitarent.

§. II.

Duo insuper sunt comitia Cleri gallicani ex novissimis temporibus insigni præconio prosequenda. Anno 1728, die 8 Maji de episcopali potestate a Christo instituta Præsules ita loquuntur: „At Jesus Christus ipse „sua institutione limites præscripsit *huic potestati*, quam subjecit Sedi Pe- „tri, in qua posuit *plenitudinem* apostolicæ potestatis.“ Tam longe ab- sunt Galli ab hodierna Germanorum doctrina, omnes Episcopos æquales esse, & plenitudinem potestatis habere. Notandum pariter a Gallis non singulos quosque Episcopos, sed ipsam episcopalem potestatem dici pontificiæ subjectam, quod vel parisiensis scholæ doctrinam corrigere videtur: si enim superiora sunt Pontifice Episcoporum Concilia; tunc in his plenitudo potestatis est, non in illo: nec Petro subjecta est episcopalis potestas, sed ille huic. Certe Christus Dominus Apostolis, licet tunc essent in unum congregati, non mandavit regere Petrum; universim autem Apostolos Petro commisit contra diaboli insidias in fide confirmandos Luc. 22. In alio conventu anno 1761 gallicani Præsules de apostolica Sede hæc ef-

fantur: „Super hunc montem sanctæ Sedis pascimur & nos, ait S. Augustinus ad populum suum, inibi nos vobis pascua porrigimus, simul, que accipimus. In hoc loco Dominus docet, & ideo statuimus verba Tertulliani usurpantes hic, nempe in romano Pontifice nostram fidem obfirmare nullam aliam fidem quærendo.“ Ita quod durius ad fidem prioris seculi in comitiis gallicanis adversus S. Romanam Sedem dissidiis tunc impellentibus actum est, hoc labente seculo ad antiquæ suæ gloriæ splendorem gallicani Præsules emendarunt.

§. 12.

Differentiam adhuc assignari oportet inter pristinam scholæ parisiensis doctrinam saltem in Ecclesia toleratam, & recentiore Cleri declarationem tanta Ecclesiarum fere omnium perturbatione ortam, & constanti apostolicæ Sedis renisu demum oppressam. Inde a constantienſi Concilio duce præcipuo Gersonè parisiensî Cancellario Pontifex, ut *singularis* persona, seu privata, seu etiam publica, scilicet tamquam *Sedens* in ipsa *Sede* distinctus a quibusdam Galliæ Doctoribus, neutiquam verò universis, synodo œcumenica inferior credebatur in iis, quæ ad propriam ipsius hæresin, seu schisma, seu quodcumque grave scandalum spectarent. Hæc, inquam, opinio Gallorum de *singulari* Papæ persona, prout expresse Patres Constantienses Sess. 4, & 5 loquuntur: *Quicumque, etsi papalis dignitatis — obedire tenetur.* Hoc sensu in Gallia vulgo defensæ binæ assertiones: *Papa inferior Concilio œcumenico*, veluti caput solitarie spectatum minus est toto collecto corpore. Hinc alteram deduxere: *Papa per se solum non est infallibilis*, quippe qui a fide ad hæresin deficere, atque vel ideo in fide ab universali congregata Ecclesia reformari posset. In hac opinione supremæ authoritatis, & inerrantiæ privilegium tantum *Sedenti in Cathedra Petri* denegatur, ipsi vero *apostolicæ Sedi*, hoc est, romanæ Ecclesiæ cum suo Capite, Petri Vicario conjunctæ nihil suæ prærogativæ derogatur, sed potius publica Gallicanæ non minus, quam catholicæ Ecclesiæ professione romana Ecclesia semper, & constanter agnita fuit tamquam *Mater*, & *Magistra* omnium reliquarum, cui ex divina Christi institutione in rebus fidei interna mentis obedientia debeatur. Itaque cum universali consensu salva consisteret apostolicæ Sedis authoritas, inter scholasticas opiniones illa de Sedentis minoritate, & fallibilitate tolerabatur. Quamvis enim communis Catholicorum extra Galliam sententia eandem rejiceret, utpote quæ aut aperte opponeretur, aut saltem

tem violentiam inferret S. Scripturæ eloquiis, Ss. Patrum doctrinis, Conciliorum actis, & decretis, nec non totius Ecclesiæ fidei de Petri dignitate, & inde defluente Pontificis autoritate; ea tamen opinio non videbatur meram, puramque speculationem egredi, nec in praxi pontificiæ autoritati quidquam detrahere, quippe cum fidei dogmata nunquam per se *solor*, sed semper cum romanæ Ecclesiæ consensu, ac antiqua fide summi Pontifices definiant.

§. 13.

At e contrario, quæ hactenus tantum inter scholasticos disputabatur opinio nulla cum autoritate publica, vel ecclesiastica, ea in conventu Episcoporum nunc declaratur gallicanæ Ecclesiæ doctrina per universale Concilium constantiense definita *). Neque jam in sola speculatione hæretur, sed vel maxime ad praxin respicitur, ut prævisum apostolicæ Sedis fulmen infringatur: propterea non solum Pontificis *personalia*, sed & apostolicæ Sedis, id est, *romanæ Ecclesiæ* unicum Capite suo conjunctæ judicia superiori quodam judicio reformabilia declarantur, eoque commentitio non tantum *collectæ*, sed & *dispersæ* Ecclesiæ, secus ac Patres constantienses judicaverant **). Haud satis bene rem intelligunt, qui eandem Ecclesiæ dispersæ, quam collectæ autoritatem prætendunt: non enim de autoritate tantum, sed de autoritatis exercitio hic quæritur, id est, de judicio uniformi totius Ecclesiæ, quo apostolicæ Sedis sententia reformetur, quale judicium a collecta solum, neutiquam vero dispersa Ecclesia institui, formari, & publicari posset. Quare si a consensu totius diffusæ Ecclesiæ dando, vel negando decreta apostolicæ Sedis penderent, cum universalis hic consensus vix, aut ne vix quidem innotescere, imo nunquam a refragariis posset obtineri; necessario divinæ fidei regula, Petri apostolica autoritate prolata nutaret, eoque amplius unitas in fide distumperetur, quo plures Ecclesias particulares error infecisset, neque solum *universalis*, sed cujuslibet *singularis* Ecclesiæ judicio Pontificis sententia subiceretur.

§. 14.

*) Basileense, ne quidem quoad illas priorum Sessionum assertiones, allegare gallicani Præfules audebant.

**) Non verbis quidem formalibus ita declaratur, satis tamen aperte ipso sensu innuatur.

§. 14.

Plerumque æquivocis verbis ludunt, qui Pontificem non in se solo, sed tantum cum consensu Ecclesiæ infallibilem prædicant: nam inter duos extremos casus, ubi vel *solus* sit Pontifex contra totam Ecclesiam, vel cum Pontifice *tota* Ecclesia idem iudicet, dissimulare solent medium casum, eumque frequentissimum, cum lite in Ecclesia orta, atque sententia Pontificis lata pars *una* capiti consentit *altera* dissentiente. Duo illi extremi casus ejusmodi sunt, ut de posteriori nulla sit prorsus inter Catholicos controversia: de priori, si tamen possibilis sit, ex constantiensis Concilii decreto pariensis scholæ, ut placet, doctrinam eligas. De tertio casu, eoque intermedio nihil Patres constantiensis statuerunt: valet igitur antiqua fidei regula, quamlibet vulgarem Ecclesiam, ut catholica sit, cum centro unitatis debere esse conjunctam. Quotquot in fide jam definita dissentirent, illæ ab unitate corporis cum suo Capite se separarent, & Catholicæ eo ipso jam non forent. Hæc, inquam, antiqua fides, cujus professio jam sexto seculo a S. Hormisdæ P. orientalibus Episcopis præscripta, & ab iisdem subsignata est, *sequestratos a communione Ecclesiæ catholicæ, id est, non in omnibus consentientes Sedi apostolicæ.*

§. 15.

Præstat uberius, inde ab initio hanc memoratu dignissimam fidei professionem percipere a Joanne constantinopolitano Patriarcha ad Hormisdam Pontificem transmissam: „Prima salus est rectæ fidei regulam custodire, & a Patrum traditione nullatenus deviare, quia non potest Dominus nostri Jesu Christi prætermitti sententia dicentis: *Tu es Petrus, & supra hanc Petram edificabo Ecclesiam meam.* Hæc, quæ dicta sunt, rerum probantur eventibus, quia in Sede apostolica inviolabilis semper catholica custoditur Religio. De hac igitur fide non cadere cupientes, & Patrum sequentes in omnibus constituta anathematizamus omnes hæreses — Quapropter sequentes in omnibus Sedem apostolicam, & prædicamus omnia, quæ ab ipsa decreta sunt, & propterea spero in una communione vobiscum, quam apostolica Sedes prædicat, me futurum, in qua est integra religionis, & perfecta soliditas: promittentes in sequenti tempore sequestratos a communione Ecclesiæ catholicæ, id est, in omnibus non consentientes Sedi apostolicæ, eorum nomina inter sacra non recitanda mystèria. — Huic vero professioni subscripsi mea manu, & direxi

„direxi perscripta tibi Hormisdæ, Sancto & Beatissimo Fratri, & Papæ
 „magnæ Romæ.“ In hanc catholicæ fidei professionem annotatio autho-
 ris, qui vulgo Bossuetus dicitur*), æque memorabilis est: „Omnes
 „ergo Ecclesiæ subsignata formula profitebantur romanam fidem, Sedis
 „apostolicæ, & Ecclesiæ romanæ fidem integra & perfecta soliditate
 „constare, ac ne umquam deficiat, certa Domini pollicitatione firmatam.
 „Nempe hanc fidem ab Episcopis ad Metropolitanos, ab his ad Patriar-
 „chas, a Patriarchis ad Pāpam mitti oportebat, ut omnium confessionem
 „unus exciperet, ac pro confessione fidei communionem omnibus, uni-
 „tatemque rependeret. Hanc professionem eodem initio, eadem conclu-
 „sione, additis subinde hæresibus, atque hæreticis, qui suis temporibus
 „Ecclesiam conturbassent, per secuta secula frequentatam scimus. Hanc
 „uti S. Hormisdæ Papæ, sanctoque Agapeto, ac Nicolao I. omnes Episco-
 „pi fecerant, ita iisdem verbis Adriano II. Papæ, Nicolai Successori fa-
 „ctam in Concilio VIII. œcumenico legimus. Hæc ergo ubique diffusa,
 „omnibus seculis propagata, atque ab œcumenico Concilio consecrata
 „quis respuat Christianus?“ Utinam author ille hæc sua verba, id est,
 hanc catholicæ fidei professionem semper in memoria tenuisset!

§. 16.

Satis aperte nunc ex §§. 12, & 13 differentia apparebit inter prio-
 rem parisiensis scholæ opinionem, & recentiorem conventus gallicani de-
 clarationem ab Ecclesia jam reprobam, & ab ipsis Galliæ Episcopis sum-
 ma sua laude revocatam. Ceterum cum gallicana Declaratio hodieum
 suos iactatores inveniat, historicum hoc caput, quod veluti *ἱσαγωγικόν*
 ad criticam nostram disquisitionem præmisimus, haud melius, quam cum
 doctis. Fleurii Continuatore concludi posse videtur: „Ergone triginta
 „septem Episcopi, qui suæ revocationi subscripti leguntur, minoris sunt
 „authoritatis, quam triginta quatuor illi Præsules, qui Declarationem
 „approbarunt? nec hucusque Ecclesia comitis Cleri Gallicani attribuit
 „Synodi auctoritatem, nec etiam ceteri Episcopi contra horum palino-
 „diam tum reclamarunt. Esto, quod *postea* aliqui has sententias secuti
 „sint; semper tamen verum est, eos a Rege & Clero fuisse revocatas &
 „ab omnibus saltem silentio, tacitoque consensu hanc revocationem ap-
 „probatam: nec Parlamenti auctoritas in rebus sacris Episcoporum sen-
 „ten-

*) Defensio Declarat. conv. Cler. Gallic. lib. 10. cap. 7.

„tentia, ac judicio prævalebit, nec quorundam Præfulum propositiones
 „Ecclesiæ auctoritatem sibi vindicabunt, utpote quæ ortum habuere in
 „private conventu, in quo Parlamenti imperium præsedet, terror sus-
 „fragium tulit, adlatio decedit, & complacendi studium subscripsit *).

CAPUT II.

An magnus Bosuetus Defensionis Autor?

PARS I.

Criteria externa.

§. I.

Eadem Fleurii continuata historia ab authore Anti-Jansenisticarum par-
 tium haud suspecto filium mihi præbèt ad alterum hoc Caput critica
 disquisitionis, quo Patre liber sit editus, *Defensio Declarationis Gallicanæ*?
 „Jam a longo tempore (verba sunt laudati Continuatoris **) *parva*, ut
 „se vocant, *Ecclesiæ* Theologi, seu Jansenistæ ultrajectini desperatæ suæ
 „causæ patrocinium, opemque quærebant in dolis, atque imposturis:
 „toti in eo erant, ut factionem suam non modo sectariorum numero,
 „sed & virorum illustrium auctoritate famosiorem redderent ***): eo
 „fine in censum suum revocabant Cardinales, Archiepiscopos, Episco-
 „pos, ac maximi nominis Principes; quos sibi, suisque commentis fa-
 „visse fingunt, in vulgus spargunt, atque ementito eorum nomine li-
 „bros, quos tamen ipsi in Hollandica sua fabrica procuderunt, proter-
 „ve eis adscribunt. Cujus fraudis specimen est liber *contra Regalis Apo-
 „stolica Sedis* Hollandiæ impressus, quem sub nomine Guilielmi Cardina-
 „lis du Bois Cameracensis Archiepiscopi post ejus obitum typis edidit,
 „illumque, dum adhuc viveret, Jansenistis, atque appellantis strenue
 „patrocinatum fuisse, falso jactarunt.“ Plura sunt, bone Lector, quæ
 tibi in hoc historico exemplo ad Jansenianæ factionis fraudes detegendas
 velim

*) Ad an. 1693. §. 37.

**) Ad an. 1730.

***). Isti Jansenistæ, seu potius Quesnelistæ jam non tantum circa sat notas illas quin-
 que assertiones errabant, sed potissimum Duce suo Quesnello Romanæ Sedis, à
 quæ damnati fuerant, calceatæ insidiabantur. Vide præstantissimos Commenta-
 rios Ballerini in Opp. S. Leonis.

velim annotes. 1. Ultrajectini sunt isti malarum artium fabricatores: 2. e mentito magnorum virorum nomine subposititios libros procedunt in fabricis Hollandicis: 3. ope controversiæ in Gallia ortæ de *Regalibus* invivam reddere Sedem Romanam student, & 4. ejus auctoritatem deprimere ad patrocinandum *Apellantium* causæ. Similia illius temporis vestigia si inveneris, ad eundem scopum tendentia; næ tu merito Janfenianam imposturam subodoraberis.

§. 2.

Aliud exemplum quæstioni nostræ adhuc conformius, ac veluti ovum ovo simillimum eadem suppeditat historia ecclesiastica *) ex duorum Galliæ Episcoporum, Rupellensis, ac Lucionensis Pastoralis epistola, qua fideli suæ plebi pessimum dolum Quesnellistarum detegunt, qui ut damnatas Quesnelli *Reflexiones morales in N. T.* auctoritate viri non solum apud Gallos, sed & exteras nationes summe æstimati defenderent, Bossueti Meldensis Episcopi, quem jure merito *Magnum* dixeris, nomen mentientes librum divulgaverunt *Defensio Reflexionum in N. T.* Hic liber aut falso Meldensi suppositus, prout viris doctis jam visum, aut certe ab ipso auctore mutata sententia est reprobatus, hinc mala fide a Jansenistis, tamquam ultima Bossueti sensa referens, procusus, prout allatis documentis duo Galliæ Episcopi damonstrarunt. Si quid jam Juristarum valet regula, *Semel deprehensus centies reus*: siquid physicum Newtoni axioma valet, *Ex similitudine effectuum ad similem causam esse concludendum*: sine temeritate præjudicare licebit, quid de libro sentiendum Bossueti nomen præferente, *Defensio Declarationis Gallicanæ*, qui liber mortuo Bossueto viginti sex abhinc annis non Parisiis, sed Luxemburgi, nisi is ipse locus impressionis sit fictus, verius Basileæ, aut Genevæ primum a. 1730 prodijt; postea vero, cum vel ipse Bossuetus vulgo Trecensis prioris Nepos eundem ut genuinum nollet agnoscere, post hujus quoque obitum multis cum mutationibus, & additionibus sine editoris nomine Amstelodami an. 1745 recusus est. Hæc licet fortia fraudulentæ suppositionis præjudicia longe fortioribus adhuc historicis æque, ac criticis roborantur argumentis.

§. 3.

Et certe, si primam illam de an. 1730 editionem ad incudem velimus revocare; ea, ex quo visa est, jam nullam apud Gallos fidem

Q 2

in-

*) Ad an. 1711. §. 17.

invenit. Cum enim Montipessulanus, & Senecensis Episcopi ad eamdem provocarent, illis Ruthensis, & Massiliensis, nec non & Lugdunensis Archiepiscopus varias dubitandi rationes, an genuina sit, insuper & contrariam exemplaris in Regia Bibliotheca custoditi lectionem opposuerunt. Quid de hoc Regi Galliae tradito exemplari manuscripto sit judicandum, brevi postea ex dicendis apparebit. Interim quod hæc in re summi ponderis est, ipse Trecentis Bossuetus, qui inter alia sui Patris manuscripta jure hæreditario etiam hoc opus apologeticum Gallicanæ Declarationis acquisiverit, contra factam publicationem in epistola anno 1735 die 31 Augusti scripta protestatus est, *se nullam, nec minimam quidem habere partem vel in hujus Defensionis publicatione, vel in ejusdem Gallicanæ translatione.*

§. 4.

Sed & altera posterior editio, quæ Amstelodami primum anno 1745 mortuo jam Trecentis Bossueto lucem aspexit, ab ipsis suis natalitiis omnem jam fidem perdidit; quippe cum certo constet eam, nisi Janseianus factus sit, saltem obstetricantibus Janseistarum manibus jam in partu suo deformatam, seu adulteratam fuisse. Atque inprimis ipsum Manuscriptum vel ex sola Trecentis Bossueti manu, per quam transit, maculam contraxit: ille enim Episcopus dudum a viris doctis accusatus fuit, pro sua cum Janseistis intima familiaritate sub e mentito Meldenis nomine plures libros (forsitan & illum pro Quesnello apologeticum) Janseismi pus redolentes, & a compluribus Galliae Episcopis damnatos in vulgus sparsisse. Quid, quod proprium ejusdem nomen præferens liber jam nigro carbone Romæ sit notatus, & inter prohibitos decreto pontificio die 7 Octobr. anno 1746 reiectus? *) Gallicana Quesnellianæ factionis historia nos docet, hunc Trecentem Episcopum se socium junxisse Antissiodorensi, aliisque sectariis Episcopis ab ipso Galliae Clero, ac Rege reprobatis, qui sub specioso prætextu regia jura defendendi officium S. Gregorii VII impugnarunt, hanc occasionem captantes adversus constitutionem *Unigenitus* impune insurgendi. **)

§. 5.

*) *Projet de Réponse à M. de Tencin Archevêque d'Embrun.*

**) *Contin, Fleur. ad an. 1730. §. 65.*

„Septembre 1701 M. de Meaux m'a demandé son traité *De ecclesiastica Potestate*, dont il a seulement retenu les premiers livres de la dernière revision, & correction sous le titre de *Gallia orthodoxa*." Isti tres primi libri postrema authoris correctione unice retenti teste Editore *) sunt ipsa *Prævia Dissertatio*. Quis jam non perfidiam Trecentis agnoscat & abominetur, qui Regi suo ceu Meldensis Episcopi vera & genuina sensa postumum opus tradidit ab ipso authore retractatum, & subprimi jussum, aliud vero Authoris ultima cura emendatum Regi abscondit!

§. 7.

Amplius ex ipso Editore tam illa Trecentis, quam sua ipsius perfidia elucet. Enimvero utriusque mala fides ex eo se prodit, quod ambo M. Bossueti nomine *Defensionem Declarationis Gallicanæ* divulgant, quam ille adeo in publicam lucem emittere non voluit, ut ex reverentia erga apostolicam Sedem expresse illam omittendam declararet, & solum Parisiensem priscam doctrinam, utpote in Gallia civitate jam donatam, defenderet orthodoxam: *Abeat Declaratio*, inquit **), *quo liberis: non enim eam, quod sepe profiteri juvat, tutandam hic suscipimus*. Equidem Bossuetus fervente adhuc Gallorum cum Romanis discordia Regis jussu pro ipsius Declarationis defensione quædam aut in unum conscripserit: aut pro more suo in sparsis schedulis annotaverit; at tertie sedatis postea animorum motibus, ac veritate tranquillius ponderata in scriptis suis multa ipse correxit, multa delevit, in specie omnia omitti voluit, si umquam talia conscripsit, quæ adversus S. Gregorium VII toto libro quarto *Defensionis* occurrunt, quod vel ipse Editor Præf. p. 28 confitetur. Et hæc quidem ultima Meldensis consilia, unde, ut verbis Editoris utar, Præf. p. 33 „videre jam possis cum magnum virom non recusasse, quin opus suum „totum retractaret eam unam ob causam, ne concordia Gallicanæ Ecclesiæ „cum Romana læderetur.“ Quare ergo in impresso non ea indicata, quæ in manuscripto tam copiose correctæ? quare deleta ibi, non hic, omissa? Falsi per se ipsum convictus est Editor, dum quod modo p. 33 de retractione ultima fassus est, superiori p. 32 negare contendit, suam editionem correctio difformem purgare cupiens, „quasi nihil inde publicæ utilitati periret, neque illustr. Author res alias fuisset dicturus, aliamve doctrinam secuturus.“ Falsum hoc, quia ultimo consilio vere retractavit

*) Præfat. p. 31.

**) Præf. Dissert. §. 10.

Æavit Bossuetus: falsum insuper nonnisi titulum operis immutatum fuisse, nam integrum fere opus, primis nempe exceptis libris, deletum: falsum etiam in contextu facile posse verbis *Declaratio Cleri Gallicani* alia substitui *Parisiensis prisca doctrina*: ita enim sæpe numero soli Declarationi textus est in *Defensione* proprius, ut nequeas illum pristinae scholarum questioni aptare, nisi illud Horatii velis in te exprimere:

*Humano capiti cervicem pistor equinam
Jungere si — velit — —*

§. 8.

Falsarius ille Editor ultrajectinus satis se Jansenistam manifestat cum importunis suis laudibus in Arnauldum extra locum effusis, quem in Prefatione, & notis libri sæpe, semperque gloriose commemorat, tum vero præcipue, qui mos est istorum sectariorum, falsa verborum dulcedine erga apostolicam Sedem, quam per cuniculos blandiendo infestant, atra tamen bile non raro erumpente. Sic Præf. p. 22 Theologos, ac Canonistas belle admonet, *ne dum Curia Romanæ errores confutant, summum Pontificem laceessant*. Ipse vero mox p. 23 summa scilicet sua moderatione Romanos arguit Pontifices, qui, ut ait, *non modo errabant, sed in errorem suum trahere Ecclesiam conabantur, cum decreta quædam dogmatica a veris dogmatibus omnino aliena ederent, quæ suæ Sedis auctoritate munirent, nec eis esset pudori errorum fieri doctores*. Item p. 32 erga summos Pontifices, ut Catholicum decet, suam reverentiam proficitur, & optat, ut Episcopus Meldensis romanæ Curia maxime indulgisset; nihilominus ultimæ correctionis formam ex reverentia romanæ Sedi debita a Meldensi suam prætermittit, & ab Authore retractata, novis etiam ex se additis, ad calumniam Pontificum typis publicat. Eadem pag. mentitur se sui muneris arbitrato fuisse, *nihil operæ suæ ad M. Bossueti, operam admiscere. non modo ejus tractatus formam non mutare, sed ne verbum quidem addere, vel detrabere*. Eodem tamen oris hiatu fatetur non se exhibere ultimam formam operis, quam sibi illustr. Author proposuerat, scribere debuisset: actu jam correxerat. Præterea qui autographis non verbum addere, vel detrabere pro lege sibi statuit, unde tantum senserit pondus in paranda editione, ut tanti oneris mole gravari vereretur, & in alios viros laborem cuperet transferre, nisi mandatum Trecentis Episcopi, quem summa reverentia coleret — ? p. 40. Nostin ex cantu avem, ex ungue leonem?

§. 9.

Verum & apertius odii sui venena adversus apostolicam Sedem evomuit, quam sat noto artificio sub nomine *Romanæ Curiae* turpis commercii accusavit, ut sibi in malæ causæ patrociniū copias compararet Defensorum, quos præmiis corruperit *oblata nimirum Cardinalatus dignitate* Præf. p. 2. Hac sordida via Duumviros præstantissimos, eruditionis æquæ ac pietatis laude eminentes, optimeque de Christi Ecclesia, dum viverent, meritos, Daguirreum, & Sfondratum sibi Purpuram acquisivisse calumniatur, nihil aliud asserens ad aliquem suæ calumniæ prætextum, nisi quod, tanti viri cum essent, publicis, iisque doctissimis scriptis Gallicanæ Declarationis novitatem impugnant. Neque etiam Sancto in cælis Pontifici Gregorio VII suis conviciis pepercit, cui p. 28 *inaudite audaciæ, & arrogantie* crimen ac scandalum *infirmorum animorum* intentare non est veritus. Hoc loco mihi in memoriam revocantur ea, quæ duo Galliæ Episcopi an. 1711 in sua instructione Pastoralis ad utrumque Clerum, populumque scripserunt de Janfenistis, dum falso Bossueti nomine *Defensionem Reflexionum Quesnellianarum* publicarent. „Sic sæpe divina „permittit Providentia, ut hæretici infamiæ notam ultro sibi inurant, & „quasi dedita opera id agant, ut homines perditī, atque impudentes ab „hominibus habeantur.“

§. 10.

Si talia ausus est convitiator ille, *Defensors* Editor contra Ecclesiæ Romanæ purpuratos Cardinales, contra summos Christi Vicarios, etiam cum Christo in cælis jam regnantes; quid mirum, quod alios viros causæ suæ adversarios, et si & ipsos dignitate, vel eruditione summos impudenti calamo insectatus fuerit? — De Strigoniensi Archiepiscopo, & Hungariæ Primate Præf. p. 4. scribit, quod *turbæ tam contentæ se adiungens* (duos Doctores Lovanienses, & Marchionem de Sarreto intelligit) *ultramontanis opinionibus plenus in medium prosiliet*: tum vero Strigonienses *nugas, & injurias* vocat eam censuram, quam Archiepiscopus, & Primas Hungariæ in Concilio Nationali tulit, censuram non ita ut protenditur p. 5. sempiterna oblivione deletam. D. Charlas natione Gallum, & eruditione clarissimum p. 7. arguit, quod eam defendat causam, quæ *nisi malis artibus* defendi non possit, & nemini dubium vult esse, quin ille *fucum facere voluerit imperitis, & vana eruditione, speciosisque sermonibus Romanorum aures permulcere.* De Bellarmino, aliisque, quos Gallicana doctrina

trina nacta est adversarios, hæc habet p. 8: *Quam facile est videre eos ingenio sua nequiter abuti, & fidem publicam, religionemque ipsam violare!* A doctissimo P. Gonzalez conscriptum p. 9 vocat *levis armaturæ opus, res ejus inutiles, & argumenta quo subtiliora, eo absurdiora.* Rocabertum Archiepiscopum Valentinum p. 11 honorifice, si placet, nominat *tam confusum Scriptorem, quam fraudulentum Disquisitorem.* Demum p. 18. Bossueti patientiam, & moderationem erga tantos viros, quantos vidimus, Declarationis Gallicanæ impugnatores mire commendat hisce verbis: „Poterat nullo labore eos *furiosos* proponere omnium virorum doctorum „*irrisioni, ac contentui*, qui non minus absurdus, quam falsis de Papæ do- „minatu, & infallibilitate doctrinis ejus veram potestatem, & in docen- „do authoritatem labefactabant, Ecclesiæque ipsius statum, & antiquum „ordinem convulsam ibant.“

§. II.

Ita si ex tripode pronunciare licet, omnesque suos adversarios conviciis oneratos dimittere; facile est pæana canere, sed forsitan sine triumpho. Sane quisquis fuerit ille haud satis consultus *Defensionis* Editor, pluribus in locis suæ Præfationis contra se ipsum sententiam dixit pag. 12. „Ejusmodi homines, quos præterita secula non paucos tulerunt, „nostra ætas parturit non minus multos, qui, quos ad obsequium co- „gere non possunt, tyrannorum more opprimant, controversiæ causas „non dirimant, sed gignant jurgia, veritatem non illustrent, sed obscu- „rent.“ — Atque iterum pag. 19: „Famæ ipsorum suæ illi Authores „male consulunt, qui ne sua scripta langueant, adversarios suos dieteris, „& maledictis insectantur. — Hodierni sunt quidam Theologi, quos „scribere iracunde, paginæ ipsorum singulæ docent, & injurias potius „suas ulcisci, quam pro veritate certare. Nam quid eos censemus, quos „sæpe videmus adversariorum suorum dicta in pejorem partem interpre- „tari, errores affingere, qui ex eorum scriptis non sequantur, eorum „peccata, si qua deprehendunt, exaggerare?“ Quid vero, si id Quesnellistarum more adversus unctos Domini, summos Sacerdotes, & ipsum supremum Christi in terris Vicarium temerario ausu moliantur? *Ex ore tuo te judico.* —

§. 12.

Quod demum ad penitus dignoscendum Editoris characterem adhuc singulariter nostram reflexionem meretur, istud est Præf. p. 7 assertum, doctrinam Gallicanæ Declarationi oppositam, quam ipse fatetur *non modo cum Romanis ingentis esse notam, sed etiam aliquod fundamentum habere in ipsa veritate*, quam veluti pro aris, & focis Hispaniæ, Poloniæ, Hungariæ, & ipsius Galliæ Archi- & Episcopi habitis etiam in Synodis defenderunt, quæ apud nos Germanos utque ad dimidium labentis seculi pleno jure dominata est, quam tres summi Pontifices, Innocentius XI, Alexander VIII, Innocentius XII *continua serie* constanter ita asseruerunt, ut contrariam proscripserint, & repudiarint, eamque demum ipsi Galliæ Præsules revocarint, hanc *communem* certe Catholicorum doctrinam, *ne universalem* dicam, NON NISI MALIS ARTIBUS DEFENDI POSSE. Hic certe sermo catholici hominis non est, esse non potest: cujus ergo? — Nativitas partus prodit Patrem, seu si malis, Matrem, ultrajectinam Sectam. Quid jam amice Lector! de hoc libro, quid de libri Editore cogitas, quem constat Catholicum, licet forsitan nomine, non tamen revera fuisse, sed apostolicæ Sedis inimicum, qui jam convictus est falsarius in eo, quod M. Bossueti nomine librum divulgaverit ab ipso Authore *retractatum*, quasi *non retractatum*? Quid non de ipsa prævia Dissertatione, seu primis tribus libris præsumendum vel solum ideo, quia per infestas hominis hæretici manus transierunt? Quam *mala fidei* a Trecensi Episcopo commissum est opus! opus, quod ipse, dum adhuc viveret, in publicum emittere non est ausus, quod primum post hujus obitum non in Galliis, non ab homine probatæ fidei, & apertæ frontis, sed apud externos fidei, tecto Editoris nomine Amstelodami emissum est.

§. 13.

Equidem, quod necesse est facere impostorem, ad manuscriptos codices autographos Editor appellat, quos asservari p. 40 futuros aliquando, si opus fuerit, suæ incorruptæ diligentiae sinceros testes. At ubinam terrarum asserventur, tam dolose reticuit, quam suum ipsius nomen, patriam, habitationis locum, Religionem. Quænam ergo huic homini incognito fides, si vel ipsum Regi Galliæ ab Episcopo Trecensi traditum exemplar, ut supra § 5., & 6 vidimus, genuinum non est? Enimvero haud temere suspicari possumus, imo & prudenter debemus, ab homine hoc inimico etiam veris M. Bossueti scriptis, ubi-

cum-

cumque occasio ferebat, ex malo, ac pestifero corde suo virus fuisse inspersum. Atqui hoc ipsum manifestum sit ex internis, ut ajunt, criteriis, quod sequenti adhuc Capite demonstrabo *Defensionis* librum in se ipso non nihil scrutaturus, & cum certe genuinis M. Bossueti scriptis comparaturus, ex qua palpabili differentia non solum, sed & oppositione apparebit illius libri authorem justo titulo cum doctis. P. Zacharia in Antifebronio vocandum esse *Pseudo-Bossuetum*.

CAPUT III.

An M. Bossuetus Defensionis Author?

PARS II.

Criteria interna.

Evolventi mihi, & solertius exploranti integros duos tomos *Defensionis* a. 1745 Amstelodami excusæ, ad evidentiam usque ipsius Præfatoris, seu Editoris vestigia fuere observata, ut nihil de Notis dicam, operi adjectis, iisque non raro aperte Jansenianis. Bellam hujus Authoris, quisquis is fuerit, imaginem doctis. Cartier depinxit *): „Hæc nempe solida illa argumenta sunt, quibus *Defensionis* Author totum negotium perficit. Quid enim præcipua historiæ ecclesiasticæ monumenta huc pertinentia partim ab ipso prætermissa, partim male, & officianter dumtaxat prolata, nisi ignorantiam; quid detruncata, aut a nativo sensu in alienum, & improbandum detorta Conciliorum, Patrumque testimonia, contradictiones satis frequenter immixtæ, nisi mendacium, & imposturam; quid denique injuriæ, ac probra in quosvis pietate, ac doctrina conspicuos viros jacta, nisi maledicentiam produunt? Hæc si libro ademeris, omne robur ei detraxisti, ut qui non nisi hujusmodi firmetur.“ Quamobrem ut hanc veluti tabulam membratim spectandam Lectoribus proponam, operæ pretium duxi, hoc præcipuum Caput in speciales Articulos dividere, exhibiturus imo Authoris in Viros bene meritos, summosque Pontifices maledicentiam: 2do contradictiones haud infrequentes: 3tio malas artes circa statum quæstionis, item in argumentando, & respondendo: 4to Sacræ Scripturæ & sancto-

R 2

rum

*) Authoritas, & infallibilitas Ss. Pontificum in Præfat.

rum Patrum detortas interpretationes: 5to Pontificum, & Conciliorum falsificationes: 6to demum, quod totius operis propositum est, auctoritatis apostolicæ Petri Cathedræ, imo & catholicæ Ecclesiæ subdolan infestationem.

ARTICULUS I.

Maledicentia Auctoris.

§. 1.

Sicut larvatus ille Bossuetus incipit a conviciis, in viros laude dignissimos effusus, ita ab iisdem tantum obiter commemorandis incipiam. Altera mox pagina suæ Dissertationis præviæ universim omnes suæ causæ adversarios iniquos *Censores* adpellat, tum vero Lovaniensem primum Professorem, Nicolaum du Bois *parum probatum suis, clamorosum scilicet, quam doctiorem.* Pag. 3 Synodi nationalis a Primate Hungariæ celebratæ auctoritatem leviter spernit, tamquam fastuose oppositam & ostentatam. Quæ christianus Lupus pro apologia Honorii adducit, a viris inter Catholicos doctissimis, ipsis adeo Gallis jam dicta, & argumentis certe non contemnendis præbata, p. 53 per rhetoricam, si placet, figuram trinæ repetitionis simpliciter falsa pronuntiat. De Bellarmino etiam, & celeberrimo Conditor annalium Baronio memorare non piget, *optima scripta multis mendis debonestasse.* Doctrinam de suprema Pontificis auctoritate, quam ipse Gerson falsus est, ante Constantiensem Synodum plurimorum fuisse traditionem, ita ut oppositorum dogmatizator fuisset de hæretica pravitate suspectus, vel damnatus, hanc doctrinam vocat T. I, p. 426 *pestimum morem, & ab alto inhibitum adulationis virus*, quam Gerson irridentem traditionem nominaverit. Interpretationem eam, quam fere totius orbis catholici quibusdam Gallis exceptis usque ad novissima tempora decreto Synodi Constantiensis pro casu Schismatis dederunt Tom. 2 p. 303, *ludibria* vocat. Authorem de Libertatibus Gallicanis, doctrinam insignem, D. Charles T. 2, p. 317 egregie laudat, ut qui *mendacissime, ac malevolentissime* scripserit, *cujus insulsißima commenta jam* (ubi?) *confutata.* Nolim plura ad invidiam adducere: satis amarulenta sententia produnt hominis, qui oblitus videtur, quid Deo, quid suæ & adversariorum famæ, quid pudori, & honestati debeat, qui victorias suas non rationum pondere, sed conviciorum acumine metiatur. Præf. pag. 21.

§. 2.

§. 2.

At enimvero ab hoc maledicendi more, quis nesciat, longe alienissimum fuisse Meldensem Episcopum, Virum, si quis umquam alius, erga adversarios suos moderatione celebrem, & vel ideo ipsis adversariis commendatum? Quem imitari quidem fraus studuit, sed quæ natura hæresis est, malignitas latere non semper potuit, quin ultro se proderet. Certe ego per decem, & amplius annos quotidianus fere M. Bossueti lustrator, nihil simile umquam in eo legisse me memini. Neque etiam credibile est de tanto Viro, tamque moderato, quod appendicis p. 12 in Lutherum scripserit probrosum de trivio dictum, *impurus Nebula*.

§. 3.

Speciali adhuc animadversione dignæ sunt adversus summos Pontifices iniquæ ficti Bossueti criminationes, qui omnia incerta, dubiave, aut omnino falsa ubique corrasit, & ambigua, quantum fieri poterat, in pessimum semper sensum detorsit, ut eo turpiore labe plurimorum Pontificum memoriam ex illorum doctrinis, responsis, decretis, immo & factis apud posteros aspergeret, invisamque redderet. Ita lapsuum pontificiorum catalogum facturus a fabula de Marcellino incipit*), mox atro commate signat Liberium, S. Zosimum, S. Hormisdam, (quanta erga utrumque malitia!) Honorium, Gregorium II, Stephanum II, Sergium III, S. Gregorium VII, Bonifacium VIII, Paschalem II, Alexandrum III, Innocentium III, Nicolaum III, Clementem V, Joannem XXII, & singulariter quidem Martinum V, T 2, p. 234 calumniatur, *eius famam graviter laborasse — appellationes bis condemnare visum sacre Synodi (constantienfis) immo totius Ecclesie refugisse lucem, atque Synodi talia repellentis prævaluisse sententiam*. Quæ omnia quam falsa sint, aut male detorta, certe autem conviciose dicta, vel a scholasticis nostris Theologis, in specie a Melchiore Cano in Locis theologicis, ipsoque Natali Alexandro, natione & doctrina Gallo in Historia ecclesiastica, abunde jam demonstratum est.

§. 4.

Sed quod hic valere amplius debet, ipse genuinus Bossuetus est, qui has calumnias aperte confundit: ille enim ubi de romanis Pontificibus

R 3

*) Defens. l. 9. c. 32.

bus sermonem Christi ad Petrum, *Ego rogavi pro te* &c. explicat *), in tota Pontificum serie nonnisi duo, vel tria loca *molesta* inveniri testatur, & hoc quidem non certe, aut absolute, sed sub dubio *forſitan*, & ut *credeatur*, observari. In sermone vero de *Unitate*, quo parisiensibus illis comitiis Meldensis Episcopus initium dedit, erectam Romæ Petri Cathedralam expresse vocat *æternam*, & romanam Ecclesiam, quippe a S. Petro & Successoribus doctrinam *hæresis ignaram*. Dein singulariter Pontifices considerans, unum aut duos tantum denotat, non qui errorem pro veritate divinæ fidei credendum umquam definierint, sed qui per vim, aut subreptionem fidei doctrinam *non satis constanter* defenderint, aut *non satis plene* explicarint. Demum observat Pontifices ex orbe universo consultos tot jam seculis respondisse ad omnis generis quæstiones de doctrinis, de disciplina, de ceremoniis, & unicam inveniri responsionem (illam Honorii) non fidei definitionem, sed silentii impositionem, quæ notata fuerit Concilii œcumenici *N.B. extremo rigore*: ejusmodi autem defectus peculiares esse summorum Pontificum, non communes Petri Cathedralæ, hoc est, romanæ Ecclesiæ, in qua nullam impressionem fecerint. Viden, quantum distent æra lupinis, hæc Bossueti moderata, & sana ab illis Pseudo-Bossueti malignis, falsisque, qui catholicum se simulans suum studium in eo posuit, ut Patrum suorum verenda turpiter denudaret, mundoque ad scandalum proponeret!

ARTICULUS II.

Contradictiones non infrequentes.

§. I.

Vetus verbum habet: *Mendacem oportet esse memorem*. Infausta oblivio, prout plerumque certis hominibus accidit, Editorem libri, eundem & authorem, vel saltem adulteratorem prodidit. Is, qui in Præfatione testatus est, nec verbum M. Bossueto addere, vel subtrahere sibi legem fuisse, in appendicis ad librum præfatione adhuc sui memor Meldensem Episcopum tamquam Authorem de se in prima persona *Ego* loquentem inducit; postea tamen in operis decursu sui oblitus append. l. 3 integrum Caput 12 de *Bossueto* in tertia persona, & pleno quidem cum titulo, ac insigni encomio in medium adducit, quod certe non a *Bossueto*, ut qui semper de se ipso modestissime scripsit, sed & sensisse videtur.

§. 2.

*) Medit. in Evang. die 72.

§. 2.

Propius adhuc *Defensionis* Authorem spectemus secum ipso pugnantem. Præviæ Dissertationis §. 6 conqueritur, *gallicanam Declarationem im merito impugnari, tamquam esset decretum fidei*, quod ipso teste a Cleri gallicani mente alienissimum fuit: en propria dicta: „Perspicuis verbis gallicani Patres testantur, ac probant non eo se animo fuisse, ut decretum de fide conderent, sed ut eam opinionem tamquam potiore, atque omnium optimam adoptarent, opinionem sane, non catholicæ doctrinæ formulam, quæ animos constringeret; Itaque revera ab omni censura temperant, numquam fidem ipsam nominant, nemini excommunicationem intentandam putant —“ E contrario, quod hic *opinionem*, sæpius alibi *dogma* adpellat. Amplius videamus, quam importune contendat Conciliorum autoritatem supra Pontifices ex constantiensis decreto de fide esse. *Defens.* l. 6, c. 19 ita loquitur: „Quæres, cum ea doctrinâ, quam tuemur, a constantiensis Concilio definita sit, illudque decretum, a Sede apostolica, totaque Ecclesia comprobatum; an igitur ad fidem catholicam pertineat? contraria vero sententia an hæretica judicari debeat? *Resp.* Nostri, atque inprimis pius ille, doctusque Gerson aperte pronuntiavit *hæreticam* esse, quæ Synodi Constantiensis definitioni adversetur. — Porro dubitari nequit, quin res, de qua agitur, pertineat ad interpretationem divini juris: quæritur enim, quàm potestatem Petro, ac Successoribus, quam Ecclesiæ atque Conciliis Christus dederit. Definit Synodus eam Conciliis potestatem a Christo immediate datam, cui etiam Petri Successorem subesse oporteat. Ergo clare agitur de interpretatione divini juris, adeoque de fide, de doctrina catholica a Deo revelata — ut nihil ob stare videatur, quo minus ea sententia hæretica sit, quæ Concilii œcumenici definitioni tam perspicue adversetur.“ Parcus sum in hisce absurdis adducendis, ne paginas impleam dignioribus reservandas.

§. 3.

Itane vero Bossuetus loquatur declarationem *defendens*, longe aliter, ac contra, quam antea Declarationem *componens* *)? Quid vere, ac sincere Bossuetus de hac Parisiensis scholæ doctrina senserit, genuina ipsius

*) Editor prætendit *Præf.* p. 12. a Meldensi Episcopo Declarationem fuisse compositam.

sius scripta demonstrant. Expositio doct. Cath. §. 21 hæc docet: „Quantum ad ea, de quibus constat in scholis disputari, quamvis Ministri Reformationis non cessent illa allegare, ut Pontificiam potestatem reddant odiosam, non necesse est hic loqui de illis, cum de fide catholica non sint. Sufficit agnoscere Caput a Deo institutum ad universum gregem in via Domini gubernandum, quod semper illi lubentes facient, qui concordiam fratrum amant, & unanimitatem ecclesiasticam.“ — En, ut *scholasticam* opinionem, & dogma *catholicum* Bossuetus hanc controversiam nomet hoc loco, ubi data opera fidei catholice expositionem conscribit: Insuper notatu digna sunt ejus verba: in Capite a Deo constituto agnosci debere potestatem *universum* gregem gubernandi, quam loquendi formulam Scholæ Parisiensi admodum invisam esse Meldensis ignorare non potuit: ipse tamen in sua fidei expositione scholasticam distinctionem inter potestatem oves *collectim*, aut *divisim* pascendi adeo non attendit, ut expresse gregem universum a Pontifice gubernandum asserat.

§. 4.

Defensionis librum perlegendo in tot antilogias offendi, ut Author toto opere retrogradam viam cancrorum instar incesse mihi videretur. Paucissimas adhuc pro exemplis adducam. Defens. T. 2, p. 29 ad finem ait: *Neque Chalcedonenses ullo modo dubitabant, quis esset Christus, Deus, an homo verus, an confusus naturis quid tertium: non id sane querebant* (scilicet quod Eutychiani docuerant, in Christo unicam esse naturam) *sed verene, & ex communi Patrum, & Ecclesiæ sententia tantum Sacramentum Leo P. exponeret*; (quasi æque suspecta, & dubia Patribus fides Leonis, sicut Eutychis fuisset) Mox tamen p. 30 fatetur, quod diffiteri non poterat, plebsque Patres illos jam ante Concilium *epistola Leonis subscripsisse*: quomodo ergo amplius de fide Leonis, *an vera esset, & communi conformis*, in Concilio quærere, aut dubitare potuerunt? Sed & aliud, quod supra simpliciter negabat, modo fatetur, quæstionem Eutychianam de Christi natura, prout revera fuerat, difficillimam Patribus fuisse visam, multosque *optima fide dubitasse*, antequam subscriberent Leonis epistolæ, per quam fides orthodoxa clare, ac perspicue fuit explanata. Unum adhuc, manu palpabile contradictionis exemplum Articulo sequenti proferam, & illud quidem nostra attentione dignissimum *de statu quæstionis subdole inverso*.

ARTI-

ARTICULUS III.

*Malæ Artes circa Statum Questionis, item in argumentando,
& respondendo.*

§. 1.

De pontificia *infallibilitate*, sive *fallibilitate* nihil se, ac Declarationem Gallicanam aliud docere, quam dudum schola Parisiensis senserit, *Defensionis* Author persuadere nobis vult *prævia Dissertatione*, uti patet cum ex plerisque, quas allegat, Authoritatibus, maxime Concilii Constantiensis, tum vero ex illa Gallis perquam accepta distinctione *Sedentem* inter, & *Sedem*. Ex eo quam certissime colligas, quæstionem non esse, nisi de solitarii Papæ, prout singularis *Persona* est, seu privata, seu etiam publica fallibilitate, utpote quæ *soli* sedenti, neutiquam vero apostolicæ Sedi negaretur; quemadmodum & in Constantiensi Synodo universa Ecclesia congregata, & consentiens Papæ *soli* opposita fuerit, atque præposita. Amplius id ipsum Author confirmat *Append. lib. 3. c. 11*, ex Declaratione sacræ Facultatis Parisiensis de a. 1663: „Doctrinam Facultatis non esse, quod summus Pontifex sit supra Concilium, œcumenicum: neque etiam, quod summus Pontifex *NB.* nullo accedente Ecclesiæ consensu sit infallibilis“; Expressæ sub hac conditione, *si nullus accedat Ecclesiæ consensus*, quod idem est, ac si *solus* sit Pontifex; tunc Facultas negat esse infallibilem. Atqui hanc ipsam esse suam, & Declarationis Cleri Gallicani sententiam *Append. p. 103* asserit: *Hæ Declarationes sacræ Facultatis re, ac sententia plane conveniunt cum Declaratione Cleri Gallicani*. Quæ cum ita sint, ipso fatente Authore ad vana, & exilia, immo ad nulla, hoc est, ad mere scholasticam subtilitatem, & abstractionem in praxi nullum usum habentem tota redigitur quæstio, de *solutis* Papæ, seu *personali* fallibilitate, salva manente *apostolicæ Cathedræ*, seu *Sedis* infallibilitate.

§. 2.

Jam vero eundem Authorem audias longe aliter in toto operis decursu docentem: *non esse Papam, nisi cum consensu universæ Ecclesiæ infallibilem*. Facile per te ipsum animadvertes maximum inter hæc duo discrimen: *Papa, si solus est, falli potest definiendo*: atque iterum, *Papa falli potest definiendo, quæmvis universa Ecclesia nondum consensit*. In priori casu,

casu, qui hactenus numquam existit, & vere *scitatus* est, saluum maneret supremum, ac infallibile tribunal apostolicæ Sedis, hoc est, romanæ Ecclesiæ cum suo Capite conjunctæ. In altero casu, qui maxime practicus est, & frequenter contingere solet, si error in Ecclesia ortus, multosque sibi, ac pertinaces assecutus fuisset nactus; ad pronunciandam sententiam veræ fidei nullum in Ecclesia infallibile tribunal foret, quippe cum apostolica Sedes hac authoritatè ponatur destituta, & universalis consensus propter ipsos pertinaces impossibilis. Atque hoc ipsum discrimen est, quod acutus, si quis umquam deceptor, optime inspexit, quodque suum & Declarationis arcanum non prius, nisi ad calcem operis, in *Corollario* T. 2, p. 310 detexit: „Hic enim patere volumus, Gallicanæ Declarationis arcanum, Gallicanos Patres non id edixisse, ne Romanus Pontifex (ut singularis persona) infallibilis haberetur, de quo in scholis tantæ rixæ sint. — Procul has scholæ voces, rixasque habuerunt, non id episcopale, suumque æstimarunt. Ad praxin maxime respicere placuit, atque illud pro certo figere, utcumque scholastica, ac subtilis quæstio se habeat, tamen convenire inter omnes Catholicos, pontificium decretum (hoc est, apostolicæ Sedis) non haberi pro irreformabili, neque ultimum robur esse consecutum, nisi Ecclesiæ consensus accesserit. Quo dogmate constituto tota infallibilitatis quæstio speculativas inter, vanasque quæstiones habeatur.“ Hic propriam vides hominis confessionem, quod non scholastica quæstio, sed longe aliud quidpiam sibi ac Episcopis Galliæ ante oculos, & cordi fuerit, nempe medium, seu artificium apostolicæ Sedis, hoc est, romanæ Ecclesiæ cum Capite suo conjunctæ in definiendo Authoritatem infirmandi.

§. 3.

Non solum ille Pseudo-Bossuetus, sed revera Meldensis etiam Episcopus hoc discriminis inter Parisiensem scholam, & Gallicanam Declarationem satis perspectum habuit: hinc istam quidem fatente Editore *Defensionis*, ne apostolicæ Sedis authoritatem læderet, missam voluit; illam vero jam universim apud Gallos civitate donatam pro vindicanda Galliæ orthodoxia sibi sumit defendendam. Tametsi porro ipsius Bossueti infirmitatem non negemus, quod opinione Parisiensis scholæ enutritus, Sedentem a Sede apostolica distinguens, aut etiam separans, non singulis Pontificibus, sed toti Pontificum seriei privilegium inerrantiæ adscripserit; attamen romanam Ecclesiam, seu perpetuam Petri Sedem,

dem; & Cathedram esse infallibilem agnovit, & in ipso Conventu Parisiensi nonnisi cum hac protestatione *constant*, & publica subscripsit Declarationis Art. 4: *Non esse irreformabile summi Pontificis judicium, nisi Ecclesie* (hoc est, romanæ) *consensus accesserit*. Id domestica Galliæ documenta de M. Bossueto testantur. Plures enim S. Theologiæ, & Juris canonici Doctores Parisiis in publica consultatione coram tota Galliæ suum dedere testimonium; *Au contraire Mr. Bossuet a toujours soutenu hautement l'indéfaillibilité de l'Eglise romaine **). Meldensis Episcopi sensa de infallibili autoritate romanæ Petri Cathedræ ex propriis ipsius scriptis suo loco percipiamus. Interim hic adhuc ex ipso Bossueto notandum, quod nequidem quoad Pontificis inerrantiam a communi catholicorum doctrina dissenferit, sed eum sub duplici respectu considerarit, vel ut Doctorem *universalem*, nempe pro universa Ecclesia fidei dogma definientem, id est, ut vulgo dicunt, *ex Cathedra loquentem*: vel ut Doctorem *particularem*, ad quæstiones Ecclesiarum particularium respondentem. Tantum hoc posteriori sensu concedit Batnagio, Papam errasse **).

§. 4.

Quam vidimus larvati Bossueti malam artem in statu quæstionis subdole inverso, eandem fere ubique in argumentando observamus. Ut nihil de eo dicam, quod illustrissimis Ecclesiæ monumentis aut omnino prætermisissis, aut nonnisi obiter memoratis, vim suam præcipuam ponat tenebrio in obscurissimis factis, dictisve, sub quorum latebris vix ulla Minervæ lampade illustrandis delitescat, quod ab aperta Bossueti fronte maxime abhorret; vix non omnia, quotquot adducit ex Conciliis Constantiensi & Basileensi, aliisque Autoritatibus argumenta, extra oleas versantur, cum illæ nullo modo apostolicam Sedem, seu romanam Ecclesiam cum suo Capite conjunctam reliquæ dispersæ Ecclesiæ, Autoritati submittant, sed tantum Pontificis *personam* judicio universalis Ecclesiæ *NB.* non dispersæ, sed in unum congregatæ velint esse subiectam. Quod ad scopum tantum non unice spectare videtur, est S. Cypriani, errantis, inquam, Cypriani exemplum, qui non solum Stephano Papæ, sed romanæ Ecclesiæ traditioni, aliarumque Ecclesiarum expresso consensui contradicere non est veritus, quem S. Augustinus *non a toto, sed a tanto*

S 2.

*) Consultation de plusieurs Docteurs en Theologie, & en Droit canon. — donnée à Paris 1718.

**) Défense de l'Histoire des Variations, §. 68.

tanto excusat peccato, cujus acerba dicteria, iusto commotioris animi indicia non potest non reprobare, cujus adhuc in vita pœnitentiam, etsi nullibi scriptam, pie tamen supponit, quem demum non aliter, nisi *martyrii falce purgatum* declaravit. Quam desperatam dixeris caussam, quæ nullo alio modo, nisi errantium exemplis possit defendi! Digna est, quæ hac de re legatur, doctissimi Thomassini *Dissertatio 2da in Synodos sub Stephano P.* Verus etiam Bossuetus in *S. Cypriano erga Stephanum P. irreverentia culpam* expresse redarguit *).

§. 5.

Est hoc speciale, & caracteristicum larvati Authoris artificium, ut in toto opere multoties universalis Ecclesiæ Authoritatem commendet, addatque fortissimum semper robur in hoc totius Ecclesiæ unanimi consensu fuisse positum, quasi hoc quisquam Catholicorum negaret, aut in dubium vocaret. Sane non de eo ulla est controversia. Si quam semel fidei doctrinam constat universi orbis catholici consensu esse probatam, & acceptatam, hoc sine dubio omnium firmissimum est *contra hereticos* argumentum. Sed non in ea nunc versamur quæstione: aliud est, quod quæritur de consensu universæ Ecclesiæ nondum manifestato, sed primum manifestando, an, usquedum hoc factum fuerit, *inter Catholicos* nulla detur firma fidei regula, cui necessario se debeant omnes, ut Catholici sint, & maneat, conformare. Orta e. g. de fide controversia, lataque per pontificiam Cathedram sententia, si pars notabilis non consenserit, fidem *in suspensio* manere larvatus Bossuetus pluribus in locis asseverat, idque ut persuadeat, utramque paginam implet. Huic vero falsæ doctrinæ directe, ac severe contradicit genuinus Bossuetus asserens, quod hoc artificio Ecclesia seductioni exponeretur, quodque nihil sit „injustius, & latiore janua aperiens manifestæ rebellionis, quam de- „fendere, Ecclesiæ judicia omnem suam firmitatem habere non posse, „usque dum partes adquiescant “ **). Quod ergo ad consensum omnium Ecclesiarum pertinet, ex eodem M. Bossueto distinctionem discas *summe observandam*, quam se ignorare Pseudo-Bossuetus simulat, vel potius affectat: est enim alius consensus *per auctoritatem*, qualis Pontifici, aut Episcopis in Concilio congregatis convenit; & alius consensus *per obedientiam*, ad qualem ipsi Episcopi erga Pontificem, aut Concilia sunt obligati.

Hæc

*) Contra Dupinium Op. posth. T. 2. p. 537. edit. Amsterdam. 1753.

**) Lettre a l'Abbaissé de Port-Royal, Opp. T. 11. p. 396. edit. Paris. in 4. an. 1747.

*Hæc distinctio tanti momenti est, ut eandem videamus a quibusdam Episcopis expressisse in suis subscriptionibus fuisse observatam: genuina sunt verba M. Bossueti, qui etiam quædam exempla producit *).*

§. 6.

Neceffe est sane ad finiendas lites circa fidem exortas, ut perpetuum, ac infallibile tribunal in Ecclesia Dei existat, cujus iudicio quæcumque particulares Ecclesiæ *per obedientiam* sese conformare debeant. Atque hæc ipsa causa est, scilicet unitas in fide per totam, qua late patet, Ecclesiam conservanda, cur apostolica Petri Cathedra Romæ collocaretur, id quod Bossuetus in Catechismo docet: „*Quæst.* in quo consistit Primatus Ecclesiæ Romanæ? — *Resp.* In eo, quod illa a Deo est instituta, ut sit Mater Ecclesiarum, & præcipua conservatrix veritatis, & NB. quod omnes Ecclesiæ cum illa debent unitatem servare “ **). Hanc unitatis necessitatem ut vel ipsis Galliæ Episcopis eo altius imprimeret Meldensis, eandem sibi pro scopo Sermonis illius præstantissimi elegit, quem pro initio Comitii dando habuit, ubi tam necessariam esse Episcoporum a summo Pontifice dependentiam cum S. Cæsareo Arelatensi affirmavit, ut ipsa jurisdictio episcopalis subsistere non possit, nisi quatenus ab illa Petri primitus instituta desuens, eidemque ceu fonti suo, aut radici inseparabiliter adhærens. Ipsum præstat audire Bossuetum: „Ita ministerium Apostolorum explicatur: omnes eandem potestatem accipiunt, & omnes ex eodem fonte (Christo) verum, non omnes in eodem gradu, neque cum eadem amplitudine. Jesus Christus enim se communicat ea mensura, qua ipsi placet, & semper eo modo, qui convenientissimus est ad unitatem suæ Ecclesiæ stabilendam. Propterea incipit a primo (Petro) & in hoc primo format totum, & ipse salvo ordine extendit, quod in uno posuit, ut ait S. Augustinus, *Petrus qui in honore sui Primatus representavit totam Ecclesiam, recepit etiam primus, & solus ab initio claves, quæ postea debebant omnibus aliis communicari.* NB. ut nos disceremus secundum doctrinam S. Episcopi Ecclesiæ Gallicanæ, quod Autoritas Ecclesiastica primitus in persona unius fundata non se extenderit ad plures, quam sub ea conditione, ut semper referatur ad principium suæ unitatis, & ut omnes illi, a quibus exercenda erit, eidem Cathedræ inseparabiliter uniti adharere debeant “ ***).

S 3

§. 7.

*) L. c. p. 400.

**) Catechisme de Meaux Leçon 3. Pour le jour de S. Pierre, & de S. Paul.

***) Sermon à l'Ouverture de l'Assemblée du Clergé. an. 1681.

§. 7.

Unde jam & aliud larvati Bossueti artificium facile dissolvitur, in quo mirum, quantum confidit Concilia opponens universalia, in quibus hæreses jam a Sede romana confixæ, ipsæque Pontificum sententiæ novo examini subjectæ, adeoque non infallibilis autoritatis, sed dubiæ fuerint visæ. Ita nimirum obsequium catholicæ fidei non rationabile, sed irrationabile, eoque ipso invisum, ac contemptum exigere velle videtur. Aut numquid nobis vel privatis, præcipue vero Theologis hoc modo ipsa etiam generalia Concilia licet examinare, ut eorundem fundamenta & ipsi inspiciamus, ut non cæca, sed rationabili fide obediamus, ut nostros adversarios argumentis confundere discamus? immo nonne ex simili motivo ipsas licet scrutari, & examinare divinas Scripturas, totamque catholicam fidem? annè ideo de divinæ Scripturæ, aut fidei nostræ auctoritate dubitamus, si velimus & ipsi veritatem istarum firmis argumentis convinci, vel ad nostram instructionem, vel ut eas aliis declarare, & præcipue adversariis nostræ fidei rationem dare possimus? Itaque non semper omne examen est *dubitationis*, seu *suspensionis* *judicii* etiam ad diffensionem parati: datur & aliud examen *instructionis*, ad consensum scilicet *per obedientiam*, tamen *cum ratione* præstandum. Atque hinc post latam a summo Pontifice sententiam haud frustra tamen in Conciliis examen restituitur, eo fine, ut motiva sententiæ omnibus Ecclesiæ Patribus illucescant, iique suum, id est, membrorum cum capite consensum manifestent: quæ in universali conventu manifestata totius corporis cum Capite consensio ad superandam obloquentium pertinaciam externæ Autoritatis, quæ dari inter homines potest, maximum pondus est. Ita observante Bossueto contra Dupinium Ephesini Patres suum in damnationem Nestorii consensum manifestarunt, licet *ex obedientia* debitum: ita vel ipse Pseudo-Bossuetus cum negare non posset, plerosque Chalcedonenses Patres jam ante conventum epistolæ S. Leonis subscripsisse, hinc in Synodo neque de Eutychis errore, neque de vera fide Leonis amplius dubitasse; fatetur, novum examen a Patribus fuisse susceptum ad legitime declarandum ipsorum cum Papa consensum *), „jam ordine, & legitime declarandum restabat, unde is sibi sensus, nempe quod recte examinantibus constitisset Leonis sententiam cum antiqua fide, quam habuerant, consentire.“ En ex ipso larvato Bossueto distinctionem sat claram, ac solide fundatam, aliud esse examen *declarationis*, ad suam, vel alie-

*) Defens. T. 2. p. 30.

alienam *instructionem*; aliud vero *dubitationis*, ad propriam si ita placet, *dissensionem*.

§. 8.

Quemadmodum in statu quæstionis invertendo, & argumentando, ita non minus, immo quam maxime in respondendo authoris vafrities invenitur, qua scilicet punctum difficultatis studet aut in alios detorquere, aut saltem obscurare, mentemque Lectoris in aliena dissipare. Atque imprimis cum semper omnium Catholicorum fides fuisset, totam, qua late diffunditur, Christi Ecclesiam Apostolicæ Petri Cathedræ, tamquam suæ unitatis Centro & Capiti esse subiectam: nova doctrina, quæ dispersæ Ecclesiæ iudicio Sedis apostolicæ sententiam cuperet subijciendam, vel ipsi larvato Boslueto visa est summam pati difficultatem, quam dissimulare non est ausus, sed ut objectionem his verbis exposuit *): „Hic quæ-
runt, quis sit ille consensus Ecclesiæ, quo nitimur, totiusne, an partis,
quot Ecclesiarum, quot Episcoporum, quot Capitulorum, quot Abba-
tum, quot vero Regionum, etiamne Indiarum, aut Japonensium? quan-
tæ molestiæ! qui sumtus, ut Nuntii quocumque discurrant, allaturi au-
thenticum consensus instrumentum!“ Gravis certe, & perquam diffi-
lis quæstio! Sed mirare levissimam responsum: *inanes quæstionculæ contra rem facti!* — Atqui hoc ipsum maximi ponderis esse debet, quia non vana speculatio, sed res facti est, quæ tantas patitur difficultates, quo modo universæ Ecclesiæ consensus sit explorandus, quo modo hujus consensus necessaria expectatio non potius destruat, quam conservet Ecclesiæ unitatem. *Regent*, ait, *Cyprianum, Augustinum, Capreolum, Leonem, alios, quos narravimus in Ecclesiæ consensione reposuisse vim, quærant, quibus sumtis, quibus curis, cursoribus, nuntiis tot regionum explorarint fidem.* Ita scilicet in alios detorqueri, aut contemni debet, quod solvi non potest. Factum Cypriani erroneum si excipias, doctrinæ ejusdem S. Patris, aliorumque omnium velut digito tibi ostendunt Cathedram Petri romanam, *ad quom perfidia habere non possis accessum*, tamquam regulam, cui conformare suum adhæSIONIS, seu obedientiæ consensum quæcumque Ecclesiæ debeant. Hanc certe magnam difficultatem frustra alibi apud *Dissensionis* Authorem quæres.

§. 9.

*) Præv. Diss. §. 77.

Jam vero nova & major instat difficultas, quid ergo, si consensus universalis obtineri nequeat parte una obstinata, & potius rebellare, quam suum judicium submittere parata? Ita profecto fidei unitati & securitati male consultum videtur, & armâ ministrari inobedientibus fide in suspenso manente. Respondet Author *): *Hæc omnia objienda veniunt non Parisiensibus, sed summis ex omni gente, ex omni ordine viris, quorum gesta produximus. Quinam illi viri? quæ gesta?— Atqui hoc certum est, hanc ipsam ob causam summos viros ex omni gente, & ordine adversus gallicanam Declarationem insurrexisse. Porro ait: fidei securitati consultum, si fides in illum symboli apostolici articulum resolvatur: Credo in Spiritum sanctum, sanctam Ecclesiam catholicam. Sic nimirum verbis ludit sensu vacuis: neque enim in Ecclesiam catholicam credit, qui cum Cathedra Petri, cum romana matrice Ecclesia, omniumque Magistra in unitate fidei non conjungitur. An suspensi animi relinquuntur, qui in Ecclesiæ catholicæ autoritate acquiescunt? Subdola interrogatio! Qui acquiescunt, eorum certe animi non sunt suspensi: at vero ii Ecclesiæ catholicæ autoritati nullatenus acquiescunt, qui medium ordinarium, divinitus institutum, quo Ecclesiæ autoritas exerceri debeat, hoc est, tribunal apostolicæ Cathedræ, seu romanæ Ecclesiæ non reverentur, sed eidem refragantur. An romanum Pontificem parvi pendunt, qui ejus auctoritati post Christum summæ nihil aliud, quam ipsam Ecclesiam catholicam, sive diffusam, sive adunatam anteponunt?— Mellea verba, si obiter aspicias, sed venenata & exitialia, si in profundum, absconditumque sensum penetres! qui enim Pontifici cum grege fidelium illi conjuncto Ecclesiam, ut ajunt, universalem anteponunt, ii non jam Ecclesiam, quod falso dicunt, minus universalem, sed partem Ecclesiæ litigantem Pontifici præferunt, januamque, ut verus Bossuetus supra §. 5 scripsit manifestæ rebellionis aperiunt. Sic ergo arma ministrari inobedientibus, cum jam negare non posset Pseudo-Bossuetus: id denuo in alios longe a se diversa sentientes nititur detorquere. Demum in casibus extraordinariis extremum quærit effugium contra, ac antea ipse pro principio generali statuerat, fidei regulam non stabiliri, nisi cum totius Ecclesiæ consensu, nemine, aut paucis tantum numero repugnante. Christus ergo vel tam improvidus fuerit, vel tam impotens, ut pro extraordinariis casibus sufficientis auctoritatis remedium ad conservandam fidei unitatem in Ecclesia sua instituere*

aut

*) L. c. §. 87.

aut non vellet, aut non posset? — [Quis est vero hæreticus, præsertim si plures jam suo errore infecerit, qui contra fulmen apostolici culminis sub latibulo *extraordinarii casus* non jam tutus sit? Ceterum sat largus ille Author extraordinarios casus, quos fingit, bene multos, totque numerat, ut si velis, ordinarie apostolico judicio possis refragari.]

§. IO.

Omniū validissimum contra novam hanc doctrinam argumentum est illud P. Gonzalez, aliorumque: „Apostolicæ Petri Cathedræ, „tamquam Tribunali divinitus instituto, ad finiendas fidei quæstiones „obedientiam in fide, & quidem internam mentis adhæSIONem, non „solum externum oris silentium deberi ex constanti Catholicorum om- „nium, etiam Gallicanæ Ecclesiæ contra Jansenistas *expressa* doctrina.“ Huic invictissimæ ac manifestissimæ veritati Author *Defensionis* opponit primum arte jam satis nota retorsionem in Innocentium IV, & Bellarminum, nihil minus, quam suæ opinionis patronos. Mox vero his nominatis suum, quasi alienum, non sine timiditate addit responsum: *Apostolicæ Sedis definitioni obedientiam deberi cum exceptione, nisi ejus jussa contineant hæresin* *): Itane? Catholicorum omnium, Gallis etiam non exceptis, doctrina nihil sit ergo, præterquam puerilis verborum lusus in hunc sensum: *Apostolicæ Sedi de fide aliquid definienti interna mente as- sentiendum est, nisi a fide aberraverit?* — Hanc si fidei obedientiam pueriliter dixeris; eam non tantum Pontifici, sed cuilibet, ne dicam viro, etiam mulierculæ debes, hoc est, cum ea sentire, nisi a vera fide aberraverit: hanc certe obedientiam nemo hæreticorum Papæ negaverit, cum eo credendi, quidquid non erroneum in fide Pontificis fuerit visum. Mittamus nugas, apostolica Sedes hunc in finem a Dei Filio instituta est, ut ejusdem sententia circa fidem dissentientes possint ad unitatem fidei redigi. Frustra hoc tribunal foret, & insipienter a Christo institutum, si lata sententia in suspenso animi manerent. Quodsi sub prætextu erroris, vel omnino *hæresis* liceat contra definitionem pontificiam excipere; tunc non tam Pontifex est, qui de fide subditorum, quam subditi, qui de fide Pontificis judicent, & quidem quælibet *particulares* Ecclesiæ erunt iudices Matris suæ romanæ, quia id iudicii etiam *diffusæ* Ecclesiæ Pseudo-Bossuetus attribuit.

§. II.

*) Præv. Dissert. §. 88.

§. II.

Quis disceptabit autem in casu dissensionis unius partis cum altera Pontifici adhærente? Audi eundem l. c. respondentem: *Quis disceptabit, nisi ipse ab alto Christus?* Christum ergo iterum de cælo descendere oportebit, ut unitas in sua Ecclesia restitui possit? non sufficiet visibilis ab ipso in terra constitutus Vicarius, non apostolica Petri Cathedra, non romana omnium Mater, & Magistra Ecclesiarum? *Quis disceptabit, nisi ipsa traditionis veritas?* Quid vero, si id, quod S. Cypriano, sociisque accidit, pro ipsa veritate traditio falsa habeatur? *Quis disceptabit, nisi ipsum, si res tanti sit, tamque ambigua, generale Concilium?* Audin cantare volucrem appellantium ex secta, toties apostolico fulmine damnatarum appellationum per 10 integra capita *libri decimi* Apologistam, Richerii quoque ab ipsa Gallia reprobati Patronum, voce sua, quæ Bossueti vox non est, jam plane proditum? Quid vero, si Concilium universale quacumque ex causa, forsitan intra seculum, & ultra obtineri non possit? quid si in ipso Concilio pars Pontifici, ac romanæ Ecclesiæ dissentiens nolit in ultramontanam redire sententiam? quid ipsius Concilii decretum valebit, si non totius congregatæ Ecclesiæ consensu firmatum? Aut num forte pars dissentiens a dando suffragio, ab ipsa sessione in Concilio excludetur? Id quidem antiquum morem saperet, sed & antiquam fidem, tantum eam esse catholicam Ecclesiam, quæ cum romana in fide consentiens; quamcumque dissentientem, eo ipso non amplius esse catholicæ Ecclesiæ partem, sed factiosam & schismaticam. *Quis disceptabit, nisi ipsa denique Ecclesia docente Spiritu S. certissima veritatis luce illustrata?* Hæcne ergo ipsa catholica Ecclesia, quæ in duas partes discissa, a fide sanctæ apostolicæ Cathedræ aliena, a centro unitatis avulsa, Matri & Magistræ suæ discola? hæcne divinæ veritatis luce illustrata, Patris luminis Filia, dilecta Jesu Sponsa, Spiritus S. Discipula? Quales blasphemix! Utut numerosa sit, aut seculi dignitate conspicua hæc dissentientium multitudo; nihil tamen valere potest adversus sanctam Christi Ecclesiam supra Petrum inseparabiliter fundatam: non enim Christus *numerositati*, sed *unitati*, non mundi Principibus, sed sub Petro constitutis Apostolorum Successoribus, usque ad finem seculi suam promisit assistentiam.

§. 12.

Hæc veri Bossueti doctrina est ab illa Pseudo - Bossueti toto cælo diversa, „romanam Cathedram esse illam, in qua Petrus semper præsideat, „& loquatur, quæ hæresin nesciat, & semper virgo fuerit, sitque, cui in- „separabiliter adhærendum, in cujus sinu tuti sumus, cujus iudicio in fide „divina necesse sit nos uniri, ad cujus iudicium, si consensus partium re- „quireretur, janua aperienda foret manifestæ rebellionis.“ Hæc, in- „quam, cum laudato sermone *de unitate*, tum sæpe alibi verus Bossuetus docet: tantum abest, ut apostolicæ Sedi partem Ecclesiæ *diffusa* opponat, ut expresse etiam Gallorum doctrinam de potestate pontificia superiore restringat ad unicum casum *congregata*, & *conspirantis* universæ Ecclesiæ. Non ergo romanæ Petri Ecclesiæ particulares quascumque Ecclesias opposuit, sed totam quantam Ecclesiam catholicam solius Papæ *persona* credidit autoritate superiorem salva semper erga apostolicam Petri Cathedram, hoc est, *romanam Ecclesiam* reverentia & obedientia.

§. 13.

His quidem similia, æque magnifica in laudem apostolicæ Sedis non raro loquitur & Pseudo - Bossuetus; sed parum tamen veteratorum more sibi constans est, prout scilicet argumentis premitur, in diversas partes se vertere & inflectere doctus. Nunc enim per apostolicam Sedem sincere cum Bossueto intelligere videtur *singularem* romanam Ecclesiam; mox vero, ne propria manu destrueret, quod ædificare volebat, apostolicam Sedem vocat *totam*, per orbem diffusam Ecclesiam, iterumque aliter, ac frequentius *successivam* omnium Pontificum seriem, qui duo posteriores sensus, si primum illum excludant, uti ex se ipsis absurdi, ita a veritate catholica sunt remotissimi. Si enim in Ecclesia nulla est singularis Petri Cathedra; tunc neque singulariter supra Petrum ædificata Ecclesia est, nullus Pastor, nullus Petri Successor cum potestate plena clavium, nullum unitatis vinculum; nulla Matrix Ecclesiæ; verbo nullus jurisdictionis primatus. Si vero apostolica Sedes nihil sit reale, nihil attuale, & visibiliter existens, tantum, *sicut tempus*, aliquid abstractum & successivum, hoc est, tota succedentium sibi Pontificum series; præterquam quod impossibile sit, totam hanc veluti catenam a vera fide Inseparabilem, abruptis tamen a vera fide annulis cogitare; eo ipso, quod series successiva nullo tempore plene, & actu existat, sequeretur numquam in Ecclesia apostolicæ Sedis auctoritatem plene, & actu existere, hinc neque um-

quam exerceri potuisse, aut posse, frustra que a Filio Dei fuisse institutam, quæ non minus impia, quam insana somnia quantum fidei catholicæ repugnent, nemo non videt.

§. 14.

Non Bossuetus, sed Dupinius in successione Pontificum Cathedram Petri constituit, quem Pseudocriticum Romanæ Ecclesiæ hanc prærogativam auferre cupientem pro meritis Episcopus Meldensis castigat, „upam vocans ex ejus speciosissimis prærogativis, esse Cathedram S. Petri, Cathedram principalem, quacum omnes fideles debent servare unitatem, quam S. Cyprianus appellat originem unitatis.“ Hujus Cathedræ a S. Petro fundatæ, & exinde semper Romæ existentis perpetuitatem Bossuetus cum S. Optato ex romanorum Pontificum successione contra Dupinium, demonstrat, *N. B.*, quæ *unica* est Cathedra peculiariter S. Petro, ejusque Successoribus commissæ etiam cum reliquorum Apostolorum exclusione, quacum necessario omnibus fidelibus servanda unitas, & quasi rivulis ad fontem suum inseparabiliter adhærendum est. *) Similiter & alterum æque Pseudocriticum, falsumque fratrem, Richardum Simonium, qui ut olim Julianus ab Ecclesiæ occidentalis autoritate ad orientalem appellare præsumsit, ex S. Augustino Meldensis confutat: „Credo hanc partem mundi tibi sufficere debere, ubi Deus gloriosissimo martyrio primum Apostolorum voluit coronare, per quem in occidente Principatum Cathedræ apostolicæ constituit. — Quid respondebit M. Simon ad tantam auctoritatem Ecclesiæ occidentalis, cujus caput Romana est, Mater & Magistra omnium Ecclesiarum? (**) En, ut auctoritatem romanæ Ecclesiæ ad fidei unitatem *necessariam*, sed & *sufficientem* sine fidei universalis Ecclesiæ consensus necessitate M. Bossuetus judicaverit!

ARTI-

*) Memoire de ce qui est à corriger dans la nouvelle Bibliothèque des Auteurs ecclésiastiques de M. Dupin. Oeuvr. posth. de Bossuet Tom. 2, pag. 532.

**) Défense de la Tradition, & des saints Peres contre M. Simon. cit. Tom. 2, pag. 10.

ARTICULUS IV.

Sacra Scriptura, & Ss. Patrum detorta interpretationes.

§. I.

Duo sunt præcipui S. Scripturæ textus, qui gallicanam Declarationem, ejusque Defensorem graviter premebant, quibus ergo infirmandis, atque alienum in sensum detorquendis omnem impendit operam; irritum tamen conatu, cum utriusque textus genuina interpretatio a vero Bossueto facta nostris in manibus sit. Primus est Matth. 16: *Tu es Petrus, & super hanc petram edificabo Ecclesiam meam* &c., quem ita exponit *): „Hisce verbis Christus, qui suam maxime unam volebat Ecclesiam, creavit „Magistratum amplissima præ ceteris potestate, & majestate præditum, „qui omnes moveret ad unitatem maxime in fide;“ Subdola vel ipso in limine, ac falsa commentatio! contra conspicuum Scripturæ textum, quo Christus *solum* allocutus est Petrum, eumque Ecclesiæ Petram instituit, creatum ait a Christo *Magistratum*, ut non in una persona, Petro, ejusque Successore collectam, sed in plures, immo universos Episcopos diffusam insinuaret supremam Ecclesiæ potestatem. Dein Ecclesiæ fundamentum, quod Christus, ut ajunt, *absolute*, hoc est, sine adjecta conditione in Petro instituit, Author ille in *bypotheticum* commutat, *si Petri Successor communem Ecclesiarum fidem pro officio debite promat*, qua ficta conditione totum Christi propositum, Petrique authoritatem ad divinam fidem firmandam in irritum mittit. Cetera, quæ adhibet verba, sunt æquivoca, parum aut nihil significantia. Cap. 2 totus in eo est, ut persuadeat, id quidem officii in Petro cuilibet Successori injunctum, ut Ecclesiæ sit fundamentum, non tamen huic officio gratiæ promissionem, hoc est, fidem semper inviolate conservandi fuisse conjunctam. Maxime animadvertendum est, quod Petrum, ceu ab Ecclesia divisum proponat, majoremque huic, quam illi firmitatem adscribat, quasi salva Christi promissione a fundamento suo separari Ecclesia posset, & aliter, quam suo cum fundamento conjuncta portis inferi insuperabilis esset.

§. 2.

Juvat ad confusionem larvati hujus Bossueti verum audire Bossuetum, verba Christi, *tu es Petrus*, explicantem **); „Nomen tuum Simonis

T 3

*) Defens. L. 10, C. 1.

**) Meditat. in Evang. die 70.

nis mutavi in illud Petri *NB.* in signum firmitatis, quam ego tibi volo communicare; *NB.* *NB.* non solum pro te, sed etiam pro *tota mea Ecclesia*, *eam enim ædificare volo super hanc Petram.* Volo in te modo emittenti & peculiari ponere prædicationem fidei, quæ ejus erit fundamentum: *Et porta inferi non prævalebunt adversus eam*, id est, illa erit firmata contra omnes Satanae conatus, ut sit insuperabilis. Et hoc quid est aliud, quam quod Jesus Christus repetit Luc. 22: *Satan expetivit vos, ut cribraret; sed ego rogavi pro te Petre, ut non deficiat fides tua, & tu confirma fratres tuos.* Non solum Christus hoc loco confirmandi officium Petro commisit, sed interprete Bossueto etiam ipsam communicavit firmitatem, eamque non pro *solo* Petro, sed pro *tota Ecclesia*, quam voluit supra Petrum ædificare, ut esset in perpetuum firma & insuperabilis contra Satanae impetus: en privilegium pro bono Ecclesiae perpetuo duraturæ Petro datum, ergo in Petro vivente semper in Successoribus perdurans! — Præterea Christus, quod hic apud Matthæum promisit non soli Petro, sed Successoribus, apud Lucam repetiit actuque contulit; ergo & Petri Successoribus, non soli Petro, nec tantum officium contulit jubens fratres confirmare, sed & precibus a Patre impetratam stabilitatis in fide gratiam cum officio conjunxit.

§. 3.

Adhuc clarius in sepe laudato sermone de *Unitate* ad Episcopos Galliae Meldensis eundem textum explicat*): „Christus dum ultimam manum vult apponere mysterio Unitatis, non loquitur ad plures, sed *personaliter* Petrum designat per novum nomen, quod illi indidit. Solus est, qui cum eo loquitur, Jesus Christus, Dei Filius cum Simone Jonæ filio: Jesus Christus, qui est vera Petra, & per se ipsam firma, cum Simone, qui non est Petrus, nisi per firmitatem, *NB.* quam Jesus Christus ei communicat. Huic Jesus hic loquitur, & loquendo efficit in ipso, & imprimit suæ firmitatis characterem: *Es ego, inquit, dico tibi, tu es Petrus, & adjungit: Super hanc Petram ædificabo Ecclesiam meam, & concludit: Porta inferi non prævalebunt adversus eam.* — Verbum Jesu Christi, qui de nihilo fecit, quod sibi placitum est, hanc firmitatem dat uni mortali: *NB.* *NB.* Ne dicas, ne cogites hoc ministerium S. Petri cum ipso finendum: hoc, quod servire debet, pro fundamento Ecclesiae æternæ, numquam potest finem habere: Petrus vivet in suis Successoribus, Petrus

*) Mæx editionis Parisiensis de a. 1743 in 4to Tom. 3, pag. 482.

„Petrus semper loquatur in sua Cathedra, hoc est, quod dicunt Patres, quod confirmant sexcenti triginta Episcopi in Concilio Calcedonensi.“
 Dicat nunc Pseudo-Bossuetus officium in fide Ecclesiam confirmandi ad Successores Petri pervenisse, non firmitatem fundamenti, quæ si absit, ipsum necesse est labefieri officium, & auctoritatem confirmandi: dicat Petrum aut non vivere, nec loqui amplius in Ecclesia, aut si Petrus loquatur, Petrum dicat decipi, & a fide posse deficere: dicat talia, fingatque. Non certe ita dixere Bossuetus, non SS. Patres, non ipse Christus Dominus, qui Petro promisit gratiam a Patre exoratum, ut ejus fides, quæ deberet fundamentum esse Ecclesiæ semper duraturæ, nunquam deficeret. Concludamus ex eodem adhuc Bossueti Sermone de Unitate p. 491: „Ita Ecclesia romana semper Virgo est: semper ædificatur, quod semel fuit creditum: eadem vox semper resonat, & „Petrus in suis Successoribus manet fundamentum fidelium: Jesus Christus hoc dixit. Cælum & Terra citius, quam ejus verbum præteribunt.“

§. 4.

Alterum jam textum Luc. 22: *Ego rogavi pro te, ut non deficiat fides tua: & tu aliquando conversus confirma fratres tuos*, ita dissecat Defensionis Author, ut partem posteriorem, quæ officium confirmandi fratres imponit, ad Petri Successores transiisse admittat, partem vero priorem, quæ gratiam divinam propter ipsum officium promittit, Successoribus Petri deneget *). — Omnem itaque movet lapidem, ut officium in Petro summis Pontificibus commissum Ecclesiæ fidem firmandi, saltem auctoritate Petri exuat, spoliaturque, gratiam negans in Cathedra Petri Successoribus, quam Christus pro bono Ecclesiæ in fide firmandæ Petro promiserat. — Quapropter triplici sensu interpretatur verba Christi: *Ego rogavi pro te, ut non deficiat fides tua*, a subsequentibus abscissa, & *tu confirma fratres tuos*: Imo Soli personæ Petri vult illam datam promissionem, quæ cum ipso expiraverit, quasi Christus ipse non indicasset finem suæ promissionis Petro datæ *non deficiendi in fide*, scilicet propter officium Petro injectum, ac perdurabile *fratres confirmandi*. 2do Hoc privilegium stabilitatis in fide, non singulariter Petro, sed *universæ* Ecclesiæ, cujus tantum personam Petrus gesserit, assignat, quasi ita ineptum fingens Christum, qui Ecclesiam indefectibilem ædificaturus jussit defectibili fundamento, sed quod idem est, fallibili

*) Defens. L. 10, C. 3, 4, 5.

libili auctoritate fidem infallibilem stabiliri. 3tio Denique Petri fidem in Sede sua peculiari, quæ romana est Ecclesia, seu in *Cathedra apostolica* non defecturam, qui solus integer, ac proprius est verborum Domini sensus, negare potius directe non audet, quam ut sincere profiteatur. Quare subdole inflatis veluti buccis romanæ Petri Cathedræ prærogativas ita deprædicat, ut magnifica dicere videatur, nihil revera dicens *): „Hæc igitur Cathedra, hæc Sedes, hæc Ecclesia est, quæ pro sui Pontificis dignitate, uniendæ Ecclesiæ necessaria numquam a vera Ecclesia, numquam a vera fide abrumpatur.“ Quare *abrumpatur*: non vero *abrumpitur*? —

§. 5.

En vulpeculam, quæ modo *optativo*, non *positivo* præclare, si Superis placet, apostolicam Petri Cathedram commendat, ut a vera fide & Ecclesia numquam abrumpatur! Quin etiam aliud adhuc latibulum sub verbo *abrumpi* sibi paravit: hoc siquidem singulare privilegium romanæ Ecclesiæ comminiscitur, ut a vera fide numquam *totaliter*, seu *in perpetuum* abrumpatur, sed, etsi a fide defecerit, non tamen, sicut e. g. Græca, vel Anglicana Ecclesia, semper in errore perseveret: tantum ergo ad tempus Ecclesiæ romanæ defectionem a fide vult esse admittendam, prudenti sane consilio hominis Janseniani, aut cujuscunque hæretici: ita enim contra *actualement*, & *presentem* apostolicæ Sedis auctoritatem omni tempore satis tutus erit, romanam Ecclesiam hæresis arguens, sed tamen *interimistica* dumtaxat, usque dum ipsa Matrix, & Magistra Ecclesia forsitan a suis discipulis, vel saltem ope Concilii œcumenici melius edocta resipiscat, idque tamquam divinam fidem amplectatur, quod antea ceu hæresin damnaverat. Ejusmodi jus docendi ac fidem confirmandi apostolicæ Petri Cathedræ quadam officii specie, quod *complementum* vocant, quilibet hæreticus attribueret potest, nihil minus suæ, licet damnatæ, sententiæ firmiter adherere, imo & unitatem fidei potest promittere, saltem *pro futuro*, dummodo ad veritatem fidei Ecclesia summo Pontifici adhærens, hoc est, catholica, deposito errore revertatur. Quam bella hæc prudentia, sed filiorum seculi! Insuper larvatus Bosuetus hoc adhuc officii exhibet Ecclesiæ romanæ, ut ejus fidem a Pontificum fide non distinguat Tom. 2, pag. 191: *Neque vero distinguimus a romanorum Pontificum fide romanæ Ecclesiæ fidem.* Atqui

*) Defens. Tom. 2, p. 190.

Atqui toto opere evincere, ac persuadere nititur, romanos Pontifices a vera fide deficere posse, & non raro jam defecisse. Conclusionem cogita.

§. 6.

Ab hisce nugis, sed & nequitiiis Pseudo-Bossueti quantum verus abhorruerit Bossuetus, eruditorum neminem fugit: in opere enim suo immortali, quod de *Variationibus Protestantium* conscripsit, pro fundamentali posuit Principio, non esse veram Christi, non apostolicam Ecclesiam, sed erroneam, ac mortiferam sectam, quæ umquam in fidei doctrina variaverit, aut variare possit. Ut vero S. Scripturæ interpretem Bossuetum sequamur; jam supra §. 2 vidimus, quomodo verba Christi: *Rogavi pro te &c.* non ad solam Petri personam restringat, non ad universam Ecclesiam, nisi indirecte, ac per consequentiam extendat, sed textum integrum, & inseparabilem de Petro, ejusque Successoribus explicet, non priorem partem a posteriore dissecans, sed utramque, quod Christus fecit, conjungens, id est, tam promissum Petro datum, ut non deficiat fides tua, quam officium Petro impositum, & tu confirma fratres.

§. 7.

Singulariter autem partem posteriorem, tu confirma fratres, ita Bossuetus exponit, ut totam Petri authoritatem, unacum officio confirmandi ad romanam Petri Cathedram in perpetuum descendisse doceat hunc in modum *): „Sequamur mysterium; verba hæc confirma tuos fratres, non sunt mandatum, quod Christus singulariter S. Petro dederit, sed officium, quod exigit, quod in sua Ecclesia in perpetuum instituit. „Forma, quam Jesus Christus discipulis dedit apud se congregatis, est forma Ecclesiæ christianæ usque ad finem seculorum. Ab illo momento, quo Simon constitutus est Caput Collegii apostolici, & Petrus appellatus, & a Jesu Christo factus Ecclesiæ suæ fundamentum per fidem, quam debebat nomine omnium annunciare, ab illo momento Christus fecit institutionem, aut si malis, designationem Primatus in Ecclesia mediante persona S. Petri, dicens suis Apostolis: *Ego vobiscum sum usque ad finem seculorum.* Quo ostendit formam, quam ipse inter illos instituit, esse ad poste-

*) Meditat. diei 72.

posteros transmittendam: *N.B.* *Æterna Successio destinata fuit Petro, sicut etiam Successio similis durationis destinata fuit ceteris Apostolis.* „Oportebat semper in Ecclesia existere Petrum, ut suos fratres in fide confirmaret. Hoc erat optimum medium ad unitatem animorum idem sentientium, quam Salvator maxime desiderabat, *N.B. N.B.* Atque hac auctoritas tanto magis necessaria fuit Apostolorum Successoribus, quanto infirmior foret istorum fides, quam illorum. Eodem tempore, quo J. C. in sua Ecclesia hoc officium instituit, oportebat pro ejus exercitio Sedem fixam eligere. — Dum consummandum esset opus, & Roma christianarum omnium Ecclesiarum Caput constituenda; Domine illud magnum Piscatorem hominum misisti, hoc est, S. Apostolum Petrum, ut hanc Ecclesiam suo sanguine consecraret, & in ea principalem Sedem christianorum erigeret, unde fides confirmari deberet — — romana fides semper fuit Ecclesie fides. S. Petri fides, quam ille predicavit, & tamquam depositum in sua Cathedra, & in sua Ecclesia reliquit, quæ ibi semper inviolate conservata est, semper Ecclesie catholice fundamentum fuit, & numquam defecit.“ Denique pia ad Deum precatio Bossuetus hanc Meditationem concludit expresse asserens divinam promissionem Petro datam unacum officio ad posteros descendisse: *Navicula, in qua portantur, & cujus gubernaculum tenent, fluctibus fuisset obruta, & tempestate demersa N.B. sine promissis Petro datis.*

§. 8.

Non minus sanctos Patres, quam divinas Scripturas falsa interpretatione depravat hietus Bossuetus. Ut brevis sim, duo sufficiant exempla. Celebris est S. Bernardi tractatus contra Abælardum, ubi ad B. Innocentium II hæc scribit: „Oportet ad vestrum referri Apostolatum, pericula quæque, & scandala emergentia in regno Dei, ac præsertim, quæ de fide contingunt: dignum namque arbitror, ibi potissimum resciri damna fidei, *N.B.* ubi non possit fides sentire defectum. Hæc quippe hujus prærogativa Sedis: cui enim alteri aliquando dictum est: „Ego pro te rogaui Petro, ut non deficiat fides tua? Ergo quod sequitur, a Petri Successore exigitur: *Et tu aliquando conversus confirma fratres tuos.*“ Quam vere, quam clare S. Bernardus! hunc vero ut pro suo gustu interpretetur Pseudo-Bossuetus, Sedentem quidem a Sede distinguit, quod mori Gallorum dari posset, etsi non omni sensu probari, sed & ipsam Sedem en, quomodo a fide indefectibilem, quasi ad mentem

tem Bernardi, prædicet: *Ut error in ea Sede non obstat (in perpetuum) in ea Pontificum serie, quæ a fide penitus abrumpi nequeat* *). Hoc Bernardus non dixit; ne cogitavit quidem, sed expresse contrarium dixit: *Ibi refarcienda esse damna fidei, ubi non possit fides sentire defectum: hanc enim esse hujus Sedis prerogativam* NB. propter promissionem in Petro Successoribus datam. §. 9.

Eandem sortem sub manu Pseudo-Bossueti experiri debuit S. Hieronymus, qui ad P. Damasum ita se exprimit: „Ego nullum primum, nisi Christum sequens, Beatitudini tuæ, id est, Cathedræ Petri communionem confocior, super illam Petram ædificatam Ecclesiam scio; quicumque extra hanc domum agnum comederit, profanus est. Si quis in arca Noe non fuerit, peribit regnante diluvio. Quicumque tecum non colligit, spargit, hoc est, qui Christi non est, Antichristi est.” Hæc non ex fidei certitudine, sed ex optima præsumptione ab Hieronymo dicta vult larvatus Bossuetus l. c. Sicut & illud Justiniani Imperatoris ad Pontificem Hormisdam: *Hoc reputamus Catholicum; quod vestro religioso responso fuerit incitatum.* Itane ergo, quid catholica fide credendum, proprioque sanguine confirmandum, cui Capiti pro ultatæ fidei communicandum esset, id ab antiquis non certitudine fidei, sed bona dumtaxat præsumptione fuerit creditum? Tolle Hieronymo fidei certitudinem, & vide, an optimam vocaveris præsumptionem; quæ dixit profanum esse, qui Cathedræ Petri communionem non societur; qui extra hanc domum supra Petrum ædificatam agnum comederit; eum perire, qui in hac arca non sit; qui cum Papa non colligat, eum spargere, non esse Christi, sed Antichristi. Hæcine ex bona tantum præsumptione dicta? Brevitatis studio nihil jam de Cypriano dicam, cuius fere non meminit *Defensionis* Author, nisi ad vituperium, dataque opera id præterit, quod S. Martyr extra suam controversiam positus mente tranquilla in laudem romanæ Ecclesiæ scripsit, ad quam perfidia non possit habere accessum. Nihil amplius de Augustino, cujus verba mihi fere contorquet dicentis, Pelagianam causam sententia Romæ lata, haud expectato prius universi orbis consensu esse finitam: *Causa finita est, utinam aliquando finiat error*!

ARTICULUS V.

Pontificum & Conciliorum Falsificationes.

§. I.

Cum in materia de appellationibus a Papa ad Concilium, ubi *Defensio*nis Author aperte Janfenianis patrocinatur partibus, hæc verba legerem Tom. 2, pag. 23: *Primus omnium mortalium, qui appellationes a Papa expressa sententia condemnavit, Benedictus fuit ille XIII, seu Petrus de Luna in schismate obstinatus & induratus*; mirari non satis potui audaciam hominis, qui orbi erudito in re propatula, quam ipse diffiteri non poterat, tam impudenter imponere tentaret. Clarissima enim supersunt antiquorum Pontificum testimonia, quibus hujusmodi appellationes illicitæ declarantur. Ita seculo V Bonifacius I ad Rufum Thessalonicensem, item Bonifacius II in Concilio romano iisdem verbis: *Nunquam licuit de eo rursus, quod semel statutum est ab apostolica Sede, tractari*. Gelasius ad Episcopos Dardanæ epist. 13 scripsit: *Cuncta per mundum novit Ecclesia; quoniam quarumlibet sententiis ligata Pontificum Sedes B. Petri Apostoli jus habeat resolvendi, utpote quod de omni Ecclesia fas habeat judicandi, neque cuiquam de ejus liceat judicare judicio. Siquidem ad illam de qualibet mundi parte Canones appellari voluerint, ab illa autem nemo sit appellare permissus*. Nicolaus I ad Michaellem Imperatorem epist. 8 hæc habet: *Nemo unquam apostolico culmini, de cujus judicio non licet retractari, manus obvias audacter intulit; nemo in hoc rebellis extitit, nisi qui de se voluit judicari*. Hæc quidem ad confrontandam, ut ajunt, mendacii impudentiam. Ceterum quam falsum in sensum larvatus Author dicta Pontificum detorqueat, satis per se in oculos cadit: quod enim numquam, quod nemini licitum esse Pontifices decreverant, id non ordinarie licitum dicit: item cum Pontifices expresse asserunt, de quibuscumque causis Ecclesiæ *in Bras* esse judicandi, & hoc judicium *sum* apostolicæ Sedis non posse retractari; ipse hæc decreta non de judicio ipsorum Pontificum, sed universalis Ecclesiæ, Papa *Executore* potius, quam *Judice* interpretatur Tom 2, p. 227. Hæc arte evincam tibi, nec a Martino V, nec a Pio II, nec a Sixto IV, nec ab ullo posteriorum Pontificum appellationes ad Concilium fuisse interdictas; quod si interpretari est, dicas, quid sit documenta depravare?

§. 2.

§. 2.

Observatu adhuc dignius est, quam mala fide in allegandis Conciliis œcumenicis Pseudo-Bossuetus incedat. Lugdunense II, Chalcedonense, & Ephesinum pro exemplis sumto! In primo illo anno 1274 Episcopi græci de romanæ Ecclesiæ Primatu suam fidem ita profitentur *): „Ipsa quoque sancta romana Ecclesia *summum, & plenum* Primatum; & Principatum super *universam* Ecclesiam catholicam obtinet, quem se ab ipso Domino in B. Petro Apostolorum Principe, sive veritice, cujus romanus Pontifex est Successor, *cum potestatis plenitudine* recepit, veraciter, & humiliter recognoscit, & sicut præ ceteris tenetur, fidei veritatem defendere, sic & de fide, si quæ subortæ fuerint, quæstiones, suo debent iudicio definiri.“ In hac Græcorum Professione systemati *Defensoris* plane repugnant ultima verba, quæ subortæ quæstiones *romanæ Ecclesiæ* iudicio submittuntur, & quidem ut *definiantur*, hinc iudicio irreformabili, quippe quo fidem divinam niti necesse est, Hunc ut evitaret scopulum, duplex excogitavit effugium, nil veritatis, etsi textus falsificationem. Ad primum igitur, ne in fidei quæstionibus *solutus* romanæ Ecclesiæ iudicium sine sua prætenâ necessitate universalis consensus deberet agnoscere, verba *præ ceteris* a Concilio in præmissis posita, & sapienter quidem, quia revera etiam omnium ceterarum Ecclesiarum particularium est officium fidei veritatem defendere, ista verba *præ ceteris* larvatus Author T. 2, p. 62 in conclusionem retrahit, quasi non aliter, nisi unacum ceterarum Ecclesiarum iudicio ad romanæ Ecclesiæ iudicium fidei quæstiones pertinerent, quod græci Patres non dixerunt, sed in eo Primatum posuerunt, ut romanæ Ecclesiæ Tribunal, tamquam apostolica Petri autoritate competens forum pro fidei quæstionibus agnoscerent.

§. 3.

Ad alterum; ne auctoritatem fidei quæstiones *definienti* fateri deberet infallibilem, aliud sibi effugium priori vel ipse jam diffusum in lusu vocis quæsit, hic certe venia indigno, quippe a scopo universalis Concilii longe alienissimo. Hinc ait p. 63: „Certe *definire*, ac *determinare* pro eodem habentur. Quis autem Theologus non audit *determinationes* sacræ Facultatis, aut quis eas propterea infallibiles cogitavit?

U 3

„De-

„*Definit*, & *determinat*, qui tota sua, qualiscumque est, autoritate judicat.“ Quas nugas vel commemorasse jam confutasse est. Quis est Catholicorum, qui theologicæ Facultatis judicium vocet *definitionem fidei*, aut solum *determinationem*? Nonne simpliciter *censura*, vel *judicium* audit, cui tamen salva fide contradicitur? Quid quod particularium adeo Ecclesiarum, & Synodorum decreta nondum in nostra Ecclesia pro *fidei definitione* valeant? Verum e contrario catholica doctrina est, apostolicæ Sedis *definitioni* ipsam fidei internam æque, ac externam obedientiam deberi. Quod de *sententia definitiva* in foro contentioso scribit, ubi humana institutione adhuc appellatio datur, quæ priorem sententiam suspendit, æque id absolum est: in fidei enim *definitione*, cui interna mentis obedientia debetur, si semel facta fuerit; nulla in terris appellatio datur; quia ideo tanta Autoritas in Ecclesia divinitus instituta est, ut unitatis in fide conservandæ regula haberetur infallibilis. Atque hæc ipsa mens Concilii Lugdunensis fuerat, hic scopus, ut quæstiones fidei *finirentur*, seu *terminarentur*, prout quam certissime ex propriis verbis Græcorum Patrum & originali idiomate elucet: — *Εάν τις ἐπὶ τῆς πίστεως ἀναθῶνται συζητήσεις, τῇ ταύτης χρῆσι κρείει διαρῆσθαι.*

§. 4.

Quantum vero a falsa illa interpretatione Pseudo-Bossueti genuinus dissentiat Bossuetus, ex ipsius ore palam demonstratur, scilicet antiquam Græcorum fidem fuisse, Petrum loqui per os Pontificis, auctoritatem apostolicam Petri, quæ fidei firmamentum sit, in romana Cathedra semper residere, quacum necessario in unitate fidei vivendum, si quis velit de Ecclesia esse &c.“ Ita plurimis in locis Bossuetus e.g. contra MM. Basnage, Jurieu, & Claude: in litteris ad D. Molanum: item in Instructione pastorali, prima & secunda de *Promissis Ecclesiæ datis*.

§. 5.

Duo Orientis œcumenica Concilia, tertium & quartum *Definitionis* Authori sunt præcipuus Achilles, quo mirifice minuitur *). Ea, inquit, quæ Concilium Ephesinum præcesserunt, ejusdemque acta de-

mon-

*) Præv. Dissert. §. 59; item Defens. Lib. 7, Cap. 9 &c.

monstrant, plena autoritate latam Pontificis sententiam non fuisse pro irreformabili habitam NB. *postquam ingens dissensio exorta est, ac Synodus œumenica injecta mentio T. 2, p. 14.* Ut ordine procedamus, primum est dispiciendum, quæ falsa contra historiam, dein contra hujus Concilii acta producat, tum vero quantum ab ipso Meldensi Bossueto confirmatur.

§. 6.

Atque inprimis quidem falsum contra historiam veritatem committit larvatus Author, dum sententiam Cœlestini P. adversus Nestorium jam latam, persuadere vult Concilii indictione habitam fuisse tamquam *suspensam*, & quidem *tam de fide, quam de personis judicatis p. 15.* Falsum est, inquam, quod Concilium ad suspendendam de fide, & personam Nestorii sententiam pontificiam fuerit ab Imperatore indictum; sed id proborum maxime votis a Theodosio, etsi sinistre contra S. Cyrillum occupato fuit concessum ad exequendam modo opportuno, & efficaci Pontificis sententiam. Ipse enim Pontifex depositionis sententiam contra Nestorium, nisi intra decem dies resipisceret, latam non aliter voluit per Cyrillum, quam in Synodo ad executionem deduci, ut res æquitate palam demonstrato Ecclesiæ judicium vel ab ipso Imperatoris brachio eo fortius sustentaretur, sine quo tanti Patriarchæ, ut Constantinopolitanus fuerat, exauthoratio prospero cum eventu suscipi non posset. Vide apud Labbeum *).

§. 7.

De fide autem a Cœlestino definita neutiquam orientales Patres, quibus pontificiæ litteræ innotuerunt, ne ipse quidem Joannes Antiochenus, tantum personæ, non vero causæ Nestorii patronus, dubitabat. De hac ergo ante Concilium inter Orientales non magna, immo nulla fuit dissensio, si Nestorium cum paucis sociis excipias: post Concilium vero, sive per ipsum Concilium, eoquod posteriores Cyrilli anathematismos probasset, major dissensio orta est Joanne Antiocheno cum triginta circiter Episcopis Orientis repugnante, ita ut præensus a Pseudo-Bossueto dispersæ Ecclesiæ consensus magis œumenico Ephesi Concilio, quam antea Cœlestini P. litteris deesset. Ceterum Pontifex indicto Concilio suam de *fide* sententiam adeo non suspensam credidit, ut eandem

pro

*) Collect. Concil. edit. Venet. 1728 T. 3, p. 571.

pro regula inviolabili Patribus proseripserit; & suis ad Concilium Legatis hoc expressum dederit commonitorium, „authoritatem Sedis apostolicæ custodiri debere mandamus. Siquidem & instructiones, quæ vobis traditæ sunt, hoc loquuntur, ut interesse conventui debeatis: ad disceptationem si fuerit ventum, vos de eorum sententiis judicare debetis, non subire certamen.“*)

§. 8.

Quo loco novum Authoris falsum se prodit, dum Pontificis mandatum ad Legatos de illorum Patrum, qui forte in Concilio contenderent, sententiis judicandi hisce suis additis, utique cum Synodo deprayat. Non sane cum Synodo judicari, sed in Synodo, in Conventu litigantes suis a Legatis judicari debere Pontifex edixit: eo ipso enim, quod membra Conventus inter se litigarent, non poterant a Synodo, hoc est, a Patribus litigantibus, sed necesse erat autoritate pontificia judicari. Quod vero Imperator sua epistola jussit pietatis doctrinam in sacra Synodo discuti, & examinari, ac ratum esse, quod rectæ fidei consonum videbitur, & ut ante coactam Synodum, communemque ejus sententiam nihil quidquam a quoquam in ulla prorsus, re, privatim innovetur, id quidem pii Principis bonam voluntatem indicat, qua plenam libertatem relinqui Concilio voluit, & ut nemo Episcoporum privatim per violentiam quidquam amplius attentaret, prout antea Nestorius contra orthodoxos Monachos sibi adversantes fecerat: neutiquam vero id regulam fidei tangit a Pontifice Concilii Patribus præscriptam, quam forsitan Imperator adhuc ignoravit, certe autem epistola sua infirmare non voluit, nec potuit. —

§. 9.

In ipsis Concilii gestis mox actione ima falsum committit larvatus Author inquires: Lectas fuisse Imperatoris litteras, & in gesta relatas, NE. probatumque a Patribus, omnia circa Nestorium a Cælestino decreta suspensa fuisse, donec sacra Synodus ferret sententiam **). Duplex hic falsum est: primum, quod Imperator in suspensio esse declaraverit a Cælestino circa Nestorium decreta, quæ ut modo vidimus, §. præc. Imperator aut ignoravit, aut non tetigit. Alterum falsum est, probatum a Patribus fuisse, quod litteræ Imperatoris continerent: tantum enim simpliciter lectæ, & sine judicio, ac deliberatione in gesta fuerunt relatae.

*) Apud Labb. acta cit.

**) Defens. T. 2, p. 15.

latæ. Equidem verum est, & Cyrilli, & Nestorii doctrinam, alteram a Pontifice jam probatam, alteram condemnatam iterum fuisse examini subjectam: ita vero oportuit fieri, atque ipse Pontifex voluit, quod certe *non dubitationis* fuit examen, quippe jam præscripta fidei regula, sed *declarationis*, ut fidei catholicæ veritas, & oppositus error amplius in conspectu Ecclesiæ manifestarentur. Hinc etiam Concilii Patres publico in Confessu professi sunt *regulam fidei sibi a Cælestino præscriptam: hujus se tantum exequi sententiam: æque ab hac, ac sacris Canonibus se cogi ad Nestorium damnandum.* — Hæc genuina acta: unde colligitur Ephesinæ Synodi judicium non fuisse institutum, quasi ad rem incertam ambigua deliberatione discutiendam, sed ad certam fixamque Pontificis sententiam modo competente, & efficaci in executionem deducendam.

§. 10.

Dignum est hac de re verum jam Bossuetum percipere. Adversus Dupinium singulares observationes in Concilia Ephesinum, & Chalcedonense confecit, utpote in quibus pontificia autoritas ad exemplum sequioris ævi magnifice resplenduit. Meldensis Episcopus male feriatum illum criticum (du Pin) per plura Capita castigat, tam quod *gravia* in istorum Conciliorum historia suppresserit, quam quod *periculosa* ex suo ingenio admiscuerit *). In specie mox Cap. 1, Observ. 1 falsi arguitur, quod larvatus *Defensionis* Author insinuare studuit, quasi lata per Pontificem sententia ingens dissensio exorta, & fidei assensio usque ad Synodum œcumenicam suspensa fuisset. Verba Bossueti sunt: „Constat ex omnibus actis, quod pontificia sententia cum submissione recepta fuerit per totum Orientem, etiam ab ipsis Nestorii fautoribus, quorum Joannes Antiochenus Patriarcha caput fuerat.“ Eoquod idem Joannes serio Nestorium monuisset, ne Pontificis litteras parvi penderet, seque ipsum in exitum *irremediabile* præcipitem daret; Meldensis ita pergit: „Atqui propositum ab illo exitio cavendi remedium non fuit aliud, quam ut Nestorius desisteret verbo *Dei Mater* repugnare, idque approbaret, hoc est, reipsa retractaret modo, quo honestissime posset: id quod etiam demonstrat, quam difficile negotium fuerit, & quantum autoritas istarum litterarum

*) Remarques sur l'histoire des Conciles d'Ephèse, & de Calcedoine. Oeuvres posth. T. 2.

rum (Cælestini P.) valuerit, eoquod Patriarcha Antiochenus aliud remedium se defendendi non proponat, quam istud revocandi.“ Deinde Observ. 4 ex sententiâ, quam Concilium Ephesinum adversus Nestorium protulit, præcipue Bossuetus auctoritatem Pontificis in Concilium declarat, quod expresse *eodem loco*, quod sacros Canones, pontificias quoque litteras posuit, ab iisdemque ad damnandum Nestorium *se conatum* fatetur. Demum Observ. 6 & seqq. totus in eo est, ut contra Dupinium, aliosque pontificiæ auctoritatis vilipensores ostendat processum Ephesinæ Synodi non alium fuisse, quam regulæ a Cælestino præscriptæ executionem, & Cyrillum Alexandrinum Synodo ut *executorem* jam latæ sententiæ, non propria, sed auctoritate pontificia præfedis, *secus aliquid absolute necessarium Concilio defuisset, nempe Auctoritas sanctæ Sedis, & Papam in sua unitate non habuisset, quod nemo negaverit semper pro regula, & fundamento fuisse habitum* *). Satis hæc de Ephesino Concilio.

§. II.

Nunc de Chalcedonensi: Qua in re eandem, quam supra, viam tenebo primum ostensurus, quibus falsis larvatus Author documenta Concilium præcedentia, dein ipsa Concilii gesta depravarit, demum genuinis Bossueti sensis concludam. Ab ovo necesse est incipiam. Cum S. Flavianus in Synodo constantinopolitana Eutychen damnasset, mox data epistola, eaque, ut videtur, intercepta, etiam altera S. Leonem romanum Pontificem rogavit, „ut propriam faciens communem causam, & sanctarum Ecclesiarum disciplinam, simul decerneret damnationem adversus Eutychen regulariter factam esse, & per propria dicta confortaret Imperatoris fidem (addidit Flavianus) causa enim eget solummodo vestro solatio, atque Defensione, qua debeat consensu proprio cuncta ad pacem perducere: NB. Sic enim hæresis, quæ surrexit **), — facillime destruetur Deo cooperante per vestras litteras, removebitur autem & Concilium, quod fieri divulgatur, quatenus nequaquam sanctæ turbentur Ecclesiæ“ ***). Hanc dogmaticam fidei causam *de humana Christi natura* expresse testatus est Flavianus, terminari posse per solam apostolicæ Sedis confirmationem, quæ ad suam, id est, particularis Synodi iudicium accederet NB. sine necessitate universalis Con-

*) Oeuvr. posth. T. 2, p. 559.

**) Hic interim eadem omissa sunt, quæ Defens. T. 1, p. 23.

***) Inter. S. Leon. Epist. 26, edit. Bættelin.

Concilii, quo jam provocatum. Ut tanti momenti testimonium enervaret larvatus Author, duo commisit *falsa*, unum contra facti historiam, alterum contra formalia documenti verba. Itaque ait *Defens.* T. 2, p. 23, Eutychianam hanc causam fuisse *apertam & planam, paucos adhuc sectatores, eosque obscuros, nec magni nominis*. Quæ singula historice falsa. Vixdum damnata Nestorii doctrina multis, præcipue Alexandrinæ Diaconibus, S. Cyrilli doctrinæ ultra modum tenacissimis videbatur difficillimum unam in Christo personam agnoscere remanente duplici, eaque distincta natura: hanc difficultatem in Chalcedonensi conventu quidam adhuc Episcopi proposuerunt. Ad hæc Eutyches Constantinopolitanus Archimandrita, id est, Monachorum, quorum tunc in Oriente summa erat æstimatio, Archiabbas in Synodo Ephesina contra Nestorium magnam sibi auctoritatem pepererat, tamquam fidei catholicæ columna, ita ut per litteras Leonis P. laudari & commendari mereretur. Is insuper potenti patrocinio Magnatum in aula imperatoria, & ut videtur, jam manifesto Dioscori Alexandrini, aliorumque Episcoporum consensu erat roboratus, nec non Monachorum turba suffultus, resque eo jam devenerat, ut contra iudicium Synodi Constantinopolitanæ vel ab ipso Eutyche, vel ab ejus fautoribus ad universale Concilium esset provocatum, jamque tumultus excitatus, prout expressa S. Flaviani verba docent: *Sic enim hæresis, quæ surrexit, & turbæ, quæ propter eam factæ sunt, facillime destruentur*. Quem textum, ut Lectoribus fucum faceret, larvatus Author corruptis supprimendo ea verba, quæ turbas jam factas testantur. En alterum falsum! —

§. 12.

Præterea eoquod S. Leo post Ephesinum latrocinium œcumenicam Synodum judicavit necessariam; idem Author contendit cit. p. 23, & 228, ex ipsa Leonis sententia fluctuationem in fide antea non satis tolli potuisse, atque apostolicum iudicium, quo S. Flavianus appellavit, tantum fuisse *provisorium*. Quæ duo quam falsa sint, genuinæ, quæ restant, litteræ loquuntur. Atque inprimis de causâ S. Flaviani: hanc ad se appellationis via delatam S. Leo decretoria statim sententia decidit, eamque pluribus litteris in Orientem missis publicavit *). „Flavianum in sua communione, proinde & pristina dignitate persistere, quæcumque Ephesi acta non posse rata haberi, & cuncta in eodem sta-

X 2

„tu,

*) Epist. 44, 45, 50, 51.

„tu, in quo ante iudicium fuerunt, esse debere.“ Idem ad Imperatricem Pulcheriam Hilarus Diaconus perscriptit *): „A præfato Papa cum omni occidentali Concilio reprobari omnia, quæ in Epheso contra Canones per tumultus, & odia secularia a Dioscuro Episcopo gesta sunt, & nulla ratione hæc in his partibus suscipi posse.“ — Rem plenissime evincit ipsa Actio romæ Concilii Chalcedonenfis: cum enim Actorum Ephesi lectio peteretur, quo minus id fieret, & male ibi gesta amplius ad deliberationem admitterentur, Legati Sedis apostolicæ obstitērunt: eam afferentes rationem, *quia a beatissimo & apostolico romanæ urbis Episcopo omnia, quæ ibi gesta sunt, vana sunt habita. Tam decretorium ergo, si quod unquam, non mere provisorium fuit S. Leonis iudicium.*

§. 13.

Falsum etiam est, S. Pontificem permisisse, ut in suspenso fides usque ad Concilii definitionem maneret. Quam enim fidei declarationem ipse in celeberrima ad Flavianum epistola ediderat **), ita ratam, firmamque esse præcepit, ut nullam amplius pro exponenda fide Concilii necessitatem agnoverit, sed & in Concilio fidei quæstionem moveri, atque in disputationem adduci, quasi fides adhuc anceps & dubia esset, penitus interdixit Epist. 90, & 93. Cur ergo S. Leo post Ephesinam Pseudo-Synodum universale Concilium iudicaverit convocandum; non id ob incertitudinem doctrinæ, sed ad gravia Ecclesiæ scandala efficaci, & opportuno remedio curanda, pacemque eo securius conciliandam *necessarium* videbatur. Hanc non fuisse *juris*, sed *facti* necessitatem doctis. Fratres Ballerinii invicte demonstrarunt ***).

§. 14.

At, inquit larvatus Author ****), „ipse S. Leo non suum, sed tantum oecumenici Concilii iudicium *irretractabile* existimavit, in epistola ad Theodoretum ita scribens: *Quæ Deus nostro prius ministerio definiverat, fraternitatis univæse irretractabili firmavit assensu* *****). — Pariter Leo inventos fuisse fatetur, qui de suis iudiciis dubitarent; neque hæretici tantum, sed & Synodi Patres ex horum numero fuerunt, prout acta testantur.

*) Epist. 46. **) Epist. 28.

***) Opp. S. Leonis M. Venetiis 1756 T. 2, p. 1163 &c.

****) Præv. Dissert. §. 61.

*****) Epist. 20.

„tur. Hisce jam latam apostolica autoritate fidei sententiam adhuc examinandam S. Pontifex permisit: nihil simile *Retractionis* post universalis „Concilii decisionem unquam legitur. — Ergo *ultimum & irrevocabile* „judicium non in pontificiæ Sedis sententia, sed unice in universali consensu est reponendum.“

§. 15.

Quantum ille Author verborum lusu delectetur, nimirum ad illudendum aliis, hoc loco noviter manifestum fit, ubi, ut cum S. Gregorio Nazianzeno loquar, *levis, & jejuna de vocum sono altercatio est*. Duplici enim sensu *irrevocabile* aliquid dicitur, vel si idem, ac *reformabile* sit, quod etiam in contrarium possit immutari, vel si simpliciter tamquam *iterum tractabile* sumatur, eoquod iterato ad tractationem propriæ inspectionis, aut amplioris instructionis gratia assumi possit. Non certe in priori sensu apostolicum suum judicium retractari S. Leo permisit, prout supra §. 13 vidimus, & hac ipsa ex epistola manifeste apparet, ubi ait: *a Deo jam prius suo ministerio definitum, quod postea universæ Fraternitatis assensu firmatum*: atque iterum: *quæ fides prius docuerat, hæc postea examine confirmata*. Fuerunt quidem, qui dubitarent; at ex ignorantia sane, non quasi ex incertitudine jam judicatæ veritatis: hisce permissum examen, non certe adincipientis iudicii suspensionem, & tamquam de re incerta disputandi licentiam, sed tantummodo ad plenam incitæ instructionem, & ex illa residui adhuc dubii depositionem. Hunc in finem apostolica Sedes non dignatur suas jam latas sententias, etsi in se irreformabiles, pleniori tamen iudicio universalis Concilii adhuc examinandas, non submittere, sed permittere ad veritatem amplius manifestandam, præcipue propter fidei adversarios ad ora obloquentium comprimenda, *ne aliarum Sedium cum Principali consensus*, verba sunt ejusdem S. Leonis, *assentatio videretur, aut alia quolibet subrepere posset adversa suspicio*. Enimvero ita & summo Sacerdotio sua servatur autoritas, dum fidei regulam, eamque irreformabilem præscribit, propositis tamen suæ fidei fundamentis, ne imperiose cogere videatur ad cæcam, & servilem subjectionem; & inferioribus salva manet per se ipsos cognoscendi, seu examinandi libertas, non ea quidem ad obstinatæ contentionis licentiam, sed ad rationabilis assensus obsequium. Hoc sensu etiamnum hodie cum S. Leone vocamus iudicium *irrevocabile*, solum illud in plenario Pastorum conventu jam expressum; siquidem universæ Ecclesiæ iudicio res semel

discussa jam non discussione ampliore dijudicari potest. Si velis hujus judicii, quod inter homines possibile est, *plenissimi* supremam, & *ultimam* dicere auctoritatem, certe ad opprimendos fidei adversarios, non sumus inviti: id tamen non obstat, quominus inter fideles christianos Sedis apostolicæ sententia sit *firmissima* fidei regula, cui pertinaciter repugnare numquam liceat, & quacum *necessario* cuilibet Ecclesiæ, ut ad Catholicam pertineat, sentiendum sit. Unum adhuc memineris, quo universalis Concilii judicium *completum*, ac *irretractabile* fiat, primæ Sedis Auctoritatem quam maxime accedere debere, id quod Patres Chalcedonenses cum Imperatore professi sunt, ut paullo infra ex actis demonstrabimus.

§. 16.

Ad ipsa igitur Concilii acta nunc veniendum. „Celeberrimam illam Leonis ad Flavianum epistolam, quæ fidei decisionem complectebatur, a Judicibus in examen vocatam, neque ab Anatholio, aliisque Episcopis susceptam fuisse, nisi postquam deliberatum, & exploratum, cum antiquioribus Conciliis consonare“, ait *Defensionis* Author *): quo loco summe momentosam veritatem reticendo, & falsa saltem specie, id quod veri dicit, obfuscando insigniter se *falsarium* ostendit. Actione 2da, ubi judicato Dioscoro de fide agi ceptum, quid contigerit, primum inspicimus. Cum Judices, hoc est, Imperatoris Delegati seculares fidei expositionem a Patribus postulassent, Cecropius Episcopus Sebastopolitanus dixit: „Emerscrunt, quæ ad Eutychem pertinebant, & super iis *N.B.* forma data est a SS. Archiepiscopo romanæ urbis, & sequimur eum, & Epistolæ omnes subscripsimus.“ Neque solus ita sensit Cecropius, sed universim Episcopi, quippe qui jam ante Synodum epistolæ S. Leonis subscripserant: hinc in actis subditur: „Reverendissimi Episcopi clamaverunt, ista omnes dicimus, sufficiunt, quæ exposita sunt, alteram expositionem non licet fieri.“ — En pontificiam epistolam pro firma, & *irreformabili* regula a Patribus agnitam! Porro recusata a Concilio nova fidei expositione idem Cecropius a Patribus petiit, & obtinuit, ut ad ampliorem instructionem jam firmata a Nicanis Patribus, & S. Leone fidei regula prælegeretur. Quare recitatae sunt expositiones fidei Nicæna, Constantinopolitana, S. Cyrilli, aliorumque Patrum, uti & S. Leonis: quæ *regulæ*

*) Præv. Dissert. §. 59.

gulæ cum legerentur, non certe *pro examinatione*, sed *pro fidei instructione* suam Patres acclamationem, tamquam ejusdem jam satis firmatæ fidei professionem, non vero veluti novæ deliberationis decisionem dederunt: hinc NB. sine examine ad solam lectionem clamarunt: „Omnes ita credimus, orthodoxi ita credunt: anathema, qui ita non credit. Petrus per Leonem ita locutus est; Apostoli ita docuerunt. — „Hæc vera fides, hæc Patrum fides“: — Unde liquide apparet, S. Leonis ad Flavianum epistolam a Concilio non quasi pro fidei discussione in examen vocatam, ut falso larvatus Author prætendit, sed pro Patrum instructione ut firmam fidei regulam fuisse prælectam.

§. 17.

Insuper sincerus Lector malæ fidei hujus Authoris indignabitur, qui ut eluderet insignes acclamationes, ac laudes, quibus Chalcedonenses Patres antiquis fidei-symbolis S. Leonis epistolam æquipararunt, insinuare nititur eos clamores non totius Concilii nomine, sed tantum a paucis, iisque privatis fuisse editos, eoquod Clerici Constantinopolitani dixerint: *Pauci clamant, non tota dicit Synodus* *). Quid magis indicens, talique viro, qualis Bossuëtus erat, indignum, quam falsatos proferre textus, & inversum dare verbis sensum? Tale quid nonnisi in Pseudo-Bossuëtum cadere potest: exhibeamus factum! Plures Episcopi, præcipue Illyriciani a Dioscoro in Synodo Ephesina decepti, & penitentia ducti veniam a Concilio petebant, non pro se tantum, sed pro omnibus, etiam ipsis (ne excepto quidem Dioscoro) criminis Authoribus. Hinc inter illos, aliosque Orientales contentio exarsit clamantibus illis, *omnes peccavimus, omnibus indulgeatur*: contra Clerici Constantinopolitani dixerunt, hunc paucorum esse, non totius Synodi clamorem: *Pauci clamant, non tota dicit Synodus*. Patet igitur luce meridiana clarius, hæc verba Constantinopolitanorum tantum intelligenda esse de dissidio per Illyricianos orto, neutiquam vero de Leonis epistola ad Flavianum jam ante Synodum universim recepta, præsertim vero a Clericis Constantinopolitanis maxime æstimata.

§. 18.

Æque falsum est, & (venia sit verbo) mendacium, quod cit. pag. 26 legitur: *Leonis epistolam ad legitimum Concilii examen fuisse revocata*,
tam,

*) Defens. T. 2, p. 26.

tam, & ab ipso Synodo de fide conscriptam Definitionem. Ne credas hanc a Synodo, ceu proprio Authore profectam fuisse Definitionem, etenim ipsissimis S. Leonis verbis concepta est. Epistolam vero Pontificis ad legitimum Concilii examen fuisse vocatam, plane falsum est. Paucis dumtaxat Episcopis, Illyricianis, & Palæstinis ex ignorantia dubitantibus induciæ aliquot dierum datæ sunt, quibus apud Anatholium Constantinopolis Archiepiscopum convenirent, *NB.* prout acta loquuntur, *ut, qui dubitant, doceantur.* Falluntur plurimum, qui credunt his Episcopis a Concilio libertatem relictam ab epistola Leonis dissentendi, secus certe, quod Ægyptiis contigit, a Concilio *pro hereticis* fuissent habiti; sed hisce quidam Doctores fuerunt assignati, ut eos circa dubium suæ ignorantiae melius instruerent, *ad docendum eos, qui dubitant*, ut de novo in actis legitur. Anatholius autem, secus ac *Defensionis* Author falso insinuat, neutiquam in Concilio amplius deliberavit de S. Leonis epistola, sed ut pro Archiepiscopo Constantinopolis a Pontifice agnosceretur, eidem *absolutissima subscriptione*, ut Natalis Alexander ait, parere jussus, etiam ante Concilium jam subscripserat.

§. 19.

Episcopis, qui antea ignorantes dubitaverant, jam satis instructis, ut omnium consensus in ipsa Synodo palam fieret, Episcoporum omnium suffragia actione 4ta petita fuerunt, *N. B.* non vero Leonis epistola amplius relecta, minus novo examini subiecta: expresse enim illud, de quo nobis nunc controversia est, *contentiosa suspensionis* examen a S. Pontifice Synodo fuerat prohibitum epistola 93 scripta ad Synodum adhuc Nicææ existentem, en verba: „Unde fratres charissimi! reiecta penitus audacia „disputandi contra fidem divinitus inspiratam vana errantium infidelitas „conquiescat, nec liceat defendi, quod non licet credi; cum secundum „evangelicas auctoritates, secundum propheticas voces, apostolicamque „doctrinam plenissime & lucidissime per litteras, quas ad beat. mem. Flavianum Episcopum misimus, fuerit declaratum; quæ sit de Sacramento „Incarnationis Domini nostri Jesu Christi pia & sincera confessio.“ Similia Pontifex ad Augustum Marcianum perscripsit epist. 94: *Nulla penitus disputatione cujusquam retractionis admissa.* En ergo, ut *irretractabilem*, hoc est, *irreformabilem* suam sententiam S. Leo declaraverit.

§. 20.

Aetione 15ta Patres Concilli multos ediderunt Canones, inter eos famosum Can. 28 de Prærogativa Constantinopolitanæ Sedis, quem magno consensu universi approbarunt. Ut S. Leo id Romæ inaudiat, vehementer indignans Canonem expungi iussit, & quamvis Anatholius, Concilium, & duo Imperatores; Valentinianus, & Marcianus humillimis litteris Pontificem rogarint, ut eundem Canonem approbaret, nihil poterant obtinere. Marciano hæc rescriptit epist. 104: „Satis sit „Anatholio, quod Vestræ pietatis auxilio, & MEI favoris assensu Episcopatum tantæ urbis obtinuit.“ Ad Pulcheriam Imperatricem epist. 105: „Consensiones Episcoporum sanctorum Canonum apud Nicæam „conditorum regulis repugnantes, unita nobiscum vestræ fidei pietate „in irritum mittimus, & per autoritatem B. Petri Apostolici NB. generaliter prorsus definitione cassamus.“ Quid ad hoc exemplum pontificiæ autoritatis in universale Concilium Pseudo-Bossuetus? Respondet T. 2, p. 85, tantum se cum Constantiensibus defendere superiorem Concilii autoritatem *in fide, in schismate, & in reformatione generali*: quasi vero, qui majora potest, minora, & leviora non posset. Si Concilii autoritas pontificiæ prævalet in rebus hisce gravissimis, hoc est, *in fide, in schismate, & in reformatione universali*, & quidem divina ex institutione; quomodo in re disciplinæ mere arbitraria, & solum humanæ, non divinæ dispositionis consensus universalis pontificia voluntate non prævaleat? Nonne hoc præcise sensu verum est, *orbis major est urbe*? Numquid autem universalis reformatio fuit ea in Concilio plenario facta, primarii, in Oriente Patriarchæ institutio ad exemplum illius in Occidente? Numquid etiam hic casus schismatis intrasset repugnante adversus Concilium Pontifice, si istud vim vi opposuisset, Pontificem, quippe obstinatum, reformatione indigere, sibi quæ superiorem pontificia autoritatem a Deo concessam prætendisset? Quenam hæc in oculis Chalcedonensium Patrum monstra, & portenta!

§. 21.

Demum absolutis omnibus Chalcedonense Concilium sui muneris judicavit, actorum suorum relationem ad summum Pontificem mittere, eorumque NB. omnium approbationem, seu confirmationem petere. Multum hac voce *confirmatio* ludit larvatus Author, quam nonnisi *accessum assensus* vult significare. Sane ne de verbo vitiligemus, hoc
Y
ipfi

ipſi admittimus: attamen ab authoritate illius, qui conſenſum præſtat, magnum diſcrimen *confirmationi* accedit; alius eſt enim, ut ex Boſſueto ſupra Art. 3, §. 5 obſervavimus conſenſus *authoritatis*, alius item conſenſus *obedientiæ*. Chalcedonenſe Concilium authoritatis conſenſum, ſeu *confirmationem* a ſummo Pontifice petiit: hinc miſſa ad S. Leonem ſynodica, quam Baluzius in lucem emiſit, in qua Patres græco idiomate profitentur, ſe in fidei declaratione *tamquam Ducem, & Authorem* S. Leonem ſecutos, quibus ipſe *sicut membris Caput* præerat: tunc exponunt, quid de cauſſa Dioſcori, quid de Metropolitanorum jure in creandis Episcopis, quid de privilegio Conſtantinopolitanæ Sedis decreverint, & ita concludunt: „Rogamus igitur & tuis decretis noſtrum „honora judicium: & ſicut nos Capiti in bonis adjecimus conſonantiam; ſic & Summitas tua filiis, quod decet, adimpleat. Sic enim „& pii Principes complacebunt, qui tamquam legem tuæ Sanctitatis „judicium firmaverunt. NB. Omnem Vobis geſtorum vim inſinuavimus ad comprobationem noſtræ ſinceritatis, & eorum, quæ a nobis „geſta ſunt, confirmationem, & conſenſionem, *ἐἰς τῶν πεπραγμένων „βεβαιώσιντε, καὶ συγκαταθήσιν **).

§. 22.

Diu multumque S. Leonis reſcriptum, quo geſta Concilii approbaret, exſpectabatur: quod cum tardius adveniret, anxii admodum viſi ſunt Patres. Ad Marcianum ergo precibus recurrunt, qui Pontificem moneret, ut tanti negotii accelerationem curare dignaretur. Imperator piſſimus litteras ad Leonem dedit, quibus ſuam admirationem ſignificavit, quod ad tranſmiſſa *N.B. omnia in Synodo acta* nihil reſponderet, cauſamque addidit, ut Concilii acta confirmare haud amplius tardaret, hiſce verbis: „Quod nonnullorum animis, qui Eutychetis etiam nunc pravam „opinionem & perverſitatem ſectantur, ambiguitatem multam iniecit, „utrum tua Beatitudo, quæ in Synodo decreta ſunt, confirmaverit. Et „ob eam rem tua Pietas litteras mittere dignabitur, per quas omnibus „Eccleſiis & populis manifeſtum fiat, in S. Synodo peracta a tua Beatitudine rata haberi.“***) Marciano Imperatori reſcripſit Pontifex: „Definitiones S. Synodi chalcedonenſis apoſtolicæ Sedi placuiſſe — ratio „non fuit ambigendi, cum ei fidei omnium ſubſcribentium conſenſus acceſſerit, quæ a me ſecundum formam apoſtolicæ doctrinæ, ac paternæ „tra-

*) Collect. Concil. Venet. T. 4, p. 1779.

**) Inter Leon. epiſt. 110.

„traditionis emissa est. — Quia vero omnibus modis obediendum est Pietatis vestræ religiosissimæ voluntati; constitutionibus synodalibus, quæ mihi de confirmatione fidei catholicæ, & de hæreticorum damnatione placuerunt, libens adjeci sententiam meam, quæ ut ad notitiam omnium Sacerdotum, Ecclesiarumque perveniat, vestræ Clementiæ præceptio ordinare dignabitur.“*) Quæ cum omnia ex gestis publicis certissima sint; quis æquò animo ferat effrontem hominis insolentiam, qui M. Bossueti nomine mentiri attentavit, a chalcedonensi Synodo nullam in fidei negotiis confirmationem petitam, sed eam a S. Leone ultro oblatam, hoc est, invitis fuisse obtrusam: de uno Canone 28, qui controversus esset, Patres ad Leonem retulisse? Ita Pseudo-Bossuetus. **)

§. 23.

Nunc ergo palam esse demonstratum confido, hunc Authorem ejusdem se perfidie reum fecisse, quam Meldensis Episcopus in observationibus Art. præc. laudatis iniquo critico Dupinio exprobravit, partim quod affectata oblivione reticuerit, quæ magni momenti sunt, partim quod suo placito addiderit, quæ magni periculi. In specie Cap. 1, observatio 5ta, quæ singulariter de Concilio chalcedonensi est, magis Pseudo-Bossuetum, quam Dupinium ferire videtur. Sensa Bossueti veri ex proprio ejus ore percipiamus.***) „Quantum ad titulum Archiepiscopi, quem Papæ chalcedonense Concilium dedit, non oportebat oblivisci, quod tunc in Ecclesia Græca hic titulus summæ dignitatis fuerit, & Papæ singulari cum emphasi & expressione datus, siquidem S. Leo vocatus est *Archiepiscopus omnium Ecclesiarum*, aut latino sermone *Papa omnium Ecclesiarum*, quod convenit cum relatione Concilii ad Papam, ubi Patres illum agnoscunt *tamquam suum Caput, tamquam eum, cui vineæ custodia a Salvatore commissa est*, se vero *tamquam illius membra* considerant: *Tu autem sicut Caput membris præeras*. (Dein adversus Dupinium concludit): „Certe suppressere in historia utriusque tam celebris Concilii (Ephesini & Chalcedonensis) quorum acta integra extant, suppressere, inquam, tantas res de Autoritate Papæ, quæ hic ubique splendescere deberet, prout revera in singulis Actorum paginis splendescit, & tot alia gesta deformare per infirmas, falsas translationes, est fidei in errorem

Y 2

*) Epist. 115.

**) Defens. L. 3, C. 5. & 8.

***) Oeuvr. posth. Tom. 2, p. 557.

„rorem inducere, & Ecclesiam suis subsidiis privare.“ Nosce in his verum Bossuetum. —

ARTICULUS VI.

Reflexio & Conclusio,

quod totus Liber recenset sit Authoritatis romanæ, immo & catholicæ Ecclesiæ subdola Infestatio.

§. 1.

Si ad ea, quæ tota hac recensione deteximus, nunc animum reflectamus; totius operis propositum, sed callide sub specioso verborum officio involutum, haud aliud esse facile constabit, quam ad patrocinandum errori ab apostolica Petri Cathedra condemnato authoritatem romanæ Ecclesiæ, simul autem & catholicæ enervare, atque subruere. Vox hominis Appellantium ex secta satis se ipsam prodit, & quidem non simpliciter appellantis ad *congregatæ* in Concilio, sed quod adhuc pejus, ad *dispersæ* per orbem Ecclesiæ universalem consensum. In hoc improvidis animis commendando *universali* consensu fallaces artificii sui technas exhaurit eo fine, ut orta de fide controversia *ultimatam* iudicii authoritatem ad ipsas litigantes partes transferat, quarum consensus, quem *necessarium* fingit, cum obtineri nequeat; jam eo ipso nullum superest litem finiendi remedium, nulla par authoritas unitati fidei restituendæ; quo artificio non solum romanæ, sed generatim totius Ecclesiæ authoritatem in ferendo iudicio contra insurgentes fidei adversarios esse subrutam, cæcus est, qui non videat.

§. 2.

Et apostolicæ quidem Petri Cathedræ quid authoritatis in definiendo tribuat, sat clare *Defens.* Tom. 2, p. 114 explicat his verbis: „Cum Petri Successor ita ex communi traditione pronunciat, ut in ejus sententia recognoscant omnes fidei suæ sensum; tum sit illa consensus, quæ iudiciis pontificiis firmum, & indeclinabile robur conciliet“ — hoc est, ut breviter dicas, quod res est, si nemo sit, qui dissentiat, tum Pontificis sententia valet: *reclamante nullo* ait p. 115. Bellus, si superis placet, finiendi controversias modus! Is tamen ipse est, quem
„men-

mendax impostor p. cit. commendat: „Hanc communem, pervulgatam esse controversiarum finiendarum viam, qui non intelligit, eum „pacis inimicum, & omnis ecclesiasticæ rei imperitum profiteor“ effrons mendacium! quo spectat & illud præc. p. 107: *Omnes intelligunt certam, & exploratam, & plenam veritatis declarationem non in Papa solo, sed in Ecclesia ubique diffusa collocatam.* En, quod supra Cap. I, §. 14 monui! inter duos extremos, quos memorat casus, de quibus nulla, vel exigua prorsus scholæ quæstio est, tertium casum, eumque frequentissimum, ac fere unice practicum fraudulenter dissimulat, quod ipsum est punctum, circa quod præsens versatur quæstio: an orta fidei controversia in autoritate apostolicæ Sedis, hoc est, romanæ Ecclesiæ cum Papa conjunctæ sit irreformabile tribunal, cui pars dissentiens aut se submittere debeat, aut si consentire non velit, catholica esse definat. Atqui hoc S. Fidei nostræ caracteristicum dogma est, quamlibet particularem Ecclesiam, ut catholica sit, cum centro unitatis, cum romana, Matre & Magistra omnium, Ecclesia debere esse in fide consentientem, & obedientia conjunctam.

§. 3.

In hac ipsa apostolicæ Sedis autoritate evertenda larvati Authoris *arcanum* consistere, supra Art. 3, §. 2 demonstratum est; hinc ut irreformabile sit Pontificis judicium, Ecclesiæ universalis, hoc est, litigantium quoque partium consensum esse necessarium contendit, quo negato pontificia sententia autoritate destituatur. Ita sane, cum sine universali Ecclesiæ consensu nihil firmum statuere possit Pontifex, manifestum sit, summæ Sedis judicium non solum universæ, sed & divisæ, hoc est, particulari cuilibet Ecclesiæ subjici, utpote penes quam stet illud consensu suo vel approbare, vel dissensu suo reprobare. Neque jam centrum unitatis foret, quod dispersos radios sua unius vi ad se adtraheret, sed vires dispersæ radiorum contra unitatis centrum prævalerent, hoc est, ipsam unitatem necessario destruerent. En quo tendat *arcana* hujus Authoris Intentio supremam Autoritatem in Ecclesiæ totius consensu reponentis! bella verba! sed ipso sensu supremam totius Ecclesiæ autoritatem destruentia pro eo casu, quo necessaria foret ad finendam fidei controversiam, dum inter dispersas Ecclesias dissensio datur.

§. 4.

Huc respicit assidua universalis Ecclesiæ consensus, tamquam solius supremæ Autoritatis dilaudatio, ut in casu dissensus jam nulla superfit suprema, ac firma satis autoritas. Hinc officium apostolicæ Petri Cathedræ *confirmandi fratres in fide*, huic furtive ablatum, & in fratres, sive totam Ecclesiam *pro casu emergente, ut illa suppleat*, translatum *Defens. T. 2, p. 160.* Hinc vana verborum æquivocatione *Ecclesiæ romanæ laborantis autoritas per Ecclesiæ catholicæ auctoritatem multis casibus suppleri* dicitur p. 156. Qui autem ex Seculo X proferuntur casus, ad unum omnes extra oleas vagantur: non enim Pontificum judicia de fide, sed scandala sunt actionum, vel schismatum, ad quæ Ecclesiæ romanæ vulnera curanda, aut allevianda reliqua Ecclesia sua auctoritate, cur non potius reverentia erga romanam? succurrerit vel intrusum Pontificem pro legitimo agnoscens, vel dubios inter Pontifices certum congregato Concilio eligens. Hæc vero quid ad rem! certe autem ad odium summis Sacerdotibus conflandum, & Patrum verenda pro pudor! denudanda. Hinc demum romana Ecclesia p. 205 expresse dicitur a fide posse *deficere*, etsi non *permanenter*, & p. 206 *ab Ecclesiâ catholica dirigi, revocari, doceri debere, perficique omnino, ne error inoleseat*: quin etiam ead. p. *Mater & Magistra Ecclesiarum totam ipsam Ecclesiam matrem, & magistram agnoscat.* Audin lupum sub ovina licet pelle ululantem?

§. 5.

Jam non ergo mirum, si fidem romanæ Ecclesiæ a fide romanorum Pontificum non distinguat T. 2, p. 191; etsi ab initio larvatus Author videri voluit nonnisi Parisiensis scholæ doctrinam veterem, hoc est, *personalem* tantum Papæ, ut in Cathedra Petri Sedentis, ab ipsa Sede distincti fallibilitatem defendere. Quam ob rem nullum non movet lapidem, ut auctoritatem S. Petri tum divinis Scripturis, tum SS. Patrum documentis quam fortissime fundatam tortis, falsisque interpretationibus infirmet: suum vero, ut putat, validissimum robor in eo argumento collocat, quod incessanter opponit, sententiam tota pontificia auctoritate jam latam adhuc ad ultimam vim suam consequendam universæ Ecclesiæ consensu indigere, eamque ob causam ad examen revocari posse, ac sæpius in œcumenicis Conciliis denuo fuisse examinatam. Totum hujus argumenti artificium in confusione notionum

con-

consistit, quarum duplicem, eamque clarissimam distinctionem ex ipso Bossueto, nec non & Concilio Chalcedonensi observare debuisset. Ut enim Bossuetus docet, summi momenti discrimen datur inter consensum *Authoritatis*, qui summo Pontifici, aut in deliberatione conciliari Episcopis universim convenit; & inter consensum *obedientiæ*, qui ab ipsis Episcopis summo Pontifici, aut œcumenico Concilio debetur. Consensus hic universæ Ecclesiæ actu jam præstitus ad conterendos fidei adversarios maximum sane authoritatis pondus est, quo majus in hac terra, atque humano modo dari non potest: id tamen haud officit, quominus apostolicæ Sedis sententia inter orthodoxos fideles pro firmissima, & irreformabili regula valeat, cui necessario, & ex obedientia consensus sit præstandus. Sed & hæc ipsa fidei obedientia non tyrannico, & cæco modo exigitur, immo rationabilis sit oportet, salva etiam libertate examinis *ad instructionem*, neutiquam vero *ad dissensionem*. Hæc sane æque notabilis est differentia, qua Concilii Chalcedonensis exemplo quibusdam dubitantibus ad suæ ignorantiae instructionem, vel ampliore veritatis declarationem examen permitti potest, negato tamen, quod Patres Chalcedonenses plane negarunt, examine ad pertinacem dissensionem, aut iudicii suspensionem. Ita teste S. Leone & subditis *disquirendi* moderata libertas, & summo Sacerdoti *definienti* plena authoritas servatur.

§. 6.

Neque vero solum apostolicæ, seu romanæ Sedis, sed & totius, ut jam dictum, Ecclesiæ catholicæ authoritatem, ne tunc, cum ea maxime opus foret, cum efficacia exerceri possit, impetit & infestat larvatus Author. Posita enim ea, quam prætendit, necessitate universalis Ecclesiæ consensus ad irreformabile iudicium, sequitur hanc supremam authoritatem ne œcumenico quidem Concilio convenire, quippe cui universa per orbem *dispersa* Ecclesia interesse nequeat; sed & hujus decreta primum ultimatam vim suam deberent per dispersarum particularium Ecclesiarum consensum adipisci, id quod *Defens. T. 2, p. 87* non diffitetur: *Haud immerito affirmamus, ultimum, quo Synodi œcumenicæ asserantur, esse Ecclesiæ universalis (dispersæ) consensum cum apostolicæ Sedis confirmatione conjunctum.* Si ergo vel œcumenico Concilio, quasi processu suo, aliave ex causâ illegitimo in dispersis Ecclesiis partes litigantes suum negent assensum; jam & hæc plenissima licet Ecclesiæ authoritas suo robore destituetur. Sic e.g. quia

quia Nicæno plurimi Ariani, quia Ephesino & Chalcedonenſi partes Orientis inſignes non conſenſerunt, ita ut hodie dum ibi Neſtorianæ & Euty-
chianæ dentur ſic dictæ eccleſiæ; quia Marcus ephesinus acquiſita ſibi fere
totius Græciæ adhæſione Florentino, quia magna nimium pars Europæ
per Lutherum & Calvinum reformatæ Tridentino, tamquam illegitimis
Conſiliis ſuam non dedere aſſenſionem; ne hodie quidem dogmata de Di-
vinitate Chriſti, deque ejus una Perſona cum duabus Naturis, de Spiritu S.
Proceſſione ex Patre Filioque, atque alia plura contra Reformatores de-
ſinita dici vel haberi poſſent pro ultimatis judiciis, neque litigantes illæ
partes jure ab eccleſiaſtica communione excludi, ſed ad unam eandem-
que Chriſti Eccleſiam catholicam, diſciſſa licet ſancta unitatis tunica, per-
tinerent ſectæ Ariana, Neſtoriana, Eutyariana, Græca, omniumque per
Europam Novatorum. — Quam monſtroſa hæc facies! hæccine una di-
lecta Jeſu Sponſa!

§. 7.

Ita nimirum ad extrema conſuſionis plus, quam babylonicæ deve-
nire neceſſe eſt illos, qui optimæ tuæ, Deus! Providentiæ audent relu-
ſtari, qua ſub unius ſupremi Capitis regimine ex univerſa terra ſpecioſiſ-
ſimam ſimul ac fortiffimam tibi Eccleſiam formaſti. Unum ex duodecim
Apoſtoliſ elegiſti Petrum, qui omnium eſſet in fide firmamentum, ne
fraude diaboli umquam ab hac Petra avelli poſſet, & expugnari. Quæ-
cumque adhærens Petro, ipſa jam eſt ſupra Petram fundata, invincibilis,
atque electa Chriſti Eccleſia, ipſa jam eſt jure ſuo catholica, hoc eſt, eo
ſenſu univerſalis, quo omnes per orbem diſfuſæ Eccleſiæ eidem in una
fide, eodemque uno ſub Capite conjungi neceſſario debeant; ut unius
Chriſti corporis membra eſſe poſſint. Quæcumque a fide Petri diſſen-
tiant, utut numero, vel dignitate conſpicuæ, ad corpus Chriſti non per-
tinent, non unius membra Eccleſiæ, non catholicæ, ſed partes abſciſſæ
& ſectæ ſunt. Hic character proprius, eſſentialis, & diſtinctivus eſt ca-
tholicæ Eccleſiæ a quacumque aliena, *Unitatis character*. Ut unum ſit cor-
pus, neceſſe eſt unum eſſe caput. Ut omnium Chriſti-fidelium unum eſſet
corpus, a Chriſto inſtitutum eſt unum viſibile in terra omnium Caput.
Huic ſupremam auferre in judicando authoritatem, eamque in membra
inter ſe diſſentientia, ſeu in partes Eccleſiæ litigantes transfundere, eſt
unitatem Capitis deſtruire, ſive *manifeſtæ rebellionis januam aperire*.

§. 8.

§. 8.

Hæc genuina M. Bossueti sensa sunt, quæ in decursu hujus Recensionis vidimus sat clare explanata. Cum eodem Galliæ præstantissimo Doctore, ac Pastore hanc nostris diebus gravissimam certe materiam juvat concludere excerptis quibusdam ex ejus Sermone *de Unitate* ad Episcopos in famosis illis Comitibus habito, quem utinam exscribere integrum liceret! „Magnum mysterium est vobis prædicandum, Fratres! „mysterium unitatis in Ecclesia, quæ interne a Spiritu S. unita aliud „adhuc habet commune vinculum unitatis externæ, atque uniri semper „debet per regimen, quo Autoritas J. C. repræsentetur. — Quale „hoc regimen? — quæ ejus forma? nihil ex nobis dicamus, Evange- „lium inspiciamus! Agnus sigillum hujus sacri libri aperuit, & Traditio „omnia explicavit. Legimus in Evangelio, quod J. C. volens incipere „mysterium unitatis in sua Ecclesia ex omnibus discipulis Apostolos „duodecim elegerit; sed hoc idem mysterium volens consummare, in- „ter duodecim elegit unum. — In secunda separatione S. Petrus Caput „constituitur; & ob eam causam Petrus nominatur a J. C., ut opus „suum præpararet, quod meditabatur, totum suum ædificium super „hanc Petram ædificandi.“ Tum verba *Tu es Petrus* &c. Meldenis suo Commentario explicat, & perpetuam virginitatem romanæ Ecclesiæ laudat, *in qua Petrus semper loquitur*, ut supra Art. 4, §. 3.

§. 9.

— Pergit Bossuetus: „Videamus adhuc breviter in textu sequentia. „J. C. persequitur propositum, & cum dixisset Petro, fidei Prædicato- „ri æterno: *Tu es Petrus, & super hanc Petram ædificabo Ecclesiam meam*, „adjungit, & *tibi dabo claves regni cælorum*; Tu, qui prærogativam ha- „bes prædicationis fidei, habebis quoque claves, quæ autoritatem re- „giminis designant. *Quidquid ligaveris super terram, erit ligatum & in* „*cælo*; & *quidquid solveris super terram, erit solutum & in cælo*: Omnia „his clavibus submissa sunt, omnia fratres, reges, & populi, pastores „& greges: NB. cum gaudio id publicamus, nos enim unitatem diligi- „mus, & in obedientia nostra gloriamur. Petrus est primus, qui jube- „tur *plus amare, quam omnes alii Apostoli*, & postea pascere, & gubernare „omnia, & agnos, & oves, & filias & matres, & ipsos Pastores, in- „tuitu suæ plebis pastores, & oves intuitu Petri, in quo J. C. reveren- „tur — — —

Z

§. 10.

§. IO.

„Sequamur adhuc, & non gravemini magnum hoc attendere
 „mysterium, ad quod prædicandum hodie necessaria ratio me impel-
 „lit. — Vidistis unitatem in sancta Sede; vultin eandem in toto or-
 „dine, & toto episcopali Collegio videre? Denuo S. Petrus est, in quo
 „illa amplius resplendet ex his verbis: *Quidquid ligaveris, erit ligatum,*
 „*quidquid solveris, erit solutum.* Omnes Pontifices, & omnes SS. Patres
 „id communi consensu docuerunt. — J. C. qui Petro dixit: *Quid-*
 „*quid ligaveris* &c. idem omnibus Apostolis dixit, atque etiamnum di-
 „xit: *Quorum remiseritis peccata, remittuntur eis, & quorum retinueritis, re-*
 „*tenta sunt eis.* Quid est ligare, nisi retinere peccata? & quid est sol-
 „vere, nisi remittere? Qui Petro hanc dedit potestatem, etiam præ-
 „prio ore eandem omnibus Apostolis concessit: *Sicut misi me Pater,*
 „*ait, ita ego mitto vos.* Non datur Potestas firmitus stabilita, non Mis-
 „sio magis immediata. Manifeste ergo hoc fuit propositum Domini
 „primitus in uno ponendi, quod postea pluribus volebat communicare.
 „NB. Verum, quod posterius, non evertit id, quod prius: & qui pri-
 „mus, non amplius locum suum perdit. Premissus ille ad unum ser-
 „mo: *Quidquid ligaveris* &c. jam suæ unius potestati subordinavit quem-
 „libet eorum, quibus paulo post dicitur: *Quorum remiseritis* &c. nam
 „promissa æque, ac dona Domini sine Pœnitentia sunt, & quod semel
 „indefinite, ac universaliter datum, hoc irrevocabile est: præterquam
 „quod Potestas pluribus data suam restrictionem jam habeat in sua di-
 „visione; cum e contrario potestas uni soli, & super omnes, & sine
 „exceptione data plenitudinem complectatur, & nulli alteri communi-
 „canda nullos habeat limites, nisi quos regula præscribat. Propterea
 „antiqui Doctores Parisienses unanimi consensu omnes in Cathedra
 „S. Petri agnoverunt plenitudinem Potestatis. Res hæc decisâ, & de-
 „finita est.“ Hic præcipuus, ac notatu dignissimus, quem vide Art. 3,
 „§. 6 subjungitur Bossueti locus, ubi ad unitatem Ecclesiæ conservan-
 „dam Episcoporum a Pontifice tam necessariam dependentiam ex S. Cæ-
 „sareo Arelatensi asserit, ut ipsa Jurisdictio ecclesiastica subsistere ne-
 „queat, nisi sub ea conditione, quatenus ad illam Petri primitus insti-
 „tutam, seu Principium suæ unitatis semper referatur, eidemque inse-
 „parabiliter adhæreat.

§. II.

§. II.

De romana Petri Cathedra ex Patrum traditione ita Meldenſis proſequitur: „Quoniam hoc conſilium Dei fuit, ut ſuos probaturus „fideles, naſci ſchiſmata, & hæreſes in Eccleſia permetteret; non da- „batur inſtitutio firmior ad hanc ſtabiliendam, neque validior ad illas „opprimendas. Vi hujus inſtitutionis in Eccleſia Dei omnia ſunt firma, „quia omnia divina ſunt, & omnia unum: & ſicut ſingulæ partes divinae, „ita vinculum unionis divinum; & tale eſt ompoſitum, ut quælibet „pars agat fortitudine totius. Propterea noſtri Prædeceſſores, qui tam „ſæpe in Conciliis ſuis profeſſi ſunt, ſe ſuis Eccleſiis præeſſe tamquam „Chriſti Vicarios, & Apoſtolorum Succeſſores accepta ab illo immedia- „ta Miſſione; in aliis quoque Conciliis, in Cabillonenſi, Viennenſi, „aliisque, quemadmodum & Pontifices dixerunt, ſe agere nomine S. Pe- „tri, vice Petri, per authoritatem omnibus Episcopis in perſona S. Petri „datam, *authoritate nobis in Petro conceſſa*, tamquam Vicarios Petri, *Pe- „trarii Petri*. Et hoc quidem tunc dixerunt, cum agerent authoritate „ſua ordinaria, ſed ſubordinata; quia omnia primum S. Petro commiſſa „ſunt, & quia talis eſt in toto eccleſiaſtico Corpore connexio, ut, „quod facit quilibet Episcopus ſecundum regulam, & in ſpiritu unita- „tis catholicæ, idem tota ſimul Eccleſia, totus Episcopatus, & Caput „episcopalis Ordinis unacum ipſo faciat, ſi ita eſt, ſi omnes Episcopi „non habent, niſi unam Cathedram per relationem neceſſariam (eſſen- „tiale) ad eam unicam Cathedram, in qua S. Petrus, ejusque Succeſ- „ſores ſedent; ex hac doctrina ſequitur, omnes in ſpiritu unitatis ca- „tholicæ ita agere debere, ut nihil ſingularis Episcopus dicat, nihil „ſentiat, quod univerſa Eccleſia ut ſuum profiteri non poſſit. — —

§. 12.

„Quam ſpecioſa es in hac unitate, o Eccleſia catholica, ſimul „autem quam fortis ad reſiſtendum! *Pulchra, & formoſa ut Jeruſalem,* „*terribilis ut caſtrorum acies ordinata!* Pulchra ut Jeruſalem, ubi ſancta „uniformitas, & admirabilis politia ſub uno Capite ſplendescit: ſpecio- „ſa certe in pace tua, dum intra muros tuos collecta eum laudibus „celebras, qui te elegit, ejusque veritates fidelibus annuncias! Ve- „rum ſi ſcandala ſuſcitantur, ſi inſurgant adverſarii, qui ſuis blaſphe- „miis Dominum laceſcere audeant; mœnibus tuis egrederis, o Jeruſa- „lem! atque ad oppugnandum illos exercitum formas, ſemper etiam

„in hoc statu formosa (pulchritudo enim tua numquam deficit) sed
 „jam tuis hostibus formidanda! Acies enim militum bene ordinata, quæ
 „tam pulchra solo aspectu est, quam terribilis sit omnium jacula contra
 „se intensa, & omnium hastas contra se erectas conspicienti! Quam igitur
 „terribilis es, o sancta Ecclesia! dum ad pugnam procedis, armati
 „tui tecum, in fronte Dux omnium Petrus, omnes ad unitatis ve-
 „xillum, quod est Cathedra Petri, conjuncti. Tu superba capita, &
 „omnem altitudinem adversus scientiam Dei se extollentem prosternis:
 „tu toto pondere densi agminis hostes tuos statione cedere cogis; tu
 „simul universos tota autoritate seculorum prætorum, & tota fu-
 „tutorum execratione opprimis; tu hæreses dissipas, & interdum in
 „ortu suo suffocas; tu parvulos Babylonis, recentes errores apprehen-
 „dis, atque ad Petram allisos confringis. Jesus Christus tuum Caput
 „ab alto tuos movet, & unit, sed movet, unitque per apta instrumen-
 „ta, per media convenientia, per unum Caput visibile, quod ipsum
 „repræsentat, quod simul omnes ad omnia movet, & ad unam actio-
 „nem collectis omnium viribus concurrat.“ — — —

**DUM PAPA, ET CAPUT OMNIUM EPISCOPORUM IMPUGNATUR, NON UNUS
 SOLUM EPISCOPUS EST, SED TOTUS UNIVERSIM EPISCOPATUS,
 QUI PERICLITATUR.**



P A R S III.

C O R O L L A R I A

ex divina institutione monarchici Primatus antiquissimis
Ecclesiæ documentis illustrata.

Divini verbi eloquia in eo, qui Ecclesiæ catholicæ est, sensu a me Parte I allata, profecto pontificii Primatus immobilia fundamenta sunt, nullis quibuscumque rationis humanæ argutiis, aut torsionibus infirmenda. Ex quibus cum reflexione critica, quod confidenter scribo, in Parte II demonstraverim, ejusmodi a Christo in sua Ecclesia institutum fuisse Primatum, qui *vere*, ac *proprie* est, non tamen, ut ad invidiam garrit Febronius, *arbitrarie*, & *absolute* monarchicus; jam ex ipsa Monarchiæ natura, quæ sacri hujus Primatus *essentialia* jura sint, facile datur intelligi. Quidquid enim suprema, eaque illimitata potestas universam Christi Ecclesiam gubernandi in se juris complectitur, id omne Christi Domini in terra universa Vicarius, B. Petri Successor potest. Nimum prolixa, & quodammodo infinita mea fieret oratio, si pontificiæ Majestatis jura omnia, & singula enumerare, eorumque amplitudinem, efficaciam, applicationem, & usum pro diversa temporum ratione vellem adcurate describere. Is tantum mihi animus est, hodierni temporis necessitati, aut utilitati contra Novaturientium falsiloquia patriæ nostræ perniciem minitancia selectis quibusdam, atque e diametro oppositis veritatibus succurrendi. Quamobrem cum ea sit plurimorum hodie vafricies, ut vagam, & generalem Papæ potestatem quasi quadam officii specie nostro seculo usitata profiteantur, omni vero actuali, & specifico pontificiæ jurisdictionis exercitio quam cautissime viam præcludere, & obstacula ponere conentur; ego hisce directè contraire mihi proposui, atque hunc in finem tantum aliqua ad externum maxime regimen spectantia, & plurimum nostris diebus solita impugnari Corollaria, ex stabilitis antea principiis licet sua sponte fluentia, hac tamen Parte III diligentius adhuc ex genuinis antiquitatis monumentis mihi summi discutienda, & illustranda.

COROLLARIUM I.

De jure leges ferendi.

§. I.

„Romano Pontifici, tamquam supremo Ecclesiæ Capiti competere potestatem ferendi leges universales in tota Ecclesia obligatorias, memo Catholicorum dubitat“, sunt verba doctiss. Zalweinii *), qui cum esset in archiepiscopali Sede Salisburgensi publicus juris canonici Doctor, adeo non supra, quam necesse erat, pontificiam jurisdictionem extulit, ut eandem potius non semel in scriptis suis fraudis etiam occulto artificio, quod admodum moleste legi, ultra quam par erat, deprimere studuerit. Immo ea est hujus theses certitudo, ut recentiores Canonistæ (tantum novissimos quosdam, hoc est, *spurius* excipe, ipso Eubelio iniquiores **) pro ea stabilienda, utpote re omnibus Catholicis exploratissima vix soleant argumentum asserre, sed studium suum mox ad limites legi pontificiæ in *hypothesi* ponendos sedulo convertant. Ita saltem antiqua fide servata seculi hujus laudem, quam non invidéo, aucupantur. Hæc porro catholica veritas, *præcipienti Patri esse obediendum*, tam alte semper fidelium animis insedit, ut inde aborta Lutheri reformatione Parisiensis Facultas theologica publico testimonio fidem suam sæpius professâ fuerit. „Certum est unum esse jure, divino summum in Ecclesia christiana militante Pontificem, cui omnes Christiani parere tenentur“ ***).

§. 2.

Ipsi adeo Basileenses Patres, quos pontificiæ autoritatis concuratos hostes merito dixeris, de catholica hac fidei doctrina adeo sibi erant confisi, ut eandem verbis saltem simulatoriis non potuerint non confiteri. Cum enim Joannes Tarentinus Episcopus in præclara sua oratione ad Concilium Basileense habita in alia multa pontificiæ Sedis privilegia assereret, *ei tradita esse jura celestis, terrenique imperii* (in rebus spiritualibus), *a Domino Redemptore nostro*; ita responderunt, ut odiosa quidem dicta sibi esse proderent; negare tamen palam utpote notissimam

non

*) Princip. jur. eccles. T. 1, Q. 4, C. 2, §. 7.

**) Introductio in jus ecclesiasticum Catholicorum T. 3, L. 2, C. 3, §. 176.

**) D'Argentré Collect. judic. T. 1, P. 27.

non auderent, hinc frigida licet ipsorum confessio *): „Late explicat jurisdictionem, & potestatem summi Pontificis, quod Caput sit, & Primas Ecclesiæ, Vicarius Christi, & a Christo non ab hominibus, vel Synodis aliis prælatus, & Pastor Christianorum, & ei data sunt a Domino claves, & uni dictum est: *Tu es Petrus &c.* & solus in plenitudinem potestatis vocatus sit, alii in partem sollicitudinis, & multa huiusmodi, quæ cum vulgatissima sint, minime necessarium erat recensere. Ita plane fatemur, & credimus.“ Quid? quod jam decisæ res est universalis Ecclesiæ sententia **): „Romano pontifici in B. Petro pascendi, regendi, & gubernandi universam Ecclesiam a Domino nostro J. C. plenam potestatem traditam esse.“

§. 3.

Sane hoc catholicæ fidei dogma tam aperte in sacris Scripturis continetur, ut nulla Ecclesiæ declaratione aut definitione, nisi propter obstinatam hæreticorum contumaciam opus fuisset. Claves enim regni colorum Petro promissæ tam ex Scripturarum aliis locis parallelis, quam ex ipsa Christi Domini explicatione, ac demum ex vulgari inter homines jam recepta loquendi formula supremam indicant gubernandi, & imperandi potestatem. Eodem quoque sacre Scripturæ sensu, & communi loquentium usu Christus promissis suis stans universi gregis Pastorem seu Rectorem, & Gubernatorem Petrum instituit. Aut num forte suprema gubernandi potestas, num universalis Rectoris officium non jam ex sua natura jus imperandi, seu leges ferendi in se includunt? Id si tu mihi neges, æternum jam mihi tecum silentium erit, nolim enim vel verbum ad insanos perdere.

§. 4.

Hæc imperandi, aut ne invidia verbo sit, dirigendi, statuendive potestate erga Apostolos aliosque fratres jam usus fuit sanctus Petrus, in locum proditoris Judæ unum aliquem Apostolum eligi jubens Act. I, 21, & universos fideles visitando abs dubio, prout Superioris officium est, quæ corrigenda videbantur, prohibitione emendans, & quæ utilia, præcepto instituens Act. IX, 32. Inde ab Apostolorum ævo exortis circa Religionem dubiis, aut controversiis ad romanam Petri Sedem ex singulis

Orien-

*) Conc. edit. Labb. T. 12 inter epist. Synod. n. 3.

**) Conc. Flor. sanctæ Unionis litteræ Cap. 4.

Orientis atque, ac Occidentis provinciis relationes mittebantur, atque obtemperantia hinc decreta vel in controversiis vim definitivæ sententiæ, vel in dubiis firmæ regulæ valorem habebant. Etsi quidem pretiosissima illa primæ antiquitatis monumenta propter persecutionum procellas fere omnia interierint; divina tamen Providentia factum, ut quædam nobis reliquæ superessent. Certum est sane, atque innegabile a primis jam Pontificibus ad propositas sibi ex omnibus locis consultationes plurima emanasse decreta, quorum cum pleraque hodie authenticæ fidem inter Criticos perdiderint, tantum ea, quæ severissima crisi probata sunt, commemorabo. Quod maxime omnium memorabile est, brevi post Petri obitum Corinthi Presbyterorum exemplum occurrit, qui a suo ministerio per Schismaticos injuste dejecti viventibus adhuc Apostolorum quibusdam non ad hos, sed ad Petri Successorem, Clementem scilicet Papam romanum appellarent. Is vero in præstantissima, quæ adhuc extat, epistola, licet summa cum humilitate, & moderatione, attamen suprema sua Capituli autoritate usus seditiosos pœnitentiæ addixit, iussitque suis, ab apostolicis viris rite ordinatis, Presbyteris subditos esse *): „Vos ergo, qui seditionis fundamenta jecistis, subditi estote Presbyteris, & correptionem suscipite in pœnitentiam, flectentes genua cordis vestri discite subiaci, deponentes arrogantem, ac superbam linguæ vestræ jactantiam. Melius enim vobis est in ovili Christi parvos, & probatos inveniri, quam altum sapientes e spe illius dejici.“

§. 5.

Simile supremæ jurisdictionis pontificiæ documentum ex secundo seculo Eusebius suppeditat exhibens epistolam, quam Dionysius Corinthiorum Episcopus romano Pontifici Soteri rescripserat **). Ex ea constat Soterem antea ad Corinthios scripsisse epistolam, quæ, sicut prior illa Clementis, tanti ab illis æstimabatur, ut eam quoque in Ecclesia perpetuo legendam constituerent, *quo præceptis, ac documentis optimis abundarent*, verba sunt Constantii minime certo Isidorianis decretalibus occupati. Aliud in hanc rem testimonium secundi seculi ex S. Irenæo defumitur ***). Propter asiaticam enim Pascha celebrandi consuetudinem a romana alienam ad Anicetum Papam profectus est Polycarpus, ut eidem siquidem Ecclesiæ Capiti rationem redderet. Cum

*) Epist. 1 ad Cor. apud Constant. n. 57.

**) Hist. eccles. L. 4, C. 23.

***) Epist. ad Victorium apud Euseb. L. 5, C. 25.

Cum Asianorum ratio Aniceto exposita ejusdem Successori, Papæ Victori pro temporum diversa jam ratione haud amplius probanda videretur, is judicam celebrandi Paschatis consuetudinem severa prohibitione, etiam cum anathematis comminatione interdixit. Neque fuit, qui tantam Pontifici auctoritatem denegaret, etsi Episcopi essent, quibus nimia, ut putabant, Victoris severitas displicuerat, inter quos præcipue Irenæus eminebat: hinc ad consilia pacis, & charitatis Papam adhortabantur, non quasi ipsam *potestatem* in dubium vocantes, sed unice potestatis *abusum*, & hunc quidem satis energice arguentes, Dicerene Febronius audebit, sanctos illos Ecclesiæ Patres falsis quibusdam, forte Isidorianis præjudiciis captos majorem justo Pontificis auctoritatem credidisse, vel S. Victorem contra divinum jus sibi arrogasse? — At, ajunt, Asiaticos Pontificis decreto morem non gessisse: hos breviter, sed invictè doctiss. Thomassinus refutat *): „Si renitentium „enim pervicacia principantem auctoritatem enervare potis esset, quæ „usquam residua foret umbra legitimi imperii? Nicænæ etiam, & Constantinopolitanæ Synodo illudere Quartodecimani: an ideo cassa, & „effræta œcumenicarum Synodorum majestas blaterabitur?“

§. 6.

Ex tertio Ecclesiæ Seculo sat celebre est in causâ Rebaptizantium S. Stephani Papæ decretum **): „Siquis a quacumque hæresi venerit ad nos, nihil innovetur, nisi quod traditum est, ut manus illi imponatur in pœnitentiam.“ Nec obstat, quod huic pariter Pontificis sententiæ S. Cyprianus se non submiserit, immo etiam opposuerit: certum est enim Cyprianum erroneam defendendo causam in modo etiam justo pertinaciori, atque animi vehementius commoti amaritudine excessisse, quippe qui apostolicam, & universalem Ecclesiarum traditionem, si tantum paucas Orientis, & Africæ excipias, ubi in Conciliis novitas introducta fuerit, *ceu veterem errorem* contemnere satis temere ausus est, & summum insuper Pontificem fannis, ac disteriis infectari, eum vocando *Hæreticorum amicum*, & *inimicum Christianorum*, nec non, quod adhuc indignius, ironico sale perfricando ***). Facile hic posset Cyprianus passione abreptus sibi ipsi opponi, ubi mente, ac ratione tran-

*) Dissert. I in Conc. gener. n. 21 edit. Colon. 1784.

**) Epist. Cypr. 74.

***) Epist. 73 & 74.

tranquilla de *Unitate Ecclesiae* scripsit, hanc scindi per diabolum: „Dum „ad veritatis *) originem non reditur, nec Caput quaeritur, nec Magistri coelestis doctrina servatur — *Quia tu es Petrus.* — Quam unitatem (cum Cathedra Petri) firmiter tenere, & vindicare debemus, maxime Episcopi, qui in Ecclesia praesidemus, ut Episcopatum quoque ipsum unum, atque indivisum probemus.“ Hæc nempe hominum infirmitas est, ut a propria cognitionis suæ regulis in *praxi* non raro passione instigante recedant, præcipue ubi falsa de causæ suæ veritate persuasio illudit. Sed Cyprianus, ut cum Augustino loquar **), maculam suam passionis falce purgavit. Quam desperata sit adversariorum causâ necesse est, qui nonnisi peccantium exempla nobis opponere possunt, hisce denuo cum doctis Thomassino respondemus ***): „Culpa liberari (ab Augustino) non poterat Cyprianus, qui consuetudinem universalis Ecclesiæ, & traditionem ab Apostolis usque ipsis derivatam contemnebat, posthabebatque nuperæ per Agrippinam invectæ corruptelæ. Minus adeo est mirum, si apostolicæ Sedis statuta minoris faceret, qui apostolicas traditiones, & universalis Ecclesiæ leges flocci faciebat. Ab hoc Cypriani contemptu, quem martyria expiavit, nihil adversus vel primæ Sedis, vel Ecclesiæ universalis, vel apostolicarum traditionum auctoritatem rite excipi potest.“ Velim tamen adhuc ex Neotericis nostris quærere, unde sciant, Cyprianum ante mortem suam non resipuisse, factique pœnitentiam egisse? Ipse enim Augustinus, qui non ab omni culpa, etiam summo suo studio, Cyprianum purgare poterat, ita scribit ****): „Fortasse factum est, sed nescimus: neque enim omnia, quæ illo tempore inter Episcopos gesta sunt, memoriæ, litterisque mandari potuerunt, aut omnia, quæ mandata sunt, novimus.“

§. 7.

Quarto jam seculo pace Ecclesiæ reddita latissimo veluti in campo pontificia autoritas sua jura antehac vinculis constricta expandit, quod ex innumeris documentis usque adeo certis constat, ut etiam hodierni nostri Hypercritici eadem impugnare vix audeant. Inde enim a Syricio decreta pontificia, quæ Dionysius Exiguus suæ Canonum collectionis

*) Videtur potius legendum *unitatis*.

**) Cont. Donat. de Baptismo L. 1, C. 18.

***) In Conc. general. Dissert. 2, n. 27.

****) De Baptis. L. 2.

lectioni inferuit, genuina esse cum diffiteri nulla ratione possint, vel inviti fatentur. Atque his decretis vim veræ legis, seu obligandi vim inesse antiquitus jam creditum fuisse, siquidem eorum observantiam summi Pontifices pœnarum ecclesiasticarum interminatione exigebant. Ita Syricius adversus Clericos incontinentes, decreti sui prævaricatores sententiam tulit *): „Qui illiciti privilegii excusatione nituntur, ut sibi „asserant veteri hoc lege concessum, moverint se ab omni ecclesiastico „honore, quo indigne usi sunt, apostolicæ Sedis autoritate dejectos, „nec umquam posse veneranda atrectare mysteria.“ Tum ipsis quoque Episcopis atque Archiepiscopis pœna indicitur, si quosdam contra summæ Sedis prohibitionem ad majores ordines promovere præsumserint**); „Scituri posthac omnium provinciarum summi Antistites, si ultra ad sacros ordines quemquam de talibus crediderint assumendum, de suo, „& de eorum statu, quos contra Canones, & interdicta nostra provexerint, congruam ab apostolica Sede promendam esse sententiam.“ Demum Pontifex Himerium Tarraconensem Episcopum monet, ad servandos Canones, & tenenda decretalia constituta, & ut ea non solum ad omnes Coepiscopos, sed ad universos Carthaginenses, ac Boeticos, Lusitanos, & Gallicos, aliosque finitimas provincias litteris perferri faciat: „Quatenus & quæ a nobis non inconsulte, sed provide sub nimia cautela, & deliberatione sunt salubriter constituta, intemerata „permaneant, & omnibus in posterum excusationibus aditus, qui jam „nulli apud nos patere poterit, obstruatur.“ Hæc scripta sunt a Febr. a. 385. En præstans perantiquæ disciplinæ documentum!

§. 8.

Siricius secutus Innocentius I quinto Seculo ad Exuperium Tolosanum de Clericis incontinentibus ita respondet ***): „De his, & divinarum legum manifesta est disciplina, & beatæ recordationis viri Siricii Episcopi monita evidentia commearunt, ut incontinentes in officiis talibus positi omni ecclesiastico honore priventur, nec admittantur accedere ad ministerium, quod sola continentia oportet impleri.“ Postea tamen discrimine facto inter eos, qui Siricii monita ignorantes, aut scientes violaverint, scribit ****): „Si ad aliquos forma illa ecclesiasticæ vitæ pariter, & disciplinæ, quæ ab Episcopo Siricio

A a 2

„ad

*) Ad Himerium Epist. 1, n. 11 apud Constant.

**) Ibid. n. 19.

***) Epist. 6, n. 2.

****) Ibid. n. 4.

„ad provincias commeavit, non probabitur pervenisse, his ignorantio-
 „nis venia remittetur, ita ut de cetero penitus incipiant abstinere. —
 „Si qui autem scisse formam vivendi missam a Siricio detegentur, ne-
 „que statim cupiditates libidinis abjecisse, illi sunt modis omnibus sub-
 „movendi, qui post admonitionem cognitam præponendam arbitrati
 „sunt voluptatem.“ Hæc disciplina vetus: eamne hodierni Reforma-
 „tores cupiant restitutam? — Zosimus Papa ad Hesychium Salonitanum
 scribens modum ordinationis sacræ ab Episcopis servandum severe præ-
 cepit *): „Sciet, quisquis hoc posthabita Patrum, & apostolicæ Sedis
 „authoritate neglexerit, a nobis districtius vindicandum, ut loci sui
 „minime dubitet sibi non constare rationem, si hoc putat post tot
 „prohibitiones impune tentari.“ Talis est Cælestini I epistola ad uni-
 „versos Episcopos per Apuliam, & Calabriam, ex qua apparet, licet
 tantum *monita* dicantur Pontificum decreta, vim tamen strictæ obliga-
 tionis eisdem inesse **). „Quisquis conatus fuerit tentare prohibita, sentiet
 „censuram Sedis apostolicæ minime defuturam. Quæ enim sola *admo-*
 „nitionis autoritate non corrigimus, necesse est per *severitatem* con-
 „gruentem regulis vindicemus.“ Insigne est Leonis M. de Pontificum
 autoritate legislativa decretum *universis Episcopis per Campaniam, Pice-*
num, Tusciam, & universas provincias inscriptum, in quo legimus ***):
 „Omnia decretalia constituta, tam beatæ memoriæ Innocentii, quam
 „omnium Decessorum nostrorum, quæ de ecclesiasticis ordinibus, &
 „Canonum promulgata sunt disciplinis, ita a vestra dilectione custodiri
 „debere mandamus, ut si quis in illa commiserit, veniam sibi deinceps
 „noverit denegari.“

§. 9.

Neque vero tantum ad Occidentales, verum etiam ad Orientales
 pontificia mandata dabantur: præterquam enim quod tribus primis secu-
 lis Pontifices Clemens, Soter, Victor, & Stephanus sua decreta, uti vi-
 dimus, in Orientem quoque miserint, Siricius expresse suam supremam
 universalis Pontificatus jurisdictionem profitetur in hunc modum ****):
Quid ab universis posthac Ecclesiis sequendum sit, quid vitandum generali pro-
*nuntiatione decernimus. Eodem Pontifice teste *****) Liberius Antecessor ge-*
neralia decreta edidit, quibus prohibuit ab Arianis baptizatos denuo in Ec-
 clesia

*) Epist. 9, n. 4.

**) Epist. 5, n. 3:

***) Epist. 4, n. 7.

****) Epist. 1, n. 12.

*****) Ibid. n. 2.

clesia baptizari. Jam antea Julius I. Antiochenis contemtam suam pontificiam auctoritatem graviter exprobraverat *): „Oportuit omnibus „nobis scripsisse, ut ita ab omnibus, quod justum esset, decerneretur. — „An ignoratis hanc esse consuetudinem, ut primum nobis scribatur, & „hinc, quod justum est, decernatur? — Obsecro, bono animo ferte! „quæ enim scribo, ad publicum bonum conferunt. Nam quæ accepimus „a B. Petro Apostolo, ea vobis significo, non scripturus tamen, quod „nota apud omnes ea esse existimem, nisi quæ gesta sunt, me conturbassent.,, Jam ergo in primitiva Ecclesia ubique notum fuerat Pontificis jus esse a S. Petro descendens, in locis quibuscumque id, quod justum est, decernendi. Non minus posteriores Pontifices jus suum exercuerunt. Inter plura, quæ Innocentius ad Orientales dedit, decreta, memoratu dignior est ad Alexandrum Antiochenum epistola, in qua duo disciplinæ capita statuuntur **): primum est, quo Patriarchæ Antiocheno jus attribuit, sicut Metropolitæ, ita omnes Orientis Episcopos sive per se, sive per suos Delegatos ordinandi; alterum prohibet, ne divisis Imperii provinciis in duas Metropoles, duo propterea Metropolitanæ constituantur. Celebris est Zosimi Papæ adversus Pelagium, Cælestinumque Tractatoria, cujus exemplaria & ad Orientales Ecclesias, *Ægypti diocesan, & Constantinopolin, & Thessalonicam, & Hierosolyma ad Episcopos* transmissa fuisse, Scriptor quinti seculi Marius Mercator testatur ***). Ita in Orientem quoque generalia Pontificum decreta propagabantur, quod insuper ex Xysto III constat, qui Cyrillo Alexandrino de scriptis ad ipsum missis mandavit ****): „Hæc ad vicinorum fratrum notitiam volo mitti per pietatem tuam, ut „discant in re tanta, etsi olim cuncta plenissime definita fuerint, non cessare, aut segnem esse tamen apostolicam Sedem: neque enim permittit nos quietos esse ab ejusmodi curis omnium Ecclesiarum sollicitudo.“

§. IO.

Quam multa, variaque in regimine utriusque Ecclesiæ, Orientalis æque, ac Occidentalis Pontifices sexti seculi ordinarint, possem innumeris propemodum exemplis ostendere, nisi brevitatis studio in re notissima a plurimis abstinere. Omisiss itaque Symachi, Hormisdæ, Agapeti, Vigilii, Pelagii, aliorumque decretis de S. Gregorio M. suorum Præcessorum vestigiis fideliter insistente, suamque eximiam ob humili-

A a 3

tatem

*) Epist. I, n. 22.

**) Epist. 24, n. 1 & 2.

***) Edit. Baluz. p. 134.

****) Epist. I, n. 6.

tatem vel ipsis adversariis commendato unicum proferam exemplum ex Fleurio desumptum *), quod non solum supremam gubernandi potestatem, sed alia etiam jura pontificia circa disciplinam sexti Seculi ad non exiguum Febronianorum confusionem luculenter ostendit. Adrianus Episcopus Thebanus a duobus a se depositis Diaconis apud Joannem Larissæum Metropolitam accusatus, ab eodem injuste fuit ad arctum carcerem condemnatus **), causa ad Episcopum primæ Justinianæ, Primatem Illyrici, & apostolicæ Sedis Vicarium remittebatur. Hujus quoque sententia cecidit Adrianus Thebanus. Quare is ad ipsum Papam appellavit, suæque appellationis certiores fecit Joannem Justinianæum Primatem, qui Legatos suos ad Honoratum Papæ Nuntium Constantinopoli habitantem misit **), promisitque, se viros suæ sententiæ defensores Romam ablegaturum. S. Gregorius, cum diu, sed frustra Primatis Delegatos expectasset, judicium utriusque Joannis, tam Larissæi, quam Justinianæi examinavit, & iniquum invenit **), ergo sententiam nullam declarat, ipsumque Primatem ad triginta dierum penitentiam, quo tempore sacra Communione privaretur, damnat, & graviores adhuc pœnas, nisi obediat, comminatur **). In epistola vero ad Larissæum Metropolitam Papa loquitur in hunc modum: „Communione Corporis Domini nostri privari meritis es, quoniam contemstisti „Antecessoris mei admonitionem, dum a jurisdictione tua Adrianum, „& Ecclesiam ipsius Thebanam exemisti **): verum plus jam a te non exigimus, ut si quam actionem civilem, aut criminalem contra Adrianum Episcopum movere velis, de hac causa Nuntii nostri, qui Constantinopoli sunt, judicent, si sit mediocris momenti; si vero majoris, „ad sacram Sedem deferatur **). Hæc tibi injungimus sub pœna excommunicationis, a qua non aliter, quam jubente romano Pontifice, „solum mortis articulo excepto, absolvi poteris **). Volumus etiam, ut

*) Hist. eccles. T. 8, L. 35, §. 27, vers. Parod.

*) Similia Metropolitanæ violentiæ exempla non mirum, quod ad constringendam illius auctoritatem Papæ ex votis Episcoporum ansam dederint.

*) Jam tunc ergo in Ecclesia græca Nuntii apostolici, iique stabiles fuerant, ut ex historia patet, cum facultatibus pro ratione temporum diversis.

*) Ita appellationes, & quidem extra provinciam pariter tunc erant in usu.

*) Tanta tunc fuit Pontificis auctoritas, & in Primatibus etiam obediendi necessitas sub gravissimis pœnis suspensionis, aut depositionis.

*) En exemptionis ab archiepiscopali jurisdictione exemplum sub Pelagio II.

*) Exemplum causæ majoris ad Papam deferendæ.

*) Aliud exemplum pontificiæ reservationis etiam pro foro interno.

„ut sine omni tergiversatione omnia bona, sacra aut profana, mobilia aut immobilia Ecclesiæ thebanæ, quæ surripuisse accusaris, & quorum commentarius in nostris manibus est, restituas, & si hac super re aliqua contentio oriatur, jubemus, ut de ea Nuncius noster constantinopolitanus cognoscat“^{*)}). Huic facto historico, quod fere singula puncta disciplinæ hodiernæ, quæ impugnantur, jam seculo sexto testatur, M. Fleury sequentem notam apponit: „Unde jurisdictionis, & judiciorum ecclesiasticorum rationem perspicue videmus, nobisque exemplum, quanta illa ætate sacræ Sedis autoritas fuerit, memoratu dignissimum perhibetur.“ Quid ad hoc criterium laudati sui Fleury Febronius? quid Febroniani??

§. II.

Apologista Febronii a sancto P. Gregorio breviter se putat posse expedire inquit^{**)}: „Apparebit multa, quæ Magnus hic Pontifex sine exemplo, & cum autoritate suscepit, vere tamen jurisdictionis papalis actus non esse, quamvis tales esse videantur. Nonnulla a sancto Pontifice ex abundanti zelo, ex singulari confidentia Episcoporum, ex Imperatorum beneplacito suscepta fuisse, quæ ad universalis Primatus officium non pertinent; etiam a sancto Gregorio (quæ summorum quoque Virorum infirmitas est) pro extensione pontificiæ autoritatis ultra natives fines allaboratum fuisse.“ Brevissimus sane modus, isque facilissimus ab autoritate SS. Patrum se expediendi officiosa hypocrisis dicendo, *pro infirmitate humana id magnis etiam viris accidisse*. Si opportuna sese occasio obtulerit, eodem jure, & sine officii ambage cum Febronio dicere poteris, ejusmodi esse hæc facta, quæ contra divinam institutionem essentialia Episcoporum jura injuste violarint, quæ puram Ecclesiæ disciplinam fœde deturparint, quæ malo suo, & deceptorio exemplo, hoc est, eo perniciosiore scandalo, quo sub sanctitatis prætextu, plus christianæ Religionis, quam omnes hæreses nocuerint, quæ demum ex spiritu superbiæ, & dominandi libidine, tamquam nativa radice sua prodierint. Hæc ratione Sanctos ab universali Ecclesia agnitos ex Beatorum albo expungere, & quidem ad ipsius Ecclesiæ ignominiam & infamiam licebit, ita ut post Gregorium VII jam Magno quoque Gregorio I jussu nostrorum Dilucliariorum toto cœlo cedendum sit. Ego autem aliter sentio, regulam

&

*) Talis tunc Nunciorum jurisdictio pro foro etiam contentioso fuit.

**) De Stat. Eccles. Tom. 2. Flores sparsi p. 440.

& normam, ad quam summorum Pontificum facta sint examinanda, non esse Febronianum Oraculum, sed potius divini Verbi effatum: *Pasce oves meas. Quidquid ligaveris, aut solveris super terram, eris ligatum, solutumve & in calis.*

§. 12.

Insuper meminisse Apologiam oportuisset, non primum sine exemplo injustæ potestatis usurpatorem dicendum fuisse sanctum Gregorium M., sed eo ipso teste jam antecessisse Pelagium, immo ab oculato Febronio similem maculam jam in Victore P. seculo II, in Stephano sec. III, (quidni in Siricio, Julio, aliisque sec. IV?) in Bonifacio, Zosimo, Cælestino, Gelasio, & præcipue Leone M. sec. V fuisse observatam.*) Quodsi ita est, prout facta SS. Pontificum negari nullatenus possunt, saltem ab hisce Dominis jure id petimus, ut honestiore modo nobiscum agant, & ab illa mendaci, attamen vulgari hypocrisis abstineant, simulantes prioribus octo seculis exercitam Pontificum auctoritatem, illorumque temporum puram adhuc disciplinam se venerari. Manifestum est quippe ex plurimis, iisque certissimis factis, eadem pontificia jura, quæ nunc tanta contentione impugnantur, jam tunc a sanctis Pontificibus exercita, atque ab universali Ecclesia ceu divinitus instituta apostolicæ Sedis jura, & privilegia fuisse agnita.

§. 13.

Ex seculo septimo vulgatissimum vel inter ipsos Adversarios Papæ Honorii factum est, quo de Christi voluntate una, duabusve disputantibus inter se Patriarchis, Sergio constantinopolitano, & sancto Sophronio hierosolymitano, silentium utrique imposuit. Postea Heraclii Imperatoris Ecthesis, etsi a Sergio, & pluribus Episcopis subscripta, nihilominus a Papa Joanne IV fuit condemnata. Sed cum pontificio decreto Paulus constantinopolitanus Sergii Successor morem non gessisset; alter Sergius Metropoli in insula Cypro illum apud Theodorum Papam accusavit in libello Papæ oblato aperte agnoscens, profitensque *sanctæ Sedis auctoritatem in potestate S. Petro collata esse fundatam*. Idem Papa Stephano Doriensi Episcopo, quem suum pro Palæstina Vicarium nominavit, per litteras potestatem tradidit in causis ecclesiasticis decernendi, atque Episcopos a quodam Sergio Joppensi illegitime ordinatos, nisi resipiscerent,

*) De Stat. Eccles. Cap. 8, §. 2.

rent, deponendi. Tanta tunc Papæ potestas, etiam in Oriente, vel suis in Vicariis existeret, & hoc quidem virtute clavium S. Petro traditarum, uti expresse S. Martinus I. testatur in epistola ad Orientales data, qua Joannem Episcopum Philadelphie suum Vicarium in omnibus Ecclesiis Hierosolymitanæ & Antiochenæ subditis instituit: „Quod facimus illa potestate, quam a S. Petro accepimus, id exigente temporum calamitate. — Fac ut hæc decreta ab omnibus fidelibus regionum illarum observentur, *).

§. 14.

Seculo octavo Germania nostra, & singulariter quidem nostra Patria digna fuit, quæ summæ Sedis attentionem ad se traheret. Viri apostolici Roma ad nos ablegati in his quoque terris Regnum Dei dilatabant. Necessæ erat novas fundare Ecclesias, in iisque disciplinam instituere locis, & temporibus illis convenientem. Hac super re apud Fleurium occurrit Capitulare Gregorii II. *), quo Legatis suis in Bavariam profecturis in mandatis dedit: „Ubi epistolas nostras reddideritis, cum Duce illius Provincie deliberabitis, ut congregetur Conventus Sacerdotum, Judicum, & omnium illius gentis Primorum — Jubebitis observari traditionem Ecclesie romanæ — Episcopatus consideratis locorum distantis, & cujuslibet Ducis jurisdictione creabitis, & cuilibet Sedi terminos ponetis. Si tres, aut quatuor Sedes constitueritis, majorem Archiepiscopo reservabitis, & congregatis tribus Episcopis nos vos ordinabitis ex autoritate S. Petri. Si virum inveneritis dignum, qui in archiepiscopali Sede collocetur, aut datis litteris vestris eum ad nos dirigatis, aut vobiscum adducetis.“ Ergo nostrorum Episcopatum institutio, & in specie archiepiscopalis jurisdictio apud nos inde ex apostolicæ Sedis gratia suam trahunt originem. Ecclesie romanæ traditio fundamentum est primitivæ nostræ, & antiquissimæ discipline, nec non, si ita loqui fas est, libertatum nostrarum ecclesiasticarum, eo forsitan in sensu, ut immunes ab acceptatione decreti essent nostri inferiores Prælati, & Pastores, si contra veterem Ecclesie romanæ traditionem Episcopi, aut Archiepiscopi vellent aliquid ordinare, quod uti facile præsumendum non est; utinam experiri non foret necesse! Præterea Episcopos ordinare, aut saltem confirmare, & Archiepiscopos constitue-

*) Fleury Hist. ecclési. T. 9, L. 38, §. 54. ... *) Lib. 41, §. 39.

situere, horumque, uti & illorum jurisdictioni limites ponere ad auctoritatem S. Petri pertinere credebatur. Non defuit summorum Pontificum cura, quo majores adhuc progressus divina Religio in nostra Germania faceret: hinc novos prioribus submiserunt Delegatos, inter quos præcipuus eminebat S. Bonifacius novorum Episcopatum erector, quorum confirmationem litteris a Papa petiit, atque etiam ut cujuslibet Episcopi limites definirentur. Zacharias P. novos hosce Episcopatus confirmavit, at in epistola ad Burchardum Würzburgensem prohibuit, *ne quis alius præter Papæ Vicarium ibi Episcopos ordinet* *). Ex quo decreto iterum apparet, in Germania vel ab ipsa origine Episcoporum ordinationem, aut confirmationem non ad Metropolitans, sed ad summum Pontificem pertinuisse.

§. 15.

Hactenus octo priora Ecclesiæ secula tantum obiter percurri, quæ vel ipso Febronio contestante iustos intra limites pontificia jurisdictione continebatur, utpote falsis decretalibus nondum existentibus. Unicum adhuc ex nono seculo exemplum græcæ Ecclesiæ haud possum præterire, tum quia ibi adhuc plane incognitæ fuerant Ilidori merces, tum quia falsis istarum præjudiciis omnes, etiam Orientis Ecclesiæ præter Occidentalem fuisse deceptas, ne Febroniani quidem nostri asserere audebunt. Ad notum itaque Photii schisma venio. Cum S. Ignatius Constantinopolitanus Patriarcha Cæsarem Bardam ob vitæ inhonestæ scandala communionem sancta privasset; is furore adversus S. Virum exarscens Concilium convocavit, in quo Episcopi, prout sæpe jam contigit, mundano favore capti Patriarcha deposito Photium, etsi laicum hominem elegerunt. Ut Sedis suæ firmitati consulere Photius, ad romanum Pontificem Legatos misit quatuor Metropolitans, electionem suam, & Ignatii depositionem Romæ nuntiaturus. Pontifex Nicolaus I hujus rei novitate contra Ecclesiæ Canones audita duobus a se Constantino-
polin Delegatis præcepit, ut Synodo indicta canonice in rem inquirerent, sibi que totam renunciarent. Insuper ad Michaellem Imperatorem epistolam dedit, in qua conqueritur, sacra Sede inconsulta Constantino-
politano in Concilio Ignatium fuisse depositum, Laici quoque electionem reprehendit, quod contra Conciliorum, & SS. Pontificum decreta facta sit, dein ita concludit: „In Consecrationem hujus viri consen-
tire

*) Lib. 42, §. 34 & 35.

„tine non possumus; donec per Legatos nostros, quid in hac causa actum sit, ad nos relatum fuerit. Atque ut in omnibus rectus ordo „servetur, volumus, ut Ignatius in conspectu Legatorum nostrorum, & „totius Concilii veniat. — Tum si omnia nobis fuerint significata, „quid pro pace Ecclesiae vestrae agendum sit, *apostolica Sanctione definitus.*“ Legatis Papae Constantinopoli praesentibus, sed & Photii sollicitatione corruptis S. Patriarcha Ignatius ad ipsum Papam appellavit, in- „quiens: *Ducite me ad Papam, cujus iudicium lubens subibo.* Idem S. Pa- triarcha in epistolis antea ad Episcopos missis adduxit Decretalem Inno- centii P. pro causa S. Chrysostomi, pariter quartum Canonem Sardicen- sem, vi cuius in locum depositi Episcopi, qui defendere se apud supe- rius tribunal velit, non intrudi alium liceret, antequam Episcopus ro- manus sententiam pronunciasset. Mentitus itaque est Photius in sua ad Papam epistola negans Sardicense Concilium, & Decretales Pontificum apud Graecos recipi, cui Pontifex ita respondit: „Quod vero dicis, ne- „que Sardicense Concilium, neque Decretales SS. Pontificum a vobis „recipi, credere non possumus, maxime cum Sardicense Concilium, „quod penes vos in vestris regionibus actum est, ab omni Ecclesia „recipitur, decretales autem epistolae a sacra Sede emanarunt, *cujus „Auctoritate omnia Concilia confirmantur.*“ Hoc adeo inter ipsos Graecos notum erat, ut ipsi Conciliabuli sui anno priore 861 contra Ignatium congregati a Papa confirmationem petierint, quam ille constanter nega- vit. Summe memorabilis ejusdem Papae sententia est, quam Orientis Imperatori, hoc idem Concilium Constantinopoli habitum propter Epi- scoporum multitudinem commendanti, rescripsit: *Nos in Conciliis non ad numerum Episcoporum attendimus, sed sententiae pronunciate iustitiam aestima- mus:* quod utique iudicis est Concilio Superioris. In tertia epistola ad omnes Orientis Fideles directae, cum Pontifex Legatorum suorum acta reprobasset; tres Patriarchas, Alexandrinum, Antiochenum, & Hiero- solymitanum, item Metropolitae, & Episcopos speciatim ita alloquitur: „Vobis *Auctoritate apostolica praecipimus*, ut de Ignatii, & Photii causa „nobiscum eadem sentiat, atque has litteras nostras in Diaecesis ve- „stris praedicari curetis, quo ad omnium notitiam perveniant“ *). Quid cogitatis Febroniani? quid est, quod tota Orientis Ecclesia tan- tam apostolicae Sedis auctoritatem agnoverit? etiamne illa aequae, ac Occidentalis iudicio vestro decepta fuit per Pseudo-Isidori mendacia?

B b 220 221 222 223 224 225 226 227 228 229 230 231 232 233 234 235 236 237 238 239 240 241 242 243 244 245 246 247 248 249 250 251 252 253 254 255 256 257 258 259 260 261 262 263 264 265 266 267 268 269 270 271 272 273 274 275 276 277 278 279 280 281 282 283 284 285 286 287 288 289 290 291 292 293 294 295 296 297 298 299 300 301 302 303 304 305 306 307 308 309 310 311 312 313 314 315 316 317 318 319 320 321 322 323 324 325 326 327 328 329 330 331 332 333 334 335 336 337 338 339 340 341 342 343 344 345 346 347 348 349 350 351 352 353 354 355 356 357 358 359 360 361 362 363 364 365 366 367 368 369 370 371 372 373 374 375 376 377 378 379 380 381 382 383 384 385 386 387 388 389 390 391 392 393 394 395 396 397 398 399 400 401 402 403 404 405 406 407 408 409 410 411 412 413 414 415 416 417 418 419 420 421 422 423 424 425 426 427 428 429 430 431 432 433 434 435 436 437 438 439 440 441 442 443 444 445 446 447 448 449 450 451 452 453 454 455 456 457 458 459 460 461 462 463 464 465 466 467 468 469 470 471 472 473 474 475 476 477 478 479 480 481 482 483 484 485 486 487 488 489 490 491 492 493 494 495 496 497 498 499 500 501 502 503 504 505 506 507 508 509 510 511 512 513 514 515 516 517 518 519 520 521 522 523 524 525 526 527 528 529 530 531 532 533 534 535 536 537 538 539 540 541 542 543 544 545 546 547 548 549 550 551 552 553 554 555 556 557 558 559 560 561 562 563 564 565 566 567 568 569 570 571 572 573 574 575 576 577 578 579 580 581 582 583 584 585 586 587 588 589 590 591 592 593 594 595 596 597 598 599 600 601 602 603 604 605 606 607 608 609 610 611 612 613 614 615 616 617 618 619 620 621 622 623 624 625 626 627 628 629 630 631 632 633 634 635 636 637 638 639 640 641 642 643 644 645 646 647 648 649 650 651 652 653 654 655 656 657 658 659 660 661 662 663 664 665 666 667 668 669 670 671 672 673 674 675 676 677 678 679 680 681 682 683 684 685 686 687 688 689 690 691 692 693 694 695 696 697 698 699 700 701 702 703 704 705 706 707 708 709 710 711 712 713 714 715 716 717 718 719 720 721 722 723 724 725 726 727 728 729 730 731 732 733 734 735 736 737 738 739 740 741 742 743 744 745 746 747 748 749 750 751 752 753 754 755 756 757 758 759 760 761 762 763 764 765 766 767 768 769 770 771 772 773 774 775 776 777 778 779 780 781 782 783 784 785 786 787 788 789 790 791 792 793 794 795 796 797 798 799 800 801 802 803 804 805 806 807 808 809 810 811 812 813 814 815 816 817 818 819 820 821 822 823 824 825 826 827 828 829 830 831 832 833 834 835 836 837 838 839 840 841 842 843 844 845 846 847 848 849 850 851 852 853 854 855 856 857 858 859 860 861 862 863 864 865 866 867 868 869 870 871 872 873 874 875 876 877 878 879 880 881 882 883 884 885 886 887 888 889 890 891 892 893 894 895 896 897 898 899 900 901 902 903 904 905 906 907 908 909 910 911 912 913 914 915 916 917 918 919 920 921 922 923 924 925 926 927 928 929 930 931 932 933 934 935 936 937 938 939 940 941 942 943 944 945 946 947 948 949 950 951 952 953 954 955 956 957 958 959 960 961 962 963 964 965 966 967 968 969 970 971 972 973 974 975 976 977 978 979 980 981 982 983 984 985 986 987 988 989 990 991 992 993 994 995 996 997 998 999 1000

*) Fleur. Tom. 12, Lib. 50, §. 11, 12, 18.

Num contra, ac tota retro antiquitas docuit, intolerabile papalis arrogantiae jugum (vestra scilicet opinione) subito sibi, quin verbo contradiceret, imponi passus est totus Oriens? Num nativa sua, & essentialia jura tam turpiter pro nihilo vendiderunt omnes illi Episcopi, Archiepiscopi, Patriarchæ, & favente quidem sibi contra Papam Imperatore? Quid, quod ipse adeo Photius a Sede romana jam damnatus, eamque propterea contumeliis proscindens, hanc tamen jurisdictionis supremæ potestatem, cui hactenus se ipsum submiserat, impugnare non est ausus!

§. 16.

Mortuo Michaele Imperatore ejusdem Successor Basilius primam suam in eo posuit curam, ut detruso Photio legitimum Pastorem Ecclesiæ Constantinopolitanæ restitueret, quo facto mox ad romanum Pontificem epistolam misit, in qua ea, quæ fecerat, narrans ita pergit: „Jam Vestrum est ea, quæ fecimus, rata habere, & reliqua componere: nimirum *decernendum* vobis est, quid de illis faciendum, qui cum Photio communicarunt. — Quia vero omnes ferme Episcopi, & Presbyteri nostri hanc culpam admiserunt, rogamus, ut super eos vestra misericordiæ viscera commoveri sinatis.“ S. Ignatius quoque in suæ ad Papam epistolæ exordio mox Primatum sanctæ Sedis, ejusque auctoritatem, quam ad sananda totius Ecclesiæ vulnera accepit, sincere profiteretur. His epistolis Hadriano II Papæ redditus Græcorum Legati multiplices gratias Ecclesiæ romanæ referebant propterea, quod a schismate ipsos liberasset; dein Imperatoris, & Patriarchæ nomine librum de Constantinopolitano Conciliabulo Papæ examinandum offerunt petentes, ut quid de illo sentiendum esset, *tamquam summum Ecclesiæ Caput* declararet. Pontifex Concilio Romæ habito Photium cum actis sui Conciliabuli anathemate feriit, ita sententiam concludens: „Quicumque, si ad ejus notitiam hæc sanctio apostolica pervenerit, exemplaria illius Conciliabuli penes se retinuerit, ea non indicaverit, vel igni tradiderit, excommunicetur, vel si Clericus est, deponatur. Quæ non solum de Constantinopolitanis, sed etiam Alexandrinis, Antiochenis, Hierosolymitanis, atque de omnibus omnino Fidelibus decernimus.“ Interim Pontificis Legati Constantinopolin advenientes Imperatori Basilio amabiles exhibuerunt litteras, in quibus Papa petiit, ut in Concilio apud Orientales celebrando omnes subscribant decretis romani Concilii adversus illa Photii decreta celebrati. Imperator Legatis honorifice exceptis inter

alia

alia respondit: „Ab annis duobus cum Patriarchis Orientis, Metropolitibus, & Episcopis Ecclesiæ romanæ, *Matris nostræ*, iudicium expectamus“ *). Ita ab orientalibus quoque Ecclesiis, ab ipsa Hierosolymitana, in qua primum nata est christiana Religio, tamquam universalis tamen omnium Mater agnita est romana Ecclesia. Igitur per prima octo secula usque ad tristissimam græci schismatis epocham ex monumentis præcipue orientalibus ostendi, quantum in totius Ecclesiæ regimine pontificia semper autoritas valuerit; restat, ut breviter adhuc ex Conciliis, iisque generalibus demonstrem, quantam & hæc subjectionis, ac obedientiæ erga Papam necessitatem agnoverint.

§. 17.

Atque de Nicæno primo universali incipiam: Can. 6 profitetur, prout expresse Patres Chalcedonenses Aët. 16 declararunt, *Ecclesiam romanam habuisse semper Primatum*. Non hic intelligendum esse inertem, aut vani dumtaxat honoris absque iurisdictione Primatum, res per se ipsam manifesta est, neque enim Alexandrino, aut Antiocheno Patriarchis suis inter suos Primatus sine iurisdictione adjudicabatur. Huc forsitan adhuc spectat sequens Canon 39, qui ita latine legitur: „Ille, qui tenet Sedem Romæ, est primus sicut Petrus, cui data est potestas in omnes Principes christianos, & omnes populos eorum, ut qui sit Vicarius Christi Domini nostri super cunctos populos, & universam Ecclesiam christianam, & quicumque contradixerit, a Synodo excommunicetur.“ Hujus autem Concilii plus, quam 20 Canones fuisse confectos, seu, si ita loqui præplacet, *statuta*, præter Franciscum Turrianum insigniter eruditum, etsi vulgo nostri ævi contemptum, fortiter probat doctiss. Cardinalis d'Aguirre **). Præterea Nicæni Patres acta Concilii ad Sylvestrum Papam transmiserunt, ejus assensu confirmanda, & roboranda, uti constat ex Felicis III epistola IV: „Eam vocem sequentes (Tu es Petrus, & super hanc Petram) trecenti decem, & octo SS. Patres apud Nicæam congregati confirmationem rerum, atque autoritatem sacræ romanæ Ecclesiæ detulerunt.“ Aliunde pontificiam in omnes Ecclesias autoritatem tunc fuisse agnitam Sardicense Concilium a. 347 testatur ***): „Hoc enim optimum, & congruentissimum esse videbitur, si ad Caput, id est, ad Petri Apostoli Sedem de

B b 3

„fin-

*) Ibid. Lib. 51, §. 18, 26.

**) Epist. ad Jul. I.

**) Conc. Hisp. T. 1, Dissert. 8.

„singulis quibusque Provinciis Domini referant Sacerdotes.“ En Caput totius Ecclesiæ; utique non iners, sed viribus præditum, id est, S. Petri Sedem, cui ligandi, solvendi, pascendi universalis jurisdictio divinitus concessa est.

§. 18.

Sat notum eruditis omnibus est, Constantinopolitanam I Synodum ad œcumenicam auctoritatem nonnisi occidentalis Ecclesiæ, maxime autem romani Pontificis consensu pervenisse. Plura in hoc Concilio memoratu digna sunt, quæ monarchicum Papæ in tota Ecclesia Imperium attestantur. 1^{mo} Antequam ad Synodum Patres convenirent, unacum Imperatore Theodosio ad Damasum legationem decernunt, ut quid ille sentiret, explorarent, & fideliter sequerentur. 2^{do} Macedonium damnantes non suis utuntur verbis, sed missis a Damaso anathematismis. 3^{io} Cum rumor spargeret, Patres ultra debitos terminos fuisse progressos, Pontifex acta Synodi ad examen vocavit, eaque confirmavit, quæ Orientales ad normam fidei decrevere, Canones autem contra statuta Patrum editos rejecit. 4^{to} Papa ad Concilium œcumenicum Orientales Romam vocat, eumque in finem ad Imperatorem litteras scribit. Nec Imperator, nec Episcopi contra Papam reclamant, quasi indebita sibi jura arrogantem, sed humilem per Legatos synodicam mittunt, qua promptam obediendi voluntatem, sed & gravissimas, quæ impediuntur, causas significant. 5^{to} Damasus in Rescripto sua jura magnifice sustinet, *filios* appellando, non tantum *fratres* Orientis Episcopos in universali apud ipsos Concilio congregatos, quos propterea laudat, quod *debitam Sedi apostolicæ reverentiam* tribuerint. Insuper Timotheum Apollinaris discipulum, quem orientales Episcopi a Papa deponi petierunt, jam ab apostolica Sede depositum declarat. Ergo quarto jam seculo ne orientales quidem Episcopos deponendi potestatem habuerunt, quin pontificia auctoritas intercederet *).

§. 19.

In Concilio Ephesino I a. 431 habito suprema Pontificis potestas, seu Monarchia mirifice eminebat. Cælestinus enim Papa in causa Nestorii legem, & decreta toti Concilio præscripsit, Legatis suis mandavit, ut si Episcopi diversa sentirent, ipsi eos sententia sua ad unitatem redige-

*) Rom. Pontif. summa Auctoritas Lib. 1, Cap. 3.

digerent: *Ad disceptationem si fuerit deventum, vos de eorum sententiis iudicare debetis, non subire certamen.* Ipsi Ephesini Patres adversus Nestorium non se proferre, sed exequi iudicium passi sunt: *Coacti per S. Canones, & litteras sanctissimi Patris, romani Episcopi, Caelestini lacrimis suffusi, & pene inviti ad lugubrem banc sententiam urgemur* *).

§. 20.

Splendidiora adhuc testimonia pontificiae auctoritatis ex Actis Concilii Chalcedonensis elucet. Ante omnia Pseudo-Concilium Ephesinum II solus Leo Papa sua auctoritate contrivit teste Gelasio I **): „S. Memoriae Flavianum Pontificum congregatione damnatum ***) pari tenore, quoniam sola Sedes apostolica non consensit, absolvit, potiusque, qui illic receptus fuerat, Dioscorum secundae Sedis Praesulem sua auctoritate damnavit, & impiam Synodum non consentiendo submovit, ac pro veritate, ut Synodus Chalcedonensis fieret, sola decrevit.“ Posthac in ipsa Synodo Chalcedonensi Patribus congregatis epistola S. Leonis ad ipsos scripta, quin vel unus contradiceret, fuit praelecta, in qua Pontifex expresse disputari prohibet de fide jam a se exposita, inquit: „Unde Fratres charissimi! rejecta penitus audacia disputandi contra fidem divinitus inspiratam vana errantium infidelitas, conquietetur, nec liceat defendi, quod non licet credi: cum secundum evangelicas auctoritates, secundum propheticas voces, & apostolicam doctrinam plenissime, & lucidissime per litteras, quas ad B. Memoriae Flavianum Episcopum misimus, fuerit declaratum, quae sit de Sacramento Incarnationis D. N. J. C. pia, & sincera confessio“ ****). Actione prima Concilii dum Paschasius Papae Legatus Dioscorum Alexandriae Antistitem inter iudices sedere vidit, assurgens ait: „Beatissimi, atque apostolici Viri Papae urbis Romae, quae est Caput omnium Ecclesiarum, praecipua habemus praemanibus, quibus praecipere dignatus est ejus Apostolatus, ut Dioscorus Alexandrinorum Episcopus non sedeat in Concilio, sed audiendus intromittatur. Hoc nos observare necessarium est, eum dare rationem, quia Synodum ausus est facere sine auctoritate

*) Ibid. Cap. 4. **) Epist. 13.

**) Quanta Ecclesiae strages, si Concilium supra, & contra Pontificem esse posset!!

****) Falsum est a Patribus Chalcedonensibus regulam fidei a Leone datam fuisse ad examen vocatam, quasi de veritate doctrinae adhuc dubitarent: jam antea enim eundem subscripserant.

„ritate Sedis apostolicæ, quod numquam licuit, numquam factum est.“
 Iussioni Leonis obtemperatum est, Dioscorus in medio stare, & iudicium subire iussus. Secus de Theodoro Cyri Episcopo actum, qui in Concilio admissus est ea sola ratione, quia S. Leo ei Episcopatum restituit, prout Acta testantur. Inter accusationes contra Eutychetem prolatas ea quoque fuit, quod S. Leonis epistolam respuerit: „Et posthæc omnia insuper & contra ipsum, cui vineæ custodia a Salvatore commissa est, ostendit insaniam, id est, contra tuam Sanctitatem — epistolam quidem tuæ respuens Sanctitatis.“ Actione 16^a rogant Patres Synodum a Leone confirmari, in specie quoad prærogativam Constantinopolitano Episcopo Can. 28 concessam: „Rogamus & tuis decretis nostrum honora iudicium, & sicut nos Capiti in bonis adjecimus consonantiam, sic & Summitas tua filiis, quod decet, adimpleat.“ Ita Præsules tantum se Leonis filios nominant suam indicantes submissionem, & profitentur ad complementum sui in Concilio iudicii decere summæ Sedis confirmativum decretum: immo cum Papæ confirmatio retinente Anatholio Constantinopolitano, qui suæ ambitionis repulsam tulerat, diutius non comparuisset, Patrum precibus exoratus Imperator Marcianus ad Leonem P. scripsit, anxietatem Fidelium exponens, ne ipsius Eutychianæ hæresis damnatio ambigua videretur. Tantum autoritatis tunc pontificiæ litteræ habebant, quæ in publicis Ecclesiis prælegebantur, ut in omnium Fidelium notitiam venirent. Demum 28 Canonem, etsi totius Synodi consensu roboratum, Pontifex irritum pronunciavit, nec ullis duorum Imperatorum, & Imperatricis precibus, ut consentiret, inflecti se passus est, rescribens: „Satis sit Anatholio, quod Vestra pietatis auxilio, & mei favoris assensu Episcopatum tantæ urbis (Constantinopolitanæ) obtinuit.“ Item: „Consensiones Episcoporum SS. Canonum apud Nicæam conditorum regulis repugnantes — in irritum mittimus, & per Auctoritatem B. Petri Apostoli generali prorsus definitione cassamus“ *). Tantumne Leo M. potuisset, nisi universali setiam Concilio Superior fuisset?

§. 21.

Propter famosam trium Capitulorum causam a. 1553 celebrata fuit Synodus Constantinopolitana II. Cum orientales Episcopi fati perpectum haberent, fieri non posse œcumenicum Concilium, nisi Rom. Pon-

*) Lib. sup. cit. C. 5.

Pontifex vel per se, vel per Legatos præsideret; omnem moverunt lapidem, ut Vigilium P. ad præsidentiam permoverent. Quamobrem per solemnem legationem trium Patriarcharum cum sexdecim Metropolitanis eum tunc in urbe præsentem invitarunt. At plura non poterant omni suo nisu impetrare, quam ut Pontifex promitteret, postero die se manifestaturum, quid sibi de hoc conventu placuerit. Animadversione hic plane dignum est, Orientales non eo progressos, ut Vigilio citationem intimarent, quemadmodum Basileenses ausi sunt erga Eugenium IV; sed illi in Concilio licet congregati, tanta cum reverentia de summo Pontifice locuti sunt, ut ipse Fleurius in sermonem Patrum orientalium suam fecerit annotationem, quam magna tunc de pontificia autoritate persuasio fuerit *). Inter Sess. 6^{am}, & 7^{am} Vigilus celebre suum *Constitutum* fecit publicari, in quo pro fundamento futuri iudicii statuit definitiones SS. Patrum, quatuor primorum Conciliorum generalium, & romanorum Pontificum: pariter legem Patribus dedit, ne circa tria Capitula quidquam proferant, ante sententiæ suæ promulgationem: „Antiquum, & regularem custodientes ordinem, ne ante „nostræ, hoc est, Sedis apostolicæ, cui per Dei gratiam præsidemus, „promulgationem sententiæ quidquam proferre tentarent.“ Constitutum porro his claudit verbis: „Statuimus, & decernimus, nulli ad ordines, & dignitates ecclesiasticas pertinenti licere quidquam contrarium his, quæ præsenti asseruimus, & statuimus Constituto, de sæpe „dictis tribus Capitulis aut conscribere, vel proferre, aut componere, „vel docere, aut aliquam post præsentem definitionem movere ulterius questionem.“ Denique Act. 8 a Concilio trium Capitulum damnatio pronunciata fuit ad normam pontificii constituti: „Servemus, ajunt Patres, unitatem ad apostolicam sacrosanctæ Ecclesiæ Sedem antiquioris „Romæ, omnia secundum tenorem lectarum apicum peragentes.“ Concilii Acta Vigilus sua autoritate confirmavit, ut patet ex epistola ad Eutychium CP., quam Petrus de Marca primus evulgavit, uti eam accipit ab antiquo volumine in Bibliotheca regia asservato, pro qua adoranda idem etiam Dissertationem lucubravit sub hoc titulo: *De decreto P. Vigili pro confirmatione Synodi V.* Quamvis Joan. Garnerius in *Notis ad Breviarium* Liberati suspectam facere hanc epistolam voluerit; rationes tamen exigui adeo momenti adduxit, ut facile illas Natalis Alexander dilueret **).

§. 22.

*) Hist. eccles. L. 33, §. 50.

**) Lib. sup. cit. C. 6.

§. 22.

Dum generale Concilium Constantinopolitanum III contra Mo-
nothelitas meditabatur Constantinus Augustus, cognomine Pogonatus;
hac super re antea romanum Pontificem consuluit a. 678 epistola eidem
inscripta: *Sanctissimo, & beatissimo Archiepiscopo antiquæ nostræ Romæ, & univer-*
sali Papæ. S. Agatho tunc Pontifex Synodo Romæ indicta duas ad Orien-
tales epistolas, quas *Suggestiones* vocant, rescripsit, in quarum prima
Augustis inscripta, postquam Sedis apostolicæ doctrinam de divina Tri-
nitate, ceu fidei regulam proposuit, ita pergit: „Porrigere dignemini
„clementissimam dexteram apostolicæ doctrinæ, quam Cooperator pio-
„rum laborum vestrorum B. Petrus Apostolus tradidit — quia ejus con-
„fessio a Patre de cælis est revelata, qui & spirituales oves Ecclesiæ
„ab ipso Redemptore omnium terna commendatione pascendas suscepit,
„cujus adnitente præsidio hæc apostolica ejus Ecclesia numquam avia
„veritatis in qualibet erroris parte deflexa est, cujus autoritatem, ut
„pote Apostolorum omnium Principis semper omnis catholica Christi
„Ecclesia, & universales Synodi fideliter amplectentes in cunctis secu-
„læ sunt“ *). In altera vero ad Synodum epistola Pontifex per suos Lega-
tos Patribus fidei regulam præscribit, inquit: „Personas de nostræ hu-
„militatis ordine prævidimus dirigere ad Vestræ fortitudinis vestigia, quæ
„omnium nostrorum suggestionem, in qua & apostolicæ fidei nostræ con-
„fessionem prælibavimus, offerre debeant, non tamen tamquam de incer-
„tis contendere, sed ut certa, atque immutabilia compendiosa definitione profer-
„re, simpliciter obsecrantes, ut hæc eadem omnibus prædicari, atque
„apud omnes obtinere jubeatis. — Qui vero hæc confiteri noluerint,
„ut infestos catholicæ, atque apostolicæ confessioni perpetuæ con-
„demnationis reos esse censemus: nec aliquando tales in nostræ humi-
„lilitatis collegio, nisi correctos suscipere patimur.“ Si Concilio visum
fuisset, Papam a Christi institutione aberrare, & injustam sibi, quam
non haberet, arrogare potestatem; debuisset sane vi officii, & assisten-
te sibi sancto Spiritu arrogantæ Agathonis sub falsa pietatis specie de-
cipien-

*) Forte Honorium quis in exemplum erroris hoc loco velit adducere; sed mis-
sis iis, quæ in obscurissima hac quæstione adhuc dubia sunt, de quibus legi
meretur inter Bollandistas doctiss. Stillingius, brevissime respondeo Honorium
ad particulares quosdam Episcopos suam dedisse responsum, ceu æconomiz
prudentis, ut putabat, regulam, nequaquam vero Ecclesiæ suæ publicam, &
universaliter tenendam fidei professionem voluisse definire.

cupientis resistere, ne demandato sibi a Deo munere ad maximum Fide-
lijum damnum, & ecclesiastici regiminis everisionem abuteretur. Tan-
tum vero abest, ut orientales Præsules adversus sanctum Pontificem se-
se opposuerint, ut potius omni cum reverentia ejus jussa impleverint.
Hac enim Papæ epistola Aët. 4 prælecta omnes in eam consenserunt, &
ut ipsi Aët. 18 fatebantur, pontificias suggestiones fideliter susceperunt,
expansisque manibus amplexi sunt, sibi acclamantes: *Petrum per Aga-
thonem fuisse locutum*. Itane ergo jam Petrus tantum habuerit authorita-
tis, quæ universali Concilio superior fuerit? Hoc orientalium Patrum
septimo seculo judicium nostrorum confundit Febronianorum calu-
niam, ad tantam authoritatem post octo primum secula malis artibus
Pontifices sese elevasse *).

§. 23.

Furentibus in Oriente Iconomachis a. 787 Orientalium vota pro
œcumenico Concilio Augusti Constantinus, ejusque mater Irene ad Rom.
Pontificem Hadrianum I transmiserunt, qui in Concilium Nicænum II
consentiens, rem tamen ipsam antea deciderat, Augustis imperans, ut si
velint Ecclesiæ ulnis recipi, prius religiosum imaginum cultum restituant:
insuper Pseudo-Synodum contra S. Imagines celebratam anathemate
damnat, idemque ad Tarasium Patriarcham CP. perscribit cum deposi-
tionis comminatione, nisi & suum studium ad imaginum restitutionem
fideliter conferat. His Papæ litteris in Concilio Aët. 1 prælectis sine ul-
lo earum examine Patres professi sunt, per ipsas se cognovisse, qualis
sit Ecclesiæ catholicæ sensus. Patriarcha CP. Tarasius nomine totius
Concilii ad Papam rescripsit: „Cum perlatae primitus Vestrae fraternæ
„Sanctitatis litteræ legerentur, præstolabantur omnes spiritualibus edu-
„liis, tamquam in regalibus cœnis fruentes, quæ Christus per litteras
„tuas epulantibus præparabat.“ Ita Christus per os Petri, ejusque Suc-
cessorum loqui antiquitus ab universali Ecclesia credebatur. Quæ res
tam clara est, ut Natalis Alexander in historia sua Seculi 8^{vi} negare
non potuerit, litteras Rom. Pontificum directrices fuisse œcumenica-
rum Synodorum, & hinc publice in illis prælegi debuisse **).

*) Ibid. C. 7.

**) Ibid. C. 8.

§. 24.

Recurrit denique Concilium generale CP. IV, quod supremæ in Papa potestatis ab ipsis Orientalibus agnitæ documentum est omni exceptione majus. Hadrianus II. per suos Legatos regulam præscripsit ab omnibus, quæ Synodo interesse liceret, antea subscribendam. Aët. I præfecta fuit hæc subscriptionis formula, & ab universali Synodo approbata: in hac varia leguntur nostra animadversione dignissima; ex quædam excerpta: „Prætermitti non potest sententia Jesu Christi dicentis: *Tu es Petrus, & super hanc petram ædificabo Ecclesiam meam.* Quod effectus probavit, quia in Sede apostolica semper catholica Religio est, immaculate conservata. Ab hujus ergo Sedis fide, atque doctrina separari minime cupientes, & Patrum, præcipue sanctæ Sedis apostolicæ, Præsulum constitutiones in omnibus sequentes anathematizamus omnes hæreses simul cum Iconomachis. Anathematizamus etiam Photium sanctæ Sedis Constantinopolitanæ usurpatorem, usque dum se sacræ Sedis judicio subiciat: & conciliabulum suum anathematizet. — Tota mente amplectimur, quæ sacra Sedes de Patriarcha nostro Ignatio decrevit, ut in communione illius Sedis esse mereamur, in qua est integrum, & veræ Religionis fundamentum. Illorum nomina, qui ab ea sunt separati, inter sacra mysteria non recitabimus. Hanc professionem ego N. Episcopus manu propria scripsi, & tibi Hadriano summo Pontifici, & Papæ universali per Legatos tuos obtuli.“ Ipse Natalis Alexander hoc loco ita commotus est, ut quasi admirans exclamarit: *Magnificum Primatus romani Pontificis argumentum!* Sed quam mirabilis, doctum tunc Virum attendere noluisse, in quo primatus se ostenderit, in eo scilicet, quod *universa Synodo superiorem Papa se gesserit, Orientis Episcopis approbantibus.* Aët. 7 tres recitatæ sunt allocutiones Hadriani ad Concilium: in tertia vehementius in Photium invehitur, qui ausus est, contra Nicolaum Pontificem judicium proferre: „Quis umquam Vestrum, ait ad Patres, tale quid, precor, audivit, vel quis hujusmodi temeritatis immensitatem legitur invenisse? siquidem romanum Pontificem de omnibus Ecclesiarum Præsulibus judicasse legimus, de eo vero quemquam judicasse non legimus.“ Tum respondit Concilium hanc Photii temeritatem extrema damnatione dignam esse: „Quomodo temeratores isti non sunt facti super Magistrum, quando adversus apostolicam Sedem, quæ ceterarum quoque Sedium magistra est, etiam os injurias vomens aperuisse probantur? — Nemo umquam apostolico culmini, de cujus judicio non licet retractari, manus ob.“

„obvias audacter intulit, nemo in hoc rebellis extitit, nisi qui de se „voluit judicari.“ Summe memoranda hæc pro nostris temporibus veteris Ecclesiæ, & orientalis quidem sententia! Demum in Encyclica ad omnes fideles directa Patres Constantinopolitani aperte supremam Papæ supra totum Concilium potestatem fatentur, Photium a se depositum, & a tota Ecclesia alienatum dicentes *per datam sibi potestatem in Spiritu sancto a primo, & magno Pontifice Hadriano **).

§. 25.

Præter universalia hæc, & quidem Orientis Concilia Coronidis loco domesticum, si ita loqui licet, originalis in Germania disciplinæ monumentum adhuc producam ex Synodo ab Apostolo Germaniæ a. 742 habita, de qua ipse Bonifacius Epist. ad Cudwertum Dorovernensem Episcopum ita testatur **): „Decrevimus in nostro synodali „conventu, & confessi sumus fidem catholicam, & unitatem, & subjectionem romanæ Ecclesiæ, sinetenus vitæ nostræ velle servare S. Petro, „& Vicario ejus velle subjici, Synodum per annos singulos congregare ***), Metropolitanos pallia ab illa Sede quærere, & per omnia „præcepta Petri canonice sequi desiderare, ut inter oves sibi commendatas „numeremur. Et isti confessioni universi consensimus, & subscripsimus, & ad corpus S. Petri Principis Apostolorum direximus, quod gratulando Clerus, & Pontifex romanus suscepit.“ Sane ipsi Episcopi oves sunt ad ovile Petri pertinentes; ab illo igitur pascendi, regendique, hoc est, pastorali ejusdem regimini subiecti. En tibi, veritatis amans Lector! per integra octo prima Ecclesiæ Secula, ex orientalibus præcipue Conciliis testimonia quam certissima, clarissimaque pontificiæ semper agnitæ, ejusdemque supremæ jurisdictionis, ut manibus jam, si velis, nostrorum Febronianorum falsitatem palpare possis, prætextentium, posteriori primum ignorantie ævo malis artibus pontificiam potestatem accrevisse.

C c 3

§. 26.

*) Ibid. C. 9. **) Inter Bonifacianas 105.

***) Illo igitur Seculo, germanicæ Ecclesiæ initio, ubi pura adhuc disciplina viguit, sub S. Bonifacio, Synodorum celebrationis impedimentum Episcopis Germaniæ non videbatur subiectio erga apostolicam Sedem, vel ejusdem Legati præsentia; Imo quod semper maxime ab Episcopis catholicis æstimabatur, erat communio cum supremo suo Capite, & omnium Pastore. Suspecta res est, dum Episcopi Papam consiliorum suorum consilium fieri reformidant.

§. 26.

Universalia Concilia & ore, & ipso opere profitebantur, se Pontifici maximo subjectionem, & obedientiam debere. Taceant jam nostri absurdi cavillatores Pontificis decreta noviter a se conficto cuidam episcopali *Placeto* subjicientes. Demonstratum est enim, immo & definitum fidei catholicae dogma, quod salva salute negari non potest, ab omnibus fidelibus, ergo & quolibet Episcopo, aut Archiepiscopo, totius Ecclesiae Capiti, & Christi Vicario obedientiam esse praestandam *). Non propterea inferiori Pastori, qualis Episcopus est, facultas denegatur, cum debita erga Superiorem reverentia eundem commonefaciendi suspensio interim obedientiae exercitio, si quod forsitan in specie decretum emanaverit particulari cuidam loco vix applicabile. Haec, inquam, facultas subordinationi haud officit, eademque in Parocho est episcopalis decreti executionem simili ex causa interim suspendente. Nisi ad invidiam dicta forent, quae Febronius ait de Episcopis **), quomodo erga legem pontificiam habere se debeant; eadem possent aequali jure asseri de Parochis respectu decreti episcopalis: „Pertinere scilicet ad Episcopos diocesani superiorem Pastorum, ut leges, quas necessitas, vel utilitas Ecclesiae hic, & nunc postulare videbatur, universali Diocesi proponat: has propter intrinsecam earum aequitatem Parochi tenebuntur acceptare, quando eas judicabunt aptas ad promovendum bonum Religionis, & disciplinae ecclesiasticae, & postquam statui publico regni (seu politico juri sui Principis) nullum dignoscantur asserre praedictum.“ Quam delicata haec res sit, ne forsitan in hujusmodi casu Parochus reverentiam violet suo Superiori debitam, optime id a Curialistis archi- aut episcopalibus didiceris.

§. 27.

Perabsurda porro est, etsi in scholis jam pervulgata opinio, pontificia lege subditos non ligari, nisi ab Episcopo loci acceptata sit, & promulgata. Bonam fidem, aut ignorantiam subditi in hoc casu sufficere, ad excusandam praevagationem facile admitto: haec duo siquidem quemcunque Diocesanus excusare possunt, si contra episcopale decretum egerit a suo Parocho, & Pastore ordinario nondum promulgatum. Quis autem serio dicat a *Placeto* Parochi legem episcopalem subditos obli-

*) Conc. Florent. in Definit. fidei. Item Trident. Sess. 25 de Reform. C. 2.

**) De Stat. Eccles. C. 5, §. 2, n. 4.

obligandi vim nancisci? Hanc quæstionem erga Curialistas Archi- aut Episcoporum instituo, & ut istorum majus jus contra pontificiam legem mihi ostendatur, jure meo postulo. Dum Clemens XII se offensum ostenderet, eoquod in Conventu Cleri gallicani aliqui dixissent, Bullam *vineam Domini* non obligare ante acceptationem Corporis Episcoporum, eamque ex parte illorum fieri *per viam judicii*; Præsules gallicani a. 1711 data ad Papam epistola declararunt, se non intelligere acceptationem, quæ sit *solemnis*, neque ut Conventus Episcoporum velut *judex* Bullam examinaret, sed ut conformitatem suæ doctrinæ cum apostolica significarent. Non igitur per modum *judicialis approbationis*, sed *pro conformitate instructionis* Episcopis licet apostolica discutere decreta. Haud equidem me latet contrariæ opinionis recentissimum, sed & falsissimum fundamentum, scilicet Papam non *ordinaria*, sed *immediata* gaudere in Diæcesanos jurisdictione, sicut tamen Episcopus gaudet in Parochianos. Verum, qua mihi ratione ordinariam Episcopi in quamlibet Parochiam potius, quam Papæ in diæcesin evinces potestatem? Sane Parochus eodem jure se *Ordinarium* Parochiæ dicet, quo Episcopus dicitur *Ordinarius* diæcesis: uterque jure divino est, aut uterque humano; etsi hic illo superior. At Episcopo quoque superior Papa est, simulque *Ordinarius* uterque. Omnes enim fideles obedientia erga Papam ligantur, ut ipsa fidei catholicæ professio, omnibus sane communis, continet: *Romano Pontifici, B. Petri, Apostolorum Principis Successori, & Jesu Christi Vicario veram obedientiam spondeo, ac juro*. Nonne *Ordinarius* *) mihi Superior est, qui vices Christi erga me gerit, qui S. Petro succedit, cui omnes, & singulæ oves ad pascendum *immediate* traditæ fuerunt, cui potestas data in universa terra quidquid ligandi, solvendive, qui ex œcumenico Concilio Lateranensis IV definitione *ordinariæ* potestatis in tota Ecclesia primatum habet, cui veram spondere, & jurare debui obedientiam? An militi, qui sub centurione stat, nihil *immediatæ* imperare potest generalis Dux exercitus? Quid est, quod dilucularii nostri rem cuilibet proletario notam in sola Ecclesia, quæ est velut acies bene ordinata, non videant? Si quis Episcopus ordinariam in sua diæcesi potestatem abneget; forte Parochus eandem in sua Parochia Episcopo negabit: & mundus judicet, quis causam suam ex ipsa ratione, ex rei æquitate, ex primæva institutione, ex factis historicis, iisque publicis, & prag-

*) Hic intelligitur *Ordinarius* jure, non exercitio Pastoralis, secus enim certissime Episcopi non tam forent Parochianorum *Ordinarii*, quam Parochi.

pragmaticis, ex Patrum testimoniis, ex divinæ Scripturæ oraculis fortius sit defensus. Hac super re legi meretur libellus vernaculus auctororis, quod scitur, Ratisbonensis, dignitate, & eruditione insignis *).

§. 28.

Sed quod præcipue offendit Punctatores Emfanos, est formula obedientiæ, & fidelitatis, quam singuli Germaniæ Episcopi in sua consecratione Pontifici jurare debent. Hosce igitur ad ipsam originem hujusmodi juramentorum reducam oportet. Inde enim a Seculo V, ut doctiss. Thomassinus docet **), juratam fidem Archi- & Episcopi exegerunt, illi quidem a suis Suffraganeis, isti vero ab inferioribus Clericis. Neque id frustra: etsi enim alias jam essent ad obedientiam obstricti; expressius tamen obligatio inculcabatur, quo constantius observaretur, ut Concilium Toletanum XI de a. 676 loquitur: *Solet plus timeri, quod singulariter pollicetur, quam quod generali innoxione concluditur.* Seculo VIII S. Bonifacius Germaniæ Apostolus, & Episcopi secum in Concilio congregati primum solemne obedientiæ juramentum ***) & sponte quidem sua romano Pontifici Gregorio II præstiterunt: rebus enim ecclesiasticis per Galliam misere collapsis intellexerant ad Ecclesiæ bonum nihil esse utilius, nihil efficacius, quam ærctissimam cum supremo Capite connexionem. Sed hodie maximus lapis offensionis esse dicitur formula juramenti, qua non amplius *canonica* solum obedientia, sed & fidelitas ei similis, quam *Vasalli* suis dominis præstare debent, ab Episcopis Papæ juranda est. Nolim ego justissimas, sed & odiosissimas causas, haud quaquam Episcopis gloriosas, singillatim hic exponere, quare S. Gregorius VII ab Aquilejensi Patriarcha, & postea illius Successores a Germaniæ Episcopis hoc juramentum exegerint. Id generatim nostros Archi- & Episcopos oportet meminisse, molestam sibi hodiernam jurandi formulam inde ex quorundam Antecessorum suorum defectibus ab apostolico culmine profluxisse. An nostris diebus adhuc necessaria videatur tam stricta, & explicita Episcoporum promissio suæ erga apostolicam Sedem fidelitatis, & dependentiæ, id ego non definiam, sed Publici judicio relinquam, hoc unice cum laudato Thomassino admonens: *Satius est remediis minus necessariis uti, quam iis abstinendo in eas revolvī calamitates, quibus rursus summo perire necessaria sint.* §. 29.

*) L. Weismann's neue Bemerkungen über das Resultat des Emserkongresses 1788.

**) Vetus, & nova Ecclesiæ disciplina Tom. 2, Lib. 2, Cap. 44, 45, 46.

***) *Canonica* hæc vocabatur obedientia, quippe ex antiquis Canonibus Papæ debita.

§. 29.

Nonne autem injusta sunt, & servatu impossibilia, quæ nostri Episcopi imperii Principes Papæ juramento promittere tenentur? Non, injusta sunt, dico, sed plane justissima, ad quæ aliunde, etiam sine jurejurando Episcopi tenerentur. Nam quilibet christiani Principes, multo magis ecclesiastici jure divino sunt obligati ad potentiam suam contra sanctæ Religionis hostes juste adhibendam. Item temporalia quoque bona S. Matris suæ, romanæ Ecclesiæ, & quæ ad decorem spectant, & auctoritatem supremi fidelium Capitis non tantum Episcopi, verum etiam omnes Christiani pro suis viribus conservare, & defendere tenentur. Ea autem quam optime ab ipsis Imperii Principibus servari possunt, si dare parati sint Deo, quæ Dei, & Cæsari, quæ sunt Cæsaris. Rem hanc Barthelii, æstimatissimi apud nos Jurisconsulti propriis verbis declarabo, qui, ubi de Concordatis Germaniæ a Pontifice Nicolao V confirmatis tractavit, ita concludit *): „Hoc igitur efficaci sane „est argumento, nec Nicolaum, summum Pontificem alia juramenta ab „Episcopis Imperatori, & aliis præstanda subjectioni sibi ab iisdem debi- „tæ præjudicare credidisse, nec Status concordantes illud juramentum, „quod summo Pontifici in consecratione emittitur, cum Imperii detri- „mento junctum, aut imperatoriis juribus adversum existimasse. „Certe nec prudens quispiam, nisi vel aversione quadam in Sedem apo- „stolicam, vel partium studiis, aut Religionis, educationisve præjudi- „ciis nimium radicatis præoccupatus fuerit, ex indole, aut tenore ju- „ramenti ipsiusmet damni alicujus, aut Imperatori, aut Imperio perti- „mescendi umbram facile inveniet, dummodo duplicem, quam Episco- „pi Germaniæ gerunt, personam penitus consideraverit. Sic enim ju- „ramentum a Principibus ecclesiasticis, tamquam Episcopis summo Pon- „tifici tantum quoad ea, quæ ad veram utilitatem, & jura Ecclesiæ ve- „ra pertinent præstari; nequaquam vero ea, quæ cum Imperii detri- „mento, juncta sunt, aut ad illud propiorem respectum involvunt, „concernere haud difficulter intelliget. Nihil sane aliud disertus ejus- „dem tenor exigit, nisi ut secundum Christi monitum & Deo, & Pon- „tifici reddantur, quæ Dei sunt, atque Pontificis; & Cæsari, ac Impe- „rio, quæ sunt Cæsaris, ac Imperii: qua regula veram Imperii simul, „& Sacerdotii concordiam cum utriusque semper felicitate arctissime „conjunctam contineri certum est.“

CO-

*) De Concord. Germ. Dissert. 3, Cap. 3, §. 39.

COROLLARIUM II.

De jure causas majores ad se vocandi, seu reservandi.

§. I.

Ea est omnium Catholicorum æque, ac ipsorum adeo Febronianorum sententia, eum in finem a Christo universalis Ecclesiæ Primatum Petro fuisse commissum, ut unitas inter fideles omnes conservaretur, prout S. Hieronymus dixit *): *Unus eligitur, ut Capite constituto schismatis tolleretur occasio.* Idem jam antea Cyprianus in epistola ad Cornelium P. perscripsit: „Neque aliunde hæreses abortæ sunt, aut nata sunt „schismata, quam inde quod Sacerdoti Dei non obtemperetur, nec „unus in Ecclesia ad tempus Sacerdos, & ad tempus Juxda vice Christi cogitatur.“ Quin ipsi Apostolorum ævo proximus S. Irenæus præclarissimum dedit testimonium, ad romanam Ecclesiam, tanquam ad unitatis centrum omnes reliquas particulares debere convenire, & hujus traditione originaria quascunque noviter inventas hæreses confundi **): „Ecclesiæ ab Apostolis Romæ fundatæ traditionem indicantes confundi- „mus eos, qui quoquo modo vel per sui placentiam malam, vel vanam „gloriam, vel per cæcitatem, & malam scientiam, præterquam oportet, colligunt. Ad hanc enim Ecclesiam, propter potentiorum Principatatem necesse est omnem convenire Ecclesiam.“ Ita quam certissimum est omnium quivum curam soli Petro traditam fuisse, ut sub uno Pastore unum esset Christi ovile: *Pasce oves meas.* Ergo jus pontificii Primatus essentiale, & immediate in divina institutione fundatum vel ipsis adversariis haud dissentientibus est *omnium Ecclesiarum cura, & sollicitudo.* Hæc autem, quod sano capite nemo mortalium negaverit, eorum, quæ in Ecclesiis particularibus contingunt, cognitionem requirit, non otiosam solum, quæ inanis foret, sed efficacem, & jurisdictione præditam. Cum porro absentia cognosci per homines, nisi relatione non possint, sequitur, res, si quæ dignæ sunt, seu graviore ad Petri Vicarium necessario esse referendas. Atque hanc *referendi majores causas* necessitatem, quæ supremam unius jurisdictionem, seu Monarchiam, etsi Febronius id neget, indicat, primæva Ecclesia jam agnovit, fideliterque observavit. Ut more meo brevis sim, ex quatuor dumtaxat primis seculis exempla proferam.

§. 2.

*) Adv. Jovin. Lib. 1.

**) Lib. 3. C. 8.

§. 2.

In ipso adhuc nascentis Ecclesiæ exordio Corinthii ad S. Clemen-
tem Romanum epistolam scripsere, in qua discordiæ apud ipsos obortæ
caussa exposita, non consilium tantum, sed & auxilium implorabant.
Seculo II S. Polycarpus Romam contendit ad Papam Anicetum, ut cum
eo de celebrando die Paschatis conferret. Martyres Lugdunenses S. Ire-
næum ejusdem Ecclesiæ tunc Presbyterum ad Eleutherium P. ob quas-
dam Ecclesiæ quæstiones miserunt. Polycrates Ephesiorum Episcopus
Concilio a se ad mandatum Victoris P. indicto, eidem rescripsit, inten-
tata licet sibi excommunicatione, non tamen se posse obedire ex illa
Majorum regula: *Obedire oportet Deo magis, quam hominibus.* Tam ob-
stinate rem variabilis disciplinæ, hoc est, celebrandi Paschatis festivam
diem, tamquam divinum præceptum defendit, ut non vereretur totam
reliquam Ecclesiam præter Asianam prævaricationis arguere. Seculo III
damnatio Origenis a Demetrio Alexandria Episcopo facta ad Pontia-
num P. refertur, qui & in eandem consentit. Ipse Origenes teste Hier-
onymo *) epistolam ad Fabianum romanæ urbis tunc Episcopum scrip-
psit, in qua pœnitentiam egit, & causas temeritatis in quemdam Am-
brofium retulit, quod ille secreto edita in publicum protulerit. S. Cy-
prius in quæstione de lapsis eandem Sedem consuluit, quam tum
defuncto Fabiano Clerus romanus moderabatur. Ad Stephanum Papam
Dionysius Alexandrinus primam earum, quæ de Baptismo conscriptæ
sunt, epistolam exaravit, controversia scilicet sat celebri exorta, utrum
eos, qui ex qualibet hæresi converterentur, rebaptizari oporteret.
Africani quoque Episcopi ex duabus Provinciis Carthagine congregati
Stephano ea, quæ decreverant, litteris significarunt. Idem ille Diony-
sius Xistum II de Sabelianis hæreticis, qui tunc temporis incredebant,
certiorem reddidit, & ne forte hallucinaretur, sententiam expetiit **).

§. 3.

Seculo IV Constantinus Imperator Donatistarum causam ad se dela-
tam Melchiadis P. cognitioni Romam remisit. Posteriori anno 314 Arela-
tensis Concilii Patres ad Sylvestrum P. epistolam dederunt, ipsum rogantes,
ut decreta Concilii confirmaret, & toti Ecclesiæ servanda proponeret
juxta consuetudinem, qua romanus Episcopus litteras ad omnes dirigeret.

D d 2

Ad

*) Ad Panmach. & Ocean. Epist. 65. **) Apud Constant. Epist. Rom. Pontif.

Ad eundem Papam Alexander Episcopus Alexandrinus epistolam misit, qua significavit, undecim tam Presbyteros, quam Diaconos, quia Arian heresim sequerentur, a se Ecclesia fuisse ejectos. Ipso fatente Febronio *) persuasum habuit Sardicenis Synodus, romanæ Sedis Antistiti, *tamquam Ecclesiæ Capiti*, incumbere Ecclesiarum omnium sollicitudinem: hinc ad Julium P. scripsit, ad Caput, id est, ad Petri Sedem de singulis quibuscunque Provinciis esse referendum. Ex illis antiquitatis rudibus, temporum injuria plurimum deperditis, duæ adhuc aliæ ad eundem Papam epistolæ restant pontificiæ Authoritatis in causis majoribus insignia monumenta. Prima est Marcelli Ancyrani Episcopi epistola, qua coram Papa se purgat ab Arianis accusatum, quod tribunal non recusat, sed & necessarium sibi ait, Romam venire, causamque suam defendere: propterea Pontificem admonet, ut pro judicis officio suos quoque adversarios accersat. Qui etiam vocati cum non comparuissent; Marcellus tamen esse sibi necesse duxit fidei professione apud Papam se purgare, quem & rogavit, ut suis litteris, quas ad Episcopos mittere solet, eandem attexeret. Altera est Arianorum, Valentis, & Ursacii epistola, qua suas adversus Athanasium criminationes coram Pontifice revocant, ejusdemque bonitatem commendant, *qui pro insita sibi benevolentia errori suo veniam dare dignatus fuerit*. Tum apertius adhuc in causis Episcoporum Pontificis Authoritatem profitentur, *se non adfuturos citra ejusdem conscientiam, si aliquando ab Orientalibus malo animo fuerint ad causam vocati*. Ipse denique Julius in celebri ad Eusebianos epistola pontificiæ Authoritatis contemptum illis exprobrat *ad antiquam consuetudinem* provocans tum generatim in causis gravioribus, tum speciatim in illa Episcoporum: *An ignoratis hanc esse consuetudinem, ut primum nobis scribatur, & hinc, quod justum est, decernatur? **)*

§. 4.

Non satis consultum mihi videtur, illud quorundam Criticorum, etiam Constantio non excepto, effugium, singularem inde jam ab initio in Alexandrinam Ecclesiam fuisse Papæ Authoritatem: hinc Julium de Athanasio tantum conqueri, se inscio contra consuetudinem depositum. In Scyllam hi incidunt vitare Charibdin volentes. Si enim in primam totius Orientis Sedem pontificia Authoritas tantum valuit, cur minus in inferiores valeret? Quodsi jam ab initio tam specialis dependentia

*) De Stat. Eccles. C. 2, §. 6.

**) Apud Constant. Epist. Pontif.

dentia fuit Alexandrinæ Sedis a Romana; unde id, nisi a Petri Autoritate repetendum? nonne adversariis vel invitis fatendum, primum Orientis Patriarchatum, hoc est, Alexandrinum inde a S. Marco, ceu Petri Legato suam traxisse originem? nonne eodem jure, nisi & majore secundæ post Romanam Sedis, seu Antiochenæ prærogativa, & dignitas præ aliis Apostolicis a Petro, ceu fonte suo derivanda? nonne ergo vel ipsa duorum in Oriente Patriarcharum potestas, tamquam in suos Vicarios a Petro fuit profecta, sive *delegata*? nonne quæso, in Antiochenum, aliosque Orientis Episcopos idem jus habuerit Papa, quod in Alexandrinum? Sane idem habuit, & exercuit, prout facta testantur. Julius siquidem Eusebianos Antiochiæ in Concilio congregatos æque, ac Athanasium ante suum tribunal vocat: item non unice, tamquam contra antiquos canones factum Eusebianis exprobrat, quod Alexandrinum, sed quod hunc quidem ceu maximum, alios autem Episcopos quoque Sedium apostolicarum se inconsulto judicare præsumserint: „Si omnino, ut dicitis, aliqua *eorum* (non solius Athanasii) culpa fuit, judicium *secundum ecclesiasticum canonem*, nec eo pacto fieri oportuit. — „Episcopi enim erant, & non vulgares Ecclesiæ, quæ injusta patiebantur, sed quos ipsi Apostoli suamet opera ad fidem instruxerunt. Cur igitur, & in primis de Alexandrina civitate nihil nobis scribere voluistis? — „Quapropter si hujusmodi suspicio in Episcopum, *qui ibi* (τῶν ἐκεῖ, „non præcise, ut male vertit Couslantius, *illius urbis*) cadebat, ad hanc „Ecclesiam scribendum fuerat.“ Ecclesiasticus autem Canon, quem Eusebiani violarunt, teste Socrate fuit, quod Papam ad Concilium non vocassent *): Quippe cum Canon ecclesiasticus vetet, ne Decreta absque sententia Episcopi romani Ecclesiis sanciantur. Theodoretus de Julio P. ita scribit **): Ille Ecclesiæ canonem secutus eos jussit Romam venire. Ut pariter Sozomenus refert ***): „Julius ad illos, qui Antiochiæ in unum convenerant, scripsit, atque adeo incusavit, quod clam contra fidem „Concilii Nicæni novas res moliti fuerint, quodque contra Leges Ecclesiæ ipsum ad Concilium non vocaverant: nam Legem esse ad Sacerdotii dignitatem spectantem, quæ pronunciat acta illa irrita esse, quæ præter sententiam Episcopi romani constituuntur.“ Hinc manifestum fit, quid de quibusdam Novatoribus sentiendum, qui ad antiquos canones reformationem prætexentes Concilium Nationale, aut Provinciale Germaniæ sine Papa & Patriarcha suo haberi cupiunt.

D d 3

S. 5.

*) Hist. Lib. 2, C. 17.

**) Lib. 2, C. 4.

***) Lib. 3, C. 10.

§. 5.

Ex quarti hujus seculi documentis insigne adhuc est S. Hieronymi testimonium, qui diserte scribit *): „Se apud Damasum ad respondendum synodici consultationibus, quæ ex Oriente & Occidente ad romanam Sedem mittebantur, operam navasse.“ Porro in quaestione, num una in Deo, tresve hypostases dicendæ sint, aperte fatetur, se absque hæsitatione id dicturum, quod Damasus juberet **): „Cum successore Piscatoris, & discipulo crucis loquor. Ego nullum primum, nisi Christum sequens, Beatitudini tuæ, id est, Cathedræ Petri communione confocior: super illam Petram ædificatam Ecclesiam scio. — Non novi Vitalem, Meletium responso, ignoro Paulinum. Quicumque tecum non colligit, spargit. — Discernite, si placet, obsecro, non timebo tres hypostases dicere, si jubetis. — Ego interim clamito, siquis Cathedræ Petri conjungitur, meus est.“ Demum cum Himerius Tarracoenensis Episcopus Siricium, de quibusdam disciplinæ capitibus consulisset, respondens Pontifex ita loquitur: *Ad romanam Ecclesiam utpote ad caput tui corporis retulisti.* Itaque ex luculentissimis hisce quatuor primorum seculorum reliquiis constat, a singulis ubique terrarum Ecclesiis ad romanam propter Primatus sui Autoritatem rerum seu causarum graviorum relationes fuisse factas. Etsi Pontifices pro sua humilitate ab odiosa *jussionis* voce in responsis, decretisve suis abstinerint, vim tamen obligandi iisdem inesse ostenderunt: severissimis pœnis in refractarios vel illatis, vel saltem intentatis, uti de Siricio constat, Julio, Stephano, & Victore, nemine uno ex Catholicis hanc pontificiæ Autoritatis potestatem impugnante.

§. 6.

Unde plena jam in luce apparet Febroniana Falsitas: „Paulatim magnum Papæ Autoritatis pondus accessisse per hanc referendi consuetudinem, quam deinceps Pontifices in necessitatem verterint, & pro jure postularint.“ Falsum est enim, & a christiana Religione alienum Febronii suppositum *pro mero libertatis suæ arbitrio* has consultationes, relationesve a particularibus Ecclesiis ad Romanam mitti cœpisse. Id factum fuisse *ex jure universalis sollicitudinis Petro divinitus commissæ* & allatæ primæ Ecclesiæ monumenta testantur, & ipse Febronius nunc sibi contra-

tradi-

*) Epist. ad Ageruchianum.

**) Epist. ad Damasum.

tradicens supra fatebatur. Ergo falsum quoque est consequens: sed jure suo eoque divino inspectionem in res Ecclesiarum graviores exigere poterant summi Pontifices, & particulares Episcopi necessitatem illas referendi, ecclesiasticis etiam Canonibus firmatam agnoverant. Inane est, quod Febronius subdit, alios etiam Episcopos e.g. Cyprianum, consultos fuisse. Conveniens enim fuit, ut Cyprianus Africae Primas, aut alii Orientis Patriarchæ a suis inferioribus Episcopis in rebus dubiis consularentur, præcipue ubi propter locorum distantiam, & persecutionis furor ad supremum Caput non tam facilis esset recursus. Attamen si ipsi Episcopi, vel singulati, vel certe in Concilio congregati, si causæ gravitas exigeret, ad Papam solebant recurrere. Accedit, quod hinc inde consultationes propter singularem personæ consultæ qualitatem potius, quam officii præstantiorem dignitatem factæ fuerint. Ita Damasus Papa vel Hieronymum Presbyterum consuluisse legitur: ita hodie quoque Universitates virorum doctorum non raro consuluntur; quis autem sompnet, id ordinarii judicis jurisdictioni præjudicare? Siquis potest, ostendat, aliis Episcopis præter Romanum omnium Ecclesiarum sollicitudinem, & jure quidem divino competere; ostendat ad alium Episcopum ex toto terrarum orbe relationes fuisse factas; ostendat, ex antiquissimis Ecclesiæ canonibus id fieri debuisse; ostendat demum, ab alio quodam Episcopo in totum orbem christianum jurisdictionem fuisse exercitam, agnitamque. Quod porro Febronius ait, a Theodosio Imperatore tale privilegium relationes exigendi Constantinopolitano Episcopo fuisse indultum; haud nego conveniens esse, ut Patriarchæ, vel Primati suo inferiores Episcopi sua dubia proponant: sed hoc certum est, ad Papam ceu universale Caput Ecclesiæ jam inde ab initio, & constanter factas fuisse graviorum rerum relationes, fierique debuisse, sive id immediate per Episcopos, sive mediate per suos Primates contingerit. Ceterum Theodosius hoc suum mandatum revocavit, postquam ei subreptio innotuit Illyrici Episcoporum, qui schismatis sensu foventes Patriarchatui romano sese subtrahere, & Constantinopolitano subdere volebant. Vide Antifebronium vindicatum, seu doctissim. P. Zachariam *) Neptiquam ergo cum fide catholica cohæret, sed maledicentia adversus Sedem apostolicam est sequens clausula: „Igitur hoc jus (relationes exigendi) sua origine nulli Sedium proprium est, & tamen ab una parte „strictius vindicatum, ab altera remissius cognitum viam aperuit mutan- „di *Consilia in Mandata, Directorium in Imperium.* S. 7.

*) Part. 3, Dissert. 7, Cap. 7.

§. 7.

Vana adhuc distinctio est, quæ forsan improvidis possit imponere, inter relationes de rebus statum *universalis*, vel tantum *particularis* Ecclesiæ tangentibus. Vana distinctio, inquam, catholicum siquidem dogma est omnium, & singularum Ecclesiarum sollicitudinem ex institutione divina Petri Vicario esse commissam. Hinc primis jam temporibus ex singulis Provinciis Orientis æque ac Occidentis de rebus suis gravioribus Relationes Romam mittebantur: hinc Victor Papa Asianos tantum circa diem celebrandi Paschatis diversos communionem privare decrevit: hinc Synodus Sardicensis statuit, ut de singulis Provinciis ad Caput referatur. Ergo quilibet Ecclesiæ status, seu particularis sit, seu universalis, a cura supremi Capituli dependeat necesse est, adeoque graviora negotia semper illuc ad notitiam referenda sunt, prout antiqui canones statuerunt teste Avito Viennensi Episcopo sec. VI *): „Synodaliū legum esse, ut in rebus, quæ ad Ecclesiæ statum pertinent, si quid dubitationis fuerit exortum, ad romanæ Ecclesiæ maximum Sacerdotem, quasi ad Caput nostrum membra sequentia recurramus.

§. 8.

Quanta injuria summi Pontifices seculi V, & sequentium fugillantur, porro discutiamus. Omnium primus fuerit Innocentius, qui majorum causarum mentionem fecerit hisce verbis **): „Si majores causæ in medium fuerint devolutæ, ad Sedem apostolicam, sicut Synodus statuit, & vetus consuetudo exigit, post episcopale iudicium referantur.“ Varia hic in suspensionem nititur trahere Febronius: 1^{mo} Verba, *vetus consuetudo*, apud Labbæum, & Justellum non reperiri. 2^{do} Has quoque causas in primis ad Episcoporum tribunal pertinuisse, quia dicitur *post episcopale iudicium*. 3^{do} Quod de *statuto synodali* legitur, non ad canones Sardicensis Concilii spectare, sed ad epistolam Julio P. missam. Hisce cavillationibus oppono clarissima illa primorum quatuor seculorum jam antea a me allata documenta, unde falsum aperte est, primum fuisse Innocentium, qui res graviores ad se referri iusserit, cum jam antea ad ecclesiasticum canonem, & consuetudinem Julius P. provocarit; nisi forte inaniter de solo nomine *causæ majoris* velis vitiligare. Nunc ad singula: primum, scilicet antiquam fuisse consuetudinem ad Papam referendi,

*) Epist. 36.

**) Epist. ad Victricium Rothomagens.

rendi, ex primis quatuor seculis jam demonstratum est. Etsi autem hæc duo verba *vetus consuetudo* in duobus impressis desint, apud Harduinum tamen, Antonium, Augustinum, Coustantium, & in probatissimis ab eodem laudatis Manuscriptis prostant. Ad alterum: etiamnum si qua in Diœcesi causâ gravior e. g. fidei fuerit orta, possunt Episcopi unacum suo iudicio præliminari rem ipsam ad supremum Pontificem referre: unde sententia finalis expectanda est. Dein vero hic observari meretur, Innocentium in cit. epist. cap. 2 inter causas majores, & minores clare distinguere: de his enim dixit: „Causas vel contentiones inter Clericos tam superioris ordinis, quam etiam inferioris a congregatis ejusdem Provinciæ Episcopis terminari debere *): nec alicui liceat reliquis his Sacerdotibus ad alias convolare Provincias, *sine præjudicio tamen romanæ Ecclesiæ, cui in omnibus causis debet reverentia custodiri.*“ De causis vero majoribus simpliciter jubet Pontifex, eas, etiam post episcopale iudicium esse *referendas*. Ad ultimum: contra, ac Coustantio placet, cujus crisis, haud raro temeraria, merito hic suspecta est, Sirmundus, Gerbais, d'Aquirre, Ballerini, alique, & ante hos omnes Sozomenus l. c. hoc statutum ad Concilium Nicænum referunt. At, quidquid sit, fatis est Concilium saltem Sardicense ita statuisse.

§. 9.

Post Innocentium I Febronius Leonem M. nominat, sed & intermedii memorandi sunt. Zosimus omnia Provinciarum Galliæ negotia Metropolitano Arelatensi committit **), *nisi magnitudo causæ etiam nostrum requirat examen*. Bonifacius I innuit Perigenem Corinthiorum Episcopum non potuisse fieri, *nisi eorum consensu, qui illic Auctoritatem Sedis apostolicæ præsentabant ***).* Summe memorabilis est Cyrilli Alexandrini Patriarchæ ad Cælestinum P. in causâ Nestorii epistola, quæ ita incipit: „Si silere, & non Pietatem tuam *de omnibus, quæ moventur, litteris certiorē facere* citra culpam, ac sinistra suspitionis metumliceret, præsertim in rebus adeo necessariis, ubi etiam recta fides a nonnullis de-

„prava-

*) Animadvertat Lector, quæ initio seculi V disciplina fuerit, ubi Episcoporum provincialis Synodus, cujus Potestas adeo nostris diebus amplifiscatur, solum *causas minores* terminare potuit, & hoc tantum, nisi pars una ad apostolicam sedem se verterit.

**) Epist. i ad Episc. Galliæ.

***) Epist. ad Rufum.

„pravata periclitatur; in memetipso dicerem, bonum & periculi expers
 „est silentium, præstatque quietam vitam agere, quam turbatam. Sed
 „quoniam Deus hisce in rebus vigilantiam a nobis exigit, & longa Ecclesiarum
 „consuetudo suadet, ut hujusmodi res cum Sanctitate tua communicetur,
 „scribo plane necessitate adactus.“ In eadem, graviore quippe, Nesto-
 rii causa, quantum pontificia Autoritas necessaria fuerit visa, vel ea
 ipsa orientalium Episcoporum schismaticorum epistola ad Xistum III ap-
 paret, in qua Antiocheni Patriarchæ ad Concilium Ephesinum accessio-
 nem Papæ referre festinant. Qua de re vel Constantii annotationem
 placuit exscribere: „Hic notatu digna videtur ea in Nestorii tota causa
 „partium festinatio, qua Nestorius ipse, Cyrillus (Alexandrinus) Joan-
 „nes (Antiochenus) ac socii, Euthérius (Thyanensis) ac reliqui Epi-
 „scopi consentientes (omnes Orientales) hoc est, Hæretici, Catholi-
 „ci, Schismatici, seu a schismate discedentes, seu in eodem pertinaces
 „apostolicæ Sedis Præfulem antevenire, ac sibi conciliare contende-
 „runt“ *).

§. 10.

Nunc demum series S. Leonem tangit, qui in epist. 12 ad Anastasium Thessalonicensem, suum in Illyrico Vicarium sibi reservat *majora negotia*, & *difficiliores causarum exitus*. Non hic agi de pontificio universali, sed solum de jure patriarchali contendit Febronius. Falsitatis autem ex allatis hæctenus documentis abunde convincitur. Jam enim primis seculis ex singulis Orientis Provinciis, non solum ex Occidentalibus, aut Illyrico res graviores ad romanum Pontificem referebantur. Synodus Sardicensis expresse statuit, ut de singulis *quibusque* Provinciis ad Caput, seu *Petri Sedem* Domini Sacerdotes referant. Julius Orientalibus exprobat, quod contra Canonem, & consuetudinem ad romanam Ecclesiam non scripserint. Innocentius pluribus in epistolis diserte exprimit, majores causas *ad apostolicam suam Sedem, ad Petrum*, id est, *sui Nominis, & honoris Authorem, ad Caput, & apicem Episcopatus* referri debere. Os vero adversariis facile obstruit Bonifacius I **) data opera jam seculo V hodierna signenta confutans: „Sed quia res postulat, approbandum documentis est, „maximas Orientalium Ecclesias in magnis negotiis, in quibus opus est, „set disceptatione majore, Sedem semper consuluisse romanam, & quo-
 „ties

*) Apud Constant. Xisti epist. 4, not. 2.

**) Epist. 15 ad Rufum, aliosque.

„ties usus exegit, ejus auxilium postulasse. S. memoriæ Athanasius,
 „& Petrus Alexandrinæ Sacerdotes Ecclesiæ hujus Sedis auxilium po-
 „stularunt. Cum Antiochena Ecclesia per multum temporis laboraret,
 „ita ut fierent illinc propter hoc ipsum sæpe discursus, primo sub Me-
 „letio, postea sub Flaviano apostolicam Sedem manifestum est esse con-
 „sultam. Ad cujus Authoritatem post multa, quæ ab Ecclesia nostra
 „gesta sunt, nemini dubium est, Flavianum communionis gratiam re-
 „cepisse, qua in perpetuum caruerat, nisi hinc super hoc scripta ma-
 „nassent. Clementissimæ recordationis Princeps Theodosius Nectarii
 „ordinationem propterea, quia in nostra notione non esset, habere
 „non existimans firmitatem, missis e latere suo aulicis cum Episcopis
 „Formatam huic a Sede romana dirigi *regulariter* depoposcit, quæ ejus
 „Sacerdotium roboraret. Ante breve tempus, id est, sub Prædeces-
 „sore meo beat. record. Innocentio orientalium Ecclesiarum Pontifices,
 „dolentes se a B. Petri communione sejunctos per Legatos pacem, si-
 „cut Charitas Vestra retinet, poposcerunt. — Igitur ad probandum
 „veritatem arbitror, quæ diximus, Fratres charissimi, exempla suffice-
 „re, quamvis plura vestri notione teneantur.“ Quantum in toto orbe
 christiano supra primas etiam Orientis Ecclesias semper Romanæ Au-
 thoritas prævaluerit, ex eadem epistola discimus, ubi paulo superius
 Ecclesiarum ordo describitur: „Quoniam locus exigit, si placet recen-
 „sere canonum sanctiones, reperietis, quæ sit post *Ecclesiam romanam*
 „secunda sedes, quæve sit tertia. A quibus ideo ita rerum videtur
 „ordo distinctus, ut se Ecclesiarum Pontifices ceterarum *sub uno tamen*,
 „eodemque Sacerdotio habere cognoscant, quibus Charitate servata pro-
 „pter ecclesiasticam disciplinam debeant esse subiecti. Et quidem hæc
 „sententia canonum a vetustate duravit, & nunc usque Christo Domi-
 „no nostro favente perdurat: *Nemo umquam apostolico Culmini, de cujus*
 „*judicio non licet retrahari, manus obvias audacter intulit, nemo in hoc rebel-*
 „*lis extitit, nisi qui de se voluit judicari.* Servant Ecclesiæ magnæ prædi-
 „ctæ per Canones dignitates, Alexandrina, & Antiochena, habentes
 „ecclesiastici juris notitiam. Servant, inquam, statuta Majorum, in
 „omnibus deferentes gratiæ, quam se in Domino, qui pax nostra est,
 „nobis debere cognoscunt.“ Hoc licet prolixius Bonifacii I testimonium
 ideo attuli, quia plane hodiernos romanæ Sedis adversarios cogit ob-
 mutescere.

§. II.

Quemadmodum ergo Antecessores, ita S. Leo suo per Illyricum Vicario, Thessalonicensi Episcopo quædam Patriarchatus jura concessit, sed causas majores *generaliter* in quibuscumque Provinciis vi canonum ecclesiasticorum tamquam totius Ecclesiæ Caput, & Petri successor sibi tenuit reservatas. Quid est, o Febroniani! quod vestra adversus apostolicam Sedem iniquitas ita vobis mentiatur, ut Patriarchæ particolari concedere velitis potestatem, quam universali Ecclesiæ Capiti negatis *causas majores reservandi*? An illi Patriarchæ tantum humana voluntate existentes majorem habuerint in Ecclesia Authoritatem, quam Petrus, ejusque successores ab ipso Christo, Dei Filio instituti? Num forte Episcoporum, Metropolitanorum, & Synodorum provincialium jura non læduntur patriarchali, læduntur vero papali reservatione? Fingite hoc etiam vobis, quod numquam mundo persuadebitis; quid vero lucramini? Nonne romanus Pontifex vester, quippe totius Occidentis Patriarcha ex antiquissimo jure, quo appellatis, eandem Authoritatem in Archi- & Episcopos Germaniæ possidebit, quam Petri successor, & Christi Vicario contra antiquæ fidei veritatem extrema pertinacia abnegare contenditis??

§. 12.

Leonis M. successores æque apostolico jure majores causas ad se pertinere declararunt, quorum, ut brevis sim, duos tantum nominabo. Hilarius ad Metropolitanos Galliæ scribit *): „In dirimendis sane gravioribus causis, & quæ illic non potuerint terminari, *apostolicæ Sedis sententia* consulatur.“ Vigilius autem **): „Si qua vero certamina aut de Religione — aut de quolibet negotio, quod ibi pro sui magnitudine terminari non possit, evenerint, totius veritatis indagine diligenti ratione discussa, rationis ad nos seriem destinantes apostolicæ Sedi terminanda servate.“ Idem etiam ***): „Ad Ecclesiam romanam tam summa Episcoporum negotia, & judicia, atque querelæ, quam & majores Ecclesiarum quæstiones *quasi ad Caput* semper referendæ sunt. — Cunctarum majorum negotia causarum eidem S. Sedi reservata esse liquet.“ Tam manifesta disciplinæ primorum seculorum monumenta dum ante oculos videmus; quis non calumniam agnoscat ***): „Ex his,

*) Epist. 8.

**) Epist. 7.

***) Epist. ad Exter.

****) De Stat. Eccles. C. 4, §. 1.

„his, & similibus Isidorus Mercator occasionem arripuit fingendi Decretales, in quibus reservationem majorum causarum favore Sedis apostolicæ antiquissimorum temporum disciplinæ simpliciter adscribit, quæ deinde etiam in Decretales Gregorii IX influxit.“ Injuriosa summo Sacerdoti fabula!

§. 13.

Saltem, inquires, pristino avo rariores fuerant ad Papam recursus: post secula primum relationes & devolutiones urgebantur. Ita fuerit, si velis; eoquod rariores tunc causæ fuerint, ubi sanctiores adhuc in persecutionibus Episcopi, Presbyteri, & Laici. Cum autem postea ab officio sæpius desciscerent homines, cum hæreses, quarum non raro summi Præsules Authores, vel Fautores fuerant, invalescerent, cum Metropolitanis in subditos Episcopos injustam sæpe violentiam exercerent, cum Episcopi ad Cæsaris gratiam magis, quam Ecclesiæ canones attenderent, uti plena est historia hisce exemplis; qualis quæso rerum facies fuisset, nisi suam Autoritatem Pontifices Maximi interposuissent, inviolatam fidem conservassent, errores suppressissent, irregulariter facta emendassent, aut facienda impediissent? Itaque necessitas fecit, ut pro suo universali pascendi munere in Provinciis remotioribus Vicarios constituerent, sed & causas graviores ad seipsos traherent, sibi quæ reservatas concluderent. En causas antiquissimorum Ecclesiæ canonum, quæ vel ipsa rei convenientia, vel temporum necessitas fuerant, non Pontificum superba usurpatio, non falsæ quædam Decretales. Hæc generaliter pro foro externo de causis majoribus dicta sunt. Eodem apostolico jure, eoque in omnes animas illimitato, & immediato summi Pontifices subditorum suorum crimina graviora pro foro interno sibi reservarunt, prout expresse docet Concilium Tridentinum *).

§. 14.

Nunc in specie de tribus dumtaxat gravioribus causis, hodie quam maxime oppugnationi expositis; primum de causis fidei, deinde Episcoporum confirmatione, demum jure dispensandi in universali lege ecclesiastica. Atque in hunc præcipue finem, ut unitas fidei conservetur, a Christo Primatum fuisse Petro, ejusque successoribus datum, una est omnium Catholicorum sententia, nec Febronio excepto **), qui

E e 3

funda-

*) Sels. 14, C. 7.

**) De Stat. Ecclesi. C. 2, §§. 2, 4, 6.

fundamentum hujus Primatus esse bonum unitatis expresse docet, *bonum, sine quo impossibile est Ecclesiam subsistere, aut perdurare*. Hinc pro principio, de quo scholæ catholicæ omnes consentiunt, statuit omnia illa, & sola primogenia esse, & essentialia jura Primatus, sine quibus unitas non potest servari, & addit: „Qui ad genuinum sensum S. Scripturæ, traditionis, ac disciplinæ primorum seculorum sapiunt, illi norunt, quod, cum romanus Pontifex inter Prælatos, & Antistites sit primus, supremo ejus muneri annexa esse debeat sollicitudo, ut per universum orbem observentur canones, ut fides illibata custodiatur, ut iidem ritus, substantiales in ministrandis Sacramentis adhibeantur, ut denique unam, omnes, eamque sanam doctrinam moralem profiteantur.“ Hinc demum ipse docet, *ea, quæ ad Ecclesiæ statum attinent, ubique gerantur, ad romanum Pontificem referenda esse*. Atqui Febronius porro ipse fatetur *); „Causas fidei graviiores ejusmodi esse, quæ ad statum universalis Ecclesiæ attinere possunt, quo titulo summi Pontificis est curare, nequid definiatur, quod in eundem statum communem, seu publicum impingat.“ En ergo non meam, sed justissimam Febronii conclusionem; *Graviiores fidei quæstiones ad romanum Pontificem referri oportet*. Quid cogitas jam sincere Lector! ubi eundem vides Febronium, quod una manu modo videbatur firmissime ædificare, altera studiosè destruentem, dicentemque, *causæ fidei non sunt reservatum summi Pontificis*, imo tamquam deceptionem Isidorianam S. Scripturæ, toti antiquitati, Conciliorum definitionibus & observantiæ universalis Ecclesiæ contrariam in Innocentio III reprobantem, quod hic Pontifex interrogatus super quæstione de Baptismo parvulorum in suo Responso ad Archiepiscopum Arelatensem quasi indubitatum præmiserit, *maiores Ecclesiæ causas præsertim articulos fidei contingentes, ad Petri Sedem referendas esse?* Hæc dum legis, quid cogitas? fierine potest, ut exeunte seculo XVIII liber tam manifestæ falsitatis convictus decipiat?

§. 15.

Sed Febronii, nec non & Zalweini ***) argutias discutiamus. Singuli Apostoli, æque Paulus, & Joannes, sicut Petrus errores damnarunt. Idem jus conservarunt Episcopi, Apostolorum Successores, æque ac illi a Spiritu S. positi, ut regerent Ecclesiam Dei, probeque noscentes ad officium pastoralis sollicitudinis pertinere de fidei dogmatibus cognosce.

*) Cap. 4, §. 2, n. 10.

**) Tom. I, Quæst. 4, C. 3, §. 4.

gnoscere, & judicare, erroresque condemnare. Hinc ab initio Ecclesiæ Episcopi leguntur in nascentes hæreses sollicitè inquisivisse, suaque Authoritate illas confixisse. Imo nullam hæresin primorum seculorum per Concilia generalia legimus damnatam, sed per Episcopos aut particularibus decretis, aut synodalibus Conclufis. Respondeo, ut breviter ea, quæ de Apostolis, expediam, jam sæpius a me observatum fuisse, quam falsum sit præjudiciū, Episcopos in jura Apostolorum *singularia* successisse. Plane ad officium pastoralis sollicitudinis pertinet de rebus fidei cognoscere, & judicare, sed non æquali jure omnium Pastorum; scilicet prout quis supremus judex non est, ita neque supremum ejus judiciū. Secus quilibet *curatus* Sacerdos pascere Ecclesiam Dei positus cognoscere res fidei posset, dijudicare, & condemnare citra Episcopi superius judiciū. Ab initio per tria secula sine generali Synodo fuisse hæreses oppressas certum est. Sed id per solos Episcopos sine papali Authoritate factum fuisse unde tu probas? Nonne jam satis demonstravimus, quam fideliter a singulis Ecclesiis, præcipue in fidei causis ad apostolicam Sedem relationes missæ fuerint? uti primo jam seculo Corinthii fecerant excitato apud se schismate, nedum hæresi. Si primitus etiam, & per se solos judicia formarunt Episcopi, nonne eadem ad Papam miserant, ut rata haberentur? — uti Antiochena Synodus, quæ Paulum Samosatenum damnaverat, epistolam synodicam dedit ad Dionysium romanum Pontificem. Ceterum bene distinguendum est inter ipsas fidei causas: aliæ enim manifestæ sunt, jamque damnatæ hæreses; aliæ difficilioris sunt indaginis, & cum periculo conjunctæ, ne judiciū a veritate aberret. Has, non illas Pontifici Maximo esse reservatas cum Gersonio contendimus, qua in re ipsos recentiores Gallicæ Præsules nobis consentientes habemus, quia 1653 ad Innocentium X scripserunt: *Majores causas ad Sedem apostolicam referri, sollemnis Ecclesiæ mos est, quem fides Petri nunquam deficiens perpetuo retineri pro jure suo possulat.*

§. 16.

Quod ad singulares quasdam Synodos attinet a Febronio allatas e. g. Chalcedonensem, in cujus actis legitur, Eutychem *regulariter* a proprio damnatum Episcopo: item errores Gothefchalci Monachi in Concilio Moguntino a. 848, hæresin Berengarii in Synodo Turonensi a. 1055, novitates Abælardi in Senonensi Concilio a. 1140, demum Lutheri erro-

res

res primitus a variis Episcopis, & particularibus Conciliis fuisse damnatos; hæc quidem exempla inconsulto, & contra se ipsum a Febronio sunt allata: probant enim post Isidorianas etiam Decretales Episcopis suum legitimum jus superesse, quæstiones fidei examinandi, imo & errores, si manifesti fuerint, damnandi, tantum non ultimata, seu finali sententia absque romani Pontificis Autoritate: probant, inquam, & evincunt calumniam esse, quæ hodie a multis spargitur, per pontificia reservata Episcopo nativo suo jure privari, & a cognitione rerum ad fidem pertinentium excludi. Ceterum quæ ex primæva jam antiquitate adducuntur exempla, pro nobis stant potius, quam contra nos. Ita si contra Eutychem judicium Flaviani proprii Episcopi sufficiens pro toto orbe fuisset; ad quid amplius implorata fuit summæ Sedis Autoritas, quæ potissimum in generali Concilio Chalcedonensi Eutychna hæresis configebatur? Gangrensis Synodus pariter inepte a Febronio affertur: nam sub Ofii Cordubensis, tamquam pontificii Legati præsidio habita fuit, & Concilii Milevitani canoncs ab Innocentio I approbati fuerunt. Plura vero, & antiquissima prostant documenta, per solos Pontifices nulla præeunte Synodo hæreses fuisse damnatas. Sic Cerdonis, Valentini, Theodati, Origenis, Apollinaris, Joviniani, Vigilantii, aliorumque errores non exspectato plurium Episcoporum judicio irrevocabiliter ab apostolica Sede damnati fuerunt. Demum cum magnis buccis antiqua provincialium Synodorum potentia a plerisque scholasticorum hodie soleat prædicari, æquum est illos ad testem sibi non invisum; sed potius acceptum ablegare. Hincmarus Rhemensis Archiepiscopus, nequaquam Pontificum adulator ita scribit *): „Quibus omnibus demonstratur, „quia Synodus Comprovincialium episcopalia judicia, generalis autem „Synodus Comprovincialium dijudicationes, sive dissensiones vel pro- „bet, vel corrigat. Apostolica vero Sedes & Comprovincialium & „Generalium retractet, refricet, & confirmet judicia, sicut epistola Leo- „nis, atque Gelasii, ceterorumque Pontificum romanorum, & Sardicen- „sis Synodus evidenter demonstrant.“ Itaque non provincialium tantum, sed universalium quoque Conciliorum decreta summi Pontificis Autoritate rejici poterant, vel confirmari, quemadmodum Concilia Arimense, & Ephesinum II constat fuisse a Pontifice rejecta.

*) De divortio Lotharii.

§. 17.

Secundo loco inter causas majores Pontifici reservatas veniunt Episcoporum causas, quarum præcipua illorum acceptatio, seu ratihabitio, vel consueto jam nomine *confirmatio*. Equidem, ut quis *valide* sit Episcopus, nihil præter assumptionem sive electionem suam, & sacramentalem consecrationem requiritur; ut vero id *licite* fiat, hoc est, secundum divinæ, imo & naturalis legis regulam, necesse est dignum, idoneumque eligi Pastorem, adeoque examine opus est de Neoelecti ad tantum officium dignitate & idoneitate. Hoc igitur judicio probari idem est, ac in Episcopum confirmari. Ad quem vero hoc judicium nativo, & originario jure pertineat, idipsum est, de quo acriter nostris diebus disputatur. Cum ergo de nativo jure & originario agitur, in ipsam rei naturam, divinamque ecclesiastici regiminis institutionem ante omnia indagandum existimo. Certe ea res, ut Ecclesiis boni Pastores præficiantur, ad universalem rei christianæ Statum maximopere pertinet, eoquod totius ovilis salus quam maxime a Pastoribus dependeat. Consentientem autem mecum vel ipsum habeo Febronium, ea, quæ ad statum Ecclesiæ universalis pertinent, essentiali ac primario jure illius potestati esse subdita, cui cura, & sollicitudo universalis a Christo fuit imposita, cui claves regni cælorum, quod est Ecclesia, tradita, cui omnes oves commissa, & qui constitutus est Pastor Pastorum: hunc non alium esse, nisi Petrum, ejusque in Pontificatu Successores inficias ire nemo Catholicorum potest. Edic, quæso, nonne ad eum, cui regimen totius Reipublicæ incumbit, jus pertinet pro totius communitalis bono ubivis idoneos judices, seu Præpositos constituendi?

§. 18.

Ab initio autem, inquires, non fuit sic, sed Paulus sine requisito antea Petri consensu Titum in Episcopum ordinavit, eidemque alios ordinandi facultatem reliquit. Primis quoque seculis post Episcopi obitum Clerus unacum populo convenit, qui a se electum, bonisque testimoniis probatum advocatis quibusdam e vicinia Episcopis ordinandum tradiderunt: successu vero temporis Ecclesiarum consensu jus ordinandi ad Metropolitanum fuit devolutum, & hoc antiquissimis Conciliis, uti Nicæno, & Laodicæno stabilitum. Nulla ergo antiquitus pontificia confirmatio requirebatur, sed ejus erat confirmare, cujus & ordinare. Disce, obsecro, attenta mente ipsum jus ab actuali ejusdem exercitio

F f

citio

citio distinguere, aut etiam separare. Tempora distingue, & jura facile concordabis. Cogita nondum integre natam, sed nascentem inter persecutiones Ecclesiam, ubi Apostolis per provincias dispersis frequens ad Petrum recursus nec possibilis fuerat, nec etiam necessarius, quippe qui *singulatim* privilegio Successoribus haud communicabili a Spiritu S. regebantur. Eadem fere tribus primis Ecclesiæ seculis ratio perduravit, dum ex una parte tam crebro ad Petri Sedem recurrendi facultas non erat, sed neque ex altera parte necessitas, quippe in primo illorum temporum sancto fervore, strittoque Persecutorum gladio nec indigni Episcopatus ambiebant, nec fidelis plebs, Clerusque alios, quam dignos præsentabant. Hinc ab initio sine fixa regula *proximi quique* Episcopi ad ordinandum Electum conveniebant teste S. Cypriano *). Sed prout natura infirmi sunt homines, paulo post abusus irreperant *Episcopis certatim accurrentibus ad ordinandos etiam indignos*: id quod ex testimonio Siricii cognoscitur **). Atque hæc causa fuerit, cum iustis lex non sit posita, cur primum Nicæna Synodus can. 4 statuerit, confirmationem Electi a Metropolitano fieri debere.

§. 19.

Duo hic de Metropolitanis singulariter consideranda sunt. Primum non jure divino Episcoporum confirmationem ad illos pertinuisse, quippe quorum existentia tantum ex jure humano est, sed ita, ut veluti quidam rivulus sit a natali universalis Petri Primatus fonte derivatus, prout Africani Patres loquuntur. Nam a primæva jam antiquitate summa supra alias, etiam apostolicas Ecclesias post Romanam Autoritas fuit Alexandrinæ, & Antiochenæ, quarum hæc ab ipso Petro, illa ab ejusdem delegato discipulo Marco suam traxerat originem. Etsi aliæ quoque Ecclesiæ super Comprovinciales suas habuerint Autoritatem ab ipsis Apostolis acceptam; tamen duæ illæ Orientis semper primariæ fuerant: quodque Apostoli quarundam Provinciarum particularium Episcopos *primarios* constituerunt, uti Paulus Titum supra Ecclesias Insulæ Cretæ, Timotheum vero supra Asianos; idipsum ad universalis Primatus, cui se quoque a Christo subordinatos noverant, imitationem fecerunt, de subordinationis ad bonum regimen utilitate, imo & necessitate convicti. Huc spectant summe memorabilia doctiss. Thomassini verba

*) Epist. 4.

**) Ad Anyf. Archiep. Thessal. epist. 4.

ba *): „Iterum, iterumque inculcandum illud est, Episcoporum imperium super alios, Apostolorum æque Successores, proficisci ab ejus prærogativæ imitatione, & expressione, qua Christus Petrum decoravit, extulitque supra alios Apostolos.“ Unde merito colligas, numquam futurum fuisse, ut Archiepiscopi constituerentur, si unus totius Ecclesiæ Primas suffecisset ad omnia per seipsum *immediate* in disitis adeo regionibus ordinandum. Hinc vel ipsa rerum naturali conditione sic exigente factum, ut universalis illius potestas originaliter ex uno fonte defluens (verba sunt S. Cypriani) in plures veluti rivos dispartiretur, salva semper penes unum totius Potestatis plenitudine, uti manifeste ex eo elucescit, quod jure electiones confirmandi per Concilii Nicæni decreta in Metropolitanos translato, nihilominus ubi singularis ratio id postulabat, non raro summi Pontifices pro sua suprema, & illimitata jurisdictione causas electionum episcopalium ex Oriente ad se vocarunt, electosque sua sententia aut confirmarunt, aut rejecerunt: plena est hisce exemplis vetus historia.

§. 20.

Deinde cave tibi, ne more hodiernorum Canonistarum sat vulgari decipiaris decreta antiquorum Conciliorum pro confirmationis jure de quibuscumque Metropolitanis *promiscue* intelligendo: duplicis enim generis inde ab initio Metropolitanis fuerant, id quod discimus ex testimoniis S. Hieronymi **), & Innocentii I ***). Alii tantum unicæ *Provinciae*, alii integræ *Diaecesi*, ut dicebatur, hoc est, pluribus simul Provinciis præerant, habebantque sub se Metropolitanos, quorum intuitu etiam Patriarchæ, seu Exarchi, seu Primates vocabantur. Hisce primi ordinis Metropolitanis, non æque aliis secundi ordinis Concilia jus tribuere inferiores Episcopos confirmandi, prout expresse Concilii Nicæni explicationem ab Innocentio P. habemus, qui Patriarcham Antiochenum admonet, ut Metropolitanos (minores) ipse ordinet, reliquos sibi subiectos Episcopos, antequam ordinentur, *suo permisso* confirmet. En verba: „Revolventes itaque Authoritatem Nicænæ Synodi, quæ una omnium per orbem terrarum explicat mentem Sacerdotum, quæ censuit de Antiochena Ecclesia cunctis fidelibus, ne dixerim Sacerdotibus, esse necessarium custodire, qua super *Diacesin* suam, non super
F f 2
„ali-

*) Vet. & nov. Eccles. discipl. Tom. 2, C. 8, §. 7.

***) Ad Alexand. Antiochen. Patriarch. epist. 18.

**) Ad Pamach.

„aliquam *Provinciam* prædictam Ecclesiam recognoscimus constitutam: unde advertimus non tam pro civitatis magnificentia hoc eidem attributum, quam quod prima primi Apostoli Sedes esse monstretur, ubi & nomen accepit Religio christiana, & quæ conventum Apostolorum apud se fieri celeberrimum meruit, quæque urbis Romæ Sedi non cederet, nisi quod illa in transitu meruit, ista susceptum apud se, confirmatumque gauderet. Frater carissime! sicut Metropolitanos Authoritate ordinas singulari, sic & ceteros non sine permisso, conscientiaque tua finas Episcopos procreari. In quibus hunc modum recte servabis, ut longe positos litteris datis ordinari censeas ab his, qui nunc eos suo tantum ordinant arbitratu: vicinos autem si æstimas, ad manus impositionem tuæ gratiæ statuas pervenire. Quorum enim sane maxima expectat cura, præcipue tuum debent mereri iudicium.“ Sane is est sensus sexti canonis Nicæni, ubi contra violentiam Meletii Lycopolis Archiepiscopi *), qui multis urbibus Episcopos contra fas ordinare præsumerat, jura Metropolitanæ, seu Patriarchæ Alexandrinæ, cui decem ad minus Archiepiscopi suberant, ex antiqua romani Patriarchatus consuetudine vindicantur, ut præter Metropolitanæ sententiam Episcopi non fierent. Idem confirmationis jus non penes quoscunque Archiepiscopos, seu Metropolitanos, sed tantum Primates fuisse amplius ex S. Leone intelligimus, qui ad Anastasium Thessalonicensem in Provinciis Græciæ a se constitutum Primatem ita scripsit **): „De Persona consecrandi Episcopi de Cleri, plebisque consensu Metropolitanus Episcopus ad fraternitatem tuam referat, quodque in Provincia bene placuit, scire te faciat, ut ordinationem rite celebrandam tua quoque firmet Autoritas.“ Illis certe genuinis antiquorum temporum monumentis, quæ constat ad jura patriarchalia jam tum spectasse Episcoporum confirmationem, quasi fulmine prostrati jacent hodierni romanæ Sedis impugnatores.

§. 21.

Nec obstat, quod summi Pontifices, uti Siricius, Innocentius, Bonifacius, Leo, aliique singulis Metropolitanis jus adprobandi neelectos Episcopos attribuerint: id enim sine cujuscumque Primatis præjudicio de illis Metropolitanis intelligendum, qui nulli *Primario* fuerint subordinati, vel novum erat pontificiæ indulgentiæ suis ex juribus concessum

*) Teste S. Epiphonio hæres. 68 & 69.

**) Epist. 84.

cessum Privilegium. Frustra aquas turbare nititur Barthelius*), dum contra claram veritatem asserit, nulla antiquitus extare vestigia hodiernæ disciplinæ omnium fere Episcoporum confirmationes Papæ reservantis: ab ævo enim antiquissimo Nicani Concilii idem hoc jus ad romanum Pontificem, tamquam totius Occidentis Patriarcham pertinuit. Majori forsitan attentione dignum foret, quod idem Doctor paulo ante locum citatum proposuit, antiquissimis Patriarchis *unacum Archiepiscopis* jus confirmandi suarum Provinciarum Præsules assertum fuisse. Sed unde id probat? Si quem forte Archiepiscopus probaverit, num rejicere Patriarcha non poterat, sive alternatim? Hoc quidem verum, pro more illorum temporum ad electionem novi Præsulis Archiepiscopum venisse: sed alia quæstio de electione, alia de confirmatione est. Utinam ille pristinus eligendi modus restitueretur, ubi Archiepiscopo præsentem & populus fidelis suam vocem, plerumque Dei vocem habuit, & totus Clerus, non soli cathedrales Canonici, & hi tantum ex nobili stemmate progeniti! utinam Concilii Basileensis apud nos decreta valerent de Doctoribus, unacum Nobilibus ad Capitula admittendis! Cur vero in Germania Archiepiscopi sint ab electione exclusi, causa non exigua videtur fuisse magna ipsorum comitatus pompa, quæ nimis sumptibus stetit. Tempora mutantur, & hinc politia ecclesiastica, quodque magis dolendum, & mores.

§. 22.

Tandem ut ad originem nostræ in Germania disciplinæ redeamus, jam ab initio apostolica Petri Autoritate Episcopi ordinabantur, prout Papa Gregorius III S. Bonifacio expressis verbis mandaverat: *Nostræ Autoritatis vices gerens Episcopos ordina* **). Zacharias P. similiter in epistola ad Germaniæ Episcopos idem hoc jus non Archiepiscopis concedit, sed soli Papæ Vicario, seu stabili suo Legato reservat ***). Vulgaris est opinio, etiam primæ apud hodiernos notæ Canonistarum e. g. Fleurii, Barthelii, Thomassini, ad patriarchalia, seu primatialia jura spectasse Episcopos, & Archiepiscopos confirmare. Hæc potissimum causa fuerit, cur Germaniæ Archiepiscopi numquam firmum jus sibi acquisiverint confirmationem suis Suffraganeis dandi. Constat præterea ex historia mediæ ævi, quod plurimum tunc grassante Simonia Archiepi-

F f 3

*) Opusc. jurid. Tom. 2, Opusc. 4, p. 460.
 ***) Ibid. ad a. 742.

**) Fleur. ad a. 739.

piscopi Imperio magis, quam Ecclesiæ devincti vel ipsa sua circa electiones jura minus, aut nihil curaverint, eoque ipso necessitatem Electos adprobandi in manibus pontificiis reposuerint. Videtur demum & hæc alia fuisse causæ, quod Imperii magni Principes, & ecclesiastici Præsules honori sibi duxerint potius a summo Pontifice, cujus tunc multo major æstimatio, atque in ipso Imperio Autoritas fuerat, quam a Metropolitano confirmari. Ut hanc rem paucis finiam, Episcoporum confirmatio romanæ Sedi Concordatis Germaniæ Aschaffenburgensibus reservata est. Quam benevole autem, & suaviter summi Pontifices hoc suo jure sint usi, ex Barthelio sane partialitatis suspecto discimus*): „Saltem inde a longissimis retro temporibus, & forsan ab ævo Adriani VI exemplum infractæ ejusmodi electionis nullum produci poterit. Quin nec illud silentio prætereundum, frequentissima potius majoris, ac indebiti prorsus favoris Capitulis Germaniæ impensi exempla allegari posse, ubi summi Pontifices electiones ob non servatam rite formam, canonicam irritas, & nullas cassasse quidem, nequaquam tamen asserta sibi per Concordata eo in casu immediate providendi facultate, ac libero arbitrio usos fuisse, sed potius cassata electione eidem Ecclesiæ de eadem persona ex benignitate sua providisse leguntur.“ Nunc de tertia causâ inter majores summo Pontifici reservata, de jure in legibus Ecclesiæ universalibus dispensandi; qua de re, cum nostris diebus gravissima sit, speciali Corollario tractabimus.

C O R O L L A R I U M III.

De jure dispensandi in Legibus Ecclesiæ universalibus, & specialiter matrimonialibus.

§. I.

Ex iis, quæ hætenus argumentis, siquid humana valet ratio, firmissimis demonstrata vidimus, sequitur eum, qui suprema, & illimitata, ab ipso Deo immediate accepta in Ecclesiam universam gaudet jurisdictione, qui solus per seipsum instituere leges ecclesiasticas universim obligantes potest, eundem etiam posse, si æquum videbitur, illas abrogare, aut in illis dispensare. Nihilominus nostris diebus, quæ nulla

*) Dissert. 3 special. de Concord. germ. C. 3, §. 29.

la amplius veritas tranquilla fruitur possessione; hac ipsa de re in sinu Ecclesiæ gravissima est excitata lis inter summos Præsules, & Doctorum controversia. Ut ordine, & recta ad scopum via multos inter scopulos incedamus, quinque sunt præcipua puncta separatim, & successive nobis discutenda. Primum est, ut evitandæ in re tanti momenti logomachix gratia notiones, quam fieri potest, clarissime dilucidentur. Dein de jure nativo indagandum, penes quem dispensandi Autoritas sita sit: amplius de usu juris hic expendendum, quid expediat. Sed & in praxin antiquam respiciendum in primis generatim circa dispensationes, demum in specie circa illas in Matrimonii impedimentis.

§. 2.

Ante omnia in qualibet controversia statum quæstionis, ut ajunt, seu punctum rei, de quo disputatio est, coram oculis esse ponendum a nemine dubitatur. Est autem id, de quo in præsentiarum quæritur, an leges Ecclesiæ disciplinæ, easque universales solus dispensare Pontifex possit, tamquam majorem causam sibi reservatam? Sermo hic unice est de legibus mere humanis, sed sacris tamen, & ecclesiasticis. In legibus enim divinis proprie, ac stricte dispensandi potestatem nullam in Ecclesia esse facile inter partes convenit. Insuper autem, & hoc quidem quam maxime notandum, de legibus Ecclesiæ universalibus quæri: nam hallucinari quosdam animadverti, qui in exempla dispensationum ab Episcopis datarum indagantes haud attendunt, an leges illæ universales fuerint, vel tantum particularcs. Cum Episcopi aut per se singuli, aut in Synodo collecti pro particulari loco, aut Provincia possint leges statuere; haud mirum, si illas quoque moderari, immutare, vel abrogare possint: sed jam nunc de potestate circa leges universales quæstio est.

§. 3.

Cum ergo de jure dispensandi, eoque ordinario quæritur, hæc quatuor caute discernenda sunt: 1^{mo} Remissio legis in casu necessitatis; cessat enim omnis lex, ubi necessitas adest, quæ nullam scit legem. Forte melius *tolerantiam* dicas, ubi necesse est malum pati, quam legis *remissionem*. 2^{do} Licentia legis est, quando lex ipsa Superiorum prudenti judicio, quoad certas circumstantias, vel causas permissa est: ita claustralis Superior justa de causa suis subditis egrediendi dat licentiam

ex

ex ipsa legis permissione. 3^{io} Interpretatio legis est, *ΕΠΙΧΕΙΡΙΑ*, vulgo *epikia*, quod idem est; ac *æquitas*: hæc datur, quando prudenter supponitur, specialem aliquem casum sub legis generali obligatione non comprehendi, e. g. si manifeste majus bonum impediretur, vel nimis difficile foret legem observare. 4^{to} Dispensatio legis proprie est, ubi publica Autoritate pro singulari casu, vel persona legis obligatio tollitur, quæ alias adesset. Hæ notiones non arbitrariæ sunt, sed factis communes, ab ipso recentissimo scriptore adversæ partis, clariss. D. Jungius Moguntia Professore defuntæ *).

§. 4.

Epikia, & *Dispensatio* magnam sæpe affinitatem inter se mutuo habent, & vulgari saltem sensu non raro confunduntur: hinc ad evitandam inanem de nomine litem, & ferendum de factis historicis justum judicium inter utramque discrimina bene sunt observanda. Hæc autem præcipua sunt, quibus *Epikia* differt a *Dispensatione*. 1^{mo} *Epikia* etiam sine *Autoritate*, & *jurisdictione* a subdito legis **) potest fieri: contra *Dispensatio* tantum dari potest ab eo, qui in ipsam legem habet *jurisdictionem*, vel æqualem cum Legislatore, vel ab illo delegatam. 2^{do} *Epikia*, qua subditus legis suo pro arbitrio utitur, debet in rei evidentia fundari, ut *moraliter* certo judicari possit, legem hic, & nunc non obligare: contra *Dispensatio* datur, ubi sine hac legis obligatio adhuc valeret. 3^{io} In re dubia citra urgentem necessitatem non licet subdito *privata* uti *Epikia*, sed debet pro *authentica* adire superiorem: contra, qui dispensandi jure est præditus, vel solum delegato, potest eodem uti sine requisita Superioris *Autoritate*, dummodo sat gravis adfit dispensandi causa. Hæc quidem de notionibus, nisi me omnia fallunt, sat clare, sat solide dicta, queis D. Jungius totum sui ædificii fundamentum jam esse subversum facile animadvertet.

§. 5.

*) Facta dispensationum episcopallum historica ex tribus primis seculis. Moguntia 1787.

**) Ut bene observat Thomassinus, inanis est terminologia lis, sitne Princeps legi subditus, an non? Nos concedimus *quoad vim directivam*, sive *pro foro interno*: negamus autem *quoad vim coactivam*, sive *pro foro externo*. Tantum hoc posteriori sensu *Subditum Legis* intelligimus. Papam igitur pace mea dixeris vel esse *supra*, vel *infra* leges: utrumque eo modo, quo me explicavi, admitto.

§. 5.

Progredimur nunc ad alterum punctum, penes quem nativo jure Authoritas sita sit dispensandi in lege Ecclesiæ universali. Equidem duo doctissimi viri præter quosdam alios, Thomassinus & Vanespenius hanc potestatem jure quodam proprio, & antiquissima praxi, cujus tamen nullum exacte quadrans exemplum proferunt, Episcopis vindicare contendunt. Quodsi vero satis attente ipsorum scripta lustrentur, manifeste apparebit, non adcurato satis, strictoque sensu, sed latiore minusque determinato vocem *Dispensationis* ab illis fuisse acceptam, scilicet pro quacumque legis remissione. Sic prior quidem ille omnino aperte casus necessitatis, aut justæ epikiæ, ubi persecutionum acerbitas non fere consilia cum summo Pontifice communicare sinebat, inter dispensationes recenset *). Alter vero generalem suam, ac indeterminatam dispensationis notionem mox in Proëmio manifestat, ubi eam vocat quancumque *legis veniam*, aut *providam juris relaxationem* **). Cum isti Duumviri ante ardentem de hujus juris exercitio controversiam viverent; non opus erat, ut tam curato studio, prout nostra exigit ætas, sua verba librarent. Ceterum eruditis omnibus constat, inter hos Duumviros, licet scientiæ laude æque præstantes, alterum tamen minus primo erga apostolicam Sedem æquum fuisse. Pereiram vero, Febronium, aliosque aperte S. Petri Vicario, nec huic solum, sed toti jurisdictioni ecclesiasticæ iniquos nihil moror.

§. 6.

Missis jam privatis Doctorum opinionibus ad argumenta me verito ex ipsa rei natura, & indole desumenda, atque inprimis, penes quem sit *ordinarium* jus in lege universali dispensandi, tum vero penes quem non sit, indagabo. Prima est mea propositio, eaque Catholico-rum omnium communis: *Romanus Pontifex in qualibet lege ecclesiastica potest justa ex causa dispensare*. Cum enim ipsius Ecclesiæ utilitas aliquoties exigat legis universalis remissionem, sequitur, ad eam concedendam esse debere in Ecclesia potestatem; hanc autem in eo residere, qui supremus est Legislator, & Rector, ipsa rei natura clamat: atqui supremum

*) Vet. & nov. Eccles. discipl. Tom. 2, Cap. 24, n. 14.
 **) Jus eccles. univers. Tom. 2. Dissert. de *Dispensationibus*.

num in Ecclesia (saltem extra œcumenicam Synodum) Legislatorem & Rectorem esse romanum Pontificem; nemo Catholicorum potest negare; ad hunc ergo jure ordinario spectare dispensandi potestatem necessario concludendum est.

§. 7.

Hinc merito Pontifex Innocentius III effatus est *): „Adscitis aliis in partem sollicitudinis summus Pontifex assumptus est ad plenitudinem potestatis, qui cum Moderator sit canonum, juri non facit injuriam, si dispensat.“ Juvat hac de re pariter angelicum Doctorem audire, S. Thomam, cujus in catholica Ecclesia haud vulgaris æstimatio est: is autem contra Religiosorum impugnatores ita scribit **): „Illa, quæ SS. Patres determinaverunt esse de jure positivo, sunt relicta sub dispositione Papæ, ut possit ea mutare, vel dispensare secundum opportunitates temporum, vel negotiorum. Nec tamen Papa, quando aliquid aliter facit, quam a sanctis Patribus statutum sit, contra eorum statuta facit, quia servatur intentio statuentium, etiamsi non servantur verba statutorum, quæ non possunt in omnibus casibus, & in omnibus temporibus observari, servata intentione statuentium, quæ est utilitas Ecclesiæ, sicut & in omni jure positivo accidit.“ Atque hoc jus pontificiæ potestatis tam certum est inter Catholicos, ut, quæ maxima ejusdem Sedis adversaria fuit, Basileensis Synodus illud agnosceret, & profiteretur ***): „Per Concilium autem statuta in nullo derogant suæ (Pontificis) potestati, quin pro tempore, loco, causis, & personis, utilitate, vel necessitate suadente moderari, dispensareque possit, atque uti summi Pontificis epikia, quæ ab eo auferri nequit.“

§. 8.

In his Basileensis Synodi verbis plura sunt, quæ reflexionem merentur. 1^{mo} Unanimem omnium Catholicorum sensum esse debuisse de hac Pontificis potestate, eoquod dicitur, nihil huic per statuta Concilii derogari, quod antiquam possessionem denotat. 2^{do} Ejusmodi jus tamquam Primatui essentiale fuisse spectatum, *quod ab eo auferri nequit*. 3^{do} Eo ipso, quod inter propria summi Pontificis jura referatur, Pa-

*) Epist. 154.

**) Cont. impugn. Religios. Cap. 4.

***) Epist. Synod. num. 5.

Patres agnovisse, jus illud dispensandi non posse *ordinarie* Episcopis convenire: secus enim non proprium jus summi Pontificis foret, sed commune omnium Episcoporum. Concilium quoque Tridentinum supposuit, saltem aliquas dispensationes jure ad summum Pontificem pertinere, dum earum executionem Ordinariis *tamquam Delegatis apostolicis* esse committendam statuit *). Restat, ut jam alteri meæ consentias propositioni :

§. 9.

Episcopi non possunt ordinario jure in lege Ecclesiæ universalis dispensare.

Dico eos non jure ordinario posse, haud vero nego vel ex speciali juris dispositione, vel consuetudine, vel delegatione id posse. Principio S. Thomæ utor, certe ex sola ratione firmissimo **): *In lege humana publica non potest dispensare, nisi ille, a quo lex Autoritatem habet, vel is, cui ipse commiserit.* Atqui lex Ecclesiæ universalis non habet Autoritatem ab ullo particulari Episcopo, sed vel ab ipsa Ecclesia, vel a supremo ejusdem Rectore, qui romanus est Pontifex: ergo Episcopos lege universalis inferiores, eidemque pro foro in- & externo subiectos non posse in illa dispensare necessario sequitur: „Et profecto „(verba sunt Ss. Papæ Pii VI ***) si jus esset Episcopis relaxare legem — „ab Ecclesiæ potestate constitutam, & ubique in catholicis ditionibus „receptam; tota everteretur Ecclesiæ disciplina, Caput subiceretur „membris, ac proinde actum esset de ecclesiastica Hierarchia divinitus „instituta, ut generaliter declaravit S. Nicolaus P. I in epistola ad Michaelem Imperatorem relata in canon. *inferior* distinct. 21. — Fidei dogma est, Episcoporum Autoritatem, & jurisdictionem subiectam esse „summi Pontificis Autoritati, ut subesse debeant Sedis apostolicæ statutis — ut patet ex jurisdictionis Primatu singulari Christi munere Petro, ejusque Successoribus divinitus collata.“ Causa ergo finita est, Petrus in Nicolao, & Pio, Christus autem in Petro, & Nicolao, & Pio locutus est.

G g 2

§. 10.

*) Sess. 22 de Reform. Cap 5.

**) 1, 2 Quæst. 97, C. 4 ad 3.

***) Breve apostolic. ad Rvdiss. Archiepisc. Colon. 20 Januar. 1787.

§. 10.

Sed vel Gallicanam etiam doctrinam ex præstanti Galliæ Theologo audiamus; ita Tournelius loquitur *): „Nec nocet, quod Episcopus vi officii in sua Diœcesi posse dicitur, quidquid potest Papa in tota Ecclesia (en principium hodiernorum a Galliæ Doctore refutatum) nam axioma illud nec in jure canonico habetur, nec nititur firma ratione, imo veritati repugnat, si generaliter accipiat, ut verba fontant: alioquin enim posset Episcopus ponere impedimenta Matrimonium dirimentia, confirmandi potestatem simplici Presbytero committere, — quæ omnia falsa sunt, & inaudita. Citatum igitur axioma hoc solum sensu verum est, quod Episcopus ea in Diœcesi sua possit, quæ ad ordinariam ejus gubernationem necessaria sunt, cum debita tamen canonicis legibus subordinatione.“ Hæc Gallorum doctrina est, hæc nostra fuit Germanorum, hæc etiamnum omnium est Catholicorum, qui idem sentiunt, idem credunt, quod tamquam fidei dogma Nicolaus P. antiquitus, & novissime Pius VI declararunt.

§. 11.

Jam satis de jure! Quoniam practica maximopere hæc præsens controversia est, tertio nunc loco non amplius quid liceat, sed quid ad utilitatem gregis fidelium expediat, seu de utili dispensationum usu, & exercitio dispiciendum. Ipsi adeo illi Doctores, qui dispensandi potestatem in Episcopatu fundari existimant, pro ipsa tamen praxi ad Ecclesiæ bonum & tranquillitatem, nec non ex generali reverentia summo Sacerdoti debita standum consuetudine, & receptis moribus docent. Ita Vanespenius **): „Dum de potestate dispensandi super certo disciplinæ puncto agitur, ea Episcopo competat, nisi ostendatur, vel ex posterioribus Ecclesiæ ordinationibus, aut praxi vel consuetudine potestas super eo dispensandi privative ad Concilia, aut ad romanum Pontificem, cui hodie aliqua, quæ olim episcopali Autoritate absoluebantur, privative competere indubitatum, spectare.“ Igitur saltem ex consuetudinis iusto titulo Papæ jus dispensandi competere Doctor ille apud adversarios magnus indubitatum habuit. Thomassinus vero a sua eximia erga apostolicam Sedem reverentia laudatissimus rationibus insuper æquissimis ejusmodi potestatis exercitium summo Pontifici

*) Tom. 6 de Legibus Cap. 6, Artic. 2.

**) De Dispensat. Cap. 1, §. 7.

fici vindicat *): „Eoquod antiquis Patribus consultissimum fuerit visum:
 „1mo solvi leges non posse, nisi ea Authoritate, qua & condi:
 „2do brevi ruituram canonum disciplinam, si quot Episcopi, tot essent
 „ejus solvendæ Auhores, ubi singulis adlubesceret: 3^{to} optari magis
 „posse, quam sperari, ut ea tota & sapientiæ luce & vigoris constantia
 „instructus sit quisque Episcopus, quanta desideretur, ut provide sem-
 „per dispensetur, & sobrie: 4^{to} ne toties movendæ sint lites in Episco-
 „pos, qui improvide, aut molliter dispensassent.“ Ex hisce motivis
 quæ sane in se ipsis gravissima sunt, primum ad provincialia Concilia,
 pedetentim autem ad solum Pontificem dispensandi morem transiisse au-
 tumat. His accedit, quod olim Patres ita voluerint: „Uno amore pu-
 „rioris semper, & politioris disciplinæ, & juris dispensationum apud
 „eos deponendi, commendandique, qui eo sanctissime defungerentur.
 „Plurculum enim inerat vigoris, sapientiæ, constantiæque in Conciliis
 „provincialibus, quam in singulis Episcopis: plus inerat etiam Pontifi-
 „cibus, & Synodis romanis, quam ceteris Synodis provincialibus, ut
 „fidem faciunt Pontificum Decretales.“ En virum, etſi veritatis non
 plene conscium, tamen æquitatis amantissimum!

§. 12.

Pondera, quæſo, apud temetipſum, quanta disciplinæ ruina,
 quanta Ecclesiæ perturbatio, quanta fidelium scandala, quanta adverſa-
 riorum ludibria inde ſint oritura, ſi cuilibet ſingulari Episcopo pro ſuo
 unius arbitrio liceat leges, & canones univerſales remittere, quidni &
 tollere? quidni & nova ſtatuta facere? quidni e.g. Matrimonii impedi-
 menta etiam dirimentia abrogare, aliave, ſi placet, inſtituere? omnia
 enim iſta æquali jure ſequuntur ex falſo Principio, ſemel tamen aſſum-
 to: *Episcopum in ſua Diœceſi plenam habere Potestatem regendi & ordinandi.*
 Edic! qualis tunc Ecclesiæ univerſalis facies, quam miſere, quam tur-
 piter dilacerata? Pone duas ſibi contiguas Diœceſes, quarum unius Pa-
 ſtor forſan nimium laxus ſit, e.g. circa jejunii & abſtinentiæ præceptum,
 alterius vero Paſtor veteris disciplinæ tenacior: cum haud ita diſſimilis
 utrobique ratio locorum ſit, plurimum tamen diſciplina differat; quæ-
 nam illius apud bonos vilipenſio, niſi & ſcandalum, hujus vero apud
 improbos invidia, atque odium? Quid de re Matrimonii delicatiſſima

G g 3

dicam,

*) De Diſpenſ. Cap. 24, n. 14.

dicam, si forte temere in una Diœcesi conjugia admitterentur, quæ in proxima ut nulla, & irrita damnarentur??

§. 13.

Fac Episcopos posse, quæ voluerint, ex falso principio, plenam esse suam potestatem, quia a Deo institutam, hanc ligari, aut circumscribi non posse, sed ad pristinam, prout inter persecutiones exercebatur, amplitudinem esse reducendam; quid suo tempore Presbyteros prohibebit iisdem armis contra Episcopos pugnare? Quid autem dixi, suo tempore? Publica documenta testantur *) hoc triste dissidium inter ordinem episcopalem, & Presbyteros jam actu grassari in quibusdam Italiæ Diœcesibus: non solum theoretice doceri, sed etiam practice a Parochis exerceri dicuntur sequentia: „Parochos esse a Deo institutos, fidei iudices, Ordinarios, in suâ (quippe divinæ) jurisdictionis exercitio independentes, nullum dari conscientiæ casum, ita reservatum, ut ipsi absolvere nequeant, ipsorum esse facultatem in sua Ecclesia prædicandi, aut absolvendi etiam Episcopo concedere, uno verbo, secundum primæ disciplinæ puritatem teste Hieronymo se in omnibus parem, & æqualem cum Episcopo potestatem habere excepta solum ordinatione.“ Qualia hæc doctrinæ monstra, qualis Sacerdotii confusio, & sacræ Hierarchiæ destructio! sed quanam mali radix, nisi falsa *episcopalis* independentiæ prætenso?

§. 14.

In casu, quo aperte suo munere male fungitur Episcopus, a Papa vi Primatus admoneri potest, aut corrigi, inquires. Sed edissere, nonne melius est, præcavere, ne error contingat, quam commissum errorem in Pastore non sine ovium scandalo corrigere? Quid vero, si correctio non facile profutura videatur, si Pastor forte corrigi impatiens, si suæ independentiæ falsis licet præjudiciis fultæ sit justotamantior, si externa etiam vi, & Autoritate seculi sit potens? Nonne tunc in extrema forsitan malorum particulares greges præcipitentur? Huic ruinæ divinus Salvator optimum remedium providit, unum totius ovilis summum Pastorem instituendo, qui oves, & Pastores regat, cui omnes Christi fideles, prout catholicæ fidei professio fert, veram, seu sinceram obedientiam præstare tenentur.

§. 15.

*) Religionsjournal. Mayn 1787. Beplage 17, Absatz 3.

§. 15.

Si demum ad hodiernam praxin dispensationum pontificiarum *pro foro externo* attendamus; inveniemus eam a Concilio Tridentino ita sapienter fuisse ordinatam, ut & honori, & officio Ordinarii quam optime sit consultum. Non enim immediate per romanam curiam dispensationes conceduntur, sed Ordinario tamquam apostolico Legato (quod sane honoris est) ad prævium examen committuntur, an preces sub vel obreptionis vitio non subjaceant. Contra si proprium jus dispensandi Episcopis tribuas, eos tamen a necessitate frequentioris ad Papam recursus eximere haud valebis: cum enim dispensationum causæ, præcipue matrimonialium non raro difficiliores sint, & graviores; tam divino jure, quam antiquissima Ecclesiæ disciplina ad Caput, seu Petri Sedem recurrere, atque inde agendi normam petere necesse erit; quod si ævo sequiore satis accurate fuisset observatum, forte tot pontificias reservationes non haberemus. Quid ergo melius pro fidelium salute, quid dignius episcopali erga Matrem, & Magistram universalem devotione, quam tranquillam disciplinæ ab ipsa Ecclesia introductæ tenere observantiam?

§. 16.

Quarto nunc loco ad veterem historiam, ceu optimam ecclesiasticæ disciplinæ magistram revertamur: & de tribus quidem primis seculis sermo est inchoandus, qua de re ante omnia præjudicio laborare doctis. alias Jungium animadverto, dum in sua historica Dissertatione de Dispensationibus episcopalibus pag. 13 scribit: *Tribus primis seculis omnium consensu purissima erat regiminis ecclesiastici, divinitus, & per Apostolos constituti observantia.* Non sane tam facile omnes eruditos sibi consentientes habebit: regimen enim ecclesiasticum a Deo - homine institutum quidem fuit quoad radicem suam, seu regendi potestatem; nequitiam tamen quoad omnimodam formam, quam Christus suis Vicariis, totius Ecclesiæ Pastoribus pro temporum, locorum, & personarum ratione ordinandam permisit. Apostoli etiam per orbem dispersi, & convertendis præcipue infidelibus intenti circa stabiliendam universalis regiminis formam parum aut nihil occupabantur, ita quidem, ut sævientibus tunc, & per tria secula fere continuatis persecutionibus hanc impeditam potius dicas, quam integrè constitutam. Igitur primævis illis temporibus purissimam quidem *morum disciplinæ*, haud vero *regiminis ecclesiastici*,
cujus

cujus tunc vix ulla adhuc libertas erat, observantiam fuisse eruditi omnes consentient. Magni interest, hac in re præjudicio esse vacuum, ne in errorem incidamus primorum temporum disciplinam restitui cupientes. Morum tunc purissima, & adhuc imitanda nobis observantia, regiminis autem forma nondum integra, nondum tranquille ordinata fuerat: imo pristina morum sanctitate jam multum deficiente necesse est aliam regiminis esse disciplinam.

§. 17.

Porro de primis illis temporibus doctiss. Kübelius Heidelbergæ Professor *) duplicem dat, eamque in genere sat firmam critices regulam, frustra a D. Jungio impugnata. Prima est: „Lustratis tribus primis Ecclesiæ seculis nihil usquam dispensationis a singulis Episcopis concessæ occurrit, nec etiam credibile est, ulla in legibus Ecclesiæ paucissimis a Christianis primo adhuc calore ferventibus vel petitis, vel ab Episcopis datas esse.“ Altera sic habet: „Neque præterea, si etiam datæ essent, quidquam concluderetur pro jure ordinario Episcoporum, cum in illo æstu persecutionum multi casus incidere potuissent, qui ad tum ad superius tribunal præclusissent.“ Quoad primam regulam observo, id de dispensatione circa disciplinam *moralem* intelligendum, tantum excepta seculo tertio lapsorum pœnitentia: circa disciplinam vero *ceremonialem* mox vetustissimum saltem quoddam vestigium proferam, & quidem pontificiæ dispensationis. Quoad alteram; nomen *Dispensationis* nobis nunc est in proprio, strictoque sensu secundum præmissas antea notiones sumendum, prout nostris quadrat temporibus, ut casus *necessitatis*, aut juxta *epikie*, qui illis persecutionum seculis sæpius occurrant, inde excipiantur.

§. 18.

Liceat ad duplicem hanc regulam & mihi tertiam de meo addere: „Pro certo habendum est primæ illius ætatis Episcopos dispensationem proprietalem in lege universali sine prævia Papæ sententia dare numquam fuisse ausos.“ Quale sit ab epikia discrimen dispensationis proprie sic dictæ; jam supra §. 4 declaravimus; ubi nimirum nec casus sit ejusmodi, qui prudenter a lege exceptus judicari possit, nec urgens necessitas, quæ aditum ad superius tribunal impediret. Jam vero

*) Exercitium canonicum de *Marrimonio*. Heidelberg. 1786. Præf.

vero pretiosa, quæ ex illa aurea ætate restant, monumenta testantur, quam tenera sollicitudine Episcopi in rebus dubiis, aut difficilibus, ne quid temere susciperent, sanctam, & apostolicam Petri Cathedram consuluerint. Plura antiquissimarum relationum exempla jam præcedenti Corollario §. 2 ex Constantio attuli, quæ iterum repetere superfluum foret: tantum ex ejusdem haud suspecti Scriptoris Præfatione pag. 29 sequentia exscribo: „Apostolica Sedes undique, nec ab Occidente solum, sed & ab Oriente arduis in rebus consultebatur, uti lo-
 „cuples testis est Hieronymus, qui cum Romam venisset, id sibi mun-
 „ris injunctum scribit, *ut in Chartis ecclesiasticis juvaret Damasum, romanæ
 „urbis Episcopum, & Orientis atque Occidentis consultationibus responderet.*
 „Amissa quidem Pontificum eorum, qui ante Damasum fuerunt, deside-
 „rantur plurima id genus responsa, sed quæ supersunt, hæc certe ab-
 „unde probant vel primis etiam Ecclesiæ seculis viguisse apostolicæ Se-
 „dis consulendæ morem.“ Dein Constantius ex litteris Dionysii Alex-
 „andrini Præsulis ad Xistum hæc refert: *Vere etenim, Frater! consilia
 opus habeo, & sententiam expeto, ne forte halluciner.* Si dubiis in rebus
 tanta fuit sanctorum illorum Præsulum anxietas, quis credat ausos fuisse
 per se solos, inconsulto Pontifice, & sine urgente necessitate legem
 Ecclesiæ manifestam, eamque universalem relaxare? —

§. 19.

Jam ad singularia dispensationum exempla. Secundo seculo saltem, ut ego quidem existimo, insigne quoddam vestigium occurrit, & quidem pontificiæ dispensationis. Erat in Ecclesiis christianis, præcipue Romana ab Apostolorum ævo introductum, Paschatis solemnitatem non cum Judæis luna ipsa decima quarta mensis primi, sed die dominica proxime insequente celebrare. In Ephesina autem, aliisque Asiæ minoris Ecclesiis mos Judæorum antiquus viguerat a S. Joanne Apostolo descendens, cujus discipulus S. Polycarpus Smyrnæ Episcopus adhuc sub Aniceto P. supervixerat. De hac Asiaticæ Ecclesiæ a reliquis differentia quæstio fuit mota volente Pontifice, ut Asiani Romanis se conformarent. Quamobrem testibus Irenæo, Hieronymo, & Eusebio S. Polycarpus Romam contendit, suæ observantiæ apostolica S. Joannis traditione sussultæ rationem redditurus, eandemque, ut putabat, tanti Apostoli Autoritate Pontifici persuasurus. Revera Pontifex, etsi Romanam, aliarumque Ecclesiarum traditionem Asiaticis præponendam judicaret,

dicaret, ob reverentiam tamen erga apostolicum Virum Polycarpum, suum illis morem, licet a communi observantia alienum, adhuc permittendum censuit. Hoc itaque primum mihi videtur exemplum pontificiæ saltem permissionis, nisi propriæ dispensationis, eoquod observantia huius disciplinæ ceremonialis numquam antea in Ecclesiis Asiæ obtinuerit.

§. 20.

Ex seculo tertio, quæ clariss. Jungius profert quasi dispensationis episcopalis exempla, ea quidem omnia levi brachio dispelluntur. Prima *ordinationes* respiciunt Neophytorum tam canone 79 Apostolorum, quam ipso apostolico præcepto I ad Timoth. III, 6 prohibitas. Parum quidem illis, quos Apostolorum vocant, canonibus moverer, de quibus saltem singulariter sumtis non constat, an primis tribus seculis jam extiterint, minus, an ubique locorum cogniti, vel recepti fuerint. Sed & contra Apostoli præceptum plures factas fuisse ordinationes *ex necessitate*, non per dispensationem fateor, id quod Nicænum Concilium can. 2 adfirmat. Necessitati autem positivum vel apostolicum præceptum cedere, quis dubitet? Certe sæviente tunc persecutione haud mirum, plurimis in locis rarissimos fuisse viros probatæ diu virtutis, ita ut necesse fuerit & noviter conversos, fidei tamen fervore excellentes ad Ecclesiæ ministerium assumere. Quin neque diffiteri possumus, jam ante Nicænam Synodum, prout humanæ naturæ est deficere, quædam adversus ecclesiasticam regulam cogentibus hominibus, quorum tunc erat suos eligere Præsules, *male* facta fuisse. Quod insuper quorundam virorum sanctorum, uti Cypriani, Gregorii Thaumaturgi, aliorumque ex legem attinet electionem, hanc potius per viam *inspirationis*, quam dispensationis dicas contigisse. Tunc enim temporis, ubi donum miraculorum adhuc frequens erat, vox populi, vox Dei credebatur, sæpe externis signis sat manifesta. Sic in specie de Cypriano ejusdem Diaconus, & vitæ scriptor Pontius testatur: *Judicio Dei, & plebis favoribus ad officium Sacerdotii, & Episcopatus gradum adhuc neophytus — electus est* *).

§. 21.

Alterius generis facta, præcipue ex S. Cypriani scriptis adducuntur, ut inde exempla primævæ disciplinæ *circa penitentiam* ab Episcopis remissæ ostendantur. Sane, inquiunt, omnibus in Ecclesiæ historia obiter

*) Tillemond. Tom. 7, p. 89.

ter versatis constat; antiquitus multo rigidior, quam nostris diebus pœnitentiæ disciplinam viguisse; nihilominus tantus ille rigor communis disciplinæ pro singularibus circumstantiis interdum ab Episcopis fuit remissus, sive, ut hodie dici amat, dispensatus. Antequam ad singularem hac in re nos immittamus, juvat cum doctiss. Chardon *) prænotare, primum a dilapso tertii seculi dimidio firmam, fixamque pœnitentiæ agendæ normam in Ecclesia fuisse institutam: etsi enim ea esset omnium Christianorum sententia, lapsos post Baptismi gratiam non sine dolore, sa pœnitentia ad secundam reconciliationis gratiam posse admitti, diversæ tamen quoad pœnitentiæ modum, ac tempus erant consuetudines pro diversis Ecclesiis, imo vix ullibi constans consuetudo, sed pro delicti gravitate, & pœnitentis dispositione, aliisve adjunctis mensuranda plerumque Sacerdotum judicio pœnitentia. Ex quo manifestum fit, ubi firma nondum lex fuit, nec locum propriæ dispensationi esse potuisse.

§. 22.

At vero inde a Cypriani, & Cornelii ævo universalis in Ecclesia lex pœnitentiæ constituta est, *lapsis in persecutione, hoc est, Sacrificatis, diu trabendam esse, agendamque plenam pœnitentiam **)*: qua in lege cum Episcopi aliquoties dispensasse legantur, quis neget antiquam illorum dispensandi potestatem? Operæ pretium est inprimis ipsam hanc legem penitus considerare, tum vero historica facta ad trutinam vocare. Cyprianus itaque causa lapsorum pro tempore persecutionis suspensa mox reddita pace in Concilio Carthaginensi peremptorium decretum de lapsis edidit, quod ad Cornelium Romæ creatum Episcopum transmissum, ab eodem adprobatum, atque in Ecclesia fuit publicatum. En ex epistola ad Antonianum ipsa decreti verba: „Scripturis diu ex utraque parte „prolatis temperamentum salubri moderatione libravimus, ut nec in „totum spes communicationis, & pacis lapsis denegaretur, ne plus de „speratione deficerent, & eoquod sibi Ecclesia clauderetur, secuti secuti „lum gentiliter viverent; nec tam rursus censura evangelica solveretur, „ut ad communicationem temere proflirent, sed traheretur diu pœnitentia, & rogaretur dolenter paterna clementia, & examinarentur „causæ, & voluntates, & necessitates singulorum.“ Si jam ad spiritum

H h 2

&

*) Histoire des Sacramens. Tom. 3, p. 250.

**) Cyprian. epist. 52 ad Anton.

& scopum hujus decreti attendamus, apparebit Africanos Patres non tam positivam statuere legem *humanam* voluisse, quam authenticam dare circa pœnitentes *divinæ* legis declarationem, eamque tantum' pro tranquillo pacis tempore. Versabantur enim inter duos veluti scopulos, cum ex una parte Novatiani per nimiam austeritatem omnem spem reconciliationis Sacrificatis abnegarent, ex altera vero parte quidam Presbyteri per nimiam laxitatem Martyrum precibus commendatis sine ulla pœnitentia, quin etiam sine humili confessione absolutionem concederent, quod Cyprianus contra Evangelii regulam, & Dei iudicium pugnare merito asseruit. Propterea ad errorem utrinque vitandum, Scripturas diu ex utraque parte librarunt, easque hoc temperamento declararunt, lapsos non penitus a communione esse abjiciendos, sed neque temere, & absque competente pœnitentia admittendos. Dico hujus decreti de lapsorum reconciliatione scopum, & principale objectum fuisse *competentem* pœnitentiam quam quidem *diuturnam* volebant, sed quod maxime notandum pro quietis, & pacis tempore, & sub hac adhuc clausula, ut quoad satisfactionis exactionem causæ, & voluntates, & necessitates singulorum pœnitentium antea examinarentur. Unde sequitur, hoc ipso decreto, tantum pro tranquillis temporibus facto circa modificationem pœnitentiæ Episcopis quamdam *licentiam*, vel *epikiam*, vel *indulgentiæ* facultatem esse relictam. Si qua ergo remissio quoad tempus, aut modum pœnitendi lapsis indulta; id ipsius legi licentia, vel iusta epikia Pastores poterant, quin proprie dispensationem darent, quæ legis obligationem etiam pro singulari hoc, vel illo casu stringentem supponeret. Uno verbo: lex illa pœnitentiæ haudquaquam ita omnimode determinata fuit; sicut quædam hodiernæ sunt e.g. matrimoniales, cum impedimentis dirimentibus quoad certos gradus consanguinitatis, vel affinitatis, aut certa propter crimina conjunctæ. Attamen, ut ne forte de verbo videar litigare, dicas pace mea quamcumque datam *indulgentiam* licet in proprio sensu *dispensationem*. Nunc ergo illius ævi disciplinam ex factis singularibus perspicimus.

§. 23.

Quænam sunt illa, quæ oculis nostris occurrunt, dispensationis in lege pœnitentiæ exempla? Nonne propriis, quæ assumunt, armis causam suam sauciant adversarii? S. Cornelius Pontifex romanus quatuor Confessores cum aliis quibusdam Novatiano schismate abreptos, iterum-

iterumque redeuntēs sine ulla pœnitentiæ impositione per solam amnestiam in Ecclesiæ sinum recepit, ut ipse Cornelius ad Cyprianum perscripsit. Idem Pontifex, prout ex Cypriani epistola ad Antonianum patet, Trophimum Episcopum, qui idolis sacrificaverat, populiq; multitudinem secum ab Ecclesia abduxerat, facti pœnitentem, fratresque seductos reducentem satisfactione remissa mox ad communicationem, in statu tamen laicali, admisit. Quæ si veræ dispensationis, ut placet, exempla sunt, quid inde colligitur, nisi a summis Pontificibus, neutiquam vero a singulis Episcopis pro illius ævi disciplina jus dispensandi exercitum fuisse? Trophimum Episcopum, ajunt, a Cornelio non ut Papa, sed ut Patriarcha dispensatum. Sed nugæ sunt istæ: constat enim romanum Episcopum non alia, nisi Petri Autoritate Patriarchatum Occidentis obtinuisse. Quod ergo ut Patriarcha Occidentis, id hoc ipso ut Petri Successor jure nativo, & divino fecerat. Tantum in Oriente propter locorum distantiam Patriarchæ humana dispositione instituebantur, qui & ipsi ampliorem suam præ aliis Episcopis Autoritatem ex illa Petri, tamquam rivulum ex universali fonte traxerant. Quamobrem jura pontificia, & patriarchalia in romano Episcopo *separari* non possunt; tantum *distingui* sub hoc intuitu, quod ex pontificiis juri-
bus aliqua Patriarchis Orientis fuerint communicata, quæ eadem in Occidente ut Patriarchalia considerantur, sua autem in radice, & origine vere Pontificia sunt. Hinc antiquissimi Pontifices, quidquid etiam in Occidente ordinaverant, apostolica Petri Autoritate se ordinare profitebantur.

§.24.

Ita vero clariss. Jungius contra nos argumentum instruit: Novatiani hanc Cornelli erga Trophimum indulgentiam in calumniam vertentes, ab illius communione Antonianum Numidiæ Episcopum abstrahere conabantur. Quare Cyprianus huic Africæ Præsuli litteras misit, in quibus Cornelium, tamquam qui nihil contra veterem disciplinam attentaverit, ex eo Capite purgat, quod in similibus adjunctis jam antea Africani quoque Episcopi disciplinam relaxarint: *Sicut Antecessores nostri sæpe fecerunt, colligendis fratribus nostris charissimus frater noster Cornelius necessitati succubuit.* Ergo & Episcopis usitata fuit dispensandi facultas. Respondeo, præterquam quod illa Cornelli potius ex necessitate indulgentia, quam propriæ dispensatio fuerit, hoc quidem argumentum quam certissime extra

oleas vagari. De eo enim nunc quæritur, an *singuli* Episcopi, atque in lege *universali* umquam dispensare potuerint. Notum est autem ex historia Ecclesiæ, ante S. Cyprianum firmam, fixamque pœnitentiæ normam, & legem universalem nondum extitisse, in qua Antecessores illius dispensare potuissent. Si vero circa particularem suæ Provinciæ disciplinam quidquam relaxaverint, quis est, qui id juris penes ipsos fuisse neget? penes ipsos, inquam, hoc est, S. Cypriani Antecessores, Carthaginenses Archiepiscopos, totius Africæ Primates, in Synodo cum suis Suffraganeis congregatos. Quid inde juris accrescit singulis Episcopis? Nam sancta illa tempora docent, nec contra particularem disciplinam quidquam ab Episcopis singularibus attentatum, sed hujusmodi res a Patriarcha, vel Primате convocata in Synodo provinciali fuisse ordinatas, nec solum in provinciali Synodo ordinatas, verum etiam, ut S. Cypriani exempla abunde demonstrant, cum apostolica Petri Cathedra communicatas.

§. 25.

Ab ipso autem S. Cypriano data dispensatio allegatur. Cum nova instaret post brevem pacem Ecclesiæ persecutio, S. Cyprianus severiorem illam *generalem* legem, ut lapsi plenam agerent pœnitentiam, relaxandam censuit, decrevitque dandam esse pœnitentibus pacem, et si nondum expleto tempore, ut ad imminens prælium eo fortius armarentur. Concilii hac super re habiti relationem ad Cornelium P. ipsis Cypriani verbis audiamus *): „Ut omnes omnino milites Christi, qui arma desiderant, & prælium flagitant, intra castra Domini colligamus, „*necessitate cogente* censuimus, eis, qui de Ecclesia Domini non recesserunt, sed pœnitentiam agere, & lamentari, ac Dominum deprecari a „primo lapsus sui die non destiterunt, pacem dandam esse, & eos ad „prælium, quod imminet, armari, & instrui oportere. Obtemperandum est namque ostensionibus, atque admonitionibus iustis, ut a „pastoribus oves in periculo non deserantur, sed grex omnis in unum „congregetur, & exercitus Domini ad certamen militiæ cœlestis armetur. Merito enim trahebatur dolentium pœnitentia tempore longiore, ut infirmis in exitu subveniretur, *quamdiu quies, & tranquillitas adesset*, quæ differre diu plangentium lacrimas, & subvenire sero morientibus in infirmitate pateretur. At vero nunc non infirmis, sed fortibus

*) Epist. 54.

„bus pax necessaria est, nec morientibus, sed viventibus communicatio
 „a nobis danda est, ut, quos excitamus, & hortamur ad prælium, non
 „inermes, & nudos relinquamus, sed protectione Sanguinis & Corporis
 „Christi muniamus. — Idoneus esse non potest ad martyrium, qui ab
 „Ecclesia non armatur ad prælium, & mens deficit, quam non acce-
 „pta Eucharistia erigit, & accendit. — Nonne nobis vel negligentia
 „segris, vel duritia crudelis adscribetur in die iudicii, quod Pastores
 „creditas, & commissas nobis oves nec curare in pace, nec in acie
 „voluerimus armare? — Placuit nobis S. Spiritu suggerente, & Domi-
 „no per visiones multas, & manifestas admonente, quia hostis immine-
 „re prænunciatur, & ostenditur, colligere intra castra milites Christi,
 „examinatis singulorum causis pacem lapsis dare, immo pugnaturis arma
 „suggerere, quod credimus vobis (Pontifici) paternæ misericordiæ
 „contemplatione placiturum.“

§. 26.

Hisce manifestis verbis Africani Patres explicant, eandem illam
 generalem legem, cujus Authores fuerant, & plena lapsorum pœnitentia,
 tantum *pro tempore quieto, & tranquillo* datam fuisse. Non itaque
 remittere se legis observantiam iudicant, sed jam legem pristinam non
 obligare *necessitate cogente*, ut milites Christi intra castra colligantur, sie-
 que Ecclesiæ communionem, & Sacramento Corporis & Sanguinis Chri-
 sti ad pugnam armentur. Observatu dignissimum est, sanctam hanc
 Carthaginensem Synodum, etsi divinis visionibus illustratam, ac de as-
 sistentia S. Spiritus merito confidentem, non tamen prætermisisse suam
 erga apostolicam Sedem reverentiam, sed hujus *Placito* se subiecisse.
 Levissima sunt, quæ D. Jungius ingerit, minusque digna, quam ut iis
 tempus teramus. Meretur autem animadversionem, quod in historica
 ejusdem Dissertatione p. 116 legitur: „Antiquas Synodorum ordinatio-
 „nes Episcopis saltem conjunctis *sine recurso ad romanum Pontificem*, quod
 „*rei caput est*, tribui debere.“ Falsum hoc quidem est, sed & a sum-
 ma Sede abhorrescentiam denotat, non dependentiam eidem debitam,
 non obedientiam, non reverentiam, non charitatem. Sane haud ita
 SS. Patres nostri fenserunt, sed illis regula fuit antiquissima: *Ne absque*
consensu romani Pontificis quidquam ab Ecclesiis decernatur. Hanc regulam
 duo græci Scriptores Socrates *), & Sozomenus **) quinto seculo,
 longe

*) Hist. eccles. Lib. 2, Cap. 8.

**) Lib. 3, Cap. 10.

longe igitur ante Isidorum Mercatorem testati sunt. O utinam eandem hanc Ecclesiam antiquissimam regulam Punctatores Emfani ante oculos sibi posuissent!

§. 27.

Ut vero de singularibus adhuc Episcopis exemplum proferam, mox patebit, quam parum pro sancti illius ævi observantia sibi præsumferint, ita, ut ne in dubio quidem casu, an lex valeret, sine Primatis consilio quidquam enuntiare auderent, minus proprie dispensare in lege, cujus obligatio adhuc adesse nosceretur. De quibusdam in persecutione lapsis, sed postea pœnitundine ductis, qui novo animo Christum confessi, & propterea exilium, & bonorum jacturam passi, id est, extorres facti sunt, de his Caldonius Africæ Episcopus ita ad S. Cyprianum scripsit *): „Oportebat vobis scribere, quoniam ii, qui postea, „quam sacrificaverunt, iterato tentati extorres facti sunt. Videntur ergo mihi abluisse prius delictum, dum possessiones & domos dimittunt, „& pœnitentiam agentes Christum sequuntur. — Quamvis mihi videantur debere pacem accipere, tamen ad consultum vestrum eos dimisi, *ne videar aliquid temere præsumere*.“ Cyprianus in responsione sua hunc Episcopum dilaudat, quod ex Scripturis divinis, quarum peritus esset, recte judicaverit hujusmodi fratres non amplius esse legibus pœnitentiæ humanis subiectos, sed *coram Deo* vera pœnitentia, & dominicæ confessionis gloria pacem sibi promeruisse. Verba Cypriani sunt: „Nec miramur, si exercitatus, & in Scripturis dominicis peritus caute omnia, & consulte agas: recte enim sensisti circa impertiendam fratribus nostris pacem, quam sibi ipsi vera pœnitentia, & dominicæ confessionis gloria reddiderunt.“ Neque igitur Cyprianus in lege ecclesiastica dispensavit, sed hosce Confessores non amplius lege ecclesiastica teneri declaravit, quippe qui jam vera pœnitentia apud Deum satisfecerint. Hinc merito doctiss. Morinus textui Cypriani hanc adjungit notam **): „Illud, quod potissimum spectat Ecclesia in reconciliationis præstatione, non est pœnitentiæ longitudo, aut severitas, sed sinceritas, & veritas.“

§. 28.

*) Inter Cyprian. Epist. 19 & 20.

**) Comment. historic. de Pœnitentia Lib. 4, Cap. 11, n. 8.

§. 28.

Equidem in veteri illius ævi historia unum invenio factum cujusdam Africae Episcopi, nomine Therapii, „qui Presbytero Victori, antequam pœnitentiam plenam egisset, & Domino Deo, in quem deliquerat, satisfecisset, immaturo tempore, & præpropere festinatione „pacem dederat“ *). Sed malefacta in exemplum trahi nequeunt, nec jus inde probari: immo hinc elucet, quantum vel ipsorum Episcoporum potestas legibus disciplinæ constricta fuerit. Cum enim hac de re Fidus Episcopus ad S. Cyprianum Primatem querimonias detulisset, is habita cum 66 Episcopis Synodo vehementer factum improbavit his verbis: „Quæ res nos satis movit, *recessum esse a decreti nostri Autoritate*, „ut ante legitimum, & plenum tempus satisfactionis, & sine petitu, „& conscientia plebis, nulla infirmitate urgente, ac necessitate cogente pax ei concederetur. Sed librato apud nos diu consilio satis fuit „objurgare Therapium Collegam nostrum, quod temere hoc fecerit, & „instruxisse, ne quid tale de cetero faceret.“ En, quantum Autoritatis in Episcopum vel Primas Carthaginensis humano tantum ex jure habuerit! Si tunc temporis jam cognita fuissent hodierna principia; nonne Therapius excipere potuisset, sibi pro sua Diœcesi plenitudinem potestatis a Deo immediate fuisse commissam, quæ ab hominibus coartari non posset, omnes Episcopos æqualem inter se Autoritatem habere, se melius agnoscere, quid illis in circumstantiis magis conveniens, & utile fuerit, soli Deo se regiminis sui rationem redditurum? Nonne ita Episcopus ille, si pertinaciter voluisset causam suam defendere, Cypriano rescribere potuisset, prout humanum in nævum incidens postea Cyprianus Episcoporum causam, vel suam potius contra supremum Ecclesiæ totius Primatem, Stephanum P. defendit? Satis jam de tribus primis seculis, ubi quædam pontificiæ quidem dispensationis vestigia, vel exempla inveniuntur, nullum autem, nec unicum cujusdam singularis Episcopi exemplum (nisi, qui forte attentati sui, castigationem retulerit) ne dicam circa legem Ecclesiæ universalem, nequidem circa particularis Provinciæ disciplinam. E contrario autem vel dubiis tantum in rebus singuli Episcopi caute, & sollicitè vel ad totius Ecclesiæ Caput, vel ad suæ Provinciæ Primatem relationes fecerunt, a quo in Synodo sententia lata, & pro rei magnitudine, vel difficultate Sedis

apo-

*) Cyprian. Epist. 59.

apostolicæ judicio submissa est secundum antiquissimam illam regulam:
Ne absque consensu romani Pontificis quidquam ab Ecclesiis decernatur.

§. 29.

Quantum jam, & sequiora secula attingentibus vel apud solum Thomassinum tot pontificii juris circa dispensationes documenta se nobis offerunt, ut describendo singula in prolixum opus liber accresceret. Quare brevitatis studio nonnisi pauca seligam, ac de Siricio quidem initium faciam, cujus extat responsio ad consultationem Episcopi Tarraconensis, qui Damaso Prædecessori complures disciplinæ maculas in Ecclesia Hispanensi exposuerat, potissimum vero circa ordinum collationes. Episcopi, qui antea pœnitentiæ subiectos, & bigamos contra canones ordinaverant, haud suam dispensandi potestatem prætendebant. Hinc Pontifex veniam concessit sic Ordinatis in suo, quem acceperunt, ordine permanendi, Episcopis vero ipsis, si quidquam simile pro futuro committerent, congruam comminatus est pœnam *): „Et „quia his omnibus, quæ in reprehensionem veniunt, sola excusatio „ignorationis obtenditur, cui nos interim solius pietatis intuitu necesse est clementer ignoscere; quicumque pœnitens, quicumque bigamus, „quicumque viduæ maritus, ad sacram militiam indebite, & incompetenter irrepsit, hac sibi conditione a nobis veniam intelligat relaxatam, „ut in magno debeat beneficio computare, si adempta sibi omni spe „profectionis in hoc, in quo invenietur, Ordine perpetua stabilitate „permaneant: scituri posthac omnium Provinciarum summi Antistites, „quod si ultra ad sacros ordines quemquam de talibus crediderint assumendum, & de suo, & de eorum statu, quos contra canones, & „interdicta nostra provexerint, congruam ab apostolica Sede promendam esse sententiam.“ Si ordinario dispensandi jure gavisi fuissent Episcopi, itane Pontifex rescribere potuisset? Aut jamne Siricius ante Isidorianas decretales essentialia, & divina Episcoporum jura iniquissime violavit?

§. 30.

Cum in quodam Italiæ Concilio statutum esset, ne ad ullum ecclesiastici ordinis gradum reciperentur, qui jam in hæresi fuissent; totius Africæ Episcopi huic *transmarino* Concilio, haud dubie a Papa ipsis notificato, ita assurgebant, ut non sibi id sumserint, quo hujus decreti tem-

*) Epist. I, Cap. 15.

temperamentum circa Donatistas recipiendo per se ipsos facerent, quamquam illi antiquissimus suæ Provinciæ usus adversaretur, & aperta dispensandi utilitas, nisi & necessitas in oculos incurreret. Quidquid ergo humanitatis, & indulgentiæ Donatistis concedendum putarunt, ab Episcopis Italiæ, & maxime ab Anastasio Papa sibi exorandum statuerunt *): „Placuit, ut litteræ mittantur ad Fratres & Coëpiscopos nostros, & maxime ad Sedem apostolicam, in qua præsidet Anastasius.“ Memoratu digna est in hoc factum annotatio Thomassini, vel apud ipsos adversarios pro meritis suis æstimatissimi **): „Erat Carthaginensis Archiepiscopi eminentissima quædam honoris, & potestatis prærogativa supra omnes Episcopos Africanos, Primatesque, sive Metropolitanos. Quidquid Patriarchis & Conciliis eorum diocesanis, sive universalibus juris inerat & Autoritatis, inerat & Carthaginensi. Non alia suæ libertatis, & antiquæ Autoritatis amantior, & retinentior fuit Ecclesia quam Africana. Et tamen ad Anastasium P. illa confugit universa, ut hanc dispensationem eliceat, cum Augustino scilicet suo persuasissima, quamquam omnes Episcopi in locum Apostolorum successerint, & quodam certo sensu ita Episcopi omnes, sicut Apostoli omnes pares sint, penes Sedem tamen Petri longe cumulationem, quam penes ceteros quoslibet Episcopos autoritatis & potestatis vim residere.“

§. 31.

A scopo clariss. Jungius aberrat, dum duos canones, ex Synodo Ancyrana unum, & alterum ex Nicæna excitat, qui Episcopis permittunt cum lapsis, & jam pœnitentibus, si visum fuerit, humanius agere: haud enim Episcopis illam dispensandi potestatem negamus, quam expressa juris dispositione acquisiverunt. Ceterum illa quidem remissio mere pœnalis satisfactionis non omni ex parte quadrare videtur, cum observante Morino Ecclesia semper sinceritatem, & veritatem pœnitentiæ potius, quam durationem, & severitatem respexerit; hinc numquam absolute, & omnimode determinata lex Ecclesiæ fuit circa modum, & tempus satisfactionis, ita ut erga Pœnitentes indulgentia uti esset ipsa legis licentia, non dispensatio. Atque hanc quidem facultatem indulgentiæ, non tamen plenariæ, sed cum restrictione canon An-

I i 2

cyræ.

*) Codex can. Afric. apud Coletum Concil. Tom. 2, p. 1305.

**) De Dispens. Cap. 24, n. 6.

cyranus V , & Nicænus XI Episcopis expresse attribuunt. Quid inde?

§. 32.

Merito desperata videatur D. Jungii causa, eoquod vel maximam vim in argumento multis ex capitibus incerto ponere nitatur. Est autem Ancyranæ Synodi canon IX vel X, quem apud Guilielmum Beveregium, Ecclesiæ Anglicanæ Presbyterum *) cum græco idiomate collatum ita lego, prout & Gentianus Hervetus transtulit: „Quicumque Diaconi constituti in ipsa constitutione protestati sunt, & dixerunt oportere se uxores ducere, cum non possint sic manere, ii, si uxorem postea duxerint, sint in ministerio, *eoquod hoc sit illis ab Episcopo concessum*. Siqui autem hoc silentio præterito, & in ordinatione, ut ita manerent, suscepti sunt, postea autem ad matrimonium venerunt, ii a Diaconatu cessent.“ Mirum, quantum Moguntiæ Professor hoc canone pluribus adhuc obscuritatibus involuto gloriatur! „Hic aperte præsumitur, ait, de se prohibitum fuisse Diaconis post ordinationem matrimonium, quod tamen gravibus de causis permittere possit Episcopus, adeoque in lege illa prohibente dispensare: ubi enim sola cum silentio admissa ordinatio inducit obligationem non nubendi, ejusque violatio pœnam, ibi est vera lex; & ubi pœna cessat, si accesserit permissio Episcopi, ibi est vera legis relaxatio.“ Non satis accurate a Doctore Moguntino Synodi verba hic referuntur. Concilium non dixit *gravibus de causis*, sed unicam nominavit, eamque *expressam* repugnantiam in ordinatione contra calibatum, neque *permitteri* ab Episcopo posse, sed tantum id fuisse factum, hoc est, *permissum*, quamvis & hoc nonnisi *interpretative*. Itaque

§. 33.

Huic adversariorum Achilli sequens oppono dilemma: Vel canon ille Ancyranus tantum statutus est, ut retro ageret in jam præteritas Diaconorum ordinationes, vel ut esset etiam lex pro futuris Diaconorum ordinationibus. Priorem quidem illum sensum ipsa canonis verba, quæ semper de præterito loquuntur, insinuare videntur. Tantum ergo duo sunt, quæ inde necessario colliguntur, communem jam tunc fuisse in illis locis disciplinam, saltem consuetudinis, aut observantiæ; et si

*) Synodicon, sive Pandectæ canonum. Oxonii 1672.

etsi forsitan non cujusdam positivæ legis, qua Diaconis matrimonium prohiberetur; & quosdam Episcopos hinc inde in Diaconos ordinasse, qui expresse protestati sunt, se continentiae servandæ pares non fore. Hoc Episcoporum factum admittimus, nec miramur, partim ob Ecclesiæ illo persecutionum tempore necessitatem, dum esset Clericorum penuria, ad quorum statum interdum juvenes cetera probi, vel inviti, & non sine violentia adigebantur spe concepta, per ipsam statum sanctitatem fore in officio continendos, ita seculi quinti initio Synesii exemplum docet; partim ob quorundam in Oriente Episcoporum ignaviam, qui teste S. Epiphanio etiam Presbyteris liberos facere permiserant, forte multo facilius Ministris uxorem ducere, & iis quidem Diaconis, quos tantum ex necessitate ordinaverant contra continentiam protestatos, quæ non sine injuria videretur imposita. Facta hæc Episcoporum vel ex bona præsumptione, vel ex culpabili ignavia non negamus, sed hæc esse legitimæ dispensationis exempla pernegamus. Certe in Antiochena præsertim Provincia inde a Paulo Samosateno continentia clericalis disciplina grave vulnus est passa: Clerici enim non solum utebantur uxoribus, sed novas etiam ducebant, ut ex hac Ancyranæ Synodo, & altera Neocæsarensi ejusdem anni 314 patet. Hoc vulnus curaturi Ancyra Patres generaliter Diaconos, qui uxorem duxerant, ab officio removebant, ex æquitate tamen mitius agunt erga eos, quos utpote invitos ab Episcopis juste non potuisse ad tam grave jugum continentia obligari censent, atque ideo in ministerio manere permittunt potissimum, ut factis Episcoporum parcerent, ne ea forte cum scandalo effectu frustrarentur. Siqua hic dispensatio, potius nunc a Synodo, & in gratiam Episcoporum, quam antea a singularibus Episcopis data est, qui continentia onus Diaconis, aut *nullatenus* relaxare volebant, aut *male*. Ceterum non solum ante Ancyranam Synodum, sed etiam posthac usque ad Nicænam de continentia Diaconorum adeo *lex positiva* universalis non extitisse videtur, ut nequidem disciplina *observantia* apud Orientales uniformis fuerit; nam in Neocæsarensi Synodo tantum Presbyteris expresse can. l matrimonium prohibetur.

§. 34.

Atqui *expressam* legem, quæ jam ante Synodum Ancyranam Diaconis nuptias interdixit, jactitat D. Jungius, & quidem ex Apostolorum canonibus, constitutionibus, nec non Paphnutii in Nicæno Con-

cilio dictis. Miror Moguntiae Professore nostris his illustratis diebus non vereri aequae suspectas merces, ac illae sunt Isidorianae, in forum producere: eruditus enim Criticis, ut Vanespenius docet, communis hodie sententia est, tam parum canones illos Apostolorum esse, quam famosas Decretales Pontificum Antefiriciorum. Si quis ex Romano-Catholicis, vulgo *Transalpinis* has Decretales amplius excitaret, Superius quantum clamoris! — Sed idem ille sic dictus Apostolorum canon XXVII, ad quem clariss. Jungius provocat, quinto nondum seculo ubique notus fuit, aut receptus: Concilium enim Chalcedonenſe tantum ait can. XIV, *in nonnullis provinciis* concessum esse Lectoribus, & Cantoribus uxores ducere. Quod dictum de Canonibus Apostolorum, valet pariter de Constitutionibus: & Paphnutius in Nicæno Concilio non utique *positivum* canonem; sed *veterem Ecclesiae traditionem* allegat, eamque non probat ubique locorum uniformem, & constantem fuisse. Ubinam ergo exemplum episcopalis dispensationis ante Ancyranam Synodum?

§. 35.

Quod si ad alteram Ancyranæ canonis explicationem confugere D. Jungius placeat; ut Episcopis pro futuro liceret Diaconos in lege continentiae dispensare; jam quidem ipse animadvertet, extra rhombum se versari: neque enim nos Episcopis negamus dispensandi potestatem expressa juris dispositione illis adjudicatam, vel legitima solum consuetudine acquisitam. Verumtamen si is sit Ancyranæ canonis sensus, illum sane probare hodie non possumus; cum certum sit, eundem non solum in latina Ecclesia, sed etiam in ipsa græca numquam fuisse receptum, probatumve. Paucis enim posthac annis Socrate teste Paphnutius in Concilio Nicæno voluit Clericos, etiam Diaconos ad abstinendum a nuptiis secundum veterem traditionem esse obligandos. Ipse denique Vanespenius observat, hoc posteriori sensu canonem Ancyranum ab aliis Ecclesiis non fuisse acceptatum: idem Balsamon, Zonaras, aliique græci canonum interpretes testificantur. Certe si observantia hic canon apud Græcos invaluisse, Trullana Synodus non statuisse deponi Diaconos debere, qui post ordinationem matrimonium contraxerint. Forsitan ergo, si tamen Ancyranus hic canon pro futuro umquam valere debuerit, uti sanior, ita verior quoque ejusdem interpretatio est, qua cum aliqui cum Martino Bracarenſi Ecclesiae romanæ student reconciliare, sicut in altero meo *Programmate de Conjugio Sacerdotibus permittendo*

p. 25 indicavi: „Ita, ut verba illa de ordinandis Diaconis, si qui continere se nolint, in ministerio maneat, sensum dent, in eo gradu ministerii, in quo sunt, permaneant, eoquod ab Episcopo permitti sunt sibi, scilicet suæ libertati ad altiorum gradum ascendendi, vel non ascendendi, prout græco originali textu exprimitur: διὰ το ἐπιτραπήν, καὶ αὐτοὶ ὑπο τῆ ἐπισκοπῆς. Si qui vero tacita continentiae professione cum Diaconatu conjuncta manu inpositionem (quæ expressio de prioribus non adhibetur) acceperint, & postea uxorem duxerint, ab omni Clero, seu ministerio, etiam priori gradu inferiore removeantur.“ Quid infirmius adversariorum argumento ex hoc Ancyrano canone?

§. 36.

Si ad remissionem satisfactionis pœnitentibus indultam vellem redire; ex seculo quinto indulgentiæ plenariæ, tantum a summis Pontificibus concessæ insignia elucerent exempla, eoquod in universalibus etiam Conciliis ne collecti quidem Episcopi, sed soli Pontifices pœnitentibus satisfactionem, eamque totam condonaverint, uti in Ephesina Synodo Cælestinus P. Nestorianis redeuntibus, in Chalcedonensi Leo M. ipsi Eutycheti, dummodo sincere ab errore resipisceret. Vide Thomassinum sæpe jam excitatum. Cum vero idem alias licet doctissimus Author quandoque dormitet, in specie circa ordinationes, & translationes Episcoporum, quarum dispensationes veteri jure ad Concilia provincialia putat pertinuisse; ego quidem in exempla ab ipso allata *) diligentius inquisivi: at nullum plane, nec unum inveni propriæ dispensationis in lege universali datæ ab Episcopis exemplum; plura vero a summis Pontificibus vel concessæ vel denegatæ dispensationis. Duo tantum proferam.

§. 37.

Perigenes Corinthi mundo natus, & Deo renatus, ejusdemque Ecclesiæ Clero adscriptus totius Provinciæ Synodo approbante ordinatus est Patrensi Episcopus; sed a plebe illa repulsus, ad Corinthios rediit brevi postea ab iisdem Sede vacante ad Episcopatum assumptus est.

Non-

*) Vet. & nov. Eccles. discipl. Tom. 2, Lib. 2, Cap. 55, 56, 60, 61. Lib. 3, Cap. 24.

Nonnulli religione ducti verebantur, ne hac postulatione canones Ecclesiæ violarentur, qui Episcoporum translationes vetabant. Si tunc persuasio fuisset, canones relaxandi facultatem in Episcopis residere; nihil videri poterat convenientius, faciliusque, quam eandem a Primæ Thessalonicensi petere. Sed illa adhuc ætate Ecclesiæ vel dubiis in causis sine Pontificis præcitu nihil suscipere tentabant. Igitur Corinthii Sedem apostolicam precibus adierunt, ut ejus Authoritate voti sui compotes fierent. Bonifacius P. etsi aquam illorum petitionem judicaret, miratus tamen nullas Rufi Thessalonicensis adjunctas litteras, illis rescribere noluit, ut & apostolicæ Sedis Authoritas, ne forte quid immaturum faceret, & delegato Primati honorificentia servaretur. Dum vero Rufus suum de Perigene testimonium dedit petentium desideriis omnino conforme; tunc Pontifex missa ad eundem altera epistola Perigenem Corinthiorum Episcopum Authoritate sua confirmavit.

§. 38.

Nundinarius Barcinonensis Episcopus paulo ante mortem suam percipere se significavit, ut sibi Successor daretur Irenæus alterius in Hispania urbis Episcopus, quem & hæredem sibi adoptaverat. Ea videbantur utriusque Præfulis merita, ut non populus tantum, Clerusque Barcinonensis consensum darent, sed & Metropolitanus cum Provinciæ Episcopis. Num vero propria quoque Authoritate legem ecclesiasticam relaxare audebant, quæ designationem, & translationem Episcopi prohibuerat? Causæ quidem dispensandi manifestæ, gravissimæque aderant, duorum Episcoporum merita, petentium nobilitas, & multitudo, Ecclesiæ utilitas, nec non & specialis causa, quod Irenæi Episcopatus in loco situs esset Barcinonensi Ecclesiæ obnoxio, ubi non sine assensu provincialium Episcoporum jam erat ordinatus. Hæ causæ in Synodo Metropolis Tarraconensis librata, ac justæ fuerant inventæ, ut rata haberetur designatio, & translatio Episcopi. Nihilominus cum gravior hæc causa esset, secundum Ecclesiæ canones ad supremum Caput referenda; Metropolitano, & Concilii Patribus visum, necessario sibi ad eundem esse Petri Sedem, ut sua decreta illic adprobarentur: hinc ad Hilarium P. litteras mittunt reverentia plenas hisce verbis *): *Suppliciter precamur Apostolatuum vestrum ut humilitatis nostræ decretum, quod juste a nobis videtur factum, vestra Authoritate firmetis.* En præclarum sanctæ illius discipli-

*) Hilar. Epist. 2.

sciplinæ exemplum, imitatione hodierna dignissimum, sed amplius eventum mirare! Res secus cecidit, ac Hispaniæ Præsules tantis rationum momentis ducti expectabant, ipsorum decreta jussu Pontificis rescissa, præceptumque, ut inviolata fide canones observarentur. Ad Ascanium Metropolitam, seu Primatem rescripsit Hilarius, ut mox juberet ad Ecclesiam suam, remeare Irenæum, idque illi ex indulgentia concedi, qui tamquam Nicæni canonis contemtor foret deponendus. Num putas, amice Lector! Hispaniæ Primatem ceterosque Præsules huic inopinato Pontificis responso fuisse indignatos, suamque dispensandi potestatem prætendendo refragatos, ut Febronius quidem consilia suggerit? Cogita, num antiquis illis temporibus minor fuerit summæ Sedis Autoritas, & minor erga eandem Episcoporum reverentia? quænam disciplinæ mutatio instituenda sit, si ad sancta illa tempora, quod optandum, foret reformanda? an veteri observantiæ Isidoriana, nonne potius Gerfoniana, & novissime Febroniana principia vulnus, — utinam non lethale! — inflixerint ???

§. 39.

Quid! quod illorum temporum exemplis adeo ostendi non possit singularium Episcoporum potestas circa relaxandos Ecclesiæ canones, ut eadem etiam expressis prohibitionibus demonstretur negata. Ita Innocentius I, cum ad declinandum schisma Episcopis Macedoniæ permisisset a Bonofo ordinatos ex venia, & humanitate ad functiones suorum ordinum admittere, rescripsit *): „Jam ergo, quod pro remedio, ac „necessitate temporis statutum est, constat primitus non fuisse, ac fuisse regulas veteres, quas ab Apostolis, vel ab apostolicis viris traditas Ecclesia romana custodit, custodiendasque mandat his, qui eam „audire consueverunt. — Quod necessitas pro remedio invenit, cessante necessitate debet utique cessare. — *Advertite, quod necessitas im-* „*petrovit, in pace jam constitutas Ecclesias non posse præsumere.* Sed, ut „sæpe accidit, quoties a populis, aut a turba peccatur, quia in omnes „propter multitudinem non potest vindicari, inultum solet transire: „priora dimittenda dico Dei judicio, & de reliquo maxima sollicitudine præcavendum.“ Cælestinus P. severe monuit Episcopos, ne quem-

dam

*) Apud Coustant. Epist. 17, n. 9.

dam de Laicis contra canones promoveri ad Episcopatum finerent *): „Nulli Sacerdotum suos liceat ignorare canones, nec quidquam facere, „quod Patrum possit regulis obviare. Quæ enim a nobis res digna fer- „vabitur, si decretalium norma constitutionum pro aliquorum libitu, „licentia populis permessa frangatur? Audivimus quasdam civitates Epi- „scopos sibi petere velle de Laicis — Talibus, Fratres charissimi, qui „juris nostri, id est, canonum gubernacula custodimus, necesse est ob- „viemus, *bisque fraternitatem vestram epistolis commonemus, ne quis Laicum „ad ordinem Clericatus admittat.*“ S. Leo factas ab Episcopis ordinationes bigamorum, & incontinentiæ macula infamum omnes declarat irritas, ac pro futuro disciplinæ custodiam inculcat **): „Non levi nos mæro- „re contristat quoties aliqua contra constituta canonum, vel ecclesia- „sticam disciplinam præsumpta, vel commissa cognoscimus: quæ, si non „qua debemus, vigilantia refecimus, illi, qui nos speculatores esse vo- „luit, excusare non possumus, permittentes sincerum corpus Ecclesiæ, „quod ab omni purum macula custodire debemus, ambientium improba „contagione fœdari. — *Si quis fratrum contra hæc statuta venire ten- „taverit, a suo se noverit officio submovendum, nec communionis nostræ futu- „rum esse consortem, qui socius esse non voluit disciplinæ.*“ Hilarius P. contra provinciales Episcopos stomachatur, quod Ecclesiæ canones relaxare præsumserint, jubetque ***): „Ut nulli fas sit, *sine status sui periculo* „vel divinas constitutiones, vel apostolicæ Sedis decreta temerare, „quia nos, qui potissimi Sacerdotis administramus officia, talium trans- „gressionum culpa respiciet, si in causis Dei desides fuerimus inventi.“ Gelasius P. inexorabilis stat pro canonum defensione, ne Episcoporum licentia dissolvantur ****): „Cum nobis contra salutarium reverentiam „regularum cupiamus temere nihil licere, & cum Sedes apostolica su- „per his omnibus favente Deo, quæ paternis canonibus sunt præfixa, „pio devotoque studeat tenere proposito; satis indignum est, quem- „quam vel *Pontificum*, vel ordinum subsequentium hanc observationem „refutare, quam B. Petri Sedem sequi videat, & docere: satisque con- „veniens sit, ut totum corpus Ecclesiæ in hac sibiimet observatione con- „cordet, quam illic vigere conspiciat, ubi Dominus totius Ecclesiæ „posuit Principatum.“ Si qua virtus *tolerantia* est; quis eam recentiorum Pontificum non commendet præ illa veterum Antecisidoriana erga Episcopos severitate?

§. 40.

*) Epist. 5 ad Episcop. Apuliæ, & Calabriæ.

**) Epist. ad Episcop. Italiæ.

***) Ad Episcop. Hispaniæ.

****) In Decretis. C. 9.

§. 40.

Satis quidem illustria hæc priorum quinque seculorum documenta sunt, quæ *generalem* dispensandi potestatem non penes provinciales Episcopos in Synodo congregatos, minus penes singulares fuisse contestantur. Restat, ut ultimo loco in facta historica indagem de dispensationibus *specialiter* circa matrimonii impedimenta. Atque hoc præcipue loco cum doctis, Thomassino velim observari, eum fuisse veteris Ecclesiæ spiritum, ut, si quæ forsitan darentur dispensationes, eæ omnes tunc concederentur, postquam jam in canones peccatum fuerit, & quando emendatio, aut pœna lustuosior Ecclesiæ, quam ipsum peccatum esse potuerit. Sexto seculo primum occurrit exemplum dispensationis pro ineundo matrimonio a S. Pontifice Gregorio M. concessæ: bonus enim Pastor, ne Anglorum gentem noviter ad fidem conversam nimii rigoris metu a via salutis abstergeret, leges ecclesiasticas matrimonii mitigandas censuit, & hac adhuc parvulis dandum, usque dum temporis progressu solidioris cibi fierent capaces: hinc in sexta ad Augustinum responsione Neoconversis hisce ad tertium usque cognationis gradum dispensavit. Hanc sextam Gregorii responsionem Moguntini Censores *mensurari* in suo pontificiæ Bullæ ad Rvdiss. Archiep. Colon. examine *) nescio, an per ignorantiam, an mala fide commiscant cum septima, qua Pontifex tantum per tolerantiam matrimonia etiam in gradibus jure divino prohibitis jam contracta ita vult permitti, ut conjuges propterea communionem sancta non priventur, sed per Sacerdotum instructionem metu divini judicii ad spontaneam separationem persuadeantur. Huic, inquam, septimo Pontificis responso, quod non jam legis dispensatio, sed facti illiciti tolerantia est, Moguntini aliud, quodammodo simile opponunt Episcoporum in Synodo Aurelianensi de a. 538 decretum, can. X: „De incestis conjunctionibus ita, quæ sunt „statuta, ferventur, ut hi, qui aut modo ad Baptismum veniunt, aut „quibus Patrum statuta sacerdotali prædicatione antea in noticiam non „venerunt (ita pro novitate conversionis, ac fidei suæ credimus consulendum) ut contracta hucusque hujusmodi conjugia non solvantur.“ Primo intuitu quisque perspicit, non hic de dispensatione agi contrahendi matrimonii, sed de non solutione jam contracti, & ex jure natura

K k 2

turæ

*) Ecclesiastici isti Censores, & publici, ut fama fert, Doctores in Sede Metropolitana tam irreverenter & atrociter, adversus sanctam apostolicam Sedem debacchantur, ut non supra Febronius, forsitan, si hodie viveret, nec Lutherus.

turæ validi, quippe quod ante Baptismum, aut saltem in legis ignorantia, eaque invincibili fuit initum: ita Gallicanus Doctor Tournelius *).

§. 41.

Moguntini aliud ejusdem seculi factum ex Gallia producunt. Prætextatus Archiepiscopus Rothomagensis teste Gregorio Turonensi in secundo affinitatis gradu Principem Meroveum dispensaverit. Sed historiam rei placet ex Fleurio referre **). Chilpericus Rex Galliæ a Regina contra Prætextatum incitatus eundem in Parisiensi Concilio 45 Episcoporum multiplex ex capite accusavit, inprimis quod Meroveum Principem cum affine sua matrimonio junxerit. Ea, quæ Rex objiciebat, ut Fleurius narrat, Prætextatus *insciabatur*. En uno verbo solutum, sectumve nodum! Verum dato etiam, quod primum hoc accusationis caput Episcopus fuerit confessus; quid inde, nisi *irregulariter factum* probatur? Nonne propterea, quod canones fregerit, reus agebatur? num factum hoc, tamquam episcopalis juris exercitium defendit Gregorius Turonensis? absit! tantum is coram Rege ita Prætextati causam tuitus est, ut ille non contra Ecclesiæ canones condemnaretur: nam ipse Rex simulatorium Processum fatabatur. Egregie huc spectant, quæ doctiss. Chardon scripsit ***): „Verum est, quod plures inter Principes „illicita matrimonia contra leges Ecclesiæ contraxerint, sed non invenitur, quod illa manus suas dederit, vel dispensationem concesserit. „Quodsi quidam Episcopi interdum fecerint ex Principum metu, vel „complacendi studio; per Confratres suos vituperati, & a sancta Sede „correcti sunt, quæ in pluribus occasionibus strenue se opposuit, ut „sanctitatem conjugiorum servaret, & regulas a Patribus hac super re „statutas observari faceret.“

§. 42.

Juvat Moguntinos Scriptores in historiam Gallicanæ Ecclesiæ, qua immerito gloriantur, amplius introducere. Ita Natalis Alexander narrat ****): „Cum Robertus Rex Francorum Bertham consanguineam „suam duxisset uxorem, graviter ipsum reprehendit Gregorius V, nec „non Episcopos, qui illicito matrimonio præbuerant assensum, Syno- „dum-

*) De Sacram. Matrim. Quæst. 8 de Affinitate carnali.

**) Ad an. 577. §. 32.

***) Histoire des Sacrements, Tom. 6, pag. 446.

****) Histor. eccles. Tom. 6, C. 1, Art. 23.

„dumque Romæ congregavit a. 998, in qua de hujusmodi conjugio dissolvendo actum est. Octo canones in ea editi. Primo statutum, ut Robertus Rex Bertham, quam contra leges uxorem duxerat, dimitteret, ac septem annorum pœnitentia crimen expiaret sub pœna anathematis: Bertha eidem pœnitentiæ addicta. Secundo Erchenbaldus Archiepiscopus Turonensis, qui ipsos conjunxerat, & Episcopi, qui his nuptiis interfuerant, atque consenserant a communione suspensi, donec ad Sedem apostolicam satisfacturi venissent.“ Anne Archiepiscopus Turonensis, aliique Galliæ Episcopi suam dispensandi potestatem, ceu jure divino sibi propriam contra Pontificis decretum prætenderunt? aut num tota Gallicana Ecclesia, quam plenis buccis solent adversarii deprædicare, jurium suorum ignara fuit? ubinam ergo tunc Ecclesia, si neque in Gallia extitit, quæ veritatem divinæ institutionis circa episcopalem potestatem agnovisset? Nonne diaboli fraudibus, id est, lisdori decretalibus, quæ peiores fuerint omni hæretico veneno, corruptam, deceptamque dici oportet universam Ecclesiam? ‘bella reformatio episcopalis jurisdictionis! ita quam proxime sicut in Anglia, etiam in Germania sectam *Episcopaliū* haberemus.

§. 43.

Eodem narrante Historico Philippus Galliæ Rex, qui primum Bertham Florentii Hollandiæ Comitis filiam in matrimonium duxerat, huic postea repudium dedit assinitatem causatus, pro ea vero Bertradam Fulconis Andegavensium Comitis uxorem consanguinitate sibi junctam rapuit, sibi que copulavit *quibusdam Episcopis adprobantibus*, qui favorem Regis divinis, & ecclesiasticis legibus præposuerant. Ivo Charnotensis, & alii prisicæ integritatis Antistites nuptias incestas, & adulteras palam improbarunt, earumque celebritati interesse recusarunt. Tanti scandali certior factus Pontifex Urbanus II scripsit ad Galliæ Episcopos præcipiens, ut Regem commonerent, & nisi resipisceret, ecclesiasticæ disciplinæ severitatem in eum exercerent. Pontifex ipse a. 1094 in Concilio Claromontano præfens Philippum Regem, & Bertradam pellicem de sententia Patrum excommunicavit, regiaque corona privavit. Tanta tunc fuerat Pontificis vel in Gallia Autoritas! Episcopi iidem, vel ejusdem farinae fuerint, qui sicut Philippi Regis cum Bertrada, ita Comitis Meduani filia cum suo cognato Comite Moritonio conjugium probaverint. Male facta in exemplum trahi non debent. Ceterum,

Kk 3

quod

quod Moguntini allegant factum ex Hildeberti Cenomanensis Epistola 34; cum apud nos rarior Benedictini Beaugendre editio, mihi ad manus non sit, in Spicilegio d'Agery, atque etiam apud Ceillier *) frustra quæsi-
vi, qui posterior tamen omnium epistolarum contenta extraxit.

§. 44.

Sunt tamen Moguntinis summe memorabilia, quæ apud laud. Ceillier in epistolis Hildeberti Cenomanensis Episcopi, dein Turonensis Archiepiscopi inveni. Is ab Archidiacono Diocesis Saginenfis consul-
tus, an liceret viduæ in maritum accipere fratrem prioris sui viri, quo-
cum antea nunquam cohabitaverat; neutiquam id licere respondit, quo-
niam matrimonii essentia non in consummatione, sed in ipso contractu
sita esset Lib. 2, Epist. 1. Archidiacono hac responsione non contento
Hildebertus ad ejus Episcopum alteram dedit epistolam, ut ille vetitas
nuptias interdiceret, nequaquam vero quamvis magna adesset ratio, ut
Episcopus saltem dispensationem concederet, quæ pro illius tempo-
poris disciplina nec ab ipso Pontifice danda sperabatur. Postea a. 1103
ad Archiepiscopum Rothomagensem scripsit de matrimonio in gradibus
cognitionis prohibitis, quod nullatenus permittendum esset, etsi bel-
lum hoc modo impediretur, quia malum non licet facere, ut bonum
inde nascatur: ergo malum facinus esse judicavit, ipsique Archiepiscopo
prohibitum ecclesiasticas leges violare, etsi causa dispensandi gravissima
foret. Epist. 14 **).

§. 45.

*) Histoire generale des Auteurs sacrés, & ecclesiastiques. Tom. 22.

**) Interim ex Operibus a D. Anton. Beaugendre Parisiis 1708 editis communicatam ac-
cepi hanc ipsam Hildeberti epistolam a Moguntinis excitatam, & ad Archiepiscopum
Rothomagensem scriptam: hæc est: „Sicut Sanctitatis vestræ pagina denunciat,
„filia Walteri de Meduana Comitiss de Moritonlo sanguine proxima prædicatur.
„Prius autem, quam præfatas personis matrimonii vinculum adstringeret, idem
„Walterus consanguinitatem mihi submurmurans, quid sentirem, cautius explo-
„ravit, bonum sibi videri, si bellum, quo diutius Comes in eum deservierat,
„intervenientis conjugii charitas terminaret. Addidit præterea, Vos, vestrosque
„Comprovinciales ei scripto confirmasse, compendio pacis, & quietis toleran-
„dum consanguinitatis piaculum. Unde & assensum Cenomanensis Ecclesiæ fu-
„turis nuptiis postulavit, ut ejus quoque Autoritate conjugio filię stabilitatem
„acquireret, si quando ei libellus repudii scriberetur. Mihi autem nec extor-
„queri assensus, nec persuaderi potuit, prudentiam vestram in eorum simplici-
„tatem descendisse, quos redarguit Apostolus dicentes: *Faciamus mala, ut ve-*
„niant

§. 45.

Porro jam Archiepiscopus factus idem Hildebertus a. 1127 Concilium provinciale Nanneti celebravit, in quo pro reformatione disciplinae varia sunt statuta, sed ea fideliter pro approbatione ad Papam Honorium II transmissa: Epist. 30, 31. Sic in Gallia vetus regula servabatur, *ut absque romani Pontificis consensu nihil in Ecclesiis decerneretur*. Demum cum Episcopus Claromontanus Hildebertum Metropolitam consultasset de Presbytero, qui furem suæ vitæ minitantem occidisset, respondit sibi quidem videri, hunc ad sacras functiones non amplius esse admittendum, *se tamen in simili casu decisionem sanctæ Sedis exploraturum*. Epist. 43. Tantam reverentiam vel primi Galliæ Archipræsules semper erga apostolicam Petri Cathedram fovebant: tantum aberant a præsumptione Ecclesiæ canones propria Authoritate relaxandi *).

§. 46.

„*niant bona*. Super his ergo, quod ad me pertinet, sollicitus fui; petenti „assensum dissensum nunciavi, nullius dispensationis intuitu permittens consanguineos, aut affines inhibitorum fœdera contrahere nuptiarum. Huic autem „connubio usque ad dissidium resistere, illius erit sollicitudinis, ad cuius Patrochlam nupta demigrasse cognoscitur. Conserve vos Dominus, Pater sancte!“ — Ex qua Epistola hæc colliguntur. Imo. Si quid provinciales Episcopi promiserint, tantum *tolerantia* fuit consanguinitatis placuli. Non enim piaculum fuisset, sed res licita, si dispensandi veram potestatem habuissent. 2do. Ipse Comes Walterus parum fiducia in hac promissione posuit, cum mœtueret suæ filiae libellum repudii dandum: ergo persuasio tunc fuit, firmam id concedendi potestatem nequidem in totius Provinciæ Episcopis, minus penes singularem quemlibet esse. 3tio. Hildebertus fidem non habuit Comiti persuasione Episcoporum assident, sed illicitam judicavit & malum facinus. 4to. Imo nuptias etiam contractas, tamen invalidas enunciavit, & episcopalis, seu parochialis sollicitudinis esse sic nuptam a viro separare. 5to. Recte verosimile non est Archiepiscopum Rothomagensis id antea promississe, aut certe postea de valore suæ promissionis dubitavit, secus consilia Hildeberti litteris non petiisset. Confutans hoc exemplo suæ causæ contrario Moguntini abstinuissent.

*) Alium jam morem sibi esse, Moguntini Scriptores ultro fatentur, quantum recorder, in oppressione divitiis Carthusiæ se quidem ad Papam scripsisse, sed huius *decisione* non expectata rem interim *executioni* dedisse: & in hoc quidem gloriantur. Velim, ut huius facti vel ex antiqua, vel ex Gallicana Ecclesia exemplum proferant. In eandem rem lectu dignissimæ animadversiones D. Schlettwein, protestandici jurisconsulti jam notæ sunt.

§. 46.

Alia occurrit in rem ex Galliis Historia. Philippus II, vulgo Augustus a. 1193 Indeburgin Canuti Danorum Regis sororem sibi in uxorem duxerat, sed postmodum ejusdem fastidio affectus novam appetiit conjugem. Ut divortio honestæ rationis speciem obduceret, romano Pontifici per Oratores suggestit, subreptione quadam se affinem duxisse, vinculi utpote illegitimi solutionem postulans. Papa judices ex Clero Gallicano delegavit addito hoc mandato, ut causam secundum canones severe, ac integerrime judicarent. Illi vero favorem Regis captantes asserta juramento a duobus Episcopis affinitate matrimonium diremerunt, aliamque Regi uxorem, nomine Mariam Ducis Bohemiæ filiam junxerunt. Indigne ferens fororis injuriam Rex Daniæ apud Cælestinum III conquestus est. Pontifex duos in Galliam Legatos misit, qui Regi Auctoritate apostolica denunciarent, ut a consuetudine Mariæ sibi temperaret, prioremque conjugem in aulam revocaret. Concilium hac super re Parisiis habitum, sed corruptis tam Episcoporum, quam Abbatum comprovincialium animis irrita fuit Legatio. Quare Pontifex ad Michaëlem Senonensem Archiepiscopum rescribens, Synodique acta rejiciens Gallis exprobravit, quod ante tam gravis negotii decisionem sanctam Sedem non consultassent, quamvis ad eandem omnes causæ majores secundum firmam canonum regulam, *ab Ecclesia Gallicana semper observatam* referri deberent. Vide apud Chardon *). Hæc ergo antiqua Galliæ disciplina, inde a Sardicensi Synodo fideliter observata, qua matrimoniales causæ merito inter graviores censebantur. Si quid sibi circa matrimonii impedimenta olim Episcopi licitum putarunt, ut idem Galliæ Scriptor observat p. 447: „Erat tunc solum, si cum impedimento partibus incognito jam esset contractum matrimonium, ita, ut non possent amplius sine gravi scandalo separari.“ Quam verius *necessitatis* œconomiam, sive tolerantiam dixeris, quam *dispensationem*.

§. 47.

Quænam secundum recentiorem Galliæ disciplinam post Concilium Tridentinum in matrimonii impedimentis Episcoporum sit potestas, ex illorum Synodis datur intelligi. Cabassutius nos ita docet **): „In Synodo Turonensi a. 1583 convenientes omnes hujus amplæ Provinciæ „Anti-

*) Tom. 6 de Matrim. Cap. 10.

**) Notitia eccles. Histor. ad Secul. 16.

„Antistites, quibus præsidebat Simon a Maillé Turonensis Archiepiscopus, sic decernunt: *In quarto consanguinitatis & affinitatis gradu, nec non cognationis spiritualis prohibitis gradibus Episcopis dispensare non licere declaramus.* His concordat alterum provinciale Concilium Tolosanum a. 1590, his verbis: *Quos cognationis gradus impedit, nisi visa prius summi Pontificis dispensatione, in matrimonii conjunctionem Parochi non recipiant.*“ Albæ gallinæ filios oportet esse Moguntinos criticos, quibus aliquid vitii in his Conciliis suboluit, quod perspicacissimi Galliæ Præsules nondum viderunt. Horum Antecessores ad normam antiquissimæ regulæ, ut sine Pontificis consensu nihil in Ecclesiis decernatur, statuta sua cum apostolica Sede communicarunt: id ipsum nunc crimini vertitur sanctæ Sedi, quod in his statutis aliqua non tam emendarit, quam vitiarit. Ergone Gallicani Præsules brevi post Tridentinum Concilium sic repente cæcutierint, ut violata sua jura non agnoverint, aut sic muti canes fuerint, ut contra canonem suo nomine, & cum injuria sibi obtrusum non reclamarent? Finge hoc, si placet, nonne saltem jam sufficit, canonem hunc a Gallicanis Episcopis eo tempore, quo Tridentinum in recentissima erat memoria, fuisse acceptatum, & hodieum tranquille observari? Moguntini autem illi Concilium exigunt, cui neque Cardinalis, neque pontificius Legatus præsideat: numquid etiam Concilium, cujus notitiam habere Papæ non liceat? Suspecta res illorum est, qui supremi Capitis conscientiam refugiunt. Id, qui velint, non Galliam certe, neque Germaniam catholicam, neque veterem Ecclesiam secum sentientes habebunt. Longe antiquior Isidoro, ipsis Socrate, & Sozomeno antiquior est Catholicorum regula: *Ne absque consensu summi Pontificis quidquam ab Ecclesiis decernatur.*

§. 48.

Hæc de gallicana circa matrimonii dispensationes disciplina. De Germaniæ Ecclesia ex duodecim primis seculis, nonnisi unum, unicum exemplum Moguntini producant. Documentum apud illust. Hontheimium occurrit *), quo Poppo Trevirensis consultis antea Archiepiscopis Moguntino, & Coloniensi cognationis dispensationem Advocato Thietfrido pro quodam prædio a. 1036 concesserit. Multa in hoc diploma

*) Histor. Trevir. Dipl. Tom. I, p. 367.

ploma observatu digna veniunt. 1^{mo} Cum Browerus *) non ipsum documentum, sed breviorum dumtaxat extractum proferat, & prior Honthelmii fides per Febronium jam vacillet, jure exigi authentica inspectio posset, eo magis, quo in nota apposita Febronianus jam tunc temporis animus se prodit. 2^{do} Hoc documentum pro more illius ævi diversis Latii vitis laborat, ut solæcismis, barbarismis, & copularum irregularitate, ita, ut presse singula verba urgeri nequeant. 3^{io} Agebatur de matrimonio jam contracto, & abs dubio consummato, quod patet ex ipsa diplomatis inscriptione, seu Thietfridi petitione, *ut consanguineam, quam duxerat in uxorem, sibi retinere liceat*, quamque prout & textus ait, *pridem desponsatam* habebat. Nec refert, quod tantum desponsata vocetur, scilicet quia detecto impedimento non amplius pro legitima conjuge habebatur. 4^{to} Bona fide, & ignoranter ambæ partes contraxerant impedimento cognationis in sexto gradu quintum attingente postea primum a quibusdam deprehenso. 5^{to} Non propria Autoritate, ut Moguntinis placet, Poppo connubii jura concessit, sed antea habitis conferentis statuit rem in Concilio *decernendam*, ad quod conveniant cum Trevirensi Piligrinus Colonienfis, Baido Moguntinus Archiepiscopi, Rambertus Virdunensis, alique plures Episcopi: hinc pro singularibus saltem Episcopis nihil inde juris probaretur. 6^{to} Factum hoc inter irregularia, seu male facta, nullum jus parentia posset rejici, & quidem propter labem Simonie, cum videri possent Episcopi *ob tanta prædii bona* matrimonii veniam dedisse. At ego æquius plane judicium de hisce Episcopis fero, & quod rei caput est. 7^{mo} Respondeo, *re solerter, & laboriose investigata* judicatum fuisse pro valore matrimonii, quod in ignorantia contractum ex jure naturali, non tantum ex gratia propter prædii bona valeret, ita ut conjuges ne separari quidem possent.

*) Annal. Trevir. Tom. 1, p. 518. Broweri testimonium ita sonat: „Per eodem quoque dies, ut veteri signatum Diplomate invenio, Poppo rogatis in consilium Pilgrino Colonienfis, & Baidone Moguntinensi, egregia virtute Præsulibus, adhibitis etiam provincialibus Episcopis causam discussit Thietfridus Trevirensis Ecclesiæ quondam advocati, qui Lucharde quadam *matrimonio sibi juncta* propinquitatis, & sanguinis necessitudine *ad liquidum baud explorata* fecerat incertum, id conjugium an ratum, ac legitimum esset. Controversia porro diligenter, multumque ab Episcopis hic disceptata *absolutus* denique (non *dispensatus*) Thietfridus, grati ac memoris officio Ecclesiæ, cujus *advocationis* pronuper amplissimum munus sustinuerat Michlenbaci XII nobilos, *agrorum* haud aspernanda spatia concessit.“ Tam notabilis cum sit diversitas Browerum inter, & Honthelmium; authentica Diplomatis inspectio jure desideratur.

sent. Hunc sensum exigunt verba: *Non solum id sub gratia concedi oportere, verum in presentia similiter manere.* Fateor quidem suspensionem Simoniam excitari posse per adjectam causalem, cum sanctæ Dei Ecclesiæ tantæ prædii bona perditum iri nequaquam debeant. Sed quia latinitatis, & copularum vitiis hoc diploma manifeste laborat, vel e loco suo transposita est hæc causalis, & jungenda cum prima resolutionis parte *sub gratia concedi*: vel copula cum idem sibi vult, ac propter quod, ita ut non ipsa causalem efficiat, sed sit causalis sequela. Secus enim *sub gratia concedi, & similiter manere oportere*, sibi non opponerentur, prout tamen in Diplomate *per non solum, verum* expresse sibi videntur opponi. Sed pace me, si velis, hanc Episcoporum sententiam iniquitatis arguas; nolim contentiosus resistere: legitimæ autem dispensationis exemplum haud inde conficies.

§. 49.

Enimvero si attente ponderemus, quam severa illo adhuc tempore circa matrimonii Leges disciplina fuerit Ecclesiæ; quædam forsitan Episcoporum facta inter irregularia potius attentata recenseri debebunt, quam legitimæ dispensationis titulo decorari. Historia seculi XIII maximum adhuc hujus disciplinæ rigorem ostendit: notum est enim, quantæ difficultatis res fuerit, ut Otto IV Imperator ab Innocentio III dispensationem in quarto cognationis gradu impetraret. Causæ aderant gravissimæ: post horrenda bella cæsi Philippi filia pro rebus pacificandis in uxorem Ottonis destinanda videbatur Imperii Principibus, Episcopis ipsisque Pontificis legatis Cardinalibus. Tandem non sine summa morositate ad totius ex Imperio Cleri, populique preces Pontifex dispensavit, sed austeris cum conditionibus, ut Otto amplissima duo Monasteria fundaret, singulariter Ecclesiarum omnium defensionem, & bellicam insuper pro terra sancta expeditionem susciperet, & universum Imperium largis elemosinis, ac ferventissimis orationibus sanctæ disciplinæ vulnus compensaret. Non inutile erit Vanespenii, magni apud adversarios viri notatum in genere de dispensationibus, tum in specie de matrimonialibus hic considerandum dare *): „Veterum tenacissimam canonum custodiam, & summam in dispensando morositatem nullus, vel parum in „historia ecclesiastica, & avita Ecclesiæ disciplina versatus ignorat, adeo

L 1 2

„quidem

*) De Dispensat. matrim. Cap. 4, §. 2.

„quidem, ut nonnulli, nec parum in veterum actis, & scriptis exerci-
 „tati asserant, plurimis seculis nullam canonis infringendi veniam datam
 „fuisse, sed dispensationes, si quæ darentur, tantum fuisse pœnarum ca-
 „nonicarum remissiones.“ Agite *Episcopales!* hanc pristinæ disciplinæ
 observantiam exemplo restaurate, & nos *Pontificii* vestra vestigia pressio
 pede insequemur; toti potius Ecclesiæ hodiernum dispensationum usum
 restringite, quam ut nimium largi in singulos Episcopos extendatis, &
 manus nostras vobis dabimus.

§. 50.

Ad domestica nos vertamus! Concilium Colonienſe a. 1536
 can. 46 ita statuit: „Quod ad gradus consanguinitatis, & affinitatis atti-
 „ner, qui matrimonium contrahendum, ac contractum dirimunt, decre-
 „tum Concilii generalis (Lateranensis IV) observabitur. — Ubi ro-
 „manus Pontifex dispensatorio diplomate matrimonium secus contractum
 „approbandum jussit, examinentur causæ diligentius, quæ dispensa-
 „tionem extorserunt.“ Missis jam nugis vestris, vanisque diverticulis,
 dicite Moguntini Censores! penes quem Colonienſe Concilium posses-
 sionem juris dispensandi agnoverit? Nonne vel invitis fatendum est,
 romanam Sedem in tranquilla possessione matrimonii impedimenta di-
 spensandi usque ad Concilium Tridentinum fuisse? Aut facta negentur,
 quæ adduximus, toti mundo cognita; aut alia in contrarium producan-
 tur nobis hætenus incognita!

§. 51.

Saltem, inquit, hac super re nihil in Tridentino Concilio fuit
 decifum. Quam optime! ergo, inquam, cum ipsis Moguntinis, *nihil*
correctum, quod non expressum, sed prior disciplina, antiqua consuetudo,
 & tranquilla Pontificis possessio, prout jam ad oculum demonstravimus,
 integre servata. Veterem hanc consuetudinis observantiam retineri se
 velle vel ipsum Tridentinum satis insinuavit, dum indeterminate *quan-*
cumque dispensandi Autoritatem sua in possessione reliquit: de pontifi-
 ciis autem dispensationibus, si extra romanam Curiam se extendant sta-
 tuit, ut Ordinariis, tamquam *Delegatis apostolicis* committantur. Nonne
 eo ipso Concilium hanc dispensandi facultatem *propria Autoritate* Episco-
 pis negavit, quod iisdem ut Delegatis pontificiis committendam voluit?
 Præterea satis sollicita fuit sacrosancta Synodus, ut eam dispensandi in
 aliis

aliis rebus potestatem, quam volebat penes Episcopos esse, clare exprimeret: sic e. g. Sess. 14 de Ref. C. 7 decrevit causam homicidii involuntarii committendam esse Ordinario, vel ex quadam causa Metropolitano, aut viciniore Episcopo, qui pro sacris Ordinibus *dispensare* possit. Item Sess. 24 de Reform. C. 6 conceditur Episcopis *dispensandi* facultas in irregularitatibus, & suspensionibus ex delicto occulto provenientibus, & in quibuscumque reservatis casibus occultis tantum pro foro conscientiae. Nonne exceptio firmat regulam in contrarium? aut nonne universalis est regula, Ecclesiae legibus etiam Episcopos esse subiectos? ergo, inquam, *nihil Episcopis concessum, quod non expressum*. Verum, quod amplius est, Tridentini Patres etiam expresse se declararunt *soli* Pontifici jus esse relinquendum intra vetitos cognationis gradus matrimonia dispensandi. Nam in Actis Concilii die 17 Augusti a. 1563 apud Paleottum legitur factam fuisse propositionem, ut saltem in quarto gradu relaxandae legis potestas fieret cum Episcopis communis: ergo hanc potestatem intra tertium, & propinquoires gradus solius Papae esse, atque esse debere, in eo omnes conveniebant. Jam vero ne in quarto quidem cognationis gradu dispensandi jus Episcopis fuisse permissum, inde liquet, quod Patres amplexi sunt Marci Antonii Bobbæ Augustensis Episcopi sapientissimam sententiam: „Non esse id Episcopis permittendum, quippe Concilii proposito adversum, *ut rarior esset relaxationis usus*: etenim si singulae a singulis Episcopis concederentur, longe frequentiores illae fierent, quam quotquot quilibet profusus Pontifex elargiretur.“ Vide apud Pallavicinium *). En ergo, quam volebas expressam etiam oecumenici Concilii dispositionem! en rationem criticam, cur Turonenses Praesules Tridentino quam proximi declararint in quarto cognationis gradu dispensationem non esse Episcopis permissam. Si adhuc quaeras, quare illa Tridentini prohibitio tantum in Actis Concilii, non inter canones inveniatur; in promptu responsio est, quia Patres tranquille observatam retineri volebant praxin: lex enim, ut dici solet, iusto non ponitur, id est, Episcopi matrimonii impedimenta dispensando abusivae usurpationis aut nulla, aut rarissima dederunt exempla, hinc causa non fuit, cur id speciali canone prohiberetur. Nihil autem contra Ecclesiae canones permissum, quod non expressum.

*) Lib. 23, Cap. 10, n. 17.

§. 52.

Ex qua antiquissima Pontificis possessione, si & divina Primatus jura hoc loco prætercamus, manifeste sequitur, cum Principes, & Electores Germaniæ ad Pium IV varia detulissent gravamina, inter quæ numerabantur dispensationes sanctæ Sedi reservatæ, eundem Pontificem merito respondisse: „Illos injustissima petere: nam ut Archiepiscopi, aut „Episcopi potestatem habeant dispensandi in his, quæ in hujus Sedis „Authoritate constituta sunt, hoc est, inferiores, & subditi in lege Superiorum suorum, nisi ubi eis hoc expresse permittitur, omni juri, „omnique rationi contrarium esse, indubitatum est“ *). Enimvero, si ut Moguntini volunt, sola facti gravamina possessionis antiquæ jura infringent; væ Dominis, qui immorigeros haberent subditos! væ nobis Catholicis in Imperio romano! contra quos sine numero & mensura Protestantibus usque ad deletionem totius rei catholicæ gravamina jam fecerunt.

§. 53.

Quænam post Concilium Tridentinum usque ad hodiernam diem vel ab ipsis Germaniæ Archiepiscopis continuata sit praxis, jussu Sanctitatis Suae a. 1736 Kalend. Decemb. in litteris suis ad Parochos manifestum fecit Nuntius Colonienfis, ubi singula designavit quinquennia, quibus tres ecclesiastici Principes Electores Imperii ab apostolica summa Sede dispensandi facultatem in certis dumtaxat gradibus circa impedimenta Matrimonii petierunt, & numquam aliter, nisi cum certa restrictione obtinuerunt. Reliquum est ergo, ut totam hanc criticam disquisitionem cum sanctissimo Papa Nostro Pio VI concludam **): „Ex quibus liquet, primum ab apostolica Sede exerceri cœpisse dispensationem matrimonialium potestatem, & hunc usum penes illam solam perseverasse, atque ad eandem solam pertinuisse, prout totius Ecclesiæ consuetudine, & consensu fuit agnitum, cum alios Episcopos eam sibi „Authoritatem assumfisse non constet, nisi cum sanctæ Sedis expresso, „vel præsumto privilegio eam tueri se posse confiderent. — Si nunc (ab „Episcopis) dispensari inciperet *jure proprio*; quid aliud ageretur, nisi „ut sancta Sedes suo spoliaretur jure, quod ab antiquissimo tempore sola semper exercuit, cujusque exercendi tenuit non interruptam, sed „con-

*) Rainald. ad a. 1563, n. 44.

**) Breve Pontif. ad Rvdiss. Archiep. Colon.

„constantem, receptamque in Ecclesia possessionem. Qui certe tam inveteratus possessionis titulus, etiam si alia deessent in suo Primatu constituta, fundamenta, valere per se ipse apud omnes deberet.“ Hæc quidem possessionis non turbandæ æquitas vel inter homines pares naturalis est. Ipsam vero possessionis suæ antiquitatem; & continuam praxin cum sanctissimus Pater factis ostendere dignatus est toti mundo cognitis; (quis credat?) Moguntini Censores eloquiæ supremi Christi Vicarii, & Ecclesiæ catholicæ Capitis vocare audent *omnia falsissima, Alles grundfalsch* *). Et hæc loquuntur in ipsa Sede Metropolitana, & ecclesiastici sunt, & publici Doctores Archidiœcesis Moguntinæ! Non ea certe (uti alias canina illa satyrica) non ea est ovium vox erga Pastorem. — *Petre! pasc oves meas!*

C O R O L L A R I U M IV.

De jure appellationum ad Papam, non a Papa.

U^t vel ex ipsa jam inscriptione patet, præsens hæc summi momenti discussio critica in duas principales partes dispescitur. Prima de jure Pontificis tractat, ex toto christiano orbe appellationes suscipiendi: altera de appellationibus a Papa divino jure, & humano prohibitis. Attamen non juris solum, sed pro nostri temporis exigentia & facti quæstio hic tractanda est. Sunt autem sex præcipue Articuli Capite I hic discutiendi: 1^{mo} De ipso supremo jure appellationum: 2^{do} De hujus juris exercitio ex factis Antenicænis: 3^{do} De Canonibus Conciliorum, Nicæni, Antiocheni, Sardicensis: 4^{to} De factis historicis Postnicænis usque ad nonum seculum: 5^{to} De recentiori positiva juris speciatim germanici dispositione: 6^{to} Demum de sano & utili adpellationum usu. Si hoc in prælio Eruditorum autoritate, hoc est, præjudiciis, quæ plurimi hodiernorum Reformatorum ducuntur, pugnandum sit; magna stant utrinque Nomina, ex uno latere Petri de Marca, Baluzii, Quesnelli, Febronii, & quem castra deseruisse dicas, Zalweini, aliorumque denso agmine gregariorum: Ex adverso autem non minus magni Nominis viri, Benedictus XIV, Cardinalis d'Aguirre, Christianus Lûpus, Antonius de Simeonibus, Thomassinus, Barthelius, Fratres Ballerini, P. Zacharia cum

eum tota, quod maximum est veteri Ecclesia. Ex hoc solo præjudicio, quæ pars fortioribus armis instructa sit, jam colligas.

CAPUT I.

De appellationibus ad Papam.

ARTICULUS I.

De ipso supremo jure appellationum.

§. I.

Nos autem ipsi intimam rei naturam scrutemur! Inditum certe a natura principium, atque etiam gentium jure stabilitum est, miseris injusta forte sententia pressis ad superioris judicis tribunal refugium, adiutumque esse concedendum. Hanc viam, quæ appellationis dicitur, cum ipsa natura afflictis voluerit apertam, ab optimo Pastore Christo fuisse occlusam, suasque oviculas, iniquis forsitan inferiorum judicum oppressionibus absque refugii solatio expositas, blasphemus foret, qui afferret. Atqui romanum Pontificem, S. Petri Successorem, in hac terra Christi Vicarium, & singulis Episcopis, vel Archiepiscopis, & Conciliis quibuscumque provincialibus jurisdictione esse superiorem, *res est divinis ex eloquiis adeo manifesta, certaue, ut catholicam fidem profitentium nemo unus, ne nostris quidem diebus palam contradicere ausus fuerit.* Hinc nostræ catholicæ fidei dogma est, naturali & divino jure ad summi Pontificis tribunal tamquam episcopali superius Appellationes spectare. Hoc jus essentialè est Primatui divinitus instituto; quod qui negaverit, hunc a nostra fide, & Ecclesia esse alienum non dubitamus, prout Benedictus XIV enuntiavit *): „Hoc jus adeo necessario connexum esse cum romani Pontificis in universam Ecclesiam jurisdictionis Primatu, ut nemo possit illud in controversiam adducere, nisi & hunc „velit præfracte inficari.

§. 2.

Ipse Zalweinius, uti & Natalis Alexander, hic Natione Gallus, ille Germanus, ambo pontificiæ Sedis nullo modo adulatores, alibi potius

*) De Synod. diœces. Lib. 4, Cap. 5, B. 1.

tus sibi stipendia meriti, hoc idem jus appellationum, ceu divini Primatus *Appendicem* agnoverunt. Verba prioris sunt *) : „Quaestio juris nostra opinione facillima est decisionis : nam si semel in Pontifice revealamur quemdam Primatum jurisdictionis, sane jus appellandi inde velut appendix *neccessario* consequitur : quid enim aliud est jus appellandi, quam jus provocandi ad judicem superiorem, velut ab ipso jure naturae fluens ? in quantum nempe sapit speciem necessariae defensionis, cum in finem, ut appellanti fiat justitia, in qua se per judicem inferiorem laesum esse queritur. Si ergo Pontifex vi Primatus vices legitimi judicis sustinet ; quo ausu ipsi admissionem, vel exactionem appellationum abnegare sustinemus ?“ Hæc Zalweinius, nempe ut Theologus catholicus : verum est illum pro sua egregia Advocati vafritie adniti ad omnem hujus juris praxin contra divinum, & naturale jus enervandam, aut extinguendam. Causam, nisi jam pateat, inquirere nolum. Alter vero hoc loco non tam historicus, quam Theologus ita loquitur **) : „Hoc ipso quod romanus Pontifex est jure divino omnium Episcoporum primus, & ceteris jurisdictione Superior, Ecclesiae Caput, Vicarius Christi ; consequens est, ut ad ipsum Episcopi, cum injuriam patiuntur, appellare possint. Ipsa enim juris naturalis æquitas ab inferiorum judicium sententiis ad supremum judicem appellari posse distat, & persuadet. Cum itaque romanus Pontifex ratione sui Primatus sit Superior Episcopis omnibus divisim sumtis, & Conciliis etiam provincialibus, ac nationalibus ; ad ipsum appellare posse Episcopos Metropolitano- rum, Primatum, Patriarcharum aut Conciliorum sive provincialium, sive nationalium, sive patriarchalium judiciis depositos, necessario sequitur, ac perinde jus appellationum episcopali- um ad romam, nam Sedem pontificii Primatus est appendix.“

§. 3.

Gallicanæ Ecclesiae doctrinam, eamque recentissimam ex teste multo præstantiore, Archiepiscopo Senonensi audiamus, qui ita scribit ***): „Quod ex Authoritate, quam *Christi institutione* in nos (Episcopos) Pontifex habet, legitime sequitur, jus est judicandi fontes Episcopos.

*) Princip. jur. ecclæs. T. 2, Q. 1, C. 4, §. 5.

**) Hist. ecclæs. Sec. 4, Dissert. 28, Propos. 1.

***) Instruct. pastor. Paris, 1753.

„scopos. Quodsi illos a Provinciæ Episcopis in primæ cognitionis causâ
 „sa judicari mores nostri postulant, jus tamen suscipiendarum appella-
 „tionum est ipsi absque ulla controversia servatum.“ Quidquid hæc in
 re antiquissimi licet canones statuerint; non certe hoc jus appellationum,
 quippe divinitus institutum, e medio tollere, aut plane in praxi irritum
 facere potuerunt, sed tantum pro *meliori* exercitio ad graviore causas
 e. g. Episcoporum restringere. Quare etiam inferiorum Clericorum,
 five etiam secularium causâ, dummodo natura sua *gravior* ageretur; eam-
 dem ad se vocare Pontifex posset insuper habita quacumque disciplina,
 aut cujuscumque Concilii statuto: neque enim ulla hominum dispositio
 Pontificem jure spoliare potest, divinitus sibi commisso, aut vel ejusdem
 usum tunc restringere, quando fidelium bono necessarius foret. Atque
 hinc quæcumque Conciliorum decreta cum hac conditione intelligi ne-
 cesse est, *sine præjudicio tamen romanæ Ecclesiæ, cui in omnibus causis debet*
reuerentia custodiri: ita jam Innocentius I *). Hoc ipsum sacrosancta Sy-
 nodus Tridentina clare sub initio, & sine expressit per specialem hanc
 clausulam, *ut salva semper Auctoritas Sedis apostolicæ & sit, & esse intelli-*
*gatur **).*

§. 4.

Observatu dignissima sunt, quæ in hanc rem doctissimi Fratres
 Ballerinii annotarunt ***): „Possit quidem nonnullis in circumstantiis
 „contendi, hanc primigenii juris ad summum Pontificem revocationem,
 „si qua in solita in Provinciis judiciorum forma aboleretur, non expe-
 „dire, eoquod plura exinde incommoda, aut scandala sequerentur, quæ
 „ex naturali, ac divina lege impedienda sunt. — At aliud est quære-
 „re, num quid expediat, vel liceat: aliud vero negare potestatem, &
 „jus ipsum, quod institutione divina certum sit, & alieni juris usurpa-
 „tionem criminari. Qui de primo solum disputat, si non passione, vel
 „præjudicio aliquo, sed zelo, ac veritate ducatur, soliusque boni pu-
 „blici intuitu agat, ut scandala impediatur, & rationes in hanc rem op-
 „portunas quibuscumque potest viribus (debita semper observantia, &
 „moderatione servata) urgeat, atque promoveat, quibus institutionem
 „ecclésiasticam consuetudine firmatam, factam tectamque servandam,
 „a novitate autem inducenda abstinendum esse suadeat, at nihil tamē
 „oppo-

*) Epist. ad Victic. Rothomag.

**) Sess. 7 & Sess. ult. de Reform. Cap. 21.

***) Opp. S. Leon. Tom. 2, p. 979.

„opponat, quod ipsam pontificiam, certeque divinam institutionem feriat; non solum nihil peccaverit, verum etiam sancte, & laudabiliter faciet.“

§. 5.

Atque hoc catholicæ fidei dogma de jure appellationum plurimis Pontificum, Isidoro Mercatore multo antiquiorum testimoniis constat. Maximi ponderis illud est Julii I, quod ad Episcopos Antiocheni Concilii a. 342 ante ipsum Sardicense perscripsit *). Cum enim Eusebiana Sectæ Episcopi S. Athanasium Tyri deposuissent, Legatos ad romanum Pontificem cum ipsis damnationis documentis miserunt, ut suæ Synodi confirmationem ab illo obtinerent. Pro Athanasio Alexandriæ congregati Episcopi ad eundem Papam litteras dederunt. Unde patet ex hoc Orientalium factis (Hæreticorum æque, ac Catholicorum) haud firmam fuisse visam Synodi Autoritatem sine ultimata Papæ sententia, ad quem Eusebiani ipsa sui iudicii instrumenta transmiserant. Pontifex ergo perceptis quoque Athanasii Legatis tam hunc, quam illos ad novum iudicium Romam advocat. Nunc vero illi suæ causæ merito diffisi parerè detestant, NB. neutiquam tamen Romam vocandi jus Pontifici negantes, sed temporis angustias, & bellicum suæ Patriæ statum prætendentes. Ceterum, quod rei caput est, orientales illi Hæretici jam tunc fore eadem causabantur, quæ moderni juris ecclesiastici Reformatores frequenter in ore habent, Episcopis injuriam fieri, si de rebus jam a se definitis denuo apud Papam rationem reddere deberent, & ratam esse habendam cujuslibet Synodi sententiam: quam in rem, immerito licet & falso Novatiani, ac Pauli Samosatani exempla proferebant. Pontifex autem respondit: „Nihil dignum querela esse, quod ad Synodum „(romanam) vocarentur: qui in rebus a se gestis, & judicatis fiduciam „ponerent, eos non indigne ferre, si ab aliis iudicium suum examinetur, id per Nicænâ Synodum permitti, & antiquam esse hanc consuetudinem — ergo oportuisset illos huc accedere, & non abnuere, ut negotium ad finem deduceretur. — Si qua culpa Episcoporum fuerit, secundum ecclesiasticum Canonem oportuisse iudicium fieri, ut primum ad Ecclesiam romanam scriberetur, & hinc, quod iustum est, decerneretur. Demum concludit Pontifex, non posse se illorum Synodo suffragari, neque injuriam facere, dum pro communi Ecclesiæ bono summæ Sedis sententiam perscriberet: *Apud omnes nota esse, quæ a B. Petro Apo-*

M m 2

stolo

*) Apud Coustant. Epist. I Julii.

„stolo acceperit.“ Hoc præstantissimo documento Julius P. tamquam de re omnibus Catholicis nota testatur apostolica Petri Autoritate Synodos Episcoporum posse reformari. Quid dicit jam Dupinius, quid Zalteinius, quid Febronius? in Sardicensi Concilio post quinque annos jus quoddam revisionis primum Pontifici concessum fuisse? Apage nugas!

§. 6.

Eodem adhuc quarto Seculo Damasus P. Ariminensis Concilii acta ad se relata dijudicavit, rejecitque his verbis *): „Neque enim „præjudicium aliquod fieri potuit per numerum Arimini congregatorum „(600 Episcoporum) quando constat neque romanum Episcopum, cu- „jus ante omnia decebat eos expectare decretum — præbuisse consen- „sum.“ Quin immo idem Pontifex varias illius temporis tam Catho- licorum, quam Hæreticorum Synodos una simul omnes præter Nicæ- nam exauthoravit, præcepitque teste S. Athanasio **), ut nulla deinceps in Ecclesia catholica nominaretur Synodus præter unam Nicænam. Veniant nunc Febroniani, & pontificiam potestatem reformandi provincia- les Synodos per Isidorum falsis Decretalibus fuisse investitam fabulentur!

§. 7.

Quinti jam Seculi initio Innocentius I, ut supra §. 3 annotavi- mus, ab ipsius universalis Synodi Nicæne decreto exceptam esse apostoli- cam Petri Autoritatem declarat ***): „Si quæ autem causæ, vel „contentiones inter Clericos tam superioris ordinis, quam etiam infe- „rioris fuerint exortæ, ut secundum Synodum Nicænam congregatis „ejusdem Provinciæ Episcopis jurgium terminetur, nec alicui liceat „(sine præjudicio tamen romanæ Ecclesiæ, cui in omnibus causis de- „bet reverentia custodiri) relictis his Sacerdotibus — ad alias con- „volare Provincias.“ Ecce, quomodo in ipsis inferiorum Clericorum causis ad summæ Sedis tribunal via appellationis per Synodum Nicæ- nam patuerit. Bonifacius I Episcopis Thessaliæ vehementer exprobrat, quod apostolico Legato debitam reverentiam non exhibentes, si qua haberent gravamina, ad se non detulerint****): „Institutio universalis na- „scentis Ecclesiæ de B. Petri sumsit honore principium, in quo regi- „men ejus, & summa consistit: ex ejus enim fonte ecclesiastica disci- „plina

*) Epist. 3 ad Episcop. Illyr.

**) Initio epist. ad Epist.

***) Ad Victric. Cap. 3.

****) Epist. 14.

„plina per omnes Ecclesias Religionis jam crescente cultura manavit.
 „Nicænæ Synodi non aliud præcepta testantur, adeo ut non aliquid su-
 „per eum ausa sit constituere, cum videret nihil supra meritum suum
 „posse conferri: *Omnia denique huic noverat Domini sermone concessa.* Hanc
 „ergo Ecclesiis toto orbe diffusis velut caput suorum certum est esse
 „membrorum, a qua se quisquis abscidit, sit christianæ Religionis ex-
 „torris. — Audio Episcoporum quosdam apostolico jure contempto no-
 „vum quidpiam contra Christi proprie præcepta tentare, cum se ab
 „apostolicæ Sedis communione, & ut dicam verius, potestate separa-
 „re nituntur, eorum petentes auxilium, quos ecclesiasticarum sanctio-
 „regularum majoris esse non dedit potestatis. — NB. Quoniam ideo
 „tenet Sedes apostolica Principatum, ut querelas omnium licenter ac-
 „ceptet; interpellari nos super hoc missa legatione convenerat, quos
 „curam omnium rerum manere videatis.

§. 8.

Agapetus P. sexto Seculo ad Justinianum Imperatorem de Ste-
 phani Larissæi causâ agens ita scripsit *): „Absit a quorumlibet menti-
 „bus christianis, ut in quacumque persona aut innocentiam redarguant,
 „aut crimen absolvant, sed universa, quæ apostolicæ Sedis nuper hac
 „sunt parte disposita, illo semper studio manaverunt, quæ Principatui
 „B. Petri vos quoque cupitis per omnia reservari, scilicet ne in his, qui
 „Sedis ejus audientiam postulassent, sprete ejus reverentia alterius sententia pro-
 „venires.“ Vigilius Papa ad Euterium hæc scribit: „Unde omnium ap-
 „pellantium apostolicam Sedem Episcoporum judicia, & cunctarum ma-
 „jorum negotia causarum eidem sanctæ Sedi reservata esse liquet. —
 „Cujus tramiti, si quis obviare tentaverit Sacerdotum, causas se non
 „sine honoris sui periculo apud eandem Sedem sanctam noverit reddi-
 „turum.“ Cum septimo Seculo Wilfridus Eboracensis Sede sua pulsus
 ad Agathonem appellasset; S. Pontifex in Concilio romano ajebat: „Non
 „mediocriter satisfecit audientibus petitionis series, quam Wilfridus Deo
 „amabilis Episcopus obtulit in hoc, cum se indigne de episcopali Sede
 „dejectum agnovit, non contumaciter per vim secularem obstitit, sed
 „humiliter sentiens Authoris nostri B. Petri Apostolorum Principis cano-
 „nicum expetivit subsidium, & supplici præstolatione, quæ super eo
 „censenda sunt, se suscepturum perhibens, quod ex ore nostro B. Pe-

M m 3

„trus,

*) Vide Antiseb. vindic. Part. 3, p. 453.

„trus, Author noster, cuius ministerio fungimur, praevidet statuendum.“
Huc adeste, Febroniani, & perceptis hisce antiquissimis documentis
Ifidorianas fraudes, si ita placet, calumniamini!

§. 9.

Neque vero soli Pontifices a Petri Primatu jus supremum iudicandi repetebant. Audiatur etiam supra nominatus Stephanus Larifaeus in libello ad Bonifacium II *): „Ego vero nec accusatorum, nec aliquorum conatus metuens, sed ad Deum solummodo, & ad leges sanctae Ecclesiae, & ad Principatum sanctarum Ecclesiarum traditum vobis respiciens, mox inter acta dixi, ut oporteret me ad aliquem accusantem respondere, aut de mea ordinatione aliquid iudicare, non sub eo, qui nunc iudicare dignatur, causam me dicere necesse est, sed alibi apud quem sacrorum Canonum lex custoditur, & usque hactenus consuetudo servatur, memoriam faciens Vestri sancti Capituli, & apostolicae Sedis, dicens vos esse Dominos hujus examinationis.“ Stephanus concinit Theodosius Ecdinienſis Episcopus, qui lectis in romana Synodo ejusdem libellis ait ad Pontificem: „Constat venerandae Sedis vestrae Pontifices, quamvis in toto mundo Sedes apostolica Ecclesiarum sibi jure vindicet Principatum, & solam ecclesiasticis causis, undique appellare necesse sit; specialiter tamen gubernationi suae Illyrici Ecclesias vindicasse.“ Frustra igitur ad labefactanda haec antiquitatis testimonia Febroniani ex S. Bernardo multo posteriore quaedam loca excitant, ubi S. Abbas magna libertate, qua vix amplius nostris cum Archiepiscopis loqui liceret, summum Pontificem, antea discipulum suum, Eugenium III a quibusdam abusibus detertere conatur, quos atra loligine describit **): „Sic facitendo, inquit, probatis vos habere plenitudinem potestatis, sed iustitiae forte non ita. Facitis hoc, quia potestis, sed utrum & debeatis, quaestio est.“ Simili modo idem vir sanctus ad Innocentium II perscripserat ***): „Appellatur de toto mundo ad te: Id quidem in testimonium singularis Primatus tui: & tu, si sapiſ, non Primatu gaudebis, sed fructu.“ Nemo non videt S. Doctorem agnovisse, confessumque fuisse pontificiam Auctoritatem, & jus recipiendi appellationes vi Primatus, & ex plenitudine potestatis, sed liberrime contra illius temporis abusus perorasse: aliud est enim abusus notare,

*) Apud Antif. vindic. l. c.
**) Epist. 178.

**) De Confid. L. 3, C. 4, n. 4.

tare, aliud ipsum usum, ejusdemque jus negare. *Stabilitum ergo catholicum dogma est ex antiquitatis, ut vel adversariis placet, adhuc puræ traditione, divinum jus penes Pontificem esse, ex universo orbe appellationes recipiendi.*

ARTICULUS II.

De factis Ante - Nicænis.

§. I.

Secundo loco curatius adhuc ipsam praxin; eamque primævam appellationum ad summam Sedem observari oportet. Sunt quidem admodum raræ primi illius ævi tabulæ, quæ temporum naufragio emergerant; quotquot tamen ex pretiosis hisce monumentis supersunt, etiam nostrorum, licet Hypercriticorum judicio probata, fere nihil sunt aliud, præterquam apostolicæ Sedis aut in rebus dubiis consilia, decretaque, aut in controversis judicia. Sic Clementis romani prima jam epistola ad Corinthios testatur injuste depositos illius Ecclesiæ Presbyteros apud Sedem Petri refugium quæsisse. Dignum memoratu est, quod S. hic Pontifex Ecclesiæ hierarchiam sub uno Capite jurisdictione prædico clare jam descripserit *): „Summo Sacerdoti, inquit, sua immunia tributa sunt, „& Sacerdotibus locus proprius assignatus est, & Levitis sua ministeria incumbunt: homo laicus præceptis laicis constringitur.“ A vero aberrant illi, qui summo sub Sacerdote Episcopum hic volunt intelligendum, partim quia S. Clemens expresse de uno Judæorum summo Sacerdote loquitur, quam veterem Dei institutionem ipsi etiam Ecclesiæ applicat, partim quia per Sacerdotes secundo loco positos generatim Episcopos, & Presbyteros nullo discrimine *nominatenus* factæ pro more Apostolorum complectitur, prout ex contextu patet, ubi ab Apostolis per regiones, & urbes ait, *Episcopos, ac Diaconos* fuisse constitutos. Clarum erit legenti ipsam hanc præstantissimam epistolam, primi & secundi ordinis Sacerdotes per Episcopos promiscue intelligi.

§. 2.

Res fatis nota est, secundo Seculo a Victore P. Synodum Episcoporum Asianorum jussu suo convocatam adhuc dijudicatam, ac re-

pro-

*) Ad Corinth. Epist. I, n. 40.

probatam fuisse. Falsa sunt, quæ Dupinius scribit *): 1^{mo} Provinciales illas Synodos sine jussu Pontificis celebratas: 2^{do} S. Irenæum, aliosque Victori restitisse, quasi eidem jus negassent judicandi, atque Episcopos excommunicandi: 3^{rio} Simili modo ab omnibus Episcopis potuisse excommunicari Episcopos: & 4^{to} excommunicationem non esse actum jurisdictionis. Tertio Seculo Dionysius Alexandrinus, cum esset de fide in Filium Dei suspectus, non ad Episcoporum provincialium Synodum, sed & romanum Pontificem fuit delatus, quod judicium S. Episcopus non recusavit, sed libenter subiit: vid. epist. Coust. Quodsi in prima, ut dici solet, instantia Pontifex jure suo judicare potuit; cur non potuerit in altera?

§. 3.

Sed neque defunt formalis appellationis exempla. Marcion a proprio Patre, & Episcopo suo ob stuprum excommunicatus ad romanam Sedem, a qua prior sententia reformaretur, confugit. Ergo jam tunc secundo Seculo Pontificis tribunal tamquam superius episcopali agnitum est. Nonne critica hæc conclusio valet? Quid refert, quod Marcion Romæ repulsam tulerit? quasi vero appellatio ab exitu, & non a provocatione ad superius tribunal esset denominanda. Ceterum animadvertendum est, non a Pontifice, sed Sede tunc vacante a Clero romano negatam Marcioni audientiam. Quam sibi potestatem viduatus Clerus non esse fatebatur, etiamne Pontifex non habuerit? Iniquior videtur Natalis Alexandri adversus Bellarminum censura**): Non enim Marcion Romanorum communionem tantum *suffragari* voluit superpressa Patris sententia, sed hanc potius reformari sublata Patris excommunicatione, sive quod idem est, restituta sibi Romanorum communionem. Propterea isti responderunt: „Nobis injussu venerandi Patris „tui istud facere non licet: una siquidem fides est, & animorum una „consensio: neque contra spectatissimum Collegam, patrem tuum moli- „ri quidpiam possumus.“

§. 4.

Tertio Seculo vel orientalis Ecclesia plura offert appellationum ad romanum Pontificem exempla. Ut enim ex antiquo Claudio Apollinario Hierar-

*) De antiq. Eccles. Disciplina. Dissert. 2, Cap. 2, §. 1.

**) Hist. eccles. ad Sec. 2, Dissert. 2, Art. 3.

Hierapolis Episcopo Eusebius narrat *), Montanus, Florianus, Bastus, alique ipsorum sequaces in variis Synodis regionum, Asiaticæ & Ponticæ damnati ad Zephirinum P. appellarunt, ut sibi ablatam communionis pacem reddi præciperet. Origenes Episcoporum judicio damnatus seu sponte sua, seu a Fabiano P. vocatus Romam petiit, ut ibi causam suam defenderet teste Eusebio **). Paulus Samosatenus in Antiochena Synodo damnatus cum nolle Sede sua cedere; in auxilium vocatus Imperator Aurelianus, etsi Gentilis hanc causam Romæ adhuc tractari, atque definitivam inde sententiam expectari iussit, prout constat ex relatione Synodi Antiochenæ ad Dionysium P. apud Eusebium ***). Tam communis etiam in Oriente persuasio fuit de suprema inter Christianos iudicandi Authoritate in romano Pontifice residente.

§. 5.

Ex Occidente appellationum exempla fere jam abundant. Privatus Laberianus ab Africanis Patribus damnatus Romæ communionem fraudibus impetrare tentavit, sed a Fabiano P. Synodi sententia confirmata est ****). Fortunatus, & Felicissimus in Carthaginensi Concilio damnati Romam navigarunt, S. Cornelio Pontifici fucum facere conati, sed nonnisi damnationis suæ confirmationem retulerunt *****). Basilides, & Martialis Hispaniæ Episcopi a provinciali Synodo depositi Romam ad Stephanum P. confugerunt, a quo etiam restituti pristinae dignitati videntur *****). Imo ipse Cyprianus ad eundem Pontificem scripsit rogans, ut ad Provinciam Arelatæ litteras dirigeret, quibus abstineto Marciano alius in locum ejus substitueretur *****). Sive Marcianus a Synodo Provinciæ jam iudicatus fuerit, sive non; utcumque Dupinius S. Cypriani verba torqueat; manifeste ex illis apparet ab ipso Cypriano agnitionem fuisse, Episcoporum causas dijudicandi potestatem seu ante, seu post Synodum Pontifici convenire.

§. 6.

Nec obstat, quod Cyprianus in causa Felicissimi & Fortunati ad Cornelium P. scripserit: „Cum statutum sit omnibus nobis & æquum sit pariter,

*) Hist. eccles. Lib. 5, Cap. 15.

**) Lib. 6, Cap. 20.

***) Lib. 2, Cap. 24.

****) Inter Epist. Cyprian. 30.

*****) Cypr. Epist. 55.

*****) Cypr. Epist. 68.

*****) Cypr. Epist. 67.

„ter, ac justum, ut uniuscujusque caussa illic audiatur, ubi est crimen
 „admissum, & singulis Pastoribus portio gregis sit adscripta, quam regat
 „unusquisque, & gubernet rationem sui actus Domino redditurus, oportet
 „utique eos, quibus præsumus, non circumcurfare, nec Episcopo-
 „rum concordiam coherentem sua subdola, & fallaci temeritate colli-
 „dere, sed agere illic causam suam, ubi & accusatores habere, & testes
 „sui criminis possint, nisi si paucis desperatis, & perditis minor videtur,
 „esse Authoritas Episcoporum in Africa constitutorum, qui jam de illis
 „judicaverunt, & eorum conscientiam multis delictorum laqueis vin-
 „ctam judicii nuper gravitate damnarunt. Jam caussa eorum cognita
 „est, jam de eis dicta sententia est. Nec censuræ congruit Sacer-
 „dotum mobilis, atque inconstantis animi levitate reprehendi.“ Ex
 his verbis commotus, & ulceratus Cypriani animus satis se prodit, qui
 rhetorico suo more hanc subdolam, & injustam, quod non diffitemur,
 appellationem exaggeravit. Hinc imo si preste verba urgerentur, ni-
 mium dixisset & falsum, quasi singulis Episcopis, etiam absque Syno-
 do provinciali, in ultima jam instantia licuisset Presbyteros condemnare
 ex ea ratione, *quod singulis Pastoribus portio gregis sit adscripta, quam re-
 gat, & gubernet unusquisque soli Domino rationem redditurus*: quod certe
 falsum est; secus vix Presbyteris, nec minus Laicis sub tyranno Epi-
 scopo! Tantum itaque 2do in fraudem & abusum appellantium tam vio-
 lenter investus est Cyprianus, & NB. pro hoc singulari casu justam ne-
 gavit appellandi causam: *Que autem causa veniendi, & Pseudoepisco-
 porum contra Episcopos factum nunciandi?* non negavit jus superioris judicis,
 sed & tacite confessus est: *Navigare audent ad Petri cathedram, atque ad
 Ecclesiam principalem, unde unitas sacerdotalis exorta est.* Hujus ergo unita-
 tis necessitatem cum principali Ecclesia, seu quod idem est, subordina-
 tionem erga eandem agnovit. 3tio Quod statutum, & praxin Africa-
 norum attinet, non negamus, *jure humano* Presbyteris fuisse prohibitum
 extra Provinciam appellare, eo tempore, quo non unius Archiepisco-
 pi, vel ejus Curialistarum arbitrio, sed a provinciali Episcoporum Sy-
 nodo judicia formabantur. Felicissimus autem nonnisi Presbyter fue-
 rat, imo nec Fortunatus legitimus, sed tantum Schismaticorum Pseu-
 doepiscopus. Ceterum disciplina mere humanæ institutionis, si qua
 caussa gravior esset, non poterat jus divinum pontificæ Authoritatis
 impedire: hinc & Romæ isto peculiari Africanorum statuto non puta-
 batur ligata S. Petri potestas.

§. 7.

Futile non minus est, quod ex S. Cypriano in causa Basilidis & Martialis post Quesnellum Dupinium opponit *): „Illis Hispaniæ Episcopis ob idololatriæ crimen depositis, & a Papa, ad quem confugerant, restitutis quidam Hispani ad Africanam Ecclesiam litteras dederunt, consilium hac in re expetentes. Cyprianus respondit, legitime jam ordinatos in locum depositorum pro veris Episcopis agnoscendos insuperhabita Papæ restitutione, quippe qui ordinationem jure profectam rescindere nequeat.“ Sed ipsum S. Cypriani textum ante oculos ponamus, & tota difficultas mox disparebit: en verba **): „Nec rescindere (Pontifex) ordinationem jure profectam potest, quod Basilides post crimina sua detecta, & conscientiam etiam propria confessione nudatam Romam pergens Stephanum Collegam nostrum longe positum, & gestæ rei, ac tacitæ veritatis ignarum fefellit, ut exambiret reponi se injuste in Episcopatum, de quo fuerat iuste depositus. Hoc eo pertinet, ut ad superiora peccata ejus etiam fallaciæ, & circumventionis crimen accederet.“ Ergo Cyprianus non ex defectu potestatis, sed justitiæ, ac propter fallaciam, & circumventionem nullius valoris esse declaravit pontificiam restitutionem. Sane ipsi Pontifices haud raro declarant, hoc sensu, scilicet ob subdolam obreptionem deceptoribus favere non posse suas sententias. His accedit non levis suspicio, quod non tam Pontifex, quam ipse potius Cyprianus relatione unius Episcopi, nempe Cæsaraugustani cum paucis Clericis ex tota Hispania deceptus fuerit, quodque reliqui ex Clero, populoque Pontificis sententiæ adhæserint expulsis Felice, & Sabino, qui in Sedes Basilidis, & Martialis fuerant subrogati. Quidquid ob penuriam documentorum placeat, certum est ex facto hoc colligi, quod ipse Baluzius Ildori Mercatoris licet inimicus certe infensissimus, in Nota 27 ad memoratam Cypriani Epistolam fatebatur: „Antiquissimum esse in Ecclesia usum, ut ex remotissimis orbis partibus Episcopi, qui se injuste pressos esse a Collegis suis crederent, provocarent ad romanum, tamquam ad primum Ecclesiæ universalis Antistitem.“ Mirum, quam audacter Febronius provocet, quis jam Dupinium refutaverit! ego vero provocare non dubito, quis Fratres Ballerinius, quis Antifebronius, quis historicas hasce veritates vel a me conscriptas sit refutaturus?

N n 2

§. 8.

*) De antiq. Eccles. Discipl. Dissert. 2; Cap. 2.

**) Epist. 68.

§. 8.

Quarti Seculi initia attingimus, ubi mox in Cæciliani causa igne occurrit exemplum, quod docet provinciales Synodos a romano Pontifice potuisse reformari. Ille enim sub Numidiæ Primatæ a 70 Episcopis Carthagine damnatus, Sedem suam retinuit, eoquod cum romana Ecclesia communione esset conjunctus, coram qua teste Augustino epist. 162 causam suam dicere potuisset. Revera cum Schismatici Africani sententiæ suæ Authoritatem deesse sentirent, eam Galliæ Præsulum assensu roborare nitebantur: quare datis ad Imperatorem Constantinum litteris ex Gallia adhuc sibi iudices dari petebant. Imperator, ut Optatus Milevitanus testatur *), iuste indignatus in hac re suum incompetens forum implorari, eandem ad romanum Pontificem ablegavit missa Melchiadi P. epistola, & adjunctis ex Gallia quoque ecclesiasticis iudicibus. In romano Concilio a. 313 pontificia Authoritate purgatus Cæcilianus Carthaginensis Archiepiscopus, ejusque adversarii Donatistæ sunt damnati. Melchiadem hac in re legitimum iudicem fuisse, aperte fatetur Augustinus, etsi ad frangendam Donatistarum pertinaciam cit. epist.: *argumento ad hominem* illos urgeat, eoquod nec ipse Pontifex per se hoc iudicium sibi usurpaverit, sed ad ipsorum preces, quibus transmarinos petebant iudices, ab Imperatore rogatus. Non minus falsum, quam & catholicis auribus summe offensivum est, quod Dupinius garrit, Melchiadem non proprio nomine, sed ut iudicem ab Imperatore deputatum sententiam pronunciaffe. Quæstionem hanc, quantum scio, primus inter Catholicos Natalis Alexander tractavit, sed ut ipse se declarat, *contra quasdam e Calviniano grege Theologastros* **). Videant ergo, qui Dupinio gloriantur Doctore, quibusnam pro castris ille militaverit.

§. 9.

Socrate ***), & Sozomeno ****), græcis testibus, *quoniam cura omnium Ecclesiarum ad romanum Pontificem spectat*, Orientis Episcopi suis Sedibus per Arianos dejecti, Paulus Constantinopolitanus, Marcellus Ancyranus, Asclepas Gazensis, & Lucius Hadiranopolitanus Romam confugerunt, seu quod idem est, appellarunt, suæque exposita causa Julii Pontificis litteris in proprias Ecclesias restituti sunt. Mendax est Dupi-

*) Contra Parmenianum Lib. 1.

**) Ad Sec. 4. Differt. 3, Quæst. 2.

***) Hist. eccl. L. 2, C. 15.

****) Hist. eccl. L. 3, C. 8.

Dupinius, dum horum ad pontificiam Sedem confugium negat. Inane pariter est, quod hisce *positivis* factis opponit, *negativum* argumentum, e. g. Meletium, & Arium, item Eustathium Antiochenum in Oriente depositos Romam non appellasse, quasi vero si quis hodie a primæ instantiæ sententiæ ad superiorem judicem non appellet, jam hujus superior jurisdictio negaretur. Certe Meletius, & Arius propter Idololatriæ, hæreseos, aliaque aperta crimina damnati mitius sibi iudicium Romæ non poterant polliceri, præterquam, quod pro antiquissimo more a catholicis Episcopis sancte observato ipsa synodalia decreta ad summum Pontificem relata fuerint. An Eustathius innocentiam suam apud Pontificem non defenderit, ex documentorum inopia ignoramus: ceterum si ad Papam non appellavit, neque id mirum, quia Imperatoris edicto violenter in exilium fuit eiectus, & contra persecutoris violentiam nulla appellatio prodest.

§. IO.

Demum post tot jam appellationum exempla ex paucissimis primævæ historiæ monumentis illud insigne est S. Athanasii, qui ab Eusebianis Tyri in Concilio damnatus per legatos saltem suos, nisi in propria persona ad Julium P. causæ suæ defensionem detulit, atque ad eam Romæ defendendam a Pontifice fuit evocatus, ut patet ex ipsa genuina Julii epistola ad Eusebianos. Frivola plane exceptio est, quam Calvinianorum ex ore Dupinius, & Febronius repetunt, non proprie iudicem, sed tantum Arbitrum ab ipsis Partibus electum in hac causâ Pontificem fuisse. Eusebiani enim, si libera voluntate in iudicium Julii, tamquam arbitri consensissent, contra eundem conqueri non potuissent, quod causæ hujus cognitionem suam ad tribunal traxisset, quod ipsos ad causam dicendam ad se Romam vocasset, quod Orientalium iudicio hac retractatione injuriam faceret: nec Julius etiam hoc retractandi jus ex antiqua consuetudine, ex ecclesiastica regula, ex apostolica Petri autoritate, tamquam omnibus notissima sibi vindicare, ac Eusebianis exprobrare potuisset, quod sine romanæ Ecclesiæ consensu sententiam contra Episcopos ferre præsumerint. Vide supra Art. 1, §. 5. — Dicant Febroniani historiæ hujus veritatem vel a græcis Historicis potius, quam a Blondello Calvini ex secta hæretico. Certe jam excitati Socrates, & Sozomenus, uti & Theodoretus *) testantur judi-

N n 3

*) Lib. 2, Cap. 4.

judicium hujus causæ a Julio fuisse reassumptum proprio romanæ Sedis privilegio, secundum Ecclesiæ canonem, & legem ad summi Sacerdotis dignitatem spectantem, quæ pronunciat acta illa irrita esse, quæ præter sententiam Episcopi romani constituuntur. Quod igitur Athanasius scribit Apolog. 2: *Eusebianos ipsi Julio, si vellet, arbitrium causæ detulisse*; id eodem interprete fecerunt, ut terrent ipsum, fiduciam suæ causæ affectantes, qua videri volebant, se novum sui judicii examen non reformidare: eventus autem simulationem detexit, dum actu examini novo pro viribus restiterunt.

§. II.

Æque vanum est, falsumque, quod Febronius cum Valesio *) afferit, Athanasium a Julio tantum innocentem fuisse pronunciatum, & in communionem receptum, neutiquam vero Sedi suæ restitutum. Inanis distinctio! Nonne qui innocens a judice declaratur, & reformata priorum judicium sententia in communionem totius Ecclesiæ restituitur, jam eo ipso legitimus pristinæ Sedis Episcopus pronunciat est? Sed nugis hesterni Valesii major est fides græcorum testium, eorumque antiquissimorum, major est ipsius Julii fides, qui expresse in laudata epistola ad Eusebianos **) profitetur *pro vero Episcopo a se habitum Athanasium, & sententiam Eusebianorum injustam, illegitimamque apostolica Petri Autoritate declarat*. Falsum insuper est, in Sardicensi primum Synodo Athanasium suæ Sedi fuisse restitutum. Cum enim post Julii sententiam novis machinationibus, novis accusationibus suorum hostium impeteretur; iterum a Sede sua fugere compulsus, ac nova hac causâ in Sardicensi Synodo discussa NB. non sine romani Pontificis consensu iterum restitutus est. His accedit, quod Eusebianis omni arte, & nisu conantibus Sardicenses Patres a communione Athanasii, & aliorum Episcoporum in Synodo Tyria depositorum avertere, illi id impossibile post Julii judicium enunciarunt, imo data opera hujus judicii æquitatem in epistola ad Alexandrinam Ecclesiam defenderunt: „Qua ex re æquitas „judicii-fratris, & Coepiscopi nostri Julii liquidissime apparuit, qui non „temerario consilio, sed cum matura deliberatione SENTENTIAM TULIT, „adeo ut nihil relinquatur dubii de communione Fratris nostri Athanasii.“

§. 12.

*) In Socrat. Lib. 2, Cap. 15 in Nota A.

**) Apud Constant. n. 15.

§. 12.

Postquam ex singulis quatuor primis Seculis jam tot, tamque clara vidimus exempla ad summam Sedem appellationum, & quidem ex paucissimis, quæ supersunt illorum temporum documentis; quid ergo de Zalweinio sentiendum, qui catholicus Doctor cum esset, Hæreticorum & Schismaticorum provocaciones ad Imperatorem comparare, parique censu habere non erubuit cum appellationibus fidelium ad apostolicam Petri Cathedram? Quis non sequentium verborum falsitatem agnoscat, & aversetur *): „Profecto si totam Antiquitatem priorum seculorum percurramus; vix ullum authenticæ appellationis exemplum reperire erit, aut si quæ admodum pauca exstarent, magis juri, & consuetudini ordinariæ, quam exemplis quibusdam & factis undecumque petitis standum foret.“ Quid ergo Zalweinius dixerit ad tot appellationum exempla paucis ex documentis a nobis allata? undenam nisi ex hisce factis consuetudinem ordinariam colligere possumus? cur ipsum jus ausus est jam in dubium vocare, quod antea ut Catholicis divinæ institutionis esse fatebatur? quid demum authentica sit appellatio, nisi *ab inferiore iudice ad legitimum Superiorem provocatio*? Talem autem romanum esse Pontificem quis Christianorum *salva fide* negaverit? Quosnam testes pro contraria disciplina primævæ antiquitatis producit, nisi unum Cyprianum, de quo ipse diffiteri non potest, *vehementius nonnihil pro suis iuribus zelasse*? vide nostram responsionem supra §. 6.

ARTICULUS III.

De Canonibus Conciliorum.

§. I.

Tertio nunc loco de Canonibus, imprimis Nicæni Concilii dicendum, cujus ex interpretatione Gentiani Herveti canon V ita sonat: „De iis, qui a communione segregati sunt, sive Clericorum, sive Laicorum sint ordinis, ab Episcopis, qui sunt in unaquaque Provincia, valeat sententia secundum canonem, qui pronunciat eos, qui ab iis ejecti sunt, non esse ab aliis admittendos: examinetur autem, numquid vel pusillanimitate, vel contentione, vel aliqua ejusmodi Episcopi acerbitate congregatione pulsati sint. Ut hoc ergo convenientem examinationem

*) Princip. jur. eccles. Tom. 2, Quæst. 1, Cap. 4, §. 5.

„tionem accipiat, recte habere visum est, ut singulis annis in unaqua-
 „que Provincia bis in anno Synodi fiant, ut cum omnes Provinciæ
 „Episcopi in eundem locum communiter conveniant, ejusmodi quæ-
 „stiones examinentur, & sic quos Episcopum offendisse constiterit, ju-
 „ste esse a congregatione separati apud omnes videantur, donec Epi-
 „scoporum congregationi videatur pro iis humaniorem proferre senten-
 „tiam.“ Incredibile est, quantum Anti-Romani laborent ad conclu-
 sionem, quæ hoc in canone non continetur, extorquendam, scilicet
 Episcoporum Synodis hic ultimum concedi judicium sine ullo ad supre-
 mam Sedem recurso, aut appellatione.

§. 2.

At enimvero tranquilla mente hunc canonem perpendens Lector,
 multa videbit huic violentæ torsioni contraria. Imo Ex ipsa textus
 littera apparet, non hic de judicandis Episcopis, neque de causis fidei
 agi, sed tantum de criminibus inferiorum sive ex Clero, sive ex popu-
 lo, hinc nequidem *de causis majoribus*. Perabsurda est Dupinii cavilla-
 tio, etiam episcopales causas hic subintelligi, quia in numero plurali
ab Episcopis dicuntur judicatæ, hoc est a Synodo Episcoporum, cum
 Clericorum inferiorum, vel Laicorum causæ tantum ab uno Episcopo
 judicari consueverint, quasi vero vulgaris mos sermonis non esset nu-
 merum *indeterminatum*, seu pluralem sæpe pro *determinato*, seu singulari
 adhibere, e. g. dici solet Episcopi hoc possunt, loco quilibet *singularis*
 Episcopus hoc potest. Sed & ipsi Nicæni Patres expresse in contextu
 de *singularis* Episcopi judicio se loqui manifestant. 2do Patres id tan-
 tum decreverunt de *ordinariis* criminum judiciis: cum enim in unius Epi-
 scopi, forsitan passione incitati sententia firmam non ponerent fidu-
 ciam, hinc singulis annis convocationem Synodorum præscripserunt: de
extraordinario appellationis judicio a summa Sede ferendo nec verbu-
 lum Patres: abstrahere autem, vel reticere aliquid, nondum est nega-
 re. 3tio Postquam bis per singulos annos celebrari provinciales Synodi
 cessarunt, eundem hunc canonem eo ipso dudum cessasse necesse est.
 4to Quod demum præcipuum est, appellationem ad apostolicam Petri
 Cathedram hoc canone non fuisse exclusam *positive* constat. Partim id
 ex eo apparet, quia ad anteriorem Apostolorum, ut vocantur, cano-
 nem ibi respicitur, qui tantum inter Episcopos diversarum Provincia-
 um inter se æquales voluit, ut nempe ab uno Episcopo excommunicatus

ab alio non recipiatur: ad romanum vero Pontificem, ceu Episcoporum omnium Caput injuriam passus semper confugisse, jam ex factis Antenicænis demonstratum est. Partim etiam ex proxime subsequenti-
bus Nicænum, iisque certissimis documentis patet, ipsum voluisse Concilium, ut jura summi Pontificis sacra testa serventur. Ita præter Sardicenses Patres, de quibus paulo postea, Julius, Bonifacius, Innocentius, quos vide supra Art. 1, §§. 5, 6, 7, & singulariter romana Synodus sub Felice III testantur: „Domino ad B. Petrum dicente, *tu es Petrus, & super banc Petram ædificabo Ecclesiam meam* &c. Quam vocem „sequentes trecenti decem, & octo SS. Patres apud Nicæam congregati „confirmationem rerum, atque Authoritatem sanctæ romanæ Ecclesiæ „detulerunt: quam utramque usque ad ætatem nostram successiones om-
nes Christi gratia præstante custodiunt.“

§. 3.

Antiocheni cujusdam Concilii, ut vulgo creditur, de anno 341 duos canones post Petrum de Marca, & Dupinium Febronius opponit. Canon XIV ordinat, si in causâ Episcopi provincialis Synodus divisa fuerit, Metropolitanus plures ex vicinia Episcopos ad priores judices advocet, a quibus, quod justum fuerit, adprobetur. Canon XV vero, ut totius Synodi unanimo consensu damnatus Episcopus apud alios minime judicetur, sed firma concordantium ex Provincia judicium maneat Authoritas. Atque hos canones ab ipso Chalcedonensi Concilio dicunt approbatos: unde jam concludunt, Episcoporum causas provincialis, aut finitimorum judicio fuisse omnimodo terminatas, ut nullus posthac appellationis locus ad superius quodcumque ecclesiasticum tribunal relinqueretur. Ad hujus obscuri Concilii canones triplicem eruditorum responsum proferam, quarum quælibet motam ab adversariis difficultatem facile superabit.

§. 4.

Prima est illorum, qui Antiochenos hos canones aut integros ab Arianis saltem occultis in odium S. Athanasii, & romanæ Ecclesiæ profectos cum Zalweinio existimant, aut ex duabus Synodis Antiochenis, una Eusebianorum a. 341, altera Orthodoxorum ante annum 335 habita commixtos cum Tillemontio, & Bartholo judicant, ita ut duo excitati canones opinione verosimillima ad Authores Arianos referendi

O o

videant.

videantur; ceteri autem, quos Chalcedonense Concilium adoptavit, totam suam inde trahant Authoritatem. Altera est responsio, quam apud Beveregium *) vel ipsi dant græci canonum interpretes, Aristæ- nus, Matthæus Blastores, ac Theodorus Balsamon, hos Orientalium canones Antiochenos a Sardicensi Synodo *justiore, & humaniore sententia* fuisse sublato, vel intelligendos esse tantum de tali Synodo, quam ipse Pontifex jam probaverit, ut Balsamon ait, *de Synodo, a qua non detur appellatio, uti a Papa.*

§. 5.

Ut vero largissimus sim, cum FF. Balleriniis **) tertium admitto, a catholicis Antiochenæ Provinciæ Episcopis a. 332 Sede vacante hos canones fuisse confectos, ubi autem nec verbum de appellatione ad supremam Sedem, de qua ibi quæstio non erat, sed juribus summi Sacerdotis intactis, tantum de provincialium Synodorum judiciis rite ordinandis tractabatur, ita ut can. XIV in diversitate opinionum synodalis revisio novis iudiciis adjunctis præciperetur: hæc autem revisio NB. provincialis in casu consensus omnium iudicum can. XV negaretur. Quis dicat propterea romani Pontificis divina jura fuisse restricta? Memoratu sane digna sunt ipsa Balleriniorum verba ***): „Illud im-
„mis animadvertimus, eo canone XV non omnem appellationem, seu
„tractationem expungi, sed solum in casu consensus omnium Episcopo-
„rum unius Provinciæ denegari illud novum iudicium e vicinæ Provin-
„ciæ Episcopis instituendum, quod antecedenti canone concessum fue-
„rat. De jure autem appellationis, aut retractationis in pleniori Syno-
„do, aut in alio tribunali superiore ne verbum quidem. Deinde eo
„solum casu novum iudicium laudato canone XV excluditur, quo cri-
„men adeo sit manifestum, ut ne uno quidem Episcopo discrepante
„omnes in condemnationem consentiant. Id in legitimis judiciis nul-
„la præcipientia, præventionem nulla institutis non solet accidere, nisi
„cum reus vel confessus est, vel saltem convictus, quo quidem casu
„aliquot etiam civiles leges tum antiquæ, tum recentiores appellationem
„vetant. — Ceterum si in iis quoque circumstantiis, quibus aliquis
„Episcopus omnium licet Episcoporum suæ Provinciæ sententia condem-
„natus, aliquo nomine se gravatum sentiat, omnis appellatio, aut
„judi-

*) In Pandect. canon. Tom. 1, pag. 435 &c. Oxonii 1672.

) Opp. S. Leon. Tom. 3. Præf. p. 25. *) Tom. 2, Col. 943.

„iudicii renovatio can. XV sublata credatur; idem canon hoc sane sen-
 „su nec a græca, nec alatina Ecclesia umquam receptus fuit, ac pro-
 „inde tum in Oriente, tum in Occidente appellationum causæ semper
 „viguere, & Sardicensium posteriorum canonum prævaluit Autoritas, qui
 „dum appellationibus aditum patere sanxerunt, hunc Antiochenum ca-
 „nonem emendarunt, simulque apostolicæ Sedis juri in appellationibus
 „prospexere.“

§. 6.

Sane Antiochenos hos canones, eoquod aliquos eorum Chalcedonense Concilium adoptavit, ad mentem ejusdem Concilii exponi oportet, ut merito doctiss. Antonius de Simeonibus contra Dupinium animadvertit *): „Quamobrem canones illos non ex Antiochenorum
 „(forte Arianorum) Episcoporum, sed ex Chalcedonensium Patrum
 „sententia exponendos esse omnes intelligunt: qui quidem haud dubie
 „sibi persuasum habebant, summum Pontificem de totius Ecclesiæ causis,
 „sive per appellationem, sive alio quocumque modo ad apostolicam
 „Sedem delatis posse judicare. Quod ut clarius ostendatur, animadvertendum
 „est, Theodoretum Cyrensem Episcopum ab orientali Synodo damnatum ad S. Leonem M. provocasse, a quo cum fuisset absolutus,
 „re postea ad Chalcedonense Comitium delata nequaquam Patres declararunt,
 „a Synodis ad rom. Pontificem provocationem non dari, quemadmodum liquido declarassent, si id verum esse existimassent;
 „sed potius fuere professi, Sedi apostolicæ orientalium Synodorum
 „sententias irritas faciendi esse potestatem. Hac de causâ Leonem M. laudibus
 „concelebrant, quod Theodoretum restituisset. — *Archiepiscopo Leoni multos annos! post Deum Leo judicavit.* — De hac
 „Leonis sententia iudices non semel in eodem Concilio, præcipue Aët. I in hæc
 „verba loquuntur: *Gloriosissimi iudices, & Amplissimus Senatus dixerunt,*
 „*ingredietur Reverendissimus Episcopus Theodoretus, ut sit particeps Synodi,*
 „*quia & restituit ei Episcopatum Sanctissimus Archiepiscopus Leo.* Cognoscebant igitur
 „Chalcedonenses Patres ex Occidente, Orientemque provocari ad romanum Pontificem
 „posse, ut etiam Eutychetis, & Flaviani exemplo nuper experti erant: idcirco dubitari non potest,
 „quin ii Antiochenos canones recipiendo nullum præjudicium Sedi apostolicæ fieri arbitratii sint.“

O o 2

§. 7.

*) De rom. Pontif. judiciaria potestate T. 2, C. 20, §. 6.

§. 7.

Ad Sardicense Concilium nunc ordine devolvimur. Qui ad rem spectant, sequentes sunt canones, quos Herveto interprete ex Græco versos, ut amplius adversariis satisfaciam, in uno latere, in altero ex latina editione Dionysii Exigui hic conspiciendos propono.

C a n o n III.

Versio græca.

Si quis Episcoporum in aliquo negotio condemnandus fuerit visus, ut putet, non malam, sed bonam causam habere, ut etiam rursus judicium renovetur, si vestræ dilectioni videtur, Petri Apostoli memoriam honoremus, ut ab iis, qui judicaverunt, scribatur Julio Episcopo urbis Romæ, & per propinquos Provinciæ Episcopos, si opus sit, judicium renovetur, & cognitores ipse præbeat. Si autem probare non potest causam ejus esse talem, ut eam rursus judicari opus sit, quæ semel sunt judicata, non infirmantur, sed rata sit lata sententia.

Editio latina.

Quodsi aliquis Episcoporum judicatus fuerit in aliqua causâ, & putat se causam bonam habere, ut iterum Concilium renovetur, si vobis placet, S. Petri memoriam honoremus, ut scribatur ab his, qui causam examinarunt, Julio romano Episcopo, & si judicaverit renovandum esse judicium, renovetur, & det judices: si autem probaverit talem causam esse, ut non refricentur ea, quæ acta sunt, quæ decreverit, confirmata erunt, si hoc omnibus placet. Respondit Synodus: placet.

C a n o n IV.

Versio græca.

Gaudentius Episcopus dixit, si videtur, necesse est adjici huic sententiæ, quam sincera dilectione plenam protulisti, ut si quis Episcopus fuerit depositus judicio Episcoporum, qui sunt in vicinia, & dicat rursus sibi defensionis negotium competere; non prius in cathe-

Editio latina.

Gaudentius Episcopus dixit, addendum, si placet, huic sententiæ, quam plenam sanctitate protulisti, ut cum aliquis Episcopus depositus fuerit coram Episcoporum judicio, qui in vicinis locis commorantur, & proclamaverit agendum sibi negotium in urbe Roma, alter Epi-

dram alius substituat, quam romanus Episcopus causa cognita sententiam tulerit.

scopus in ejus Cathedra post appellationem ejus, qui videtur depositus esse, omnino non ordinetur, nisi causa fuerit in judicio Episcopi romani determinata.

Canon V vel VII.

Versio græca.

Osus Episcopus dixit, placuit, ut si quis Episcopus delatus fuerit, & congregati ejusdem regionis Episcopi eum gradu moverint, ac veluti appellans confugerit ad Beatissimum Rom. Ecclesiæ Episcopum, & velit ipsum audire, & justum esse existimaverit ejus rei examinationem renovari; Coepiscopis scribere dignetur, qui sunt propinqui Provinciæ, ut ipsi diligenter, & accurate singula perscrutentur, & ex veritatis fide de re sententiam ferant. Si quis autem postulet suum negotium rursus audiri, & ad ejus supplicationem romanum Episcopum movere visum fuerit, ut e proprio latere Presbyteros mittat, sit in potestate ipsius id, quod illi placuerit, & si decreverit Rom. Episcopus aliquos oportere mitti, qui cum Episcopis sint iudicaturi, habentes Authoritatem ejus, a quo missi sunt, & hoc ponendum est: si autem sufficere crediderit ad rei cognitionem Episcopi (lege Episcopii) sententiam, faciet, quod prudentissimo ejus consilio recte habere videbitur.

Editio latina.

Osus Episcopus dixit: placuit autem, ut si Episcopus accusatus fuerit, & judicaverint congregati Episcopi regionis ipsius, & de gradu suo eum dejecerint, si appellaverit, qui dejectus, & confugerit ad Episcopum Rom. Ecclesiæ, & voluerit se audiri, si justum putaverit, ut renovetur judicium, vel discussionis examen scribere his Episcopis dignetur, qui in finitima, & propinqua Provincia sunt, ut ipsi diligenter omnia requirant, & juxta fidem veritatis definiant. Quod si is, qui rogat suam causam iterum audiri, deprecatione sua moverit Episcopum romanum, ut de latere suo Presbyterum mittat, erit in potestate Episcopi, quid velit, & quid æstimet; & si decreverit mittendos esse, qui præsentibus cum Episcopis judicent, habentes ejus Authoritatem, a quo destinati sunt, erit in suo arbitrio. Si vero crediderit Episcopos sufficere, ut negotio terminum imponant, faciet, quod sapientissimo consilio suo judicaverit.

§. 8.

Hos canones attento animo consideranti, Quesnellianæ, Dupinianæ, & Febronianæ cavillationes facile, ut fumus evanescunt: a Patribus siquidem Catholicis non tantum Occidentis, sed & septuaginta & amplius Orientis contra Eusebianos, ut videtur, conditi sunt: illi enim S. Athanasii hostes infensissimi eidem a se injuste condemnato omnem restitutionis viam occludere conabantur, propterea adversus Julium P. graves querelas proponentes, quod iste orientalium Synodorum jura violasset jam judicatas ab illis causas denuo ad suum tribunal trahendo; iniquum id esse prætendentes, sed sicut orientales Episcopi causas ab occidentalibus definitas pro validis habuissent, ita neque Occidentales, neque ipse adeo Pontifex Orientalium judicia retractare deberent, quasi vero romano Pontifici, tamquam universæ Ecclesiæ Capiti, & Primati suprema in Orientem jurisdictio non competeret. Ut hisce Hæreticorum iniquis gravaminibus os obstruerent Sardicenses orthodoxi Patres, non solum innocentiam Athanasii declarare, eumque restituere decreverant, sed & Eusebiana gravamina retundere, atque observantiam summo Sacerdoti debitam canonicis etiam institutis firmare: quem in finem hosce tres canones confecerunt, jam singulatim a nobis examinandos.

§. 9.

Prout tertii canonis verba satis indicant, nondum hic de vera, & propria appellatione damnati ad summam Sedem sermo est, sed de secundo judicio synodali, quod vi canonum petere Episcopus poterat prima cognitione provincialis Synodi damnatus, *si putaret se bonam habere causam*, ad quod secundum judicium, propinqui extraprovinciales Episcopi vocari solebant. In hoc casu, ut dicitur, secundæ instantiæ, nondum pontificia autoritate judicabatur: attamen Sardicensis Synodi Præses, Osius expedire putabat, ut lite inter comprovinciales Episcopos orta neutra pars litigans ex alia Provincia judicem evocaret, sed ut præter generalem reverentiam supremo Capiti debitam S. Petri memoria, quam deprimere Eusebiani studebant, in eo specialiter honoraretur, ut hæc causa, utpote gravior, cum de damnando Episcopo ageretur, *ab ipsis judicibus provincialibus*, seu primæ instantiæ ad romanum Pontificem referretur, in cujus arbitrio staret, ex finitimis Episcopis *judices denominare*, de quorum æquitate præsumeret. Huc respicere videtur, quod

quod iidem Patres in synodica epistola ad Julium P. scripserunt: „Optimum & valde congruentissimum esse videbitur, si ad Caput, id est, ad Petri Apostoli Sedem de singulis quibusque Provinciis Domini referant Sacerdotes.“ Ergo de *relatione* causarum, nondum de *appellatione* hic agitur: ac merito FF. Ballerinii observarunt, tantum hoc tertio canone, ubi de relatione ipsorum iudicum, a Patribus Sardicensibus adhiberi formulam: *S. Petri memoriam honoremus*, neutiquam vero in aliis canonibus, ubi de damnati appellatione sermo est, quia hic non reverentialem tantum honorem, sed jus strictum summæ Sedis agnoverunt. A vero igitur plane alienum est, quod post Petrum de Marca plurimi ad nauseam recoquunt: hunc tertium Sardicensem canonem esse primam originem quasi gratuiti juris pontificii circa suscipiendas appellationes, de iis enim nondum hoc canone agebatur.

§. 10.

Quantum nunc canonem explicemus, qui prioris additamentum est de tertia, ut ajunt, instantia, seu vera jam, & propria appellatione damnati a secundo iudicio extraprovincialium iudicum ad romanum Pontificem. Nihil in eo statuitur de jure Pontificis appellationes suscipiendi, sed hoc pro certo jam supposito tantum ordinatur, ut alter in locum depositi non subrogetur, antequam romanus Episcopus causa cognita sententiam tulerit. Hæc ipsius græci textus verba sunt plane directoria, ita ut nugæ fabulentur Petri de Marca asseclæ, dum tantum hic apud priores iudices novis additis *revisionem* volunt indicari: causam enim cognoscere, & sententiam ferre, quod utique in tertio jam tribunali proprium jus appellationis indicat, expresse romano Pontifici tribuitur. Clarius autem adhuc est latinus textus, qui *agendum in urbe Roma negotium, & causam in iudicio romani Episcopi terminandam* asserit. Atque hæc latina lectio non solum in omnibus Mssis Dionysii Exigui, verum etiam in aliarum collectionum sex perantiquis codicibus invenitur, imo ipsum originale exemplar, Sardicensium canonum latino sermone fuisse conceptum validis certe argumentis probant Ballerinii *).

§. 11.

*) Opp. S. Leon. Tom. 2, p. 950.

§. II.

Quinto canone Gaudentii sermonem de formali damnati Episcopi appellatione ad Papam excipiens Osius ita est prosecutus, ut si quis a Synodo provinciali depositus vel in secunda jam instantia ad romanum Pontificem appellando (id sibi vult græca expressio *ut appellans*) confugerit; ab ejusdem voluntate dependeat, an, & quomodo velit alterum concedi iudicium, scilicet an Pontifex propinquæ tantum Provinciæ Episcopos ut iudices velit nominare, an dignum æstimet ad preces appellantis, qui suspectos habet finitimos iudices, e proprio latere Legatos mittere, qui cum Episcopis iudicent, & qui NB. pontificiam in iudicio auctoritatem præ Episcopis obtineant. In aprico positum est, utroque hoc quarto, & quinto canone agi de formali appellatione ad superius Episcopis, idque pontificium tribunal, eamque appellationem, ut licitam a Patribus Sardicensibus agnosci, ac præsupponi, neuti quam vero noviter institui. Ex quo apparet, quam false & inapte Dupinius garriat, quod Pontifex romanus non de causâ ipsâ iudicavit, sed tantum de Episcoporum iudicio; quasi istud dijudicare, non foret ipsam rejudicare, & reformare posse causam. Causam ab Episcopis jam iudicatam recognoscere, iterumque desuper aut in tertia Romæ per se ipsum instantia, aut in secunda per Legatos in partibus sententiam ferre, dicite Febroniani! quid est hoc, nisi suprema jurisdictione pontificia in via appellationis iudicare? Enimvero aut communis hominum ratio insaniat necesse est, aut vos verborum inani fucio fallitis.

§. 12.

Nihil officit Hincmari Rhemensis Archiepiscopi interpretatio *), quod Sardicenses Canones causam Episcopi in provinciali Synodo iudicati cum Pontificis romani Vicario, vel arbitrio, & Episcoporum, qui jam iudicaverunt, & aliorum, qui in propinqua Provincia sunt, iudicio præcipiant terminari. Præterquam enim quod nulla sit fides Hincmari in hac interpretatione, quippe qua usus est ad palliandam suam erga Episcopos arrogantiam, & violentiam; nec ipse etiam Hincmarus negavit, sed potius fassus est cognitionem ejusmodi causæ, etiam in secunda instantia debuisse ad Papam referri, ut *cum ejus arbitrio terminaretur*.

*) Epist. ad Joannem P. VIII.

naretur. Alia autem plura, utpote a scopo suo aliena Hincmarus astute reticuit, quæ Sardicenses Canones expresse præcipiunt, ut Legatis pontificiis eadem, quæ Papæ, in iudicio Episcoporum authoritas sit, Can. V; sive ut romanus Episcopus post secundum jam iudicium finitimum iudicum causâ cognita sententiam ferat, Can. IV. Quod vero iidem Canones in Oriente, & Occidente usu fuerint recepti, mox fiet ex dicendis manifestum.

ARTICULUS IV.

De factis Postnicænis usque ad nonum Seculum.

§. I.

Quarto igitur loco facta Postnicæna, eaque Isidoro Mercatore longe anteriora breviter discutienda sunt, & omisissis quidem iis, quæ de Synodo Constantinopolitana, & Chalcedonensi Dupinius producit (quippe quæ cum extra oleas versentur, responsione digna non sunt) appellationum ulteriorem historiam inprimis ex Oriente repetamus. Eustathius Sebastenus Episcopus in Concilio Melitineni depositus, *viam sibi ipsi*, verba sunt Basilii *), *per quam restitueretur, excogitavit, eam videlicet, ut ad Liberium P. profisceretur.* Cum ab eodem litteras, per quas restitueretur, Synodo Tyanensi a. 369 exhibuisset, locum suum pristinum obtinuit. Natalis Alexandri verba hic sunt memoranda: „Nec vero illud tantum suæ adversus apostolicam Sedem venerationis argumentum dederunt omnes Episcopi Diocæseos Ponticæ in Synodo Tyanensi congregati, verum etiam cum postea pristinos in errores esset relapsus Eustathius hominem apostolicæ protectionis munitum præsidio, ita sunt reveriti, ut ipsum damnare, ac exauthorare prius noluerint, quam Rom. Pontificem de ejus relapsu monuissent, eumque rogassent, ut illum Canonum ultioni permitteret, ut constat ex laudata S. Basilii epistola“ **).

§. 2.

Falso opponit Dupinius, Eustathium missum fuisse ad Liberium, non ut ageret de sua restitutione, sed tamquam Legatum Synodi Lampsacæ-

*) Epist. 74.

**) Ad Sec. 4. Dissert. 28, Propos. 2.

placens, ut Papam ad communionem Episcoporum Semiarianorum amplectendam adduceret. Duplici enim ex causa inter Legatos Lampsaenæ Synodi Eustathius ad Liberium proficiscebatur, tum ut ipse, ut pote depositus, pro vero Episcopo a Papa reciperetur, teste S. Basilio, tum ut Synodus ex Semiarianis congregata, & propterea Papæ merito suspecta ab illo exposita fide pro catholica haberetur. Falsum quoque Dupinii figmentum est, Eustathium non fuisse Sedi suæ a Liberio restitutum, sed tantum per litteras ejus fidem commendatam: nam secum attulit Pontificis epistolam, per quam restitui iustus est, prout S. Basilius testatur: *Epistolam attulit, per quam restitueretur.*

§. 3.

S. Joannes Chrysostomus in Synodo ad Quercum a Theophilo Alexandrino inique damnatus ad Innocentium I romanum Pontificem appellavit: non minus Theophilus quoque Romam Legatos misit, qui definitivam inde sententiam referrent, prout patet ex epistola Honorii Imperatoris ad Arcadium Imperatorem Orientis Pontifex depositionem Chrysostomi in Synodo factam reprobavit, nullamque declaravit. Injuriam Ambrosio Camaldulensi Monacho Dupinius facit, quasi ille Palladii id testantis textum originarium ad extollendam Rom. Pontificis auctoritatem mala fide fuisset interpretatus: neque enim ut Dupinio arridet, græca vox *αδερνως* simpliciter improbantem significat, sed potius, quod apud Scapulam invenitur, & contextus exigit, *reprobantem, abrogantem*, aliquid pro nullo decernentem, seu cum *Auctoritate improbantem.*

§. 4.

Neque etiam obstat, quod Innocentius ultimum de Chrysostomi innocentia iudicium ferre nondum voluerit, sed in Epistola ad Clerum, populumque novam petierit synodalem cognitionem, utpote *qua sola talium procellarum motus sopire posset.* Nam Pontifex contentus primum iudicium suæ Auctoritate irritum fecisse, pro sua prudentia integram causæ hujus cognitionem Concilio reservavit, quod expediens sibi videbatur, ut veritate facti in aprico posita orientalium Episcoporum divisos animos ad unitatem reduceret, & meliora Imperatori persuaderet, ad opprimendam innocentiam jam disposito. Dupinius autem falso contendit non ad Pontificem, sed ad Synodum provocasse Chrysostomum, eoquod in epistola ad Innocentium scripserit: *Licet obseques essemus,*

mus, & ad Synodum appellaremus. Ad magnam enim, & legitimam Episcoporum Synodum Chrysostomus provocavit, antequam ab illa Pseudo-Synodo ad Quercum damnaretur: nondum ergo hæc propria fuerat appellatio, quippe quæ iudicio nondum lato locum habere nequit. Postea vero ab exilio revocatus S. Chrysostomus novam ab Imperatore Synodum petit, non ut Sedi suæ restitueretur, utpote jam restitutus, sed ut demonstrata sua innocentia suorum inimicorum facinora iusta ultione punirentur. Insuper Febronii vana est objectio, quod Chrysostomus suas litteras non ad solum Pontificem, sed simul ad Episcopos alios Italiæ direxerit *). Istud enim propterea factum, quia Episcopi illi occidentales pro more illorum temporum in Concilio congregati unum cum, & sub Papa tribunal constituebant: hinc observante Fleurio Chrysostomus initio suarum litterarum ad solum loquitur Pontificem, in fine autem ad plures sermonem convertit **). Solus certe Pontifex fuerat, a quo Synodi occidentales eminentiorem suam traxere auctoritatem.

§. 5.

Nec vero a iudicio dumtaxat Theophili, sed & ab altera Episcoporum Constantinopoli collectorum Synodo ad Innocentium P. Chrysostomus appellavit ita scribens: „Obsecro, ut scribatis ***), quod hæc tam inique facta & absentibus nobis, & non declinantibus iudicium, non habeant robur, sicut neque sua natura habent. Illi autem, qui inique egerunt, pænæ ecclesiasticarum legum subiaccant: nobis vero, qui nec convicti, nec redarguti, nec habiti ut rei, litteris vestris, & charitate vestra, aliorumque, quorum scilicet & antea societate fruebamur, frui concedite.“ Et si S. Chrysostomus acta Synodi natura sua sine robore esse agnosceret; ad pontificiam tamen auctoritatem confugit, ut invalida declararentur. Nec porro Innocentio licuisset cum Episcopo synodali sententiâ deposito communionem habere, quod ecclesiastica lege Episcopis prohibitum fuerat, nisi superior Pontificis in ipsas Synodos jurisdictio ubique nota fuisset.

P p 2

§. 6.

*) De Statu Ecclesiæ T. 1, Cap. 5, §. 9, n. 1.

**) Hist. eccles. T. 5, L. 22, n. 3.

***) Mamiana editio S. Chrysostomi in singulari ad solum Pontificem verba dirigit, obsecro, ut scribas.

§. 6.

Itaque sententiam in hac secunda Synodo adversus S. Chrysostomum latam æque rescidit Pontifex, ac illam prioris: id constat ex Dialogo Palladii, ubi Theodorus Rom. Ecclesiæ Diaconus refert verba Commonitorii ab Innocentio P. Legatis dati, quos e suo latere Constantinopolin miserat, ut adessent Concilio ad illius causæ plenam discussionem celebrando: in hoc autem Commonitorio isthæc inter alia leguntur: „Non oportere Joannem iudicium aggredi, nisi illi prius Ecclesia, communicoque redderetur, ut omnis dilationis evasione sublata sua sponte Concilium ingredi posset.“ Atque hæc Pontificis sententia tanti habebatur, ut teste Theodoreto *) Episcopi Occidentis non prius cum Episcopis Ægypti, & Orientis, & Bosphori, atque Thraciæ communicare voluerint, quam nomen illius Sanctissimi Viri (Joannis Chrysostomi) in tabulis, in quibus nomina Episcoporum continebantur, retulissent: hinc & Arsacium ejus Successorem ne salutare quidem dignati sunt. Quod hoc loco Natalis Alexander observat, dignum sane observatu est, hoc argumentum ex appellatione S. Joannis Chrysostomi depromptum eo majoris esse roboris, quod ejus, etsi Episcopi orientalis, causa non esset res fidei, sed meræ disciplinæ. Quare eorum evanescit distinctio, qui tantum in fidei causis ad unitatem necessariis Pontificis Authoritatem admittere velle videntur, eandem vero negant, pernegantque in rebus disciplinæ, utpote sine quibus salva possit *essentialis* unitas totius Ecclesiæ corporis consistere. In rebus gravioris momenti, etiamsi tantum disciplinariis intervenire semper potuisse summum Pontificem ex historia omnium Seculorum quam certissime constat: neque Episcoporum est, quippe inferiorum, definire, quasnam causas sua interventione dignas summus Pontifex possit, aut velit judicare.

§. 7.

Aliud Constantinopolitani Patriarchæ ad apostolicam Sedem appellantis exemplum suppeditat S. Flavianus, qui in Conciliabulo Ephesino damnatus libellum appellationis Papæ Legatis obtulit, cujus rei coævæ extant testimonia omni exceptione majora. In eo omnes conveniunt, ut ipse fatetur Dupinius, sed cum Quesnello contendit, Flavianum non ad Pontificis, sed œcumenici Concilii iudicium appellasse, idque

*) Hist. eccles. L. 5, C. 34.

idque ex ipso Leone persuadere nituntur, qui licet suæ Authoritatis studiosissimus nullibi dicit appellationem *ad se* fuisse interpositam, imo expresse in epistola ad Imperatorem scribit, ex eo, quod Flavianus appellarit, generalem Synodum esse convocandam, & hoc *necessario* postulari vi Canonum Nicænorum, seu potius, ut multis videtur, Sardicensium. Præterea ex litteris Placidie Imperatricis ad Theodosium patet, quod Flavianus non solum ad apostolicam Sedem, sed & *ad omnes Episcopos illarum partium* provocaverit. His, si quæ sunt, difficultatibus levi brachio dissolvendis cum FF. Balleriniis *) tria opponimus ex historicis monumentis illorum temporum mox demonstranda. imo S. Flavianum revera ad Authoritatem apostolicæ Sedis appellasse, non vero adversariorum sensu ad universale Concilium, quasi necessarium & supremum in sua causa tribunal, sine quo Pontificis Authoritas insufficiens fuisset. 2do S. Leonem P. accepto appellationis libello statim apostolica Authoritate decrevisse nulla esse acta Conciliabuli Ephesini. 3tio Eundem alia plane ex causa Concilium generale indixisse, quam quod ad illud Flavianus appellaverit.

§. 8.

Ac primum quidem ex verbis S. Leonis sat clare colligi potest: *Quia & nostri (Legati) fideliter reclamarunt, & eidem libellum appellationis Flavianus Episcopus dedit **).* Cum enim Leo asserat, *Legatis suis* a Flaviano libellum appellationis fuisse traditum; quid est hoc, si cor tuum sincere interroges, nisi *ad se*, seu ad apostolicam Pontificis Authoritatem a S. Flaviano fuisse appellatum? Ad quam enim aliam confugerit Flavianus Authoritatem, nisi ad eam, cujus Legatis libellum appellationis tradidit? Certe naturalis is sensus est, quem si negaveris, mentem tuam præjudicio, aut odio adversus S. Sedem captam ostendis. Quesnellus plane somniat, dum Legatos illos non tantum summi Pontificis, verum etiam universæ Ecclesiæ occidentalis nomine deputatos fuisse contendit. *Cur vero*, ait, *Flavianus nomen Leonis non interposuit?* unde quæso, id Quesnello constat, siquidem ipsa S. Flaviani appellatio ad nos haud pervenit? Nonne judicandus est, ejus nomen interposuisse, cujus Legatis suam appellationem obtulit? Nonne merito creditur eadem fuisse formula Flaviani, qua in simili causa Theodoritus Cyri Episcopus expresse ad S. Leonem appellavit ***)? „At ego apostolicæ Ve-

P p 3

„stræ

*) Opp. S. Leon. Tom. 2. Observ. in Dissert. quam Quesnellus.
) Epist. 44 ad Theodos. *) Leon. Epist. 52.

„stra Sedis expecto sententiam & oro, atque obtestor Sanctitatem tuam, ut mihi rectum, ac iustum *tribunal Vestrum invocanti*, opem ferat, jubetque ad vos venire, & doctrinam meam apostolicis vestigiis inherentem ostendere.“ His adde aliud ipsius Flaviani documentum, quo sensa sua de pontificia Authoritate in recognoscendis Orientalium quoque judiciis clare expresserat. Cum enim ex litteris S. Leonis didicisset, Eutychem in Synodo depositum ad romanum Pontificem appellasse; non solum ad illum acta Synodi transmisit, sed & totam causam ejus judicio NB. sine necessitate Concilii universalis definiendam subiecit, hisce verbis *): „Propriam faciens communem causam, & sanctarum Ecclesiarum disciplinam *simul decernere* **) in damnationem adversus eum regulariter factam, & per propria scripta dignare. — Causam enim eget solummodo *Vestro solatio, atque defensione* ***), qua debeatis consensu proprio ad tranquillitatem, & pacem cuncta perducere. Sic enim hæresis, quæ surrexit, & turbæ, quæ jam propter eam factæ sunt, facillime destruentur, Deo cooperante per Vestras sacratissimas litteras. Removebitur autem & Concilium, quod fieri divulgatur, quatenus nequaquam ubique sanctissimæ turbentur Ecclesiæ.“

§. 9.

Sunt & alii indubii testes appellationis a Flaviano ad Leonem P. interpositæ. Liberatus sexti Seculi Scriptor Carthaginensis ex documentis, quæ ipse inspexerat, ita narrat ****): *Flavianus contra se prolata sententia per ejus Legatos Sedem apostolicam libello appellavit*. Præclarum in hanc rem testimonium dat pariter epistola Valentiniani Imperatoris ad Theodosium *****): „Debemus dignitatem propriæ venerationis B. Apostolo Petro intemeratam, & in nostris temporibus conservare, quatenus beatissimus romanæ civitatis Episcopus, cui Principatum Sacerdotii super omnes antiquitas contulit, locum habuit, ac facultatem de fide, & Sacerdotibus judicare. — Hujus enim rei gratia secundum solemnitatem (hoc est *consuetudinem*) Conciliorum, & Constantinopolitanus Episcopus NB. Eum per libellos appellavit.“ Hoc testimonium

*) Epist. 26.

**) Id est. sententiam similem ferre, quem sensum vox græca dat *συμληφθῆναι*.

***) Mellius ad græcum textum: *Vestra inclinazione, & subsidio*.

****) In Breviario Cap. 12.

*****) Inter Leon. Epist. 55.

monium adeo evidens est, ut Petro de Marca vel invito veritatis confessionem expresserit *): *Flavianum vero ad Leonem P. provocasse tradit* Legatis libello manifeste probatur ex epistola *Valentiniani*: & paulo post, libellum appellationis tradidit Legatis summi Pontificis, sic tamen, ut ad solum Pontificem romanum provocaverit. Observari etiam cum FF. Balleriniis meretur appellationis rationem ab Imperatore in eo reponi, quia summus Pontifex *vi Principatus*, seu Primatus sui potestatem habet *de fide, & Sacerdotibus judicandi*. Nec refert, quod forte Flavianus unacum Pontifice ad romanæ Synodi Episcopos suam appellationem inscripserit, ut colligi videtur ex Gallæ Placidia ad filium Theodosium epistola **), in qua legitur Flavianum ad apostolicam Sedem, & ad omnes Episcopos *barum partium*, id est, cum Leone P. in Synodo congregatos appellasse. Hæc enim romana Synodus non aliunde, nisi ab ipsa Petri apostolica Sede suam traxerat Authoritatem: mos quippe antiquus summorum Pontificum fuerat in gravioribus causis Synodos Romæ cogere, ne soli per se ipsos præcipiti quodam impetu sine congrua deliberatione negotia peregrisse viderentur. Quamobrem etsi Flavianus ad iudicium romanæ Synodi causam suam per Legatos pontificios direxerit; certum est tamen, ab eo superiorem hujus tribunalis Authoritatem non aliunde, quam ab apostolica Sede Petri fuisse derivatam: unum erat enim ad apostolicæ Sedis *Synodum*, sive *iudicium* appellasse. Hinc merito doctissimus Mansi in Animadversionibus ad Dissert. 28 Natalis Alexandri *de jure appellationum* hæc scribit: „Tam aperta sunt documenta, quæ S. Flavianum appellationem suam ad solum romanum Pontificem interposuisse ostendunt, ut hostem veritatis se prodat, quicumque hoc denegare præsumat.“

§. IO.

Eandem rem confirmat, alterumque simul punctum §. 7 evincit epistola Hilarii Diaconi ad Pulcheriam Augustam, scilicet accepto appellationis libello S. Leonem statim apostolica Authoritate decrevisse, nulla esse acta Pseudosynodi Ephesinæ. Formalia sunt epistolæ ***): „Vestra itaque veneranda Clementia cognoscat, a præfato Papa cum omni occidentali (scilicet illa romana) Synodo reprobata omnia, quæ in Epheso contra Canones per tumultus, & odia secularia a Dioscoro „Epi-

*) De Concord. Sacerd. & Imper. L. 7, C. 7, n. 2.

) Epist. 56. *) Epist. 46.

„Episcopo gesta sunt, & nulla ratione hæc in his partibus suscipi posse, quæ per potentiam prædicti non sine læsione fidei, & præjudicio sanctissimi Viri, innoxiique (Flaviani) commissa sunt.“ Hæc sane ut jure observant FF. Ballerinii, decretoriam sanctionem a Leone P. pro Flavianò editam in romana Synodo significant. Idem confirmatur ipsius Leonis epistolis 44, 45, 50, & 51 ex eadem Synodo in Orientem missis, in quibus affirmat Flavianum *in sua communione*, ac proinde in Constantinopolitana Sede persistere, irritaque Ephesi acta, & omnia *in eodem statu* esse oportere, in quo ante judicium illud Orientalium fuerunt. Hinc etiam in Concilio Chalcedonensi Act. 10 cum lectio Actorum Ephesi peteretur a Judicibus; Legati pontificii eandem impediunt hanc afferentes rationem, quæ maximi ponderis est: *Quia a Beatissimo, & Apostolico romane urbis Episcopo omnia, quæ ibi gesta sunt, vana sunt habita.* NB. Si Flavianus ad universale Concilium appellasset, & sine hoc Leoni jus non fuisset decernendi in causa Flavianiani; Pontifex Ephesina Acta privatim quidem, sicut quivis alius Episcopus irrita judicare potuisset, neququam vero id in Synodo sua tanta Autoritate definire, ut suam sententiam pro norma Ecclesiis præscriberet, omnesque, qui Ephesinis gestis assensum dederint, nec pœnitentia respuerint, Ecclesiæ communione privaret, prout patet ex Leon. Epist. 80, quod certe apostolicam Autoritatem fuisse interpositam demonstrat.

§. II.

His accedit, quod acta ejusdem Conciliabuli Ephesini in causa Theodoretì pariter S. Leo apostolicæ Sedis judicio reformaverit, prout constat tum ex ejus Epist. 120, tum ex Chalcedonensis Synodi Act. 1, ubi Judices dixerunt: *Ingrediatur & Reverendissimus Episcopus Theodoretus, ut sit Particeps Synodi, quia & restituit ei Episcopatum Sanctissimus Archiepiscopus Leo.* Iidem Judices pro Theodoretò Concilii sententiam postularunt, sicut & Sanctissimus Leo Archiepiscopus judicavit, quibus totum concinens Concilium respondit: *Post Deum Leo judicavit.* Quodsi verum est in Theodoretì causa, in qua, quid Leo re ipsa scripserit, ignoramus; cum FF. Balleriniis concludo, id multo magis fatendum esse in appellatione Flaviani, ob quam & Synodus Romæ coacta, quæ Ephesina gesta rescidit, & litteræ e Synodo illa romana emissæ sunt, quibus S. Flavianus inique depositus, & pro vero Constantinopolitano Episcopo habendus decernitur.

§. 12.

Restat nunc tertio loco ostendendum, quod S. Leo longe alia ex ratione universale Concilium desideraverit, quam quia ad illud Flavianus appellavit. Enimvero si quis difficiles illius temporis circumstantias mente tranquilla pensitet; is facili negotio intelliget, cur Leo celebrandum judicaverit universale Concilium, non eam fuisse *juris*, sed *facti* necessitatem. Etsi enim satis aperte iniqua essent Ephesini latrocinii adversus S. Flavianum acta vel ipso Quesnello iudice; illa tamen veluti iusta per Eutychianorum Episcoporum violentiam ab Imperatore Theodosio suffultam vindicabantur. Hinc iniqua vis non tam jure erat declaranda, quippe quod parum in effectu profecisset; quam majori quadam veluti violentia, scilicet universi orbis iudicio retundenda: neque id solum fuerat S. Leoni agendum, ut Flavianus exul pro innocente ab Orthodoxis haberetur; sed potius, ut actu efficeret, ipsum extincta hostili persecutione ab exilio revocari, suisque oviculis restitui. Remedium igitur efficax pro curandis scandalis per Eutychianam perfidiam Imperatore patrocinante excitatis necessarium videbatur; neque aliud id esse Leo M. perspexerat, quam ut in œcumenico cum Occidentalibus conventu pars Orientalium pertinax confunderetur, & ejiceretur; pars vero alia, quæ per inscitiam in errore versabatur, meliora edoceretur, demum alia pars, præpotentium metu abrepta, prout semper debiles dantur animi, ad rectum tramitem reduceretur, & vel maxime, ut Imperator Theodosius circumventum se, deceptumque conspiciens suum ab iniquis Patrociniis subtraheret. Propterea in Occidente conventum fieri Pontifex volebat, ubi alii Augustis imperantibus, omni violentiæ periculo submoto factiosi homines nihil possent, sicque cuncta securius componerentur. Atque hoc animi sui consilium, non tam ob juridicam declarationem, quam ob remedium scandalorum œcumenicam Synodum convocandi S. Leo in ipsis ad Theodosium litteris manifeste aperuit, & his quidem verbis *): „Generalem „Synodum jubeatis, intra Italiam celebrari, quæ omnes offensiones ita „aut repellat, aut mitiget, ne aliquid ultra sit vel in fide dubium, „vel in charitate divisum, convenientibus utique orientalium Provin- „ciarum Episcopis, quorum si qui superati minis, atque injuriis a veri- „tatis tramite deviarunt, salutaribus remediis in integrum revocentur, „ipsi-

*) Epist. 44.

„ipſique, quorum eſt cauſa durior, ſi conſiliis melioribus acquieſcant, „ab Eccleſiæ unitate non excidant.“ Atque iterum *): „Conci- „cilium univerſale intra Italiam — Clementia Veſtra concedat, ut in „unum convenientibus omnibus his, qui aut ignorantia, aut timore „prolapſi ſunt, correptionis remediis conſulatur.“ En! ut non dubi- tet Pontifex de errore Eutychianorum, quaſi ſuſpenſa fide uſque ad Concilii deciſionem, ſed tantum ſolicitus ſit de efficaci remedio erran- tes corrigendi.

§. 13.

At inquirunt, non tantum facti; ſed & juris neceſſitatem Leo ex appellatione Flaviani derivavit cit. Epiſt. 44: „Quia & noſtri fideliter „reclamarunt, & eiſdem libellum appellationis Flavianus Epiſcopus „dedit; generalem Synodum jubeatis intra Italiam celebrari.“ Et pau- lo infra: *Post appellationem interpoſitam hoc neceſſario poſtulari.* Reſpon- deo: Si Leonis M. epiſtolam attente legas; duo, obſervabis a S. Pon- tifice ſimul petita fuiſſe, & generalem Synodum, & eam quidem *intra Italiam*: primum, ut efficax remedium ſcandalis afferret, prout modo vidimus & hæc facti neceſſitas erat: alterum vero, ut ex jure appella- tionis a Flaviano interpoſitæ Theodoſium reſelleret, ob Ephreſinæ Sy- nodi prætenſam Authoritatem obſtinacius reſiſtentem; hæc ſane Impera- tori oppoſita, quod ipſus libenter aſſero, fuit juris neceſſitas, quam merito S. Pontifex poſt appellationem ad ſe factam contra Pſeudoſyno- dum Ephreſinam ex Nicæniſ, aut Sardiceniſibus canonibus allegavit his verbis: *Quam autem poſt appellationem Flaviani hoc neceſſario poſtuletur, ca- nonum Nicææ habitorum decreta teſtantur.* Illa porro Sardiceniſia decreta, ut vulgo creditur, quæ Leo excitavit, nequaquam ad univerſale Con- cilium, ſed tantum ad apoſtolicæ Sedis judicium appellationis viam oſtendunt. Hæc genuina eſt S. Leonis interpretatio, cur poſt appella- tionem neceſſarium dixerit Concilium, NB. *intra Italiam* celebrandum, ut- pote quod a præſentia ſua, & Authoritate ultimati judicii robur acqui- rere deberet. Non erit ſuperſuum hic dicta de Canonibus Sardiceniſi- bus Art. 3, §. 7. relegere. Nulla ergo Pontifici fuit neceſſitas generale Concilium celebrandi; ſed Imperatori Concilium poſt appellationem ex- ſpectandi, in quo pontificia Authoritas ultimatam ſententiam enunciaret. Propterea ut pontificia Authoritas in reaſſumendo judicio liberior eſſet; id *intra Italiam* fieri S. Leo poſtulavit.

§. 14.

*) Epiſt. 69.

§ 14.

Præter ipsas S. Leonis epistolas habemus & alios ejusdem ævæ, summique momenti interpretes, Valentinianum Imperatorem, qui ad Theodosium scripsit *): „Hinc ergo postulanti (Papæ) annuere non negavi, quatenus ad tuam Mansuetudinem meam petitionem ingererem, ut prædictus Sacerdos (Leo) congregatis ex omni orbe, etiam reliquis Sacerdotibus NB. *intra Italiam* omni præjudicio submotus, a principio omnem causam, quæ vertitur, sollicita probatione cognoscens sententiam ferat.“ Non is Imperator dixit, ut congregati ex toto orbe Sacerdotes omnes, sed ut prædictus Sacerdos, S. Leo sententiam ferat, cui scilicet, ut paulo ante præmiserat, ob Principatum Sacerdotii competeret *de fide, & Sacerdotibus judicare*. Similiter Placidia Augusta ad eundem Theodosium, generale Concilium *intra Italiam* postulans se expressit **): „Ut secundum formam, & definitionem apostolicæ Sedis, quam etiam nos tamquam præcellentem similiter veneramur, in statu Sacerdotii illæso manente per omnia Flaviano, ad Concilium apostolicæ Sedis judicium transmittatur, in qua primus ille, qui cælestes claves dignus fuit accipere, Principatum Episcopatus ornavit.“ Demum nec alio sensu eadem Imperatrix Pulcheria scripsit ***): „Ad apostolicam Sedem, in qua primus Apostolorum B. Petrus, qui etiam claves regnorum cælestium suscipiens, Principatum tenuit, *Episcopatus* (alii *Episcoporum*) causa remittatur.“

§ 15.

Confecta igitur res est: Sanctissimi viri, & Episcopi a Synodis orientalibus inique damnati ad sanctam apostolicam Sedem romanam appellarunt, ab eaque recepti, & restituti sunt, prout Gelasius P. testatur ****): „Apostolica Sedes frequenter more majorum, etiam sine ulla Synodo præcedente, & absolvendi, quos Synodus inique damnaverat, & damnandi nulla existente Synodo, quos oportuit, habuit facultatem. Sanctæ memoriæ quippe Athanasium Synodus orientalis abdixerat; quem tamen exceptum Sedes apostolica, quia damnationi Græcorum non consensit, absolvit. Sanctæ memoriæ nihilominus Joannem Constantinopolitanum Synodus etiam catholicorum Præfulum certe damnavit, quem simili modo Sedes apostolica etiam sola, quia

Q q 2

,,non

*) Epist. 55.

**) Epist. 56.

***) Epist. 58.

****) Epist. 13 ad Episcop. Dardan.

„non consensit, absolvit. Itemque sanctæ memoriæ Flavianum Pontificem, cum congregatione damnatum pari tenore, quoniam Sedes apostolica „non consensit, absolvit.“ Tune vero tot, tamque sanctos Pontifices, & Episcopos auræ ætatis conviciari audebis ab Isidoriano quodam Mercatore fuisse deceptos? Ut ego in immenso veluti mari jam vela contraham, a plurimis aliis Orientalium exemplis, quæ insuper adducere ex quinto, & sequioribus seculis possem, brevitatis gratia abstinerebo, unice adhuc, sed & enixe Lectorem rogans, ut ad ea velit animum reflectere, quæ Corollario I §§. 15, & 16 de Photiano schismate attuli, clarissima oerte facta, ex quibus suprema in judicando potestas apostolicæ Sedis vel ab Orientalibus agnita elucescit.

§. 16.

Antequam occidentalis Ecclesiæ historiam prosequar; vel ipso in limine morandum, & solvenda objectio est, quam licet; inanimissimam, magna tamen verborum pompa Launoyus, & Dupinius, horumque Magistrorum discipuli præjudiciis capti ostentant. In causâ Bonosi, inquirunt, cum a Synodo Capuana delegati iudices, Anysius Thessalonicensis Metropolitæ, & vicini Episcopi per litteras Syricium P. adiissent, ejusque judicio sententiam ferendam commississent, rescripsit Pontifex *): „Sibi judicandi formam non competere, sed ipsorum esse sententiam ferre, quibus Synodus detulisset, nec ullam refugiendi, aut „elabendi accusatoribus, vel accusato copiam esse.“ En meum responsum! Non hic de appellationis, sed primæ instantiæ judicio agitur, quod Pontifex sibi jam non competere, quippe sua dignitate indignum censuit, ne demandata sibi a Synodo potestate judicare videretur, qualis illa fuerat Thessalonicensis, aliorumque ex vicinia Episcoporum. Si causâ tamen integra foret, id est, nondum Synodi nomine iudicibus delegata; propria sua Pontificis Autoritate se judicaturum Siricii asseruit: nunc vero illorum esse *primam* suscipere cognitionem, servata sibi recognoscendi, sententiamque latam confirmandi, vel reformandi potestate. Hoc sibi ipsa volunt Siricii verba: „Accepi litteras vestras „de Bonoso Episcopo, quibus vel pro veritate, vel pro modestia nostram sententiam sciscitari voluistis. Sed cum ejusmodi fuerit Concilii „Capuensis judicium, ut finitimi Bonoso, atque ejus accusatoribus judices tribuerentur, & præcipue Macedones, qui cum Episcopo Thessalonien-

*) Epist. Siric. ad Anyf.

„lonicensi de ejus factis cognoscerent; advertimus, quod nobis judi-
 „candi forma competere non posset. Nam si integra esset hodie Sy-
 „nodus, recte de iis, quæ comprehendit vestrorum scriptorum series,
 „decerneremus. Vestrum est igitur, qui hoc accepistis judicium, sen-
 „tentiam ferre de omnibus: vicem enim Synodi recepistis, quos ad
 „examinandum Synodus elegit. — Ideo primum est, ut ii judicent,
 „quibus judicandi facultas est data: vos enim totius, ut scripsimus, Sy-
 „nodi vice decernitis. Nos quasi ex Synodi Autoritate judicare non
 „convenit. — Unde vestræ normam expectamus sententiæ.“

§. 17.

Eadem responsio confirmatur ex iis, quæ S. Ambrosius rescriptit ad Theophylum Alexandrinum, quem Capuana Synodus delegaverat ad diffidia Antiochenæ Ecclesiæ componenda, scilicet, *quæ Synodi nomine decernerentur, ea esse ad Sedem apostolicam referenda, ut inde confirmarentur.* Non ergo suprema agnoscebatur Capuanæ Synodi Autoritas; sed sicut Alexandrini, ita Theſſalonicensis Archiepiscopi judicium erat apostolicæ Sedi subjiendum. Verba Ambrosii sunt *): „Sane referendum arbitramur ad S. Fratrem nostrum, romanæ Sacerdotem Ecclesiæ, quoniam præsumimus, ea te judicaturum, quæ etiam illi displicere nequeant: ita enim utile erit consultum sententiæ, ita pacis, & quietis securitas, si id vestro statuatur Concilio, quod Communioni nostræ dissensionem non afferat, ut nos quoque accepta vestrorum serie statutorum, cum id gestum esse cognoverimus, quod Ecclesia romana, haud dubie probaverit, læti fructum hujus examinis adipiscamur.“

§. 18.

Graviores causas, illas præsertim fidel, in Africana etiam Ecclesia per appellationem ad Rom. Pontificem deferri potuisse, nunc ostendendum exemplis est. Et Pelagius quidem Episcoporum judicio damnatus vel ipse, ut quidam volunt, ad Innocentium I appellavit, vel Africani Præfules proprio motu sententiam suam ad eundem Pontificem miserunt iis ex rationibus, quas ipsi non siluerunt, tam ut in gravi adeo fidei periculo sua judicia Sedis apostolicæ Autoritate firmarentur, quam ne in ipsos culpa neglecti officii caderet, si quæ pro bono Ecclesiæ suggerenda Pontifici, tacuissent. Summe æstimatum Afris rescri-

Q q 3

ptum

*) Epist., ad Theoph.

ptum Innocentius P. emisit *): — „Antiquæ traditionis exempla servantes, & ecclesiasticæ memores disciplinæ, Vestra Religione vigorem non minus nunc in consulendo, quam antea cum pronuntiaretis, vestra ratione firmastis, qui ad nostrum referendum approbastis esse iudicium, scientes, quid apostolicæ Sedi, cum omnes hoc loco positi ipsum sequi desideremus Apostolum, debeatur, a quo ipse Episcopus, & tota Autoritas nominis hujus emerfit. — Vel id vero, quod Patrum instituta sacerdotali officio custodientes non censetis esse calanda, quod illi non humana, sed divina decrevere sententia, ut quidquid quamvis de disjunctis, remotisque Provinciis ageretur, non prius ducerent finiendum, nisi ad hujus Sedis noticiam perveniret, ut tota hujus Autoritate, iusta quæ fuerit pronuntiatio, firmaretur, indeque fumerent ceteræ Ecclesiæ (velut de natali suo fonte aquæ cunctæ procederent, & per diversas totius mundi regiones puri lactices Capitis incorrupti manarent) quid præcipere, quos abluere, quos veluti cæno inmundabili sorditatos mundis digna corporibus unda vitaret.“ Post hanc primum Pontificis allatam sententiam Pelagii causa Africanis videbatur finita teste Augustino **): *Jam de hac causa duo Concilia ad Sedem apostolicam, inde etiam rescripta venerunt: causa finita est, utinam aliquando finiatur error!*

§. 19.

Innocentio fati functo certe ad ejus Successorem Zosimum Cœlestius Pelagianus appellavit, cujus ille fraudibus delusus Carthaginensis Concilii iudicium suspendi iussit; & Episcopis injunxit, ut deputatos Romam ablegarent, NB. qui etiam paruerunt, missisque simul Concilii actis Papæ suaferunt, *ut iterato Cœlestium ad examen vocaret ***).* At Cœlestius illud sustinere non ausus Roma aufugit: tum vero Zosimus sententiam tulit, qua decreta Concilii Africani confirmavit, & Pelagianam hæresin iterum damnavit, hancque damnationis sententiam prolixa epistola speciatim ad Africanos, & generatim ad omnes catholicæ Ecclesiæ Episcopos, nullo his amplius examine permisso misit subscribendam: id quod etiam fideliter ab universis factum, Juliano, sociisque ejus exceptis, qui & Sede sua depositi, & Ecclesia sunt ejecti. Hæc celeberrima Zosimi epistola, quæ *Tractatoria* vocatur, supremam &

*) Apud Constant. Epist. 29 ad Episcopos, Carthag.

**) Sermon. 132 de verb. Evangel. Joann.

**) Fleur. Tom. 5, Lib. 23, §. 50.

& infallibilem in rebus fidei Authoritatem apostolicæ Sedis ex traditione quinti jam seculi evidenter demonstrat. Vide apud Constantium additamenta ad epistolas Zosimi.

§. 20.

Atque etiam Episcoporum causas ex Africa ad romanam Sedem per appellationem deferri potuisse, testem exceptione majorem habemus S. Augustinum, qui de Cæciliano Carthaginensi Episcopo a Donatistis exagitato, & in pluribus Conciliis deposito scribit Epist. 162, illum potuisse suam causam dicere apud romanam Ecclesiam, *in qua semper apostolica Cathedræ viguit Principatus*. Neque enim Africana vetus disciplina sicut inferioribus Clericis NB. in causis mere personalibus, & criminalibus, ita Episcopis quoque appellationes transmarinas prohibuerat, id quod expresse iterum de eodem Cæciliano Augustinus testatur: „Neque enim de Presbyteris, aut Diaconis, aut inferioris ordinis Clericis, sed de Collegis agebatur, qui possent aliorum Collegarum iudicio, præsertim apostolicarum Ecclesiarum causam suam integram reservare.“ Hæc sua facultate reipsa usus est Antonius Fussalensis, qui apud Synodum Provinciæ accusatus, & Sede sua dejectus ad Bonifacium P. appellavit, quam appellationem non solum Pontifex acceptavit, sed & ipsi Africani Præsules ratam agnoverunt, cum Synodi Acta Romam miserint, & ipse adeo Numidiæ Primas ad Pontificem pro Antonio litteras dederit commendatitias *). Porro frequentia tunc fuisse hujusmodi exempla, *Sede apostolica judicante, vel aliorum iudicia firmante*, ex Epist. 26 S. Augustini discimus, qui prætermisiss antiquioribus tria recentia tantum iudicia in Episcopos Africæ lata commemorat. Hæc Augustini testimonia sufficiant, ut brevitate studio nihil dicam de Lupicino Africæ Episcopo, quem pendente causa coram apostolica Sede, quo appellavit, excommunicari non debuisset, S. Leo Afris rescriptit Epist. 87. Hanc ipsam epistolæ partem vere genuinam esse, nec merito suppositionis suspectam contra Quesnelli conatus doctiss. FF. Ballerinii suis in Annotationibus demonstrarunt.

*) Fleur. Tom. 5, L. 24, §. 34.

§. 21.

Nihil adversariis predest famosa, sed & intricata ipso fatente Dupinio Afrorum controversia cum summis Pontificibus, Zosimo, Bonifacio, Cœlestino. 1^{mo} enim ipsa principalis causa non circa appellationem cujusdam Episcopi, sed Apiarii Presbyteri versabatur. 2^{do} non de appellationibus in causa fidei, sed tantum in mere personali, seu criminali agebatur: 3^{tio} Afri non ipsum jus divinum supremi judicis Pontifici negabant, sed tantum juris exercitium restringi, non penitus tolli petebant: hinc intacto jure sola pericula fraudum & abusuum opponunt, neque Episcoporum appellationes absolute volunt exclusas, sed tantum ne *facilius* admittantur, & ne illi *præpropere* & *indebite* videantur restitui. 4^{to} Ipsorum animi facto Apiarii non injuste quidem, gravius tamen offensi, & commoti fuerant, hinc prout natura fert, suo impetu ad extrema præcipites, omnibusque generatim appellationibus infensi: 5^{to} Ignorantia facti laborabant, videlicet Canonum Sardicensium infcii, & in Nicænis suæ causæ patrocinium invenisse sibi visi: quid vero Pontifices pro tuendis suis juribus responderint, hodie perditis Rescriptis ignoratur. 6^{to} Demum, tametsi Afri falso fundamento juris ecclesiastici Pontifices niti crederent, vel sola tamen observantia erga apostolicam Cathedram pontificium Legatum sua in regione *NB. cum facultate judicis* admiserunt, nec indigne tulerunt, Coepiscopum suum Urbanum Romam ad causam evocari; sed licet adhuc controversia durante exactam Pontificis mandatis obedientiam præstiterunt. Quam ob rem merito FF. Ballerini concludunt*): „Videant, qua moderatione iis utendum sit, qui hac in re Afri-
„canis Magistris, ac Ducibus gloriantur, ac simul intelliguat, quam per-
„peram hanc Africanorum resistantiam solis appellationibus Clericorum
„transferant ad Episcoporum appellationes; quas ab Africanis nunquam
„vetitas, & semper receptas ostendimus.“ Quid? quod ipse antiquus
Codex Africanæ Ecclesiæ expresse testatur in certis casibus etiam inferioribus Clericis a provinciali Synodo provocare licuisse: *Si judices convinci potuerint vel inimico animo judicasse, vel aliqua cupiditate, aut gratia depravati.* can. 10 Concil. Carth. III. Quid hic tranquillus Lector nostro ævo cogitabit?? — Demus autem, &, quod falsum est, quasi verum transmittamus, Africanos nullas generatim appellationes in causis criminalibus ad Romanum Pontificem admisisse; quid sola Africa adversus universæ Ecclesiæ consensum & observantiam valeret?

§. 22.

*) Opp. S. Leon. Tom. 2, p. 971.

§. 22.

Quantum in Occidente pontificiæ Authoritati circa judicia ecclesiastica fuerit tributum, imprimis ex antiquissima constat Imperatoria Lege, quam a Gratiano Synodus Romana precibus impetraverat, ut judiciorum ecclesiasticorum ordo seculari, quod ajunt, brachio protegeretur, & in executionem deduceretur. Lex autem Gratiani primum de judiciis in prima instantia sic disponit: „Volumus, ut quicumque judicio Damasi, quod ille cum Concilio „quinque vel septem habuerit Episcoporum, vel eorum, qui Catholici „sunt, judicio, vel Concilio condemnatus fuerit, si injuste voluerit „Ecclesiam retinere; ut qui evocatus ad Sacerdotale judicium per contumaciam non ivisset, aut ab illustribus viris, Præfectis Prætorio Gallicæ, atque Italiæ, sive Proconsulibus, vel a Vicariis autoritate adhibita ad episcopale judicium, ut ad urbem Romam sub prosecutione „proveniat, aut si in longinquiorebus partibus alicujus ferocitas talis „emerferit, omnis ejus causæ dictio ad Metropolitæ in eadem provincia „Episcopi deducatur examen, vel si ipse Metropolitanus est, Romam „necessario, vel ad eos, quos Romanus Episcopus judices dederit, sine „dilatione contendat. (Deinde de secunda instantia.) Quodsi vel Metropolitani Episcopi, vel cujuscumque iniquitas est suspecta, aut gratia; „ad Romanum Episcopum accersitum liceat provocare.“*) Hanc Imperatoris legem ad preces Romanæ Ecclesiæ latam, quæ semper a Catholicis tamquam Mater & Magistra omnium reliquarum est agnita, exsufflat Dupinius, asserens, sed non probans *numquam fuisse promulgatam, nec usu receptam*. Asserenti incumbit probatio. Nos vero hujus legis observantiam vel ex ipsa Gallia mox demonstrabimus.

§. 23.

Maximum Valentiniæ civitatis Episcopum ob gravissima crimina Clerici jam ad Præcessores Bonifacii I detulerunt, a quibus provinciales judices pro causæ cognitione *NB.* delegati fuerunt, quod tamen judicium astute ille subterfugit, propterea iterato apud Bonifacium accusatus. Pontifex etsi illum jam sua sententia damnare potuisset, prout semper in summa Sede misericordia prævalet judicio, noviter per omnes provincias datis litteris Gallicanæ Synodi judicio examen commisit, ita tamen,

*) Vide apud Dupin. *de antiq. Eccles. Discipl.* Dissert. 2. Cap. 1. §. 4.

tamen, ut Patrum sententia ad se Romam pro confirmatione mitteretur. Verba epistolæ sunt *): „Quidquid autem Vestra charitas de hac causâ „duxerit decernendum, cum ad nos relatum fuerit, nostra ut concedet, „necesse est Authoritate firmetur.“ Apud eundem Pontificem, non tantum apud suum Metropolitam, aut Synodum provincialem Lutevenses Clerici Patroclum arelatensem accusarunt, quod in aliena provincia prætermisso Metropolitano Episcopum ordinasset. Bonifacius P. totam hanc causam Metropolitæ, Hilario Narbonensi apostolica autoritate committit, ita tamen, ut peractis omnibus apostolicæ Sedi, quidquid statuerit, referret **). Inde manifestum fit, provincialium Synodorum, aut Archiepiscoporum judicia non sine apostolica Authoritate supremi tribunalis locum tenuisse. Porro Cælestinus P. ab Orientalibus apud se accusatum Danielelem, jam vero in Gallia Episcopum factum, non expectato provincialis Synodi iudicio, mox dignitate episcopali a se dejectum, Romam ad suum iudicium avocavit. Idem Pontifex causam Massiliensis Episcopi ad se delatam archiepiscopali iudicio NB. sua Authoritate delegavit ***). Certe Archiepiscopi Galliæ, tamquam causarum delegati iudices, sicut ad Bonifacium, ita ad Cælestinum suam sententiam referre debebant, apostolica autoritate firmandam. Si jam veterem aureæ ætatis disciplinam hierarchicam, hoc est quarti, quintique seculi usque ad octavum ex Oriente, & Occidente comparemus; hoc plane dignissimum notatu discrimen apparebit, apud Orientales quidem in graviore causâ semper viam ad primam Petri Cathedram, sed nonnisi per appellationem patuisse: in occidentalibus vero, Europæ præsertim Ecclesiis ad pontificium tribunal primum etiam iudicium potuisse deferri, & Archiepiscopos quam maxime delegata Authoritate apostolicæ Sedis, cui suas sententias referre debebant, fuisse gavisos. Non est, cur Dupinii inanes cavillationes hic morer, quæ ipsas Pontificum illorum epistolas genuinas legenti facile evanescent.

§. 24.

Nunc breviter adhuc ad Leonis M. facta contra falsam, atque iniquam Quesnelli censuram satis quidem jam a FF. Balleriniis vindicata ****). Celidonium Galliæ Episcopum a S. Hilario Arelatenfis in Synodo

*) Bonifac. Epist. 2 ad Episc. Galliæ.

**) Epist. ejusdem 13 ad Hilar.

***) Cælestin. Epist. 2 ad Episc. Provinc. Viennens. & Narbon.

****) Opp. S. Leon. T. 2. Observat. in § Dissert. Quesnel.

modo damnatum ad Leonem P. appellasse, ab eoque appellationem suscep-
tam, & Hilarii sententiam fuisse reformatam, res est vel ipsis ad-
versarius exploratissima: tantum quod negant, pernegantque, est, S. Hi-
larium, ceterosque Gallie Episcopos Pontificis judicio acquievisse.
Sed & hac in re præter FF. Ballerinius Quesnellum luculentissime falsi-
tatis convincit doctis. Cerboni *). Idem Hilarius in causa Projecti
Episcopi, cui contra Canones Successorem ordinavit, apud Pontificem
accusatus, adversus se sententiam retulit. Memoratu digna est Impe-
ratoris Valentiniani constitutio in Gallias missa, qua Leonis decretum
adversus Hilarium jure Metropolitico a Papa spoliatum jussit executioni
mandari: „Quid enim (inquit Imperator) tanti Pontificis Autoritati
„in Ecclesiis non liceret? Sed nostram quoque præceptionem hæc ratio
„probavit, ne ulterius nec Hilario, quem adhuc Episcopum nuncupari
„sola mansueti Præfulis permittit humanitas, nec cuiquam alteri eccle-
„siasticis rebus arma miscere, aut præceptis romani Antistitis liceat ob-
„viare. — NB. Hac perenni sanctione censemus, ne quid tam Epi-
„scopis gallicanis, quam aliarum Provinciarum contra consuetudinem
„veterem liceat sine venerabili Papæ Urbis æternæ Autoritate tentare.
„Sed hoc illis, omnibusque pro lege sit, quidquid sanxit, vel sanxerit
„apostolicæ Sedis Autoritas, ita ut quisquis Episcoporum ad iudicium
„romani Antistitis evocatus venire neglexerit, per Moderatorem ejus-
„dem Provinciæ adesse cogatur“ **). En pragmaticam legem Imperii
occidentalis etiam pro evocatione Archi- vel Episcoporum ad roma-
num Pontificis iudicium! Facile foret, si volupe pro pontificio Appel-
lationum jure ex Italia, Hispania, Illyrico vetera adhuc exempla pro-
ducere. Doctissimi Viri, d'Agguierre, Natalis ipse Alexander, FF.
Ballerinii, Cerboni, Zaccharia, alique abunde id jam præstiterunt.
Unice velim Lectorem meum hic rogatum, ut de S. Gregorio M. histo-
riam relegat supra Coroll. I, §. 10 ex Fleurio a me desumptam.

§. 25.

Quod vero in prima etiam instantia aditus ad apostolicam Se-
dem patuerit, epistolæ S. Gregorii exempla ipsius Africæ exhibent, un-
de difficiliore fuerant appellationes. Sic epistola ad Monachum Hila-
rium nos docet, quod Felicissimus, & Vincentius Diaconi a suo Epi-
scopo

R r 2

*) De Jure, & legum Disciplina. Tom. 3. Romæ 1777.

**) Vide Cerboni. Tom. 3, p. 345.

scopo Argentio injuriam passi, eundem insuper turpissimi criminis reum ad S. Pontificem detulerint: Gregorius vero admissa accusatione Hilario, tamquam Legato suo, quid agere deberet, præscripsit. Ex epistola ad Columbum discimus, Constantium, & Mustellum Diaconos Pontifici nunciasse, quod Maximianus Ecclesiæ Pudentiæ catholicus Episcopus pecunia corruptus defuncto illius Ecclesiæ Donatista Episcopo alium ex eadem secta permiserit ordinari: unde Pontifex, quid agendum, præcepit. Clerus Ecclesiæ Regensis suum Episcopum Paulinum nimis Sævitiæ apud Gregorium accusavit; quapropter is datis litteris ad eundem Columbum, & ad Victorem Numidiæ Primatem hanc Episcopi culpam præcipit puniendam. Edic Febroniane, num & has litteras pontificias inter spurias Isidori censeas abijciendas? —

§. 26.

Nec primi tantum ordinis Sacerdotes, seu Episcopi, sed & inferiores Clerici poterant ad Sedem romanam ex utraque Ecclesia, tam Orientis, quam Occidentis appellare; imo interdum etiam in prima instantia illic suum refugium quærebant, ubi summus totius Pastor ovilis præfederat. Per Africanam disciplinam id quidem inferioribus Clericis ad præcavendos abusus in causis personalibus erat vetitum; quæ tamen regula in causis Ecclesiæ gravioribus, maxime autem fidei exceptionem patiebatur, ut ex Africa prolatis exemplis doctis. Mansi comprobatur *), & nos ipsi quædam super. §. vidimus. Frequentiora sunt exempla aliarum Ecclesiarum, & quidem Clerici Constantinopolitani a Nestorio degradati ad Cælestinum appellarunt, qui eos in suo gradu, & communione permanere decrevit, quod patet ex ipsius Epist. 19. Aëtius ejusdem Ecclesiæ Archidiaconus contra Patriarcham Anatholium ad S. Leonem appellavit, ut ex Epist. 57, & 58 ad Marcianum, & Pulcheriam dignoscitur. Eutyches Archimandrita, & Ecclesiæ Constantinopolitanæ Presbyter a Concilio ad eundem Pontificem primum quidem appellasse mentitus est, postea vero actu appellavit. Neque in Gallia inusitata fuerant hujusmodi appellationes. Ita Savianus, ac Leo Presbyteri a Rustico Narbonensi Metropolitano degradati Romæ novo examine suam causam discuti petiere, cumque & illic judicio defecissent, a S. Leone ad suum Episcopum remissi, ejusque clementiæ commendati sunt, ut constat ex Epist. 92 ad Rusticum. Tuentius Gallicanæ Eccle-

siæ

*) Animadvers. 1 in Næal. Alexand. Dissert. 28 de Jure appellationum.

sia Clericus adversus Proclum Massiliensem Metropolitam ad Pontificem appellavit, quod docet Zosimi P. epistola ad Episcopos Africae, Galliae, & Hispaniae. Clerici Arelatenfes ad Pelagium I confugerunt, nec auditus fuit Sapandus Episcopus, etsi ægerrime id ferret. Profecto si SS. Pontificum epistolas ad seculum usque octavum scrutemur, passim apparebit, etiam inferioris Cleri appellationes ad romanam Sedem ubique in usu diu ante famosum Mercatorem fuisse. Tu Febroniane! quid ad historica hæc exempla dices? etiamnum Ecclesiae disciplinam falsis mercibus esse corruptam asseres? Sed mendacium tuum manibus palpamus.

§. 27.

Ultimo loco hujus Articuli non est silentio prætereundum, quam antiquæ illi hætenus a nobis explanatæ nostra Germaniæ disciplina vel inde a sua fundatione, hoc est sub S. Bonifacio, nostro Apostolo conformis fuerit. Etsi quidem tunc proprio motu Ecclesiae particulares secundum Veterum instituta romanæ Matri fideliter referrent, si qua res nova, aut gravior causa contigisset, eamque Pontificum judicio committerent finaliter determinandam; attamen exempla non desunt recursuum ab Episcoporum judiciis ad apostolicam Petri Cathedram. Ita Episcopi, ac Presbyteri criminum causa depositi Romam contendebant, & inde reversi se absolutos jactabant. S. Bonifacius nequaquam id faciendi potestatem, seu ipsam in hos Sacerdotes jurisdictionem ausus est summo Pontifici abnegare; sed submissa epistola rei veritatem edoceri petiit: cui Zacharias P. a. 745 rescripsit: „Et hoc pariter suggestisti, „quod hi, qui ante projecti sunt Sacerdotes, a nobis se absolutos apud Francorum Provinciam divulgant, quod tua S. Fraternitas nullo modo credat, „Quia (quod impossibile) si hoc fecissemus, tuæ charitati per nostras indicassemus litteras. Sed hoc, quod impossibile, nullo modo credas, quia „non aliud prædicamus, & aliud agimus, & dirigimus, ut illi garriunt; „sed auxiliante Deo illud, quod prædicamus, finetenus observandum censemus. Hoc autem Sanctitatem tuam, firmissime ut teneas, hortamur, NB. ut sanctorum Patrum institutis, & consultis sacrorum „Canonum omnimodo obsequi debeas, quia nos nullatenus aliud prædicamus, & aliud agimus“ *). Infani fuissent hi Sacerdotes, si Romam usque profecti fuissent præscii, si rediissent, nullam pontificiæ ab-

R r 3

solutio-

*) Apud Harzheim. Tom. I, p. 71.

Digitized by Google

solutionis rationem in Germania habendam: ad quid enim illam mentiti fuissent? Hinc & Pontifex suam quidem absolventi jurisdictionem insinuat per ea verba: *quia si id fecissent, per litteras indicassent* sed hos tamen Sacerdotes absolvere sibi impossibile fatetur, non quasi ex defectu jurisdictionis, sed ex defectu justitiæ, eoquod contra Canones peccare non posset, quos defendere deberet, hoc est, quia non aliter posset agere, quam predicaret.

§. 28.

Quin etiam apostolica nostræ Germaniæ tempora nos docent, summo Pontifici non solum jus fuisse a Synodo provinciali appellationes suscipiendi, sed & partium evocationes Romam usque suum ad iudicium faciendi. Hoc altera demonstrat epistola Zachariæ P. scripta a. 747: „Dum fuerit aggregatum Concilium, ad medium deducantur „sacrilegi illi, & contumaces, Adalbertus, & Godalsacius, & Clemens „Episcopi, ut eorum denuo subtili indagatione cribretur causa: quod- „si deviantes a rectitudinis tramite usquequaque repereritis, & conv- „dicti fuerint, inclinati ad viam converti rectitudinis, ut bonum, atque „placitum in oculis vestris paruerit, cum Principe Provinciæ disponite „secundum sacrorum Canonum sancita. Sin autem in superbia persti- „terint contumaciter proclamantes, reos se non esse; tunc cum pro- „batissimis, atque prudentissimis Sacerdotibus duobus, aut tribus præ- „dictos ad nos dirigatis viros, ut profunda inquisitione eorum Sede „apostolica eorum inquiratur causa, & juxta quod meruerint, finem „suscipiant“ *). Satis jam dilucide veterem seculorum, quæ adhuc pura ab lîdori corruptione vocantur, disciplinam circa appellationes perspeximus.

ARTICULUS V.

De Jure recentiore, speciatim Germanico.

§. I.

Sequiori ævo appellationes ad romanam Curiam fuisse adhuc frequentiores, nec adversarii negant, nec nobis probandum incumbit. Ceterum nolim ego curiosius indagare, an ipsæ forsitan successu temporis frequen-

*) Harzheim T. I, p. 76.

quentiores inferiorum tribunalium injustitiæ, aut violentiæ hæc miserrum refugia ad supremum judicem, in jure naturæ fundata multiplicaverint: siquidem cum mundi dignitatibus etiam arrogantia Præsulum, maxime autem Archipræsulum nonnumquam ad exorbitantiam usque adcrevisse videatur. Certum esse non diffiteor, prout in rebus humanis nihil est a rubigine abusuum exemptum, seculis undecimo & duodecimo appellationum frequentiam tanto jam excessu inolevisse, ut cum S. Bernardo viri probatissimi justas propterea querelas, præsertim quod profanæ causæ sine numero & modo Romam traherentur, ipsis Pontificibus proponerent. Hinc primam juris, verius autem abusuum reformationem ab iisdem etiam Pontificibus factam invenio, plurimis jam causis ad delegatos in partibus judices sponte sua remissis. Sane id in Eugenio III jam laudat Bernardus *in considerat.*: „Bene facis tu, quod appellationum negato suffragio, imo suffugio multa remittis negotia ad cognoscentes, vel qui noscere citius possunt: ubi enim certior, ac felicior notio, ibi decisio tutior, expeditiorque.“ Alia ad cavendos abusus avocationum, aut causarum delegationum remedia largiter instituerunt summi Pontifices Innocentius III. a. 1216, Honorius III. a. 1223, Innocentius IV. a. 1243, Bonifacius VIII. a. 1302, & Clemens V. 1311, quorum singula statuta vide vel in libro Pontificibus Romanis summe infenso *).

§. 2.

Juris autem publico pacto Ecclesiam inter, & Imperium firmam de appellationibus prima Epocha se mihi offert initio Seculi XIII, ubi Imperatores Otto IV. a. 1209, & Fridericus II. a. 1213 pacem cum romano Pontifice inierunt promittentes, *se quidem non impedituros ad romanam Curiam appellationes, attamen tantum in causis ecclesiasticis.* Quam regulam a. 1230 etiam amplexus est Rex Henricus in comitiis Wormatiensibus. Idem inculcat *Pax publica* Friderici II. de a. 1235. Huic regule etiam Concilia Germaniæ sese conformabant: ita Concilium provinciale Moguntinum a. 1261: & Colonienſe a. 1266. Unde & Rudolphus Habsburgicus a. 1275 summo Pontifici promisit: „Appellationes in negotiis, & causis ecclesiasticis ad apostolicam Sedem libere fiant, eorumque persecutionem, sive processum nullus impedire præsumat“ **). Ea Concordatorum Germaniæ partem non contempnam, & quidem regulam

*) Concordata Nationis germanicæ integræ, Tom. 2, pag. 193.

**) Vide l. c. p. 191.

gulam ad interpretationem posteriorum. Non enim a natione nostra a. 1439 Moguntiae decreta Basileensia omnia *absolute*, sed tantum *cum certis modificationibus* sunt acceptata, seu prout ipse Rex Rom. Albertus II in sua constitutione explicat, *quatenus commoditatibus temporibusque, & moribus Nationis Germanicae convenire videntur.* *) Atqui ex modo allatis documentis constat, in moribus Germaniae fuisse positum, & pactis publicis firmatum, NB. *ut in causis ecclesiasticis appellationes ad apostolicam Sedem libere fiant, easque nemo impedire praesumat.* Ea est ergo modificatio, sub qua Decretum Basileense sess. 31 a Germanis acceptum dici potest, scilicet *secundum mores, & consuetudinem Germanorum.*

§. 3.

Hæc epocha reformationis, seu juris recentioris in Imperio circa appellationes, seculum XIII, quæ ad romanam etiam Curiam in causis ecclesiasticis appellare quidem permissum, ab ipsis tamen Pontificibus, ut cum iusto moderamine id fieret, fuit provisum. Cumque abusus mala teste experientia numquam possint simul ac semel, quasi in momento curari; haud sane difficiles in restringendis amplius ab ordinario iudice avocationibus sese præbuerunt Pontifices: ita Moguntia ab Innocentio IV speciale privilegium petiit, atque obtinuit, vi cuius in nulla causa litigantes extra patriam possint ad iudices evocari, quamdiu ipsæ partes coram Ordinario suo paratæ forent juri stare. Aliis adhuc modis in provincialibus Synodis e, g. circa delegatos iudices abusus remedia Papis non invitis quærebantur**): adeo, ut si veritatem fateri velis, summos Pontifices, dicas paterno potius affectu iudicum subditorum querelis remedi studuisse, quam easdem durius, aut imperiosius repulisse.

§. 4.

Quod causas criminales inferiorum Clericorum concernit; easdem sicut in Gallia ab ævo Caroli Calvi, sic & in Germania regulariter, hoc est, vi observantiæ ac privilegii apostolici ad transalpinum iudicium devolvi non potuisse videtur: hoc quidem dari potest hodiernis ad *jus antiquum Germaniae*, NB. quod isidoriano antiquius non est, Appellatoribus. Dignissimum autem observatu est, quod hac occasione multi cum criminum causis, mere *personalibus* controversias *reales* integrarum societatum

*) Ad Concord. Nat. Germ. Document. Fascicul. 2, p. 4.

**) L. c. p. 196.

tatum e. g. *Monasteriorum* perperam confundant, falso præjudicio ducti, sicut in illis, ita in his quoque casibus ad summæ Sedis tribunal recursum fuisse umquam prohibitum. Præterquam enim, quod nec inferioribus Clericis in causa personali appellatio fuerit interdicta, ubi domesticos iudices cum fundamento poterant *iniquitatis* arguere; illæ *Monasteriorum* ad romanum Pontificem provocaciones non fuerant propriæ tamquam a legitima iudicis sententia appellationes, sed plerumque contra opprimendum violentiam, eamque non raro extrajudicialem, aut certe nimium aperte partialem refugia. Si vel unius *Monasterii* historiam vellem hic describere, quam pudenda facinora elapsum temporum resuscitare deberem oblivione jam merito sepulta! Quamobrem non solum in ejusmodi casibus ad summam Sedem refugia tunc petebant, sed & ipsi fundatores *Monasteriorum* eadem sæpe ab Episcoporum potestate exempta, & romano Pontifici immediate cupiebant esse subiecta. Quæ *Monasteriorum* causæ, etsi quidem ex se ipsis ad personales, imo criminales Clericorum causas veteri jure ordinatas non pertineant; quoniam tamen cum iisdem solent a plerisque commisceri, licebit mihi breviter hoc loco περισαλογειν.

§. 5.

Disciplinæ primævæ In Germania fundamentale documentum exhibet Abbatia Fuldensis inde a sua fundatione exemptio, per ipsum nostræ Patriæ Apostolum, S. Bonifacium ab apostolica Sede impetrata. Authenticum hoc Privilegium immediatæ subjectionis erga romanam Ecclesiam Zacharias P. anno 751 concessit, quod Mabillonius refert lectu non indignum *). „Zacharias P. Bonifacio Episcopo, & per eum Fratribus „in Monasterio ab eo constructo. Quoniam semper sunt concedenda, „quæ rationalibus congruunt desideriis, oportet, ut devotioni Condi- „ris piæ constructionis oraculum in privilegiis præstandis minime denegetur. Igitur quia postulasti a nobis, quatenus Monasterium Salvatoris „a te constructum in loco, qui vocatur Boehonia, erga ripam fluminis „Fuldæ privilegio Sedis apostolicæ decoretur, ut sub jurisdictione sanctæ „nostræ, cui Deo Authore deservimus, Ecclesiæ constitutum, nullius „alterius Ecclesiæ potestati submittatur; Pro qua re piis desideriis faventes hac nostra Authoritate, id quod exposcitur, effectui mancipamus.

„Et

*) Annales. Ord. S. Bened. T. 2, p. 156.

„Et ideo omnem cuiuslibet Ecclesiæ Sacerdotem in præfato Monasterio
 „ditionem ullam habere, aut authoritatem, præter Sedem Apostolicam,
 „prohibemus: ita ut nisi ab Abbate Monasterii fuerit invitatus, nec
 „Missarum solemnitatem ibidem quisquam præsumat celebrare, ut pro-
 „fecto juxta id, quod subiectum apostolicæ Sedi consistit, inconcussè
 „dotatum permaneat: Locis quoque, & rebus, tam eis, quas moder-
 „no tempore tenet, vel possidet, quam quæ futuris temporibus in jus
 „ipsius monasterii divina Pietas voluerit augere ex donis, & oblationi-
 „bus, decimisque fidelium, absque ullius personæ contradictione, fir-
 „mitate perpetua perfruatur. Constituimus quoque per hujus decreti
 „nostri paginam, ut quicumque cuiuslibet Ecclesiæ Præsul, vel qua-
 „cumque dignitate prædita persona hanc Privilegii nostri chartam, quam
 „Authoritate Principis Apostolorum firmamus, temere tentaverit,
 „anathema sit, & iram Dei incurrens a cœtu Sanctorum omnium ex-
 „torris fiat: Et nihilominus præfati Monasterii dignitas a nobis indul-
 „ta, perpetualiter inviolata permaneat, apostolica Authoritate subni-
 „ta. Data pridie Nonas Novembris imperante Domino Augusto Con-
 „stantino, anno 32 Imperii ejus, Indictione quinta.“

§. 6.

Refugia igitur ad summum Ecclesiæ Antistitem, quo suos Ad-
 versarios sæpius Religiosi provocabant, ipso nitebantur jure naturæ,
 nulla hominum dispositione impediendo. Atque hac ipsius naturæ æqui-
 tate impellente hodiernis etiam diebus fieri conspicimus, ut Monaste-
 riorum causæ vel a Dominis Protestantibus non minus doctè, quam
 solide defendantur. Qua in Palæstra insignem victoriæ laurum contra
 Moguntinos non ita pridem sibi promeruit celeberrimus Schlettwei-
 nius *). Sed quod singulariter commemoretur, dignissimum est Ele-
 ctoris Palatini nunc gloriosissime regnantis decretum a. 1779 die 1 De-
 cembris datum pro tutela Regularium contra Moguntini, vel potius
 Wormatiensis Episcopi violentiam: en tenorem decreti: „Eo minus ex-
 „spectare debuimus susceptum tribunali ecclesiastico tam indignum, quo
 „per illud jura nostra territorialia inveniantur læsa, religiosi Ordines,
 „quorum manibus arma defunt, magis magisque afflicti, Catholicorum
 „plebs

*) Die Gerechtigkeit in Abſicht auf die Klöſter. 1784. Wichtige Beyträge zu
 der Gerechtigkeit in Abſicht auf die Klöſter. 1785. Entwicklung der wichtigen
 Materien vom Kirchenſeigenthum. 1786.

„plebs scandalizata, & opprobria Protestantium provocata. Inutilis labor foret multis demonstrare formidandas similis attentati con-
 „sequencias: hæ nimis jam publico notæ sunt. Et cum decreta Wor-
 „matensium in sua executione necessario terribiles effectus producere
 „debeant; obligatos nos sentimus, pro pace interna Religionis, pro
 „conservatione Dignitatis electoralis, pro afflictorum consolatione his-
 „ce Dominis ante omnia amicabiliter declarare, quod neutiquam co-
 „gitemus respicere, aut quomodolibet effectui dare directe, vel indi-
 „recte, privatim aut publice dictam resolutionem, nec quamcumque
 „aliam, quæ in futurum prodire posset in præjudicium statutorum Con-
 „cilii generalis Tridentini quoad episcopalem jurisdictionem erga Reli-
 „giosos. Non possumus non hosce Dominos rogare, ut statibus no-
 „stris parcant, ne per ejusmodi attentata tempestas erumpat injuriosa
 „reverentiæ Episcopis debitæ, & honori sanctæ Religionis. Hortamur
 „e contrario, ut evitetur omnis perturbatio in cura animarum, omnis
 „violatio ecclesiasticæ Constitutionis, omnis immutatio in regulis insti-
 „tutorum religiosorum, nos potius conjuncto studio adjuvare in iis,
 „quæ ex jure Advocatiæ, & Superioritatis territorialis impendere de-
 „bemus, remediis ad bonum Religionis, & Cleri.“ Quodsi Religiosos
 „inique pressos vel seculares Principes suam in tutelam hodie recipiant;
 „quis credat antiquitus contra injustas oppressiones vetitum fuisse ad
 „supremum Ecclesiæ Caput refugium?

§. 7.

Ut denuo ad gravamina in specie Germanorum circa appella-
 tionum abusus redeamus; tempore magni Schismatis, ne tunc quidem
 ipsum divinum jus apostolicæ Sedis graviores causas suum ad tribunal
 advocandi ullus eorum, qui catholicæ Ecclesiæ membrum esse ambie-
 bant, impugnare, vel in dubium vocare est ausus; sed in Concilio
 Constantiensi tantum quoad causas minores avocationum ad Curiam li-
 mitationem post Gersonium quidam petiere: quin ipsa Synodus seculari-
 bus adeo in causis romanum tribunal permisit: 1^{mo} in casu perhor-
 rescentiæ duobus testibus, & juramento Actoris probandæ: 2^{do} in
 casu negligentæ secularis judicis legitime probatæ: 3^{io} cum consen-
 su partium expresso *). De causis vero ecclesiasticis ita decrevit:
 „Quæ vero ad forum ecclesiasticum pertinent, & NB. de jure sunt
 „per

S s 2

*) Van der Hardt, Tom. 1, Col. 1003.

„per appellationem, aut alias devolutæ, aut de sua natura in illa
 „(Curia) tractandæ, tractentur in ea: ceteræ committantur in parti-
 „bus, nisi forte pro causæ aut personarum qualitate illas tractare in
 „Curia expediret pro iustitia consequenda *), vel de Partium consen-
 „su in Curia tractarentur. Matrimoniales tamen causæ in prima in-
 „stantia præter appellationem non committantur in Curia, nisi in caus-
 „sis proxime dictis. Item ad refrenandum appellationes frustratorias,
 „quæ ante definitivas sententias interponuntur, ordinamus, quod in-
 „iuste, seu frivole appellantes ab interlocutoria, vel gravamine ultra
 „condemnationem expensarum, damnorum, & interesse in decem flo-
 „renos, si appellatio interponatur in Curia, & in viginti, si de Parti-
 „tibus ad Curiam, parti appellatæ condemnentur. Et quod super ea-
 „dem locutoria, vel gravamine secundo appellare non liceat, nisi ha-
 „berent vim definitivæ“ **). Tantum jus Pontificis circa appellatio-
 „nes Constantiensis Synodus agnovit, quam certe non dices Pontificum
 „adulatricem, aut illorum dominatui subditam fuisse.

§. 8.

Nostra autem germanica Natio tam longe ab iniqua pe-
 titioe abrogationis omnium sine discrimine appellationum ad romanam
 Sedem, ut in Avissamentis a. 1418 Martino P. exhibitis tantum mode-
 ramen desideraret circa appellationes *extrajudiciales*, aut etiam *judiciales*
omisso medio, indifferenter, & citra definitivam. Quamobrem etiam Pon-
 tificex ad quinquennium cum Germanis concordavit in hunc modum***):
 „Sanctissimus Dominus noster Papa Martinus V statuit, & ordinat, quod
 „nullæ causæ in romana Curia committantur, nisi quæ de jure, & na-
 „tura causæ in romana Curia tractari debebunt, & quod causæ, quæ
 „ad forum ecclesiasticum de jure, vel consuetudine non pertinent,
 „per

*) Ita ab universali Synodo diffidentia quædam prodita fuit saltem in quibusdam
 inferioribus iudiciis.

**) Sess. 43.

**) Ea est concordati hujus conditio, ut tantum ad quinque annos fuerit initum:
 qua ergo fronte quidam hunc summum Pontificem, aliosque illius Successores
 fracti publici foderis reos condemnare audeant, non perspicio. Neque id
 hominum genus multoiosa hujus concordati perversione adversus summos Ponti-
 fices uti velle, mihi facile persuasero; attamen eosdem a crassa hujus rei igno-
 rantia haud excusandos existimo. Plura forte, si digna se obtulerit occasio,
 hac de re alias.

„per romanam Curiam etiam prætextu cruce signationis Laicorum extra
 „tempus passagii non recipiantur de illis cognoscendo in Curia, vel
 „extra committendo, nisi de consensu partium. Quæ vero ad forum
 „ecclesiasticum pertinent, & de jure sunt per appellationem, aut alias
 „ad romanam Curiam devolutæ, ac de sui natura in eadem tractandæ,
 „tractentur in ea, ceteræ committantur in Partibus, nisi forsan pro
 „caussæ, & personarum qualitate in commissione exprimenda illas tra-
 „ctari in Curia expediret pro justitia consequenda, vel de Partium con-
 „sensu in Curia tractarentur“ *). En ut faciles semper, & æquos er-
 ga petitiones Nationum sese romani Pontifices præstiterint!

§. 9.

His tamen non contenti Basileenses, ut summum Sacerdotera
 deprimerent, toto animo studiosi, sibi vero ipsis non solum ecclesia-
 sticam, sed & secularem jurisdictionem ultra modum inique arrogantes,
 cum jam Catholicorum omnium consensu schismatici essent, quo Na-
 tionis nostræ favorem captarent, ad eam decretum emiserunt hujus te-
 noris **): „Quod in partibus ultra quatuor diætas a romana Curia di-
 „stantibus omnes quæcumque causæ (exceptis majoribus in jure ex-
 „presse enumeratis, & electionum Ecclesiarum cathedralium, & Mo-
 „nasteriorum, quas immediata subjeçtio ad Sedem apostolicam devol-
 „vit) apud illos judices in Partibus, qui de Jure, aut consuetudine
 „præscripta, vel privilegio cognitionem habent terminentur, & finian-
 „tur: & ne sub umbra appellationum, quæ nimium leviter & non-
 „numquam frivole hætenus interponi visæ sunt, atque etiam in eadem
 „instantia ad prorogationem litium sæpe multiplicari, materia fovendis
 „injustis vexationibus relinquatur, statuit eadem sancta Synodus, quod
 „si quis offensus coram suo judice habere non possit justitiæ comple-
 „mentum, ad immediatum Superiorem per appellationem recursum ha-
 „beat: nec ad quemcumque, etiam ad Papam, omisso medio, neque a
 „gravamine in quacumque instantia ante definitivam sententiam quo-
 „modolibet appelletur, nisi forsitan tale gravamen extiterit, quod in
 „definitiva sententia reparari nequiret; quo casu, non alias ad imme-
 „diatum Superiorem liceat appellare, si vero quispiam a Sedis aposto-
 „licæ immediate subjeçto ad ipsam Sedem duxerit appellandum, causæ
 „per rescriptum usque ad finem litis inclusive in Partibus committatur,
 „nisi

S s 3

*) Harzheim Tom. V, pag. 730.

**) Sess. 31.

„nisi forte propter defectum iustitiæ, aut justum metum etiam in Partibus convicinis, de quibus in Commissione exprimendis legitimo prius documento alias, quam per juramentum summarie constiterit, apud ipsam Sedem foret merito retinenda. Et quidquid in contrarium hujus saluberrimi decreti attentatum, factum, vel obtentum fuerit, sit nullum ipso facto; litigantes, qui contra fecerint, in expensas condemnentur.“

§. IO.

Varia sunt in Basileensi hoc decreto bene observanda. 1^{mo} Patres, etsi quidem schismatis, non tamen hæresis rei, sed catholicum adhuc dogma servantes distinctionem expresse faciunt inter causas majores, & inter alias quascumque: & illas quidem non audent, æque ac has apostolicæ Sedi subtrahere. Quæ summe notabilis distinctio non ex principiis Decretalium Isidori petita, ut placet Domino Gregelio Moguntiæ ante aliquot annos discipulo *), sed ipsis divinis Scripturis, & tota retro Patrum Orientis, & Occidentis traditione fundata est. Provocamus enim hunc Dominum, jam in dogmate a nobis dissentientem, ut argumenta refutet a nobis hætenus ex utroque Verbi divini fonte allata pro catholico dogmate juris *appellationum ad apostolicam Petri Cathedram*. Plura adhuc alia falsa hujus Scriptoris hodiernorum, ut vocantur, Publicistarum præjudiciis occupati, ne prolixior fiat oratio, refellere jam non est opus. Hæc nempe misera fors est juvenum nostrorum, ut optima ingenia a Magistris publicis venena imbibant: quem exitialem statum nostrarum Universitatum, quibus tamen sanctæ fundationes prodiga manu adjiciuntur, vivis coloribus depingit lectu dignissimus ex Protestantium numero Schlettweinius. Vid. §. 6.

§. II.

2^{do} Gravioribus causis, quas apostolico Papæ judicio reservant Patres, in jure enumeratis adhuc adjungunt illas electionum in Ecclesiis cathedralibus, & Monasteriorum exemptorum. Ita vel a Basileensibus agnita fuit immediata jurisdictio romani Pontificis in cæteros Diocesanos, utpote quos ab Ordinariis locorum exemptos, & immediate sibi subiectos facere potuit: imo si verum est, quod hodie magno oris jactatur hiato, NB. Basileensia Decreta solemniter a Natione nostra fuisse acceptata, & publi-

*) Dissert. inaugur. de *Juribus Nation. German. Moguntæ* 1787.

publico pacto cum romano Pontifice firmata, nec non & rationem legis fundamentalis in Imperio habere; sequitur *immediatam* Papæ in subditos Germaniæ jurisdictionem, etsi tantopere nostris Reformatoribus exosam, a Majoribus nostris solemnī acceptatione agnitam, & publica fide romano Pontifici hanc agnitionem fuisse adpromissam, & nunc pro Imperii lege fundamentalī esse habendam. Et Monasteria quidem exempta in Nationis nostræ Concordatis, & Imperii lege fundamentalī novum acquirunt, fortissimumque fulcimentum.

§. 12.

3tio Vi hujus Decreti Basileensis equidem causæ minores *per judices in Partibus* terminandæ forent; attamen nec verbulo præscribitur, eosdem judices simul debere esse *Nationales*: sufficit ergo, si vel sint ad Partes delegati. Quin etiam expresso tenore legitimi agnoscuntur judices, qui aut de jure, aut *NB.* consuetudine præscripta, aut solum Privilegio cognitionem habent: ergo facultas in Appellatorio judicandi apostolicis Legatis necessario permitti debet, nisi propter jus, saltem propter consuetudinem seculis præscriptam, & pactum cum Pontifice publica fide initum. Præterea talis agnoscitur in subditos Germaniæ jurisdictionis Papalis, adeoque immediata, ut judicandi Autoritas vel Privilegio possit a Papa quibusdam præter Ordinarios committi: neque enim aliud quam summi Pontificis privilegium potes hic intelligere, quippe cum certo de judicibus sermo est, qui non episcopali, sed papali Privilegio judicare subditos localis Episcopi, ejusque judicia reformare possint: hujusmodi pontificia privilegia tunc temporis etiam in Germania valuisse, vel invitus testis est recentissimus falsarum mercium fabricator Bonnenfis, non Isidorus quidem, sed Hedderichius, qui non ita pridem falsum confinxit Privilegium a Paulo II, ut mentitur, Ruperto Colonienfi Archiepiscopo 1467 concessum: quam turpem fraudem doctiss. P. Zacharias jam denudavit ad futuram nostrorum temporum apud posteros confusionem *).

§. 13.

*) In F. Philipp. Hedderich — Specimen animadversionum Placentiæ. 1789. Frivola est Hedderichii apologia Bonnæ eod. an. vulgata, in qua Pauli P. Bulla adversus *leviora* suppositionis argumenta artibus sac notis vindicatur. Quare Bonnenses propter crimen falsi in P. Schenkli *Synagma* commissi nondum scripsere apologeticum?

§. 13.

4to. Nec verbo ausi Basileenses Pontificis jus circa suscipiendas appellationes attingere, hoc certo supposito tantum prolixo ingressu in abusus appellationum invehuntur, *quod nimium leviter, & nonnumquam frivole fuerint interpositæ*. Hinc etiam easdem non absolute excludunt, ne minoribus quidem in causis, sed tantummodo modicamen practicum statuunt, *ut non omisso medio* — Quin imo in certis casibus e. g. ob defectum justitiæ, si is probatus fuerit, omisissis etiam convicinis iudicibus immediate apud sanctam Sedem tractatio causæ permittitur.

§. 14.

5to. Denique quæ verba difficultatem facessere, & summi Pontificis jus inique violare possent, sunt sequentia: *Causas esse apud iudices in Partibus terminandas & finiendas*. Item: *Causa per Rescriptum usque ad finem litis inclusive in Partibus committatur*. Quod duplici in sensu intelligi potest; vel ut a iudice in Partibus fiat prius causæ instructio, eaque Romam missa, & decisione inde remissa, per eundem iudicem in Partibus sententiæ promulgatio, nec non & executio, quatenus ipsi litigantes ad Curiam longum iter suscipere non debeant: vel ut delegatus a Papa iudex non solum causam instruat, sed & per se ipsum sine actis Romam mittendis, adeoque independenter a Papa, quam velit sententiam, enunciet, & exsequatur. Nemo non videt posteriorem hunc sensum, vel naturæ æquitati esse contrarium: natura enim iubet delegatam potestatem a Principali dependere, eique rationem reddere suæ actionis iudicio superiore vel confirmandæ, vel reformandæ; præterquam quod tota ratio appellationis ad supremum iudicem propter maiorem justitiæ præsumptionem hoc modo annihilaretur, nec jam refugium ad hoc divinitus datum tribunal remaneret, sed nonnisi vana huius refugii fictio. Atque etiam Episcopis & Archiepiscopis injuriosa foret hæc delegatorum iudicum se inferiorum independentia, a quibus reformari possent pro solo illorum libitu, sine ratione ulli Superiori reddenda. Num ea mens Basileensium fuerit summo Pontifici plus iusto infensorum, ego non discutiam; totius nostræ Nationis non fuisse certum est, ut amplius ex dicendis patebit.

§. 15.

Etsi vero Basileense hoc decretum a Pseudosynodo ad captandam benevolentiam Nationi nostræ oblatum sua ex natura nullius sit valoris, quip-

quippe a schismaticis parentibus ortum; quoniam tamen Moguntiae anno 1439 sub Alberto II Rege Romanorum inter alia decreta receptum dicitur, hodie nostram attentionem meretur præter ea hoc loco rememoranda, quæ jam Parte II, Excursu II de *Concordatis Germaniæ* uberius ex Actis producta vidimus. Et quidem ut ordine procedamus in hac nostris diebus maxima de *Germaniæ Concordatis* controversia, oportet tria singulari studio discutere: 1^{mo} ipsam Moguntinam decretorum acceptationem, 2^{do} Eugenii IV permissionem, 3^{tio} demum Nicolai V, siqua est, Aschafenburgii confirmationem.

§. 16.

Instrumentum factæ per Allemanniæ Principes Decretorum Basileensium acceptationis, prout a Moguntinis editum, fere jam in omnium manibus versatur; ipso tamen fatente illustr. Würtweinio fuere, qui hujus Instrumenti fidem atque auctoritatem vehementer impugnarunt. Res digna foret, quæ non solum in Archiepiscoporum, sed etiam aliorum Principum Archivis, & Romæ quidem in manuscripto codice Bibliothecæ Vallicellanæ inquireretur: suspicione enim non caret hoc ipsum de *caussis*, & *appellationibus* decretum, cujus quidem initialia verba Würdtweinius in Instrumento memorat*), in recensione tamen singulorum decretorum, inde a pag. 343 idem reticet, & studiose omittit. Hoc ipsum decretum in Exemplari Salisburgensi ad Nicodemum Frisingensem Episcopum transmissio defuisse videtur, eoquod Episcopus ille singulorum decretorum *initia* enumerans, ut ipse loquitur in Synodo diocesana anno 1440, hujus tamen nullam facit mentionem. Neque hoc apud solum desideratur Meichelbeckium**), sed & in multo antiquioribus Conciliorum collectionibus, uti Coletana Tom. 19, & illa præstanti Regia Parisiorum: Tom. 33. Quod certi hinc colligitur, istud est Basileense decretum *de causis* in illo Frisingensi Concilio non fuisse acceptatum, nec proin patria nostra, id est, Bavaria ab illa Archiepiscoporum Moguntina acceptatione ullum trahere valorem.

§. 17.

*) Subsid. Diplom. Tom. 7, p. 336.

**) Histor. Frising. Tom. 2. Part. instrum. p. 270.

§. 17. Nec totam Germaniam magis, quam Bavariam illa restringit Moguntina acceptatio: in hoc quippe conventu non tota Natio intererat, sed cum Alberti Regis oratoribus tantum Electores, & Archiepiscopi partim in propria persona, partim suos per legatos. Tamen igitur Archiepiscopi hac occasione sibi opportuna, Papæ vero iniqua firmum jus appellationum sibi vindicare quaesierint; spectata tamen Episcoporum aliorumque Principum indole haud credibile est horum accessisse consensum, quo suam cederent libertatem ad summum tribunal Romani Judicis accedendi, sibi que necessitatem imponerent satis alias inviso Metropolitaram tribunali sese subjiciendi. Vel ipsi acceptatores Moguntini hanc difficultatem perpexerint, necesse est, cum tam larga modificatione decreta Basileensia acceptaverint, ut cuilibet Episcopo, vel Principi plenam sancte libertatem pristinam relinquerent. En verba: „Salvis tamen in quibusdam declarationibus, modificationibus, & limitationibus nostræ Germanicæ Nationi, ac cuilibet nostrum singulariter in suis provinciis, Diœcesibus, seu Territoriis congruentibus, & accommodis factis, & fiendis, suis loco & tempore opportunis exprimendis, ac per sacrum Concilium decretandis.“ Quod nec Basileensi, nec alio quodam posteriori in Concilio factum, nisi forte Tridentino, cujus statutis, & canonibus germani Patres nostri acquieverunt, Novatores autem hodierni refragantur.

§. 18. Quare decipiunt illi, qui decreta Basileensia Moguntinæ acceptata, quasi absolutam Germaniæ Concordatorum regulam venditant silentio prementes eam, quæ cuilibet Episcopo, vel Principi expresse asserta est, libertatem modificandi decreta, & limitandi: prout singulariter Diœcesis, seu Territorio congruum & accommodum fuerit sive pro præterito, sive pro futuro. Hanc cum moribus Germanorum congruentiam, hoc est, observantiam Basileæ decretis seu anteriorem, seu posteriorem næ tu potiore jure dixeris regulam ipsius Moguntinæ acceptationis, atque hinc Nationis nostræ Concordatorum!

§. 19.

Sicut primitus a Germanis quibusdam anno 1439 acceptata, hoc eodem, non alio modo anno 1446 ab Electoribus semel, atque iterum Fran.

Franeofordii reafsumta funt Bafileenfium decreta. Illud igitur in fpecie de *cauffis* vel numquam a Patriæ noftræ Epifcopis fuit acceptatum, vel certe cum aſſerta ſibi libertate congruam cuiuslibet Diœcefi obſervantiam vel retinendi, vel inchoandi. Inſuper autem ex Aſſis memorabile hoc eſt, univerſam Germaniæ Nationem in illa Bafileenſia decreta adeo non conſenſiſſe, ut & adverſus eandem Elektorum & Archiepiſcoporum acceptationem a quibusdam apud Eugenium P. expreſſa gravamina moverentur.

§. 20.

Quid ergo Eugenius permiferit, nunc videamus. Inter ea, quæ Nationis noſtræ Legati Romam miſſi a Pontifice poſtularunt, tertio loco erat: ut *Nationi germanica ſuper gravaminibus opportune provideatur*. Fuere autem non omnia Germanorum gravamina, quæ decretis Bafileenſibus levarentur, ſed & alia quædam e. g. de diſpenſatione romana in quarto conſanguinitatis, vel affinitatis gradu, de exemptionum exorbitantiis, & privilegiis; quin imo, ut modo §. ſup. dictum, de ipſa decretorum acceptatione Præſules quidam gravabantur. Quantum ad iſta; quid Pontifex ad tranquillitatem Germanorum concederet, haud ſatis clare perſpectum habebat, prout ipſe loquitur in Bulla ad ſuos Legatos data Kal. Auguſti anno 1446, quod ſibi de illis decretis *non plane conſtat*. In eadem vero Bulla Legatis ſuis plenam facultatem dedit *ſuper aliis gravaminibus, quæ Natio eadem præſentis, moderandis, limitandis, & auferendis*. Quod autem ad Bafileenſium decretorum acceptationem ſpectat, ex quorum obſervantia cum Prælati quidam *aliis reclamantibus* dicerent, germanicam Nationem ex pluribus gravaminibus relevari; Pontifex tranquillitati haud melius conſulendum ratus, edita Bulla: *Ad tranquillitatem*. anno 1447 acceptationem decretorum cum ſuis modificationibus *quoad præterita* ratam habuit in favorem illorum, qui eadem vel acceptarunt, vel acceptantibus adhaſerunt.

§. 21.

Quod vero jam ad rei caput pertinet, eſt *quoad futura* obſervatio, & modificatio eorundem decretorum: hac de re admodum adhuc implexa ipſis Germanis in diverſa ſciſſis, ſapiens Papa nondum aliquid certi voluit ſtabilitate, ſed cum in ſinem Legatum ſuum cum ſufficienti po-teſtate ad partes Germaniæ transmittere decrevit, qui non ſolum cum

Archipræsulibus, sed & aliis ejusdem Nationis Principibus; & Prælati, cum quibus fuerit opus, super observantia & modificatione decretorum hujusmodi, nec non super provisione Sedis apostolicæ tractare poterit, & finaliter concordare. Usque ad hæc enim duo puncta, ut prædictum est, concordatum cum Germanis per priorem Legationem summo Romanorum gaudio jam erat conolusum. Interim vero NB. relative ad novum Legatum in Germaniam mittendum, Pontifex lis, qui decreta acceperunt, permisit ulteriorem eorundem usum scilicet cum modificationibus, quibus recepta sunt. Terminum etiam, quo hæc permissio expirare deberet, satis clare expressit, donec per Legatum hujusmodi, ut prædictum est, concordatum fuerit, aut si hoc non contigisset, benevolus Papa terminum prolongari voluit usque ad proxime futurum, jamque indictum Concilium; vel per Concilium, quod ad prædictorum Regis, Prælatorum, & Principum exhortationem convocare proponimus, aliter fuerit ordinatum. Nemo non videt, quod Pontifex nullatenus intenderit jam actuali pacto eam decretorum Basileensium acceptionem firmare, sed upice tranquillitati interimistica providere, usque dum concordia firma circa eadem decreta sive retinenda, sive immutanda per Legatum obtineatur, sin minus; pro sua bona voluntate Pontifex voluit permissionem durare usque ad aliam post decem menses celebrandi Concilii ordinationem. In hac hypothefi, quod concordia de sæpe dictis decretis obtineri non possit, sane aliam Concilii ordinationem Pontifex debuit expectare. Qua naturali verborum interpretatione manifestum fit, Barthelium & Horixium crasso errore, nisi mala fide, voculam aliter ad partem superiorem de faciendo per Legatum concordato transposuisse, quasi Eugenius jam vero quodam, stabilive pacto Basileensa decreta admisisset.

§. 22.

Haftenus de modo, seu conditione diximus, qua interim Eugenius P. in petitionem Germanorum consensit. Quid vero præcise Germanis concesserit, si quæras; dico, ipsum satis clare non cognovisse, quid permitteret, sicut Germani non cognoverant, quid præcise peterent. Neque enim absolute, & prout jacent, decreta Basileensa sub Rege Alberto sunt acceptata, sed largissimis, summeque vagis cum modificationibus, quæ Germanicæ Nationi, & cuilibet singulariter Principi, vel Episcopo pro suo Territorio, vel Diœcesi congruerent, & accommodæ essent aut factæ, aut fiendæ. Neque Eugenius aliter in decreta

creta acceptata consensit, nisi illis similiter cum modificationibus, quibus recepta sunt. Quod vero maxime hoc adhuc loco observari oportet, Bulla Eugenii de tranquillitate non est pactum universaliter cum tota Natione conclusum, sed uni tantum parti data promissio, quod omnes & singuli, qui præfata decreta receperunt, vel recipientibus adhaerunt in præfata Natione — libere, & licite uti possint. Quæ mera permissio nullam alteri parti obligationem imposuit Basileensia decreta recipiendi, sed his æque, ac illis plenam reliquit libertatem.

§. 23.

Atque hoc quam clarissime elucet ex Bulla ejusdem Eugenii ad Theodericum Moguntiae Archiepiscopum 6 Id. Febr. a. 1447 data, qua eidem facultatem concedit dubia, & difficultates super acceptance illorum decretorum occurrentes componendi: „Quia provisio circa illa in genere „loquitur, nec poterant omnes, quorum interest, *specificari*; cupis tales in tuis Provincia, Civitate, & Diœcesi Moguntinensi *specificare*, „ac de illis attestari, nec non ubi petita; seu opus visum fuerit, „declarationes facere posse tempore procedente. — Nos igitur, qui „tales, quorum interest, ad præsens *specificare* non valemus, supplicationibus tuis hujusmodi inclinati, tibi quotiens opus fuerit, super acceptance decretorum, ac possessorum pacificatione juxta concordiam præfatam litteras tuas testimoniales — dandi, concedendi, & „NB. an sub concordia, & generalitate præfatis hi, quorum interest, „contineantur, & per easdem intelligantur, seu comprehendantur, — „declarandi, & attestations faciendi autoritate apostolica plenam, & liberam tenore præsentium concedimus facultatem.“ Ita vel in Diœcesi, imo & Civitate Moguntina non omnes acceptance decretorum Basileensium tenebantur, sed liberum erat non solum Episcopis, verum etiam inferioribus eadem recipere, aut recipientibus adherere. Unde necessario consequitur, nullo jure sibi ex Concordatis, debito Archiepiscopos exigere posse secundam appellationum instantiam, sed prout vetus observantia est, cuilibet relinqui debere suam libertatem.

§. 24.

Quemadmodum non Eugenius IV, ita hoc defuncto neque Nicolaus V in stabilem, & absolutum valorem decretorum Basileensium unquam

quam consensit. Hic in litteris ad Theodericum Moguntinum 5. Kal. April. a. 1447 datis equidem declaravit velle se, *quantum cum Deo posset*, ab Antecessore concessa, & ordinata manutenere, & adimplere; attamen eidem Archiepiscopo perscripsit circa hæc ipsa concessa, & ordinata pro pacto firmiter stabiliendo non plene se consentire: hinc alias addidit litteras per suum pro Germania Legatum Joannem, titulo S. Angeli Cardinalem transmissas, quibus mentem suam *plenius* explicavit. Hæc epistola si ex Moguntino Archivo ederetur, aut Romæ forsitan inveniretur, plurimum certe luminis præsentis obscurissimæ quæstioni affunderetur. Ceterum quod ad finale, plenumque concordatum Aschaffenburgensis Conventus a. 1448; de hoc sufficiens nobis testimonium ex Actis suppeditat Æneas Sylvius testis idoneus, quippe oculatus, neque adversariis merito suspectus, ita scribens *): „Disceptatum est, quonam pacto Pontifici Nicolao parandum esset. Erant, qui decreta Basileensis Concilii omnia suscipienda contenderent, illisque salvis Papæ obediendum. Contra Legatus apostolicus ejus Concilii legibus, quod Romana Sedes refusasset, nullam inesse vim aiebat. Alii, quibus media sententia placebat, verum Basileæ Concilium aliquando fuisse affirmabant, ejusque temporis constitutiones haudquaquam rejiciendas esse putabant. Postremo eo modo concordie locus fuit, ut sententia quorundam decretorum Basileensis Concilii reciperetur, reliqua vero ejus statuta rejecta viderentur.“

§. 25.

Si velis cum Nellerø largiori sensu Æneæ verba interpretari, ut non tantum *quædam*, sed *plurima* Basileensium decreta Aschaffenburgi recepta, & alia quædam rejecta fuisse contendas; etsi gratis id, vixque probabile asseras, me tamen contentiosum non invenies. At certe rem ipsam substantia sua veram esse fatearis necesse est, quippe quam Æneas Mayero Moguntinæ Cancellario, ejusdem rei optime gnaro, suoque adversario perscripsit. Hinc manifestum est, ab ipsis Germanis agniti fuisse hoc cum Pontificis Legato concordatum tamquam terminum, quo Eugéniana permissio decretorum Basileensium desierit: non enim amplius ad eam, sive suam sub Alberto Rege acceptationem **) provocarunt, minus illam pro fundamento posuerunt, quid? quod

*) In Apolog. adv. Mayer. Cap. II.

**) Numquam illa acceptatio totius Nationis fuit, sed tantum Electorum sub Alberto Rege Papæ iniquo, & duobus schismaticis Archiepiscopis iussuacibus.

quod etiam directe illam Germanorum quidam repudiarunt, quibus *media sententia* placuit tantum primarum 25 Sessionum constitutiones ex Basileensi Concilio adoptantibus. Tandem concordiae omnium locus fuit eo modo, ut *sententiae* quorundam decretorum, non ipsa *ex integro* decreta Basileensium reciperentur. Unde totus harum sententiarum valor, qui hodieum subsistere possit, ab hac Aschaffenburgica acceptione unice repetendus est, ita ut merum sit commentum recentiorum post Barthelium Canonistarum, illam sub Alberto acceptionem esse Concordati Germanici regulam, Aschaffenburgensem vero sub Friderico III concordiam nonnisi a regula exceptionem. Quod vel DD. Protestantium ex numero Göttinganus Scriptor, utut sanctae Sedis insensibilissimus hostis, & objurgator ingenue fassus est, scilicet efficaciam decretorum Basileensium cum concordato per Pontificis Legatum concluso jam cessasse, & illa nunc tantum *ad Antiquitates historico-publicas* pertinere *). Ceterum a nobis longissime absit, hujus Scriptoris nugae, & absurditates omnes amplecti.

§. 26.

Protestanticis Scriptoribus, uti Spittlero, Moblio, aliisque dogmatum Ecclesiae nostrae oppido ignaris magnum errorem facile indulgerem, quo acceptionem decretorum Basileensium etiam *ecclesiastica legis* titulo volunt valere; nisi ea ipsa historica documenta, quibus abutuntur, satis clare exprimerent illorum decretorum tantum a *quibusdam* Germaniae Principibus factam acceptionem, iisdemque ad tempus datam permissionem intacta *aliorum* omnium sua pristina libertate. At enimvero tam crassum errorem in Catholicis quis ferat? Num ignorare hi possunt, unum esse a Filio Dei suae Ecclesiae Caput constitutum, cui omnes Christi fideles per orbem universum obedire debeant? Tantum abest, ut particulares quidam Praefules, mundive Principes adversus summum Pastorem insurgere, atque etiam legem, cui ille se subiceret, praescribere possint: quod in Ecclesia haecenus inauditum. Num hosce, si Canonistae sunt, latere potest, veterem hunc esse, Ildoro Mercatore multo antiquiorem, jam a graecis Scriptoribus Socrate, & Sozomeno adductum canonem, ut *in seipso Romano Pontifice in Ecclesijs decreta non statuerentur*? Quid, si invito? quid, si adversus summum Sacerdotem??

§. 27.

*) Götting. historisch. Magazin. Band 1, St. 2, §. 13.

§. 27.

Unam omnium molestissimam quæstionem si recoquas, quid ergo Germani suo Concordato *præcise* obtinuerint; tu mihi prius respondeas velim, quid ergo Germani illo æterna oblivione delendo tempore *præcise* quæsierint, quo debitam Pontifici obedientiam aliquot annis recusarunt, aut si velis politice loqui, *Neutrales* suspenderunt? Profecto fa-teor difficile esse, speciatim enumerare singulas, si quæ sunt extra Instru-mentum Pacti Aschaffenburgensis, sententias decretorum Basileensium concorditer admissas: neque enim Meyerus, neque Sylvius determinate aliquas assignarunt, sed vagis tantum verbis, & cum incertitudine de spe-cifico decreto loquuntur, *quod receptum esse videatur* *). Ex quo, ut lar-gus sim, colligere possis in ipso Tractatu Aschaffenburgico eandem gene-ralem fuisse regulam, supra §. 18 indicatam, jam antea a summis Ponti-ficibus indultam, scilicet congruentiam cum moribus, & observantia Ger-manorum. Ita enim semper benevolam se Roma Germaniæ exhibuit, prout etiamnum se exhibet, ut violata licet a nobis sæpius, ac solemniter fide, illa præcipue Westphalica in Pacificatione, & novissime Emsano in Balneo, tranquillam tamen permittat, foveat, et nutriet observantiam recepti moris, veterumque Privilegiorum, quibus Natio nostra præ aliis etiamnum, jamque forsitan ultra merita gaudet, uti illud est liberarum Electionum, de quarum abusibus tacere melius est, quam loqui, nisi pro-xime loqui cogat necessitas.

§. 28.

Ex Actis præliminaribus Aschaffenburgensis Instrumenti facis jam constat, Nicolaum V a confirmatione absoluta decretorum sub Al-berto acceptorum adeo alienum fuisse, ut nonnisi *sententias* ex quibus-dam Basileensium decretis electas, illas videlicet, quæ in Instrumento nominantur, aut plures etiam, si largus sim, Germanorum observan-tiæ conformes, & accommodas approbaverit. Ex aliis vero ab Euge-nio IV absolute pro futuro valore (intellige nisi aliter in Concilio fuerit ordinatum) indultis quod Nicolaus confirmavit, unum est præcipue hoc loco dignum observatu: illud scilicet Bullæ *inter cetera desideria* in-dultum, quod tractat de Dignitatibus, & Beneficiis ecclesiasticis tempo-re Neutralitatis collatis, & causis litigiosis circa easdem collationes
vel

*) Apolog. l. c.

vel jam exortis, vel adhuc orituris. Hæc ipsum indultum est, quod jam ante Aschaffenburgensem Concordiam æque hic Pontifex, ac Antecessor concessit, ac postea Kal. Febr. a. 1449, non a. 1448, ut perpetuam quibusdam videtur, in favorem Episcopi Frisingensis, nomine Joannis Grünwalder extendit: ex alia vero parte per eandem sanctionem, ut Rainaldus refert *): „Statuta, quæ Germanorum rogatu antea ab Eugenio edita, corroborataque ab ipso Nicolao fuerant, cum ex plano usu compertum esset plures inde exortas lites, ac jura possessionum infringi, penitus convulsit.“ Hæc sunt, quæ Nicolaus specialiter *de causis* relative ad Eugenianam concessionem pro futuro valore confirmavit.

§. 29.

His itaque sat clare dilucidatis Clausula Aschaffenburgensis, quæ alias obscurior videri posset, jam difficultate carebit: „In aliis autem, quæ per felicitis recordationis Dominum Eugenium P. IV pro Natione præfata usque ad tempus futuri generalis Concilii permissa, concessa, indulta, atque decreta, & per memoratum sanctissimum Dominum nostrum Papam Nicolaum confirmata fuere, in quantum illa Concordiæ præsentem non obviant, ista vice nihil extitit immutatum.“ Plura hic sunt, quæ observari merentur. 1^{mo} Omnia generaliter rememorantur tam *conditionate*, quam *absolute* ab Eugenio usque ad futurum Concilium permissa, & decreta: 2^{do} inter hæc quibusdam tacite rejectis fit limitatio tantum ad ea, quæ a Nicolao sunt confirmata, & præsentem concordiam non obviant: 3^{tio} atque hæc ipsa non simpliciter *confirmata*, quasi singula stabilem valorem habitura, sed tantum præsentem pacto *nihil mutata* declarantur: 4^{to} idque *pro hac vice* propter celebrandum paulo post Concilium, a quo alia videtur expectata fuisse ordinatio, forsitan ob prævias jam tunc difficultates, & lites ex ipsis Eugenii indultis orturas, prout testante Rainaldo eventus docuit. §. præc.

§. 30.

Perpicax certe ingenium, si placet, romanum hanc formulam concepit, ut integra, & illibata sanctæ Sedis jura servaret magna perti-
nacia tunc impugnata. Cum enim quedam Eugenius *conditionate*, ni-
si

*) Ad a. 1448 n. 3.

§ concordia per Legatum intercesserit, quædam vero absolute usque ad tempus futuri Concilii indulserit, eademque Nicolaus eodem modo confirmaverit, sequitur conditionate permissa cum ipso permissionis termino cessasse; eoquod non mutata fuerint, sed quod erant, permanse- rint, hoc est, tantum pro tempore intermedio data: cujusmodi sunt decreta Basileensium sub Alberto acceptata. Quæ autem absolute ab Eugenio Germanis usque ad futurum Concilium concessa, e. g. de le- vamine certorum gravaminum extra Basileensium decreta, de restitutio- ne duorum Archiepiscoporum jam antea depositorum, de collationibus beneficiorum, earumque causis litigiosis; eadem Germanis, ut pro fu- turo valerent, sunt confirmata. Quamobrem illa decreta a quibusdam Moguntia olim acceptata vere non sunt amplius, nisi historica antiqui- tas vel ipso teste Barthelio *): „Scilicet inter Nationi nostræ concessa, „& adpromissa, quæ mox omnem suum effectum consecuta sunt, & „hodie nullum amplius effectum juridicum habent, mereque ad illa- „strationem hujus materiæ subserviunt, esse decreta Basileensia per Al- „bertum, II Romanorum Regem in Germaniam introducta.“ Nihil est inanius, quam quod hodierni Publicistæ opponunt, a Barthelio non- dum fuisse inspectum acceptationis Albertinæ instrumentum, quippe po- stea primum ab Horixio detectum. Quid inde? An decreta Basileensia ab acceptatione Archiepiscoporum, quam quidem & Barthelius non ignoravit; nonne potius a confirmatione Pontificum vim concordato- rum obtinere debuissent? hanc pro stabili valore decretorum defuisse, Barthelium jam optime ex Actis sibi notis perspectum habebat.

§. 31.

Certum est a veritate illos aberrare, qui ex clausula *in aliis autem confirmationem* decretorum Basileensium sub Alberto receptorum evin- cere laborant: non enim alia ab Eugenio permissa firmiter permanere dicuntur, nisi *ex tunc*, quæ & Nicolaus confirmavit, & præsentî concordia non obviant, ubi manifeste ad acta tractatus Aschaffenburgici provocatur: atqui ut ex iisdem actis ipsi jam perspeximus, num- quam Nicolaus acceptationis Albertinæ decreta pro futura stabilitate confirmavit, sed e contrario concordia Aschaffenburgi initæ obviaret; si generatim decreta illa, eaque *integra* amplius valerent. Ex famosa ergo clausula *In aliis autem* decreta illa Basileensia nullatenus reviviscere possunt.

*) Tractat. histor. Canon. pragmat. Cap. I, §. 13.

possunt. Quodsi etiam falso licet, atque ad excessum largitas daretur, ad summum sequeretur illa tam famosa decreta a quibusdam, qui Albertinæ acceptationi adhæserunt, licite in usum deduci potuisse usque ad proxime futurum generale Concilium, in quo aliter ordinaretur, quod in Tridentino factum. Hinc ne hoc quidem Concordati titulo Archiepiscopi nostri jus sibi debitum pro secunda appellationum instantia, aut Delegatis mere nationalibus ex Basileensi decreto Sess. 31 possunt prætere.

§. 32.

Dato insuper, non concesso difficilem adhuc, & obscuram videri ipsam Concordati formulam; certe sicut in communi jure erga æquales, ita etiam erga summum Sacerdotem optima transactionum regula deberet admitti inde ab initio tranquille semper perdurans observantia; atqui hæc plane sanctæ Sedis adversarios condemnat. Ab epocha enim Aschaffenburgicæ pacificationis usque ad annos ultra viginti paucos, hoc est per tria, & amplius secula (quanto temporis intervallo!) utrique compacificentium parti ignota fuit illa decretorum Basileensium quasi ex pacto obligatio. Consuetudinem in regulis juris communis optime fundatam romano Pontifici jus dicere nemo negaverit vel æquitatis naturalis inter æquales, aut etiam inter hostes amans. Consuetudo autem dormitancia invaluerit? Anne Germania dormitavit Basileensibus festariis utique vigilantibus, & paulo post hæresi excitata sanctæ Sedj infensissima? Nonne gravamina gravaminibus patriæ nostræ haud gloriosis fuere cumulata, nisi ab Hæreticis, certe a Mercenariis Archiepiscoporum, inde a Majero Moguntino usque ad Emsanos balnearios? Mirum, quod inter 100 illa gravamina a. 1522, nec unicum ad decreta Basileensia provocaverit? Cur ecclesiastici tres Electores in sua epistola ad Rom. Pontificem a. 1673 unice conqueruntur de non servato pacto Aschaffenburgensi, & quidem nec verbulo de appellationibus, sed tantum de electionibus, de annatis, de collatione Beneficiorum, & indulto, ut putabant, sibi debito? Cur ad hanc usque diem in nulla Capitulatione cæsarea mentio facta de conservandis Imperij juribus per Basileensia decreta, ut nunc prætenditur, acquisitis? Numquid in Conventibus electoralibus adversus romanam Curiam vigilarunt Metropolitanæ Curialistæ? Numquid hæc, si supponatur dormitancia, in Majoribus nostris ignorantiam prodit istorum jurium, quæ nunc primum,

at sero nimis prætenduntur? Si soli Romani vigilarunt; vigilanti-
bus jura!

§. 33.

Quod Basileensis Synodi decreta hinc inde in provincialibus Synodis, ut Moguntiae a. 1451, & Wirzeburgi a. 1452 fuerint commemorata, istud supra excitati duo Scriptores, Papæ inimici, unus Protestanticus, & alter neotericis principiis supra modum imbutus, Spittlerus & Gregelius facile non magis, quam solide dissolvunt: illis enim in Conventibus non agebatur de disciplina hierarchica, seu relativa ad romani Pontificis jura, sed solum de domestica sui Cleri disciplina, quam æque ex se ipsis, ac Basileensibus ex statutis ordinare Præsules potuerunt. Et sane nescio, an vel isthæc Basileensium decreta in dictis duobus Diœcesibus amplius valorem *practicum* habeant. Duumviri illi pariter in suis scriptis, quæ, vide §§. 10, & 17, ostenderunt, Mayeri Moguntiae Cancellarii gravamen de a. 1457 esse impertinens, atque injustum. Quid, quod iidem positive ab exemplis demonstrarunt, Majores nostros per sic dicta *Principum Concordata* solam intellexisse Aschaffenburgicam pacificationem ne cogitando quidem de Basileensibus decretis? Unico adhuc, quod ad hominem vocant, argumento utar: Per ordinationem aulici Consilii imperialis de a. 1559 jubentur *Concordata Nationis germanicæ* semper reposita servari in Consilii aulici tabula, ut eo facilius in dubiis casibus inspicere possint. Quæro ex ipsis DD. Consiliariis Viennæ imperialibus, an usque ad paucissimos abhinc annos præter solum Aschaffenburgensem instrumentum etiam Albertinam illam decretorum acceptationem in tabula repositam habuerint? Quam dabunt responsum, hæc sufficiat, ut vel ego ipsis, vel ipsi mihi victas dent manus.

§. 34.

Purum est igitur commentum, aut ad summum unilateralis prætensio, nequidem consensu omnium Compartmentium admissa, quod Germaniæ Concordata integra a. 1763 per Horixium fuerint inventa, partemque illorum præcipuam Basileæ decreta constituent. Quod tamen, si ita esset non concessio, tantum permissio; ne stantibus quidem hisce decretis per Germanos acceptis, summus Pontifex quidquam perderet: non enim nisi vana sunt hæc terculamenta, ad formidinem infirmis animis incutiendam, & vagam aliquam auctoritatem suis attentatis prætexen-

texendam. Verum enimvero Natio nostra Theutonica teterrimam coram Deo, & hominibus maculam gestaret, eoquod decreta conciliaria pro reformatione morum, & disciplinæ facta, publicæque fide acceptata, nec non in fundamentalem Imperii legem transmutata non servaverit, sed fere ad totius disciplinæ morum, imo & Religionis ruinam omnia, præsertim salubriora extra observantiam posuerit paucissimis exceptis, quæ non ad vitæ emendationem, non ad lapsæ Religionis ædificationem, sed unice ad quorundam suorum Præfulum amplificationem, atque adeo ab apostolica Petri Cathedra independentiam primum recentissimis hisce diebus in praxin numquam antea usitatam vult deducere, neque id ex juris titulo satis probato, sed tantum prætenso. Attendite Germani! nostræ Nationis interest, talium judicium, quales Curialistæ archiepiscopales Emsano in Balneo spectandos se dederunt, tribunalia effugere. *Non venerunt, ut pascant, sed ut mactent, & perdant.*

§. 35.

His tranquille perpensis necessario concludendum est, aliam firmiorem nostrorum cum Nicolao V Concordatorum regulam de receptis decretorum Basileensium *sententiis* stabiliri haud amplius posse, quam ipsam Germanorum anteriorem Aschaffenburgensi transactione, & posteriori observantiam. De illa hujus Articuli superioribus §§. jam dixi, illamque publicis ex pactis demonstravi: de hac talia mox proferam, quæ omne dubium tollant. Fortiora certe argumenta nemo requirit, quam ex ipsorum Adversariorum gestis, exemplis, & testimoniis, publicisque documentis desumpta.

§. 36.

Ut nihil amplius de famosis 100 gravaminibus a. 1523 dicam, ubi tantum de causis profanis, quod Romam & quidem in prima instantia ad jus vocari soleant, querela movetur; in causis ergo ecclesiasticis romanum hoc judicium fuit *NB. tranquille* agnitum. A. 1563 Consiliarii Electorum & Principum varia a Pio IV summo Pontifice reformanda petierunt, quorum primum erat, ut in profanis causis nemo umquam, in ecclesiasticis vero in tertia demum instantia ad Urbem pertrahi valeat. Itaque salvis Germaniæ Concordatis per ipsos Imperii Principes saltem certo cum moderamine ad romanum tribunal aditus patebat. Dignum autem memoratu est Pii IV responsum ad id, quod de tertia primum

instantia petebatur ad excludendam Papæ, quam vocant; *concurrentem* jurisdictionem. Apud Rainaldum sic legitur *): „Ut nulli liceat prætermisso Ordinario coram Delegatis ab apostolica Sede iudicibus in Germania suas causas peragere; cum nulla hoc Germaniæ exposcat utilitas, & hujus Sedis authoritati deroget plurimum, non putat sua Sanctitas concedi debere: nam & in magnum esset Germanorum, qui causas, & negotia habent, præjudicium. — Quodsi querantur Ordinarii suam per hoc jurisdictionem minui, cogitare debebunt, non a decem, aut viginti, aut triginta annis introductum, sed a tempore, de hujus initio non est memoria, ita observatum, ut liceret unicuique coram delegatis iudicibus in Germania suas causas peragere, sed etiam ad romanam Curiam suos Adversarios libere evocare. Itaque queri eos non posse sibi ab apostolica Sede non concedi, quod nullo ipsis jure debetur.“ Ostendant, si qui possint, quid contra hæc summi Pontificis rescripta Germani responderint!

§. 37.

Adhuc memorabilis est Trevirensis Archiepiscopi rescriptum ad suum Officiale Trevirenses, & Confluentinum de a. 1622, quod ex vernaculo idiomate, prout apud illust. Hontheimium legitur, ita in latinum transfero **): „Satis tibi notum est, *quavis ex antiquissima observantia*, in nostris & vicinis Archi- & Diocesisibus ita usitatum fuerit, ut ab Officiariis in causis ecclesiasticis, & prophanis indifferenter ad pontificiam Sanctitatem, vel ejus Legatos appellaretur, & ab iisdem hujusmodi appellationes active, & passive usque ad finalem executionem inclusive tractarentur, & absolverentur; nihilominus ad petitum unius alteriusve partis ab imperiali Camera similes appellationes *NB. in rebus prophanis* — cassatas, annullatas, & annihilatas fuisse: — Propterea gratiosissime mandamus, ut in commissio tibi Officialatu — hoc mandatum publices, quatenus in futurum usque ad aliam ordinationem nostram nullus in rebus prophanis a te aliter, nisi ad Nos, sive ad nostrum electorale aulicum iudicium appellare possit, & debeat.“ Ergo antiquissimam Germaniæ observantiam ad summum Pontificem, vel ejus Nuntium appellandi leges imperiales *saltem in causis ecclesiasticis* licitam reliquerunt, prout & Capitulatio cæsarea inde a temporibus Josephi I usque ad hodiernum diem Art. 14, §. 5 testat-

*) Ad a. 1563, n. 44.

**) Histor. Trevir. Diplom. Tom. 3, pag. 274.

testatur. Atque hoc ipsum jus sanctæ Sedis necessario debet inviolatum conservari, cum sua cæsarea Majestas Articulo omnium primo sese publico juramento obstringat, sanctæ romanæ Ecclesiæ, & apostolicæ Sedis jura conservaturam.

§. 38.

Nunc ad tempora generalis Concilii Tridentini redeundum, quod supposito sane fidei dogmate, divino scilicet apostolicæ Sedis jure appellationes suorum subditorum suscipiendi, ad præcavendos aut emendandos appellationum abusus sapientissima decreta sanxit, in specie *.): „Causæ omnes ad forum ecclesiasticum quomodolibet pertinentes, etiam „si beneficiales sint, in prima instantia coram Ordinariis locorum dumtaxat cognoscantur, — nec antea aliis committantur, aut avocentur, „neque appellationes ab eisdem interpositæ per Superiores quoscumque recipiantur, earumve commissio, aut inhibicio fiat, nisi a definitiva, „vel definitivæ vim habente, & cujus gravamen per appellationem a definitiva reparari nequeat. Ab his excipiantur causæ, quæ juxta canonicas sanctiones apud Sedem apostolicam sunt tractandæ, vel quas ex „urgenti, rationabilique causâ judicaverit summus romanus Pontifex per „speciale rescriptum signaturæ Sanctitatis suæ, manu propria subscribendum committere, aut avocare. — Legati quoque etiam de Latere Nuntii, gubernatores ecclesiastici, aut alii quarumcumque facultatum vigore non solum Episcopos in prædictis causis impedire, aut aliquo modo „eorum jurisdictionem iis præripere, aut turbare non præsumant, sed nec „etiam contra Clericos, aliasve personas ecclesiasticas, nisi Episcopo „prius requisito, eoque negligente procedant, alias eorum Processus, Ordinationesve nullius momenti sint, atque ad damni satisfactionem Partibus illati teneantur.“ Ecce quam provide ex una parte ad Episcoporum honorem & auctoritatem apud subditos conservandam ab ipsa jam Ecclesia abusibus præcautum sit, ex altera vero parte divina jura sanctæ Sedis romanæ custodita; atque facultates ejus Legatorum & reverenter agnoscantur, & suis tamen limitibus sapienter contineantur.

§. 39.

Porro Judicium in Partibus delegationes sacra Synodus non quidem præcipit; attamen prout romani Pontifices semper se promotos & faciles circa

*) Sess. 24, Cap. 20.

circa easdem exhibuerunt, ita & de iisdem ad honorem Ordinariorum ne leviter quidem violandum statuit*): „In singulis Conciliis provincialibus, aut diœcesanis aliquot personas, quæ qualitates habeant juxta Constitutionem Bonifacii VIII, quæ incipit: *Statutum*, & alioquin ad id aptas designari, ut præter Ordinarios locorum iis etiam posthac causæ ecclesiasticæ ac spirituales, & ad forum ecclesiasticum pertinentes in Partibus delegandæ committantur. Et si aliquem interim ex designatis mori contigerit, substituat Ordinarius loci cum consilio Capituli alium in ejus locum usque ad futuram provincialein, aut diœcesanam Synodum, ita ut habeat quæque diœccesis quatuor saltem, aut etiam plures probatas personas, ac ut supra qualificatas, quibus hujusmodi causæ a quolibet Legato, vel Nuntio, atque etiam a Sede apostolica committantur: alioquin post designationem factam, quam statim Episcopi ad summum romanum Pontificem transmittant, delegationes quæcumque aliorum judicum aliis, quam his factæ, subreptitiæ censeantur.“ His tam æquis nondum contentum esse, dicas, num sit pacificum esse, aut æquum? Animadvertendum est autem hoc loco, ab universali sacrosancta Synodo Nuntiorum apostolicorum jurisdictionem in Partibus non excludi, sed expressè asseri, atque appellationes ad eordem admitti, a quibus causæ, si ita visum fuerit, subdelegatis a se iudicibus committantur.

§.40.

Ea, quæ hoc Articulo publicis ex documentis demonstravimus, sufficient ad rite cognoscendum Jus appellationum recentius, idque Germaniæ nostræ adcommodatum. Vidimus, quam solliciti ad reformandos abusus romani Pontifices vel proprio motu, vel ad preces inferiorum iudicum fuerint; ipsum vero jus ad supremam Petri Cathedram, dummodo cum moderamine, appellandi quam constanter ab Imperatoribus & Principibus, a Synodis non solum Tridentina, sed & Constantiensis, imo ipsa adeo Basileensi fuerit agnitum, atque observantia communi ad hodiernum usque diem custoditum. Sed & purum esse commentum, vanumque terculamentum vidimus, quod hodierni Publicistæ magno numero contra extantium documentorum fidem, contra totius Germaniæ pluribus secularis tranquille continuatam praxin, nisi etiam contra Cæsareas Capitulationes de Basileensium decretorum sub Rege Alberto acceptatione, tamquam Concordatorum Nationis nostræ fundamento, aut lege Imperii fundamen-

*) Sess. 25, Cap. 10.

damentali prætendunt, & incessanter veluti sufflatae bullas in aëra ja-
ctitant.

ARTICULUS VI.

De sano & utili appellationum usu.

§. I.

Hisce tanta sapientia & moderatione jam ordinatis, prout modo a nobis
ostensum est, quis non putet superfluam esse de sano & utili appella-
tionum usu tractationem? Neque enim juribus jam optime dispositis aliud
quid præter eorumdem jurium executionem faciendum superest. Hinc
autem illæ lacrimæ! Provincialium & diœcesanarum ex utroque Clero
tam seculari, quam regulari Synodorum ad disciplinam instaurandam opti-
ma remedia fere ubique in Germania vel neglecta, vel certe prætermissa
sunt: hinc neque judices in Partibus designati, & inde nova (tantum
non in autores culpæ) materia gravaminum. Quantum romani Ponti-
fices rectam justitiæ administrationem, & litigantium indemnitate cordi
habuerint, præ ceteris ostendit immortalis memoriæ Papa Benedictus XIV
epistola encyclica, post supremum Ecclesiæ clavum in se susceptum anno
1741 ad omnes Archi- & Episcopos data, qua suas illis graves curas de
judicum delegandorum vel ignorantia, vel malitia manifestat. Cumque
facile hujus corruptelæ radicem detegeret, eoquod præscripta canonicis
sanctionibus judicum synodaliū designatio universim esset neglecta; pro
injuncta sibi omnium Ecclesiarum sollicitudine Episcopos hortabatur, &
obtestabatur, ut sublatis quibusvis impedimentis Concilia provincialia &
synodalia, sicubi omissa sunt, quamprimum haberi curarent. Largiorem
adhuc in concedendo Ordinariis privilegio, ultra quam per Canones de-
beret, hic Pontifex se præstitit, Episcopis permittens, ut usque ad syno-
dalem judicum denominationem interim cum suo Capitulo quosdam eli-
gerent a Papa designandos: illorumque nomina Romam mitterent, & qui-
dem pro Diœcesum amplitudine plures etiam, quam quatuor, modo vi-
ros juris peritia sat bene instructos.

§. 2.

Idem Pontifex anno sequente aliam edidit Constitutionem *Ad mi-
litantis Ecclesiæ* in eum finem, prout ipse loquitur: „Ut graves nimium,
„diuturnæ, nulloque umquam tempore intermissæ Episcoporum, alio-
rum-

„cumque ordinariam jurisdictionem habentium querelæ adversus majora
„tribunalia, atque illa etiam nostræ romanæ Curie proposita tandem
„compescantur. — E contrario nobis quoque, dum etiam in minoribus
„essemus, superiorum judicium responsiones audire contigit asserentium,
„memoratas querelas inanes esse, nec ulli innixas fundamenta, utpote
„ex hac unica re causam & originem habentes, quod inferioribus grave
„est obedientiæ ac subjectionis jugum erga majora tribunalia, ipsisque
„nimis displicet, sibi subditis appellationis beneficio succurri.“

§. 3.

Facile cognovit sapiens Pontifex hæc dissidia componi, & succrescentia litium semina evelli posse, si, quæ a sacra Tridentina Synodo, ab apostolicæ Sedis constitutionibus, & Congregationum sacrarum decretis provide sancita sunt, debita executioni mandarentur. Quapropter ad conservandam Ecclesiæ disciplinam, restituendamque tribunalibus formam canonicis legibus consentaneam quadraginta quatuor decreta fecit, quæ dicas summo studio pro casibus possibilibus excogitata, ut nihil videatur oblitus, quod ad amplificandam Ordinariorum potestatem secundum jus & æquum faceret, arctosque admodum Curialistis romanis limites constituit, quibus illi hodie dum manent constrikti, plurimumque jam emendati, adeo ut attendi non vellet Pontifex, quidquid a Curia illegitime emanaret. Quid jam reciproce a Germania expectes sincere Lector! Res nostræ nihil hac vel illa Pontificis constitutione emendatæ, gravamina vero ad hodiernum usque diem reduplicata. Ita dixeris Germanos *) a multo tempore disciplinæ vulnera ferire, ac postea in lamenta erumpere, id quod jam in proverbium vernaculum abiit: *Sie schlagen, und flagen.*

§. 4.

Rebus sic stantibus quis Germaniæ subditis crimini vertat, si in causis suis litigiosis principia juris naturalis, divini, & communis ecclesiastici, nec non & observantiam immemoriam suæ Nationis sequantur, atque a iudice ordinario immediate ad supremum Ecclesiæ Capitis tribunal, vel ejus Legatum in Partibus confugiant, tum ut via brevior & tutior incedant, tum etiam ut sumtibus percant mediam Archiepiscoporum

*) Si Germanos dico, non omnes intelligas, sed aliquos. *Repræsentantes*: nondum enim pro explorando consensu tota Natio in unum fuit congregata.

rum instantiam prætereuntes, eamque romana non viliori pretio sua servitia exhibituram? Si grave Germanis est papalium Curialistarum dominium, remotius est tamen; sed illud archiepiscopatum Curialistarum dominium quo propius nobis, eo formidabilius, ne imponatur nobis gravius onus, & prout ab exemplis probat sapientissimus quidam Germaniæ Episcopus, *intolerabile*. Exempla terrent.

§. 5.

Jus naturale dixi non prohibere ab inferiore tribunali appellationem ad supremum omisso intermedio. Quid est enim appellatio, nisi ab eo, qui pressum se sentit, provocatio judicis ad suum Superiorem? Quod si ille duos, tresve superiores habeat, quodnam est illud naturæ jus, quod supremum mox adire judicem vetet, nisi prius adeantur omnes medii? Quid enim, si judex ille primus, qui meus est oppressor, supra se plures adhuc sibi invicem subordinatos judices haberet; anne miser ego, & pressus ad ipsum, in cujus justitia confido, Principem nonnisi per quatuor, aut quinque, pluresve ascendere instantias, sicque miseriam cumulare miseris debebo? Nonne natura miseris hoc facilitavit refugium? Nonne subditus natura duce immediate ad Principem potest pervenire, suam illi querelam deferens? Nonne Princeps aut per se ipsum, aut per quem velit Commissarium hanc potest discutere causam? Natura ergo appellationum tantum exigit ad superius tribunal provocationem, neutiquam vero per omnia intermedia tribunalia, hominum arbitrio constituta, usque demum ad supremum judicem ascensionem.

§. 6.

Divino jure præpositos sibi habet christianus homo tum locales suos Pastores, tum vero Supremum ovium, & Pastorum omnium Pastorem, S. Petri Vicarium. Huic quidquid solvendi, aut ligandi in Ecclesia claves sunt immediate a Christo datæ: potest is ergo quemlibet suorum subditorum per se solvere, aut ligare: hujus ergo implorans judicium, quid facit, nisi quod institutionem a Deo profectam sequatur? Nostra tempora, quod non mirum, Doctores tulerunt, qui de divina, nescio qua, Archiepiscoporum origine scripserunt, quorum ignorantia in rebus divinis, an majorem commiserationem, an falsiloquentia majorem mereatur indignationem, sub judice lis esto! Archiepiscopales

Curialistæ, qui summi Pontificis Primatum, etsi divinitus institutum, ab aliquot abhinc annis tam inermem facere, nec non & despectibilem conati sunt, haud ægre ferant, si ipsorum principia amplectentes, Episcoporum omnium (excepto uno Capite) discrimen cupiamus sublatum, & minus necessariam nostro ævo judicemus Archiepiscoporum humano arbitrio, & quidem maxime pontificio, institutam jurisdictionem, præcipue cum exemptæ Diœceses non minus feliciter subsistant, quam Archiepiscopis subiectæ, aut fortitan illæ minus, quam istæ gravaminum causas habeant.

§. 7.

Appellare per medias instantias res est antiquissimis, primisque Christianis adeo non conveniens, ut ad lites inter se celerrime, viaque brevissima finiendas ne ordinarios quidem suos iudices laicos in causis prophanis adirent, sed illos (certe sine piaculo) declinarent, causas, si quas haberent, ad Pastores suos deferentes. Jus vero ecclesiasticum commune, omisso inferiore iudice, ad Papam, tamquam supremum iudicem viam appellationum vult semper esse debere apertam. De appellat. Cap. 7: *Si duobus*. Hic commune jus sequitur illud naturæ, quod presso subdito viam ad ipsum Principem vult semper patere. Enimvero, quod ipsi Curialistæ archiepiscopales jam animadverterunt, a Spiritu bonæ Matris Ecclesiæ videtur alienum, per tres, quatuorve etiam instantias suorum subditorum causas pro consequenda adeo difficulter iustitia trahere cum magno temporis, & pecuniarum dispendio.

§. 8.

Ea demum iuribus conformis, & immemoriali ab ævo observata Nationis nostræ praxis est, & consuetudo, ab ordinario iudice aut ad ipsam romanam summi Pontificis Sedem immediate confugere, aut quod Nationi nostræ multo compendiosius est utiliusque, ad pontificiam in Partibus Delegationem, quam Nuntiaturam vocamus. Huic ex tranquilla observantia appellationes in secunda instantia licite, non non tamen *necessario* apud nos deferri res manifesta est, si recentissimam archiepiscopalem Curialistarum litem excipias. Idem insignis inter nostros juris ecclesiastici Doctor Anton. Schmidt testatur *): „Hi (Nuntii) non exercent, nisi quasdam facultates Concordatis nostris non
„con-

*) Instit. jur. eccles. german. Tom. I, p. 224.

„contrarias. NB. Jus secundæ instantiæ ipsis relictum, ita, ut in Germania vel ad eos, vel ad Archiepiscopos appellari queat.“ Hanc observantiam Concordatis esse contrariam propter Basileensium decretorum acceptationem, nostri temporis signum est, ut Art. præc. demonstravimus.

§. 9.

Quamobrem necessario hanc fluere consequentiam manifestum est, si Archiepiscopi jus novum, quod nondum ipsis competit, acquirere velint, cum de spontanea cessione hic agitur & supremi Judicis, qui a legitimo sui juris exercitio vel per se, vel per suum Delegatum immediate in *appellatorio* a prima instantia judicandi promittat abstinere; & subditorum Germaniæ, qui jure suo se abdicent ad supremum Pastorem prius confugiendi, quam Archiepiscoporum judicia experti fuerint; ad id consequendum alia non superest via præter pacificam cum utraque parte, quæ sua legitima possessione cedat, compositionem. Res ea certe ad Imperii Diætam non pertinet, ceu ad tribunal pro ferenda judicii sententia; attamen illuc videtur posse deferri, tamquam ad Consilium pro deliberatione instituenda, num ipsi Imperii Partibus id expedire videatur: quod si ita; quomodo cum sua apostolica Sanctitate pacifico modo sit transigendum. Capitul. Cæsar. Art. 14, §. 5.

§. 10.

Ex his tranquillus Lector jam concludat, quid ergo de Articulo 22 Emsani in Balneo conventus sit judicandum. Inprimis generaliter *absque ulla distinctione* omnes causæ in Imperio ad jus ecclesiasticum pertinentes primæ, vel concurrenti cognitioni summi Pontificis eriperentur, quod neque Constantiensis, neque ipsa Basileensis Synodus fecit, sed utraque *causas majores* in jure expresso enumeratas, aut quæ *de sua natura* apud Pontificem tractandæ sunt, admisit, suisque a decretis excepit. Si ergo Constantiensis, & Basileensis Synodi decreta, ut volunt archiepiscopales Curialistæ fundamentum nostrorum cum Papa Concordatorum sint, atque etiam fundamentalem Imperii legem constituent; sequitur hunc ipsum Articulum Emsanæ Punctionis adversus publicam fidem germanicæ Nationis esse sædifragum, & legem Imperii fundamentalem evertere.

§. 11.

Ad a. Causæ minores in prima cognitione ita hactenus ab Episcopis jam sunt pertractatæ, ut neque Pontifex, neque Nuntii apostolici eorum jus umquam violare tentaverint, prout Reverendissimus Spirensis Episcopus testatur in sua Responsione ad Archiepiscopum Moguntinum a. 1787.

§. 12.

Ad b. Nuntiis via facti & invitis, iisque primi ordinis Principibus ecclesiastica jurisdictio *totaliter* aufertur, adeoque & jus in tertia instantia, vel in secunda exemptos judicandi. Atqui hoc ipsum denuo Basileensia decreta Sess. 31 infringit, quæ apostolicos Legatos non excludunt, sed illis intactam relinquunt suam jurisdictionem, NB. qui vel consuetudine præscripta, vel solum ex Privilegio jus cognoscendi habent, dummodo non omisso medio appellationes, aut avocationes fiant.

§. 13.

Ad c. Præscribitur pro Curialistis archi- & episcopalibus novus ordo judicialis, qui canonicis statutis, & usitatæ in Imperio praxi sit conformis. Atqui si ad Principia Emsanæ Punctationis novus judicialis ordo sit reformandus, eundem cum canonicis statutis, & Germaniæ observantia e diametro pugnare jam demonstratum est tota hac ipsa præsentente Dissertatione.

§. 14.

Ad d. Falsum est teneri romanum Pontificem vi Concilii Basileensis, aut Tridentini ad judices *nationales* in Partibus delegandos. Nisi executio Tridentini Canonis de iudicibus in Synodo provinciali, vel diœcesana denominandis inter pia desideria referri debeat; eadem ab exemplo Archiepiscoporum expectanda est.

§. 15.

Ad e. Quod demum caput rei est, ut omnis via recursus, etiam indirecti ad summum Pontificem Germaniæ subditis præscindatur, projectatum fuit pro tertia instantia provinciale perpetuum *quasi synodale* iudicium.

elum. Huic gravissimo puncto momenta jam gravissima opposuit laudatus Spirensis Episcopus: ubi ille desit, ego incipiam. 1mo. Cum idem hoc punctum in decretis Basileensibus, atque adeo *ex hypothesi* in Concordatis Germaniæ jam contineatur; salva Nationis publica fide sine consensu alterius partis compaciscentis hæc Pontificis exclusio fieri nequit.

§. 16.

2do. Ea est ipsa appellationis natura, ut ad novum, ac superius quidem tribunal causæ subditi a priore iudice pressi transferatur: cum ergo prima, & secunda instantiæ sint archi-vel episcopalia judicia; necesse est, ut tertia instantia non amplius ex iisdem iudiciis componatur: atqui Episcoporum & Archiepiscoporum Curialistæ, illorum ex manu stipendia accipientes non aliud a prioribus, superiusque iudicium formare possent, minus pontificium; siquidem a Pontificis autoritate in iudicando non dependerent, nisi forsitan assumpto pontificiæ delegationis inani titulo.

§. 17.

3tio. Maximum autem est, idque merito Spirensi Episcopo nec *expediens*, nec *possibile* visum, quod ovibus christianis janua ad suum Pastorem a Christo datum hoc Emfano Puncto penitus occluderetur, adeoque nisi jam facta esset, fieri saltem proxime posset ovium a suo Pastore separatio, id quod Catholici *Schisma* vocant. Jus appellationum ad summum Pontificem, quod catholicæ fidei dogma est, idque practicum, & ab omni retro antiquitate exercitum, divinum hoc jus, nisi verbis expresse negaretur, factis certe annihilaretur, sicque catholica fides nobis Germanis perditum iret.

§. 18.

Non sic crediderunt Patres nostri, sed unius omnium Pastoris oves januam suo Pastori ad ovile semper apertam voluere. In hoc appellationis communi miseris refugio illi dignitatem Ecclesiæ Romanæ consistere crediderunt: in eo sitam esse pretiosissimam gemmam, quæ in pontificia thiara radiet, S. Bernardus affirmat ad Innocentium II scribens *): „Hoc „inter cetera Vestri singularis Primatus insignia specialius nobilisque „nobilitat Vestrum, & inclytum reddit Apostolatum, si eripitis paupere-
rem .

*) Epist. 198.

„rem de manu fortiorum ejus. Nulla meo judicio in corona Vestra pretiosior gemma Zelo illo Vestro, quo æmulari consuevistis oppressos, nec reliquistis virgam peccatorum super sortem justorum.“

APPENDIX.

De recentiore caussa Spirensis cathedralis Capituli cum suo Decano.

§. 1.

Nihil est illustrius ad novissima Imperii nostri sensa de pontificia in rebus ecclesiasticis jurisdictione agnoscenda, quam celeberrima nostris primum diebus excitata inter cathedrale Capitulum spirense, & suum tunc Decanum, nunc Episcopum, illustrissimum Comitem de Styrum controversia: hinc non potui non hanc historiam præsentis de appellationibus quæstioni tamquam appendicem ex documentis plane decretoriis adjungere, quæ in libello continentur, solidissime scripto, & in vernaculum sermonem translato *).

§. 2.

Gravissimæ inter Capitulum, & Decanum discordiæ 1760 adeo eruperant, ut illud hunc ab officio suo removendum concluderet. Utraque pars ad Moguntini Archiepiscopi tribunal provocat, cujus judicium ante omnia spoliatum Decanum in pristinum statum restitui jubet. A mandato hoc, tamquam irreparabili gravamine Romam appellat Capitulum, impetratque citationem, & inhibitionem. Curia Metropolitana nec appellationi, nec inhibitioni locum esse contendit. Episcopus vero spirensis, & Cardinalis de Hutten unacum cathedrali Capitulo Romæ apud pontificium Auditorem petunt, ut hæc tota caussa nequidem in tramite juris disceptari permitteretur, sed ad Congregationem Tridentini Interpretum eapropter ablegaretur, quia inter gravamina quædam essent, quæ illuc pertinerent. Papa precibus Cardinalis Episcopi, & Capituli consensit, ac prædictæ Congregationi disquisitionem permisit: Moguntinus vero Elector id indigne ferens totis viribus renisus est, præcipue Palatini Electoris

*) Frage, ist die Gerichtsbarkeit der päpstlichen Nuntien in Deutschland den Reichsgesetzen, und der Reichsverfassung zuwider? 1787.

toris ope suffultus. Res itaque ad secularia etiam tribunalia devenit, & ad ea quidem duo, quæ in Imperio summa sunt, quorum unum, id est, *Aulicum* pro Decano stetit, contra alterum, hoc est, *Cameralis*: præterquam quod duæ insuper Aulæ, Imperatoris, atque Galliæ Regis Episcopum cum Capitulo protegerent. Unde manifeste falsum est, quod Anonymus quidam *) scribit, hanc appellationem a *tota* Natione germanica tamquam suis juriis contrariam fuisse agnitam.

§. 3.

Peropportune accidit, ut hujus litis occasione quidam Curialista, famosi licet nominis, male tamen jam antea in Ecclesia notati, ex Moguntino Archivo instrumentum acceptationis Decretorum Basileensium de anno 1439 extraheret: mox reliqui tantum non omnes Curialistæ archiepiscopales vetus illud Principum *inter se* Concordatum avide apprehendebant, & veluti ad vitam resuscitare conabantur, prætendentes illud esse fundamentum Germaniæ Concordatorum cum Papa initorum, quod commentum jam satis a nobis confutatum est. Instante tunc Romanorum Regis, Josephi II coronatione putabant Moguntini, hujus suæ tam optatæ inventionis optimum usum se facere posse. Quamobrem a. 1764 Capitulationis Cæsareæ Articulo 14 novam addi volebant pontificiæ jurisdictionis in Germania restrictionem, quæ duabus præcipuis constaret punctis: 1^{mo} ut nullæ ecclesiasticorum causæ, maxime quæ ad possessorum momentaneum spectant, ante finalem decisionem deferri Romam, vel ad Nuntiaturam possent: 2^{do} ut omnes causæ ecclesiasticæ (tantum quibusdam ex antiqua observantia exceptis) etiam in Appellatorio intra Archiepiscopatum per Commissarios natione Germanos, a Pontifice designandos terminari deberent. Hinc illud *Monitum* Electoris Palatini, de quo Francofordii in Comitibus electoralibus deliberatum.

§. 4.

Res secus cecidit, ac sperabatur. Legati enim Principum licet Laicorum, atque etiam A Catholicorum non satis fundata agnovere ea, quæ contra apostolicam Sedem movebantur, gravamina. Et quamvis concederetur, scripta quadam supplicatione *NB. generalibus* tantum verbis concipienda Imperatorem esse rogandum, ut contra romanæ Curie pressiones

*) Historisch, kanonische Abhandlung von den Legaten, und Nuntien der Päpste.

nes in causis ecclesiasticis ad Summæ Cæsareæ Majestatis altissimum thronum confugere liceret; ne in id quidem Bavarica Legatio pro singulari semper Patriæ nostræ erga sanctam Sedem devotione consensit.

§. 5.

Itaque contra Moguntinorum conatus in Collegio electorali conclusum, sine ulla mutatione retineri debere cæsareæ Capitulationis Articulum 14, qui tantum causas profanas a tribunali Nuntiorum papalium arceret, & expresse ordinat: „Causas ecclesiasticas legitime a secularibus „distinguendas, atque in dubiis casibus cum sancta Sede amicabili modo „tractandum esse, ut cuilibet judicio, tam ecclesiastico, quam civili „suum integrum jus, & jurisdictio servetur.“ Quidquid ergo juris ex Germaniæ publica, & antiqua praxi circa appellationes in secunda instantia romanus Pontifex habuit, id certe per Capitulationem Josephi II firmatum retinuit.

§. 6.

Supplicatio autem ad Imperatorem haud omnino fideliter, & votis conformiter a Curialista Moguntino concepta fuit: nam ille partim gravamina, ut actu existentia, imo in dies accrescentia depinxit, partim speciale gravamen de Nuntiorum tribunali, tamquam re insolita, proposuit; quod utrumque adeo ex votis Electorum non colligebatur, ut iisdem etiam repugnaret. Quapropter apostolicus Nuntius ad Cæsaris electionem missus jure contradixit: nostra autem Bavarica Natio vel *generales* illas Moguntinorum querelas neque umquam ut æquas agnovit, neque modo agnoscit.

§. 7.

Ea quidem Josephi II Capitulatio fuit; quinam vero Spirensis causæ exitus? multo adhuc romano Pontifici gloriosior. Francofurti in Comitibus præfens Nuntius apostolicus, Archiepiscopus Ravennatensis nomine Nicolaus Oddius Electoris Palatini animum, quem æquitatis amantissimum noverat, cum sancta Sede reconciliaturus Manhemium profectus est, & felici quidem successu: rem enim ita composuit, ut Pontifex Clemens XIII Spirensis causam ad se ipsum advocaret, factaque nova disquisitione ordinario Archiepiscopi judicio remitteret, modo Decanus interim, quippe spoliatus, in pristinum statum restitueretur:

tor: hæc æquissima conditione Palatinus Elector bona Capituli *sequestrata* mox restituere se velle promisit, nec amplius Decano patrocinari, sed potius curare, ut Processus ille Romam, ceu ad superiorem instantiam legitima appellationis via rediret, Sæque Sanctitatis iudicio Decanus se submittere deberet. Quin etiam Serenissimus Princeps addidit, Auctoritate sua se intercessurum, ut Collegii electoralis epistola ad Imperatorem nullum sanctæ Sedi præjudicium crearet. Hæc non solum Nuntio Manheimii, sed & datis Romam litteris die 12 Maji a. 1764 ipsi Pontifici Elector promisit.

§. 8.

Re cum Palatino Electore tam feliciter confecta Nuntius apostolicus spe optima plenus ad Archiepiscopum, & Electorem Moguntinum reversus est, easdem illi conditiones propositurus, quem etiam difficilem non amplius invenit, quippe jam expertum, iterato licet in Comitibus tentata consultatione, Imperium tamen ad sua vota trahi non posse. Quare is submississimas ad Pontificem litteras dedit hæc a nobis singulariter ponderandas.

§. 9.

Majoris difficultatis negotium videbatur, Cardinali Episcopo Spirenfi mitiora consilia persuadere, existimanti sua gesta Concilii Tridentini decretis firmissime fundari, atque a Metropolitano sua episcopalia jura infringi; donec tandem & ipse cederet, perhumanis litteris ad se a Moguntino Archiepiscopo scriptis, quibus ille Cardinali se purgat, sicut proprio ore Regis christianissimi Legato se purgasse profitetur *a malignarum oblocutionibus*, hunc scilicet in modum: „Se non prætendisse nova principia stabilire, & appellationes a decretis interlocutoriis suæ Curiae, vim definitivæ habentibus, & quorum gravamen per appellationem a definitiva reparari nequeat, tales appellationes ad Curiam romanam se non velle impedire, & eliminare, sed sancte potius insistere sanctionibus sacrorum Canonum, & præcipue sacri Concilii Tridentini, ut, qui casus appellationum ab Episcopo ad Metropolitanum juxta sacrorum Canonum normam admittuntur, iidem etiam admitti debeant in Curia sua Moguntina, quoties ab ea appellari ad summum Pontificem contigerit.“ Addidit quoque idem Elector, quæcumque *ab aliis* (quasi non a se ipso) in Comitibus electoralibus monita, aut

Y y 2

scripto

scripto typis impresso proposita fuerint ad Articulum 14 Capitulationis, hæc sua non facere, sed omnia ea tolli se existimare, si tantum huic præcise causæ opportunum a summo Pontifice remedium adhiberetur. Hinc demum conquestiones Collegii electoralis ad Sac. Cæs. Majestatem scriptas præter hujus *unice* causæ processum sine ullo effectu remansuras pro sua Parte declaravit, nec sibi umquam, in mentem venisse testatus est, præsentem disciplinæ, seu politiæ statum hucusque retentum in Imperio quoad provocationes, & appellationes ad sanctam Sedem (*NB.* jam in secunda instantia consuetas) ne hilum quidem immutare. Ita Moguntinus Elector sparsas adversus se, quas vocat *calumnias*, diluit ex toto corde apostolicam Sedem se venerari asserens, ejusque conferendis juribus in Imperio germanico totis viribus nullo non tempore institutum. Si velis hanc aulicam officii speciem vocare; hujusmodi species politiæ saltem non Romanorum, sed Germanorum aulæ adscribas.

§. IO.

Pontifex igitur Clemens XIII causâ hac ad se ipsum avocata utriusque Partis jura novo subjecit examini non jam invitis, sed in Suae Sanctitatis justitia omnem fiduciam ponentibus duobus Electoribus, Moguntino & Palatino, uti ex amborum Romam missis epistolis, jamque typo impressis constat. In specie Palatinus Elector, quod antea Moguntinus fecerat, pariter Pontifici declarat, quæcumque in Nomine Suo ad Artic. 14 Capitulationis in Comitii proposita, aut in litteris Collegii electoralis ad cæsaream Majestatem contenta sunt, ea omnia sublato *unice* hoc gravamine ex Parte Sua sine effectu esse remansura. Serenissimus insuper Sanctissimo Patri spondet, Sua in Imperio Autoritate se allaboraturum: „Ne quid præjudicii sanctæ Sedi ex Comitiiis, „& litteris electoralibus enascatur, *NB. NB.* neve jura, quæ hæctenus „in Imperio retinuit, ullo modo imminuantur, aut ab eo, in quo fuerunt hæctenus statu, exturbentur, sed si restituto ante omnia Decano „de Styrum ejus causâ coram Metropolitano in prima instantia fuerit „decisa, appellatus in secunda, & ultima tribunalium in Curia romana „competenti judicio se sistat, ac plene satisfaciatur.“ Elector Serenissimus hodieum verbo stat.

§. II.

Tandem mense Septembri ejusdem anni optata valde summi Pontificis sententia prodiit, qua suspensio Decani *preter juris ordinem*, & damnum per interlocutoriam archiepiscopalis Curiae *baud irreparable* declarabatur; quapropter & acta totius causae Moguntiam pro prima instantia remittebantur, ita ut si post anni lapsum sententia decisoria non fuisset secuta, Capitulo, vel Decano liberum esset viam iustitiae secundum ordinem romanorum tribunalium persequi. Unde manifestum fit, ex hac causa, utut inique diffamata, adeo Nationi nostrae novum gravamen non accevisse, ut potius novo, & arctiori amicitiae vinculo Serenissimus Princeps Palatinus pro suo innato aequitatis studio sanctae Sedi adstrictus fuerit, Roma enim hanc licet intricatam causam non ipsa ad se trahere quaesivit, sed tantum accepit a Germaniae Episcopo, & cathedrali Capitulo ad se delatam, comprobante hanc appellationem duplici Aula, & imperatoria Viennae, & regia Parisiis; sed & Roma rei aequitate inspecta Germaniae sua jura per causae remissionem integra servavit. Filii hominum! ut quid diligitis vanitatem, & quaeritis mendacium?

§. 12.

Pro coronide merentur adhuc singularem plane in praesenti controversia reflexionem duae Archiepiscopi Moguntini ad Pontificem Romanum epistolae, quarum tenorem etsi longiorem, quia tamen summe momentosum ex libello in fronte hujus appendicis laudato hic transcribendum duxi.

Ex litteris de 26 Julii anno 1764.

„Quo tempore in causa Capituli cathedralis Spirensis contra ejusdem Decanum Comitem a Limburg Styrum novae turbae, ac tedia oriebantur, ob iteratos ab una, alteraque parte ad laicos judices recursus, & nova horum judicium decreta, ipsarum etiam partium recentia scripta, opportunius accidit, summoque me gaudio affecit Reverendissimi Domini, Archiepiscopi Ravennatensis, nuper Sanctitatis Vestrae Nuntii extraordinarii adventus, ab eoque habita noticia, qualiter Sanctitati Vestrae placuerit, praedictam causam per tot Urbis, & Germaniae tribuna-
lia in avia & devia pertractam ad se vocare; spes simul certa affulsit, coram Sanctitatis Vestrae folio nunc omnes tandem dissipandas tenebras,
& causam hanc mere ecclesiasticam e laicorum judicum manibus ere-
ptam

„ptam in viam pariter juris, & iudiciorum a sacris Canonibus præscriptam
 „probande Urbe, ac Germania nostra remittendam fore. Dudum illud
 „Prædecessor meus binis ad Sanctitatem Vestram humillimis litteris, aliis-
 „que iudicum suorum S. Rotæ Decano 22 Septembr. anno 1760 dire-
 „ctis, pari erga sanctam Sedem devotione, & rationum gravissimarum
 „pondere efflagitaverat, scilicet *primo*, ut Decanus Spirensis a Capitulo
 „suo, nullo juris ordine, sed via facti suspensus, & ejectus ante omnia
 „redintegretur, nec interposita a Capitulo Spirensi appellatio a manuten-
 „tionis decreto iudicum moguntinorum in tribunalibus Urbis recipiatur.
 „*Secundo* ut ipsa querela Capituli contra Decanum in prima instantia hisce
 „in partibus cognoscatur, & decidatur, salva tamen omnino utrique parti
 „ad sanctam Sedem postmodum appellatione. *Tertio* ut eadem causa pes-
 „simo exemplo, ac ignoto hucusque in Germania temporalium prætextu
 „ad tribunalia Imperii laica delata supremo iudicio Sanctitatis Vestræ,
 „suorumque in Curia romana tribunalium restituatur. His sensis & deside-
 „riis piissime in mortuo Prædecessore meo Deo providente Ecclesiæ Mo-
 „guntinæ promotus, honorum & onerum hæres hoc in statu molestam
 „causam inveni, novo studio adcurate perpendi, concordiam inter par-
 „tes non semel tentavi, spe frustratus, tandem Eminentissimo Domino
 „Cardinali Spirensi declarare debui, me nec latum unquam a decreto
 „manutentionis iudicum Moguntinorum discedere posse. Non ignoro
 „passum inde contra tibi rumorem in Urbe, quod romanas appellatio-
 „nes impedirem, auctumque, dum in nuperis Comitibus electoralibus eli-
 „gendo Romanorum Regi destinatis a Legato Palatino super appellationi-
 „bus romanis quædam monerentur, ac super iisdem Collegii electora-
 „lis nomine quædam epistola ad 17 Martii a. c. Sacræ Majestati Cæsareæ
 „scriberetur. Sed supremæ Sanctitatis Vestræ perspicaciæ cum omni fidu-
 „cia submitto, an iusta sit talis accusatio? Quotidie me sciente, ac vo-
 „lente Moguntinæ appellationes ad tribunalia Urbis devolvuntur: hoc
 „ipso tempore complures ibi pendent, & trahuntur, imo in illa ipsa caus-
 „sa Spirensi tractatum fuit frequenter, eandem ad sanctam Sedem per ap-
 „pellationem devolvendam esse. Idipsum hisce repeto, & confestor,
 „non tantum huic appellationi spirensi a me tunc deferendam esse, quan-
 „do evacuata fuit in partibus prima instantia, quæ cito finiri poterit. Sed
 „modis insuper, viribusque omnibus a me curandum, ut pars Romam ap-
 „pellans ibi & compareat, & iudicatus tribunalium Curie romanæ ple-
 „nissime pateat. Utque Sanctitas Vestra eo magis de candore hujus meæ
 „decla-

„declarationis secuta reddatur, insuper addo, penitus me persuasum exi-
 „stere, præsentem Ecclesiæ, quoad provocaciones & appellationes ad
 „S. Sedem disciplinam tam necessario connexam esse cum ipsa Ecclesiæ
 „rum Germaniæ libertate, ut hanc convelleret, qui appellationes roma-
 „nas abolere vellet. Atque ex hoc ipso Sanctitati Vestræ perspicuum erit,
 „quam parum præjudicii S. Sedis juribus ex dictis Principum Electorum
 „ad S. Cæsaream Majestatem litteris exurgere possit.“

§. 13.

Ex litteris 17 Martii a. e. exaratis, „Quæ enim monita sunt in
 „Comitiis illis, quæ scripta exhibita præcipue ad Art. 14 Capitulationis,
 „hæc mea non facio, imo pro parte, quam in statu publico Imperii ha-
 „beo, omni studio enitar, ut nequidquam præjudicii juribus, quæ Se-
 „des apostolica hætenus retinuit, ex iis omnibus, & litteris prædictis
 „enascatur: atque si qui pacis perturbatores novos inde tumultus ali-
 „quando cierent, ego pro meo Archi-Cancellæ Status officio omnibus,
 „quæ fierent contra Sedem apostolicam juris, seu facti innovationibus
 „obstam. Quod vero spectat ad litteras sæpe dictas Collegii electora-
 „lis id quidem constat, occasionem illis unice dedisse modernam ap-
 „pellationem Capituli Spirensis, sed hoc ipso cessabit litterarum scopus,
 „& effectus, si causa Spirensis in Germaniam remittatur in prima in-
 „stantia cognoscenda, & Romam demum in gradu appellationis redi-
 „tura, ibique terminanda. Aliud est enim appellationum abusus nota-
 „re, seu appellantium excessus, quos ipsæ coercent apostolicæ Consti-
 „tutiones recentes & antiquæ, Correctioni summæ Sedis exhibere; aliud
 „est, quam appellationes ipsas romanas impugnare: postremum hoc
 „nec Germaniæ Metropolitanis, nec mihi in mentem venit, quin po-
 „tius eadem romanæ appellationes in celebri Art. 14 Capitulationis in
 „eodem, quo fuerunt hætenus, statu præservatæ sunt verbis satis di-
 „sertis. Liceat itaque, Beatissime Pater! addere & gloriari, in iis po-
 „tius de sancta Sede benemeritum me fuisse, super quibus accusor,
 „qua de re Sanctitatem Vestram alias uberius informandi locus erit.
 „Denique, quod tertium rei caput est, recursus nempe ad laicos judi-
 „ces Imperii, qua in re cum supremo Ecclesiæ iudice communem caus-
 „sam habent Archiepiscopi, & Episcopi omnes, haud timeat, rogo San-
 „ctitatem Vestram, quin modis omnibus iisdem sim obstiturus, præfer-
 „tim si sub prætextu temporalium in exteris Regnis auscultato in Ger-
 „mania

„mania hucusque inaudito fuscipiantur: hoc enim modo & Pontificum,
 „& Episcoporum jurisdictionem, & omnem Ecclesiæ libertatem everti
 „agnosco, & palam profiteor, & penitus abominor. Longius esset hic
 „enarrare, quid desuper in Aula cæsarea jam egerim, & porro acturus
 „sim. Constitutum mihi insuper est, quamprimum sub severissimis pœ-
 „nis omnibus interdiceret, ne ejusmodi recursus ad Brachium seculare
 „omnino habeant, habentibusque consentiant, & consilium, auxilium,
 „vel favorem exhibeant. Cessabit vero hoc ipsum quoque, si Sancti-
 „tas Vestra dignetur, sæpe dictam causam Spirensē sine longiore
 „mora in Germaniam modo supra dicto remittere, seque tanta mole-
 „stia liberare. Primis hisce in eadem causa ad Sanctitatem Vestram
 „litteris id rogo, & Sanctitatis Vestræ pedes exosculans apostolicam
 „Benedictionem mihi, & gregi commisso supplex efflagito.“

§. 14.

Plura sunt quidem in his duobus documentis novissimis æque, ac
 decretoriis, quæ ad trutinam mentis singulari reflexione revocari meren-
 tur: nolim tamen ego criticam mei ipsius animadversionem adjungere,
 totum Lectori judicium relicturus, tantum vero, quæ dignissima sunt no-
 tatu, veluti in indicem reducturus. 1mo. In Spirensi hac causa ab una,
 alteraque parte ad laicos judices recursus, & diversa horum judicum de-
 creta fiebant, atque a *via sacris Canonibus præscripta* litigantes Germani dis-
 cedebant. 2do. Ab interlocutoria primæ instantiæ, *tamquam gravamine*
irreparabili Capitulum cathedrale una cum suo Episcopo ad tribunal Curiæ
 romanæ appellabat. 3tio Recursum a partibus ad secularia Imperii tribu-
 nalia factum vocat Archiepiscopus Moguntinus *pejissimum exemplum, ac igno-*
tum bucusque in Germania, etsi fieret vel temporalium prætextu. 4to. Ipse fa-
 tetur, quod & abominatur, *hoc modo & Pontificum & Episcoporum jurisdi-*
ctionem & omnem Ecclesiæ libertatem everti. 5to. Promittit iisdem recursibus
 in futurum *modis omnibus se obstiturum, & suis subditis severissimis pœnis*
interdicturum, ne ejusmodi recursus ad brachium seculare omnino habeant, ha-
berentibusque consentiant, & consilium, auxilium, vel favorem exhibeant. 6to. Ar-
 chiepiscopus Elector apud Pontificem romanum se purgat *de accusatione,*
 quod romanas appellationes impedierit, & quidem vi *Moniti, & Littera-*
rum Collegii electoralis in ultima Cæsaris electione. 7mo. Negat Archi-
 episcopus hanc accusationem esse justam: *Monitum* illud Legato Palatino
 adscribit, *Litteras* vero Electorum Collegio, nec verbo jus commemo-
 „rans

vans decretorum Basileensium per Concordata Germaniæ validorum. 800. E contrario autem expresse & aperte profitetur, romanas appellationes a prima instantia se salvo admittere. 9no. Insuper testatur, quotidie se scientes & volentes ex Moguntia appellationes ad tribunalia romana devolvi: 10mo. Spendet etiam, modis viribusque omnibus se curaturum, ut pars Romam appellans ibi & compareat, & judicatus Curie romane amplissime pateat. 11mo. Ex eo, quem profitetur, candore mentis Pontifici declarat, penitus se persuasum existere, præsentem Ecclesiæ quoad provocaciones & appellationes ad S. Sedem disciplinam iam necessario connexam esse cum ipsa Ecclesiarum Germaniæ libertate, ut hanc convelleret, qui appellationes romanas abolere vellet. 12mo. Monitum ad Art. 14 Capitulationis, ubi mentio de Concordatis Principum, protestatur, se non facere suum, 13tio. Quin etiam pro sua parte in Scatu publico Imperii pollicetur se omni studio adnifurum, ne quidquam præjudicii iuribus, quæ Sedes apostolica hætenus retinuit, ex iis omnibus enascatur. 14to. Illos pacis perturbatores nominat, qui inde novos tumultus aliquando cierent. 15to. Suum interponit Archi-Cancellæ officium, quo velit obistere omnibus, quæ fierent contra Sedem apostolicam juris, seu facti innovationibus. 16to. Quod spectat ad litteras Collegii electoralis, declarat unice cum caussa Spirensi earum cessare scopum, & effectum. 17mo. Demum testatur, nec Germania Metropolitanis, nec sibi in mentem venisse appellationes romanas impugnare. 18to. Quin potius easdem appellationes in celebri Art. 14 Capitulationis in eodem, quo fuerunt hætenus, statu sat disertis verbis esse præservatas. Hæc ad summum Pontificem Archiepiscopus Elector Moguntinus a. 1764. Tute, mi Lector! nunc cogita, quid de posterioribus Moguntinæ Curie moliminibus in Conventu Confluentiæ a. 1769, in Emmano balneario a. 1786, & actu in Dieta Imperii judicandum sit!

CAPUT II.

De appellationibus a Papa.

Ultimam ad supremum Pastorem, ac judicem suum instantiam debere Christianis omnibus saltem in gravioribus causis manere apertam, prima hujus criticæ disquisitionis parte confectum ivimus: jam inde sponte sua, & alterius Partis assertio fuit, ab ultimo, seu supremo tribunali, quod est illud summi Pontificis, nullam amplius dari posse appellationem. Propter ipsam tamen hujus rei gravitatem ho-

diernis præcipue diebus schismati, quod Deus avertat, admodum propinquis operæ pretium est peculiare adhuc examen instituere, quod tribus Articulis perficiam dicturus: *1mo* De ipso jure divino, quod appellationes a summo Pontifice vetat, penitusque excludit: *2do* De historia antiquissimi axiomatis, *Prima Sedes a nemine judicatur*: *3tio* De recenti origine opinionis Papam Concilio subjicientis:

ARTICULUS I.

De jure divino prohibente appellationes a Papa.

§. I.

Teste incarnata veritate Petrus est fundamentum Ecclesiæ divinitus firmatum, quod suam huic firmitatem communicet; non vero quod ab hac firmitatem accipiat, ut recentiores quidam fingere ausi sunt: Petrus est enim a Christo constitutus, ut fratres confirmaret, non inverse Petrum confirmare fratribus concessum est. Petro claves regni cælorum *soli* datæ sunt, hoc est, suprema in Ecclesia potestas, ut quidquid a Petro super terram solveretur, sive ligaretur, in cælo quoque solutum esset, ligatumve. Nulla ergo amplius superior in terra datur Potestas, quæ reformare posset jam in cælis firmata Petri judicium. Unus est Pastor omnium ovium, & Pastorum a Christo denominatus, cui totius ovilis cura commissa, S. Petrus: unum ergo ex divina institutione caput totius corporis, quod ab uno regendum est. Unde antiquis catholicum dogma, formam regiminis Ecclesiæ esse veram Monarchiam. Essentia Monarchiæ destrueretur, si suprema potestas in plures divideretur. Falsum foret catholicum dogma, si Aristocratia Ecclesiæ dominaretur. Institutio divina everteretur, si Petrus Apostolis inferior declararetur, quos Christus non solum singulos, sed in unum omnes Petro declaravit subiectos.

§. 2.

Quænam enim illa Potestas, cui pontificia subdatur? Nullus ad hodiernum usque diem, nullus eorum, qui adhuc vel nomine Catholici velint audire, nemo unus aliam publice ausus est assignare Potestatem Pontifice superiorem, quam Concilium universale. Ut non hic repetam jam superius ex primis, iisque generalibus Conciliis, in specie ex Ephesino, & Chalcedonensi demonstrata in *Append. ad Part. II contra Pseu-*

Pseudo-Bossuetum, supremam auctoritatem in solo romano Pontifice semper fuisse agnitam; quod hoc loco singulariter quadrat, ubi de iudicio Papæ dijudicando quæritur, est universalis, ejusque orientalis Concilii VIII, seu Constantinopolitani IV decretum, quo expresse declaratur etiam ab œcumenica Synodo contra primæ Sedis Antistites sententiam ferri, aut solum eos in jus vocari sine nota impudentiæ non posse. En Canonem *): „Si qua vero œcumenica Synodo collecta de romana etiam „Ecclesia controversia extiterit, licebit *NB.* cum decenti reverentia „de proposita questione veneranter percontari, responsumque admit- „tere, & sive juvari, sive juvare, non tamen impudenter contra se- „nioris Romæ Pontifices sententiam dicere.“ *Ἀποφάσσειν* græca vox latino quidem sermone *sententiam dicere* redditur; vi tamen sua nativa, & propria *in jus vocare* potius significat. Quodsi ergo generali Synodo sine temeritatis, imo & impudentiæ nota non liceat romanos Pontifices in jus vocare, aut contra eos sententiam ferre, etsi forsitan rebus antea secum expensis iusta videatur causa; necesse est, ipsi adeo universali Concilio jurisdictionem non esse in supremum Pontificem.

§. 3.

Dignum est hic memorari, quod Petrus Ballerinius observavit **): „Hoc œcumenicæ Synodi testimonium nulli obnoxium contro- „versæ, quantum præstet aliis quibuslibet posterioris ævi, & inferioris „multo, aut nutantis auctoritatis, quæ ab Adversariis opponi solent, „facile est judicare. Hic certe generalis Concilii Canon, quo romani „Pontifices ab œcumenicæ quoque Synodi sententia, atque jurisdictione „subtrahuntur, satis superque omnem excessus, aut assentationis no- „tam detergit ab eo generali axioma, *Prima Sedes non judicatur a quo- „quam*, quod ex antiquitate, ac ex quodam principio naturali deprom- „tum generalis quoque Concilii jus in summorum Pontificum personas „evidenter excludit.“ Quas huic decretorio Canoni orientalis, atque „œcumenici Concilii *Pseudo-Bossuetus* opponit argutias, quippe in se „ipsis nimium futiles, non opus est rememorare: eas satis nervose jam, „& clare dissolutas vide, si velis, apud laudatum Ballerinum, Cerbo- „ni, Zachariam, aliosque.

Z z 2

§. 4.

*) Act. 10, Can. 53.

**) De Potest. eccles. C. 5, §. 10.

§. 4.

Præter Concilii universalis decretum plures habemus expressas summorum Pontificum constitutiones, ac definitiones, & quidem quin repetam jam supra allegata Julii I, Innocentii I, Leonis I, aliorumque ex antiquitate, quam vocant incorruptam, Pontificum rescripta, quibus declararunt, majores causas apostolicæ Sedis judicio esse terminandas, atque ad finem perducendas; Gelasius P. Seculo V appellationes ad quodcumque, etiam generale Concilium illegitimas esse, & prohibitas clarissime scribit *): „Nec taceamus, quod cuncta per mundum „novit Ecclesia, quoniam quorumlibet sententiis ligata Pontificum Se- „des B. Petri Apostoli jus habeat resolvendi, utpote quæ de omni Ec- „clesia fas habeat judicandi, neque cuiquam de ejus liceat judicare ju- „dicio, siquidem ad illam de qualibet mundi parte Canones voluerint „appellari, ab illa autem nemo sit appellare permissus.“ Ante annos mille trecentos Pontifex Gelasius ad Episcopos scribens testatur, quod cuncta per orbem Ecclesia noverit, apostolicam Petri Sedem jure gaudere de omni Ecclesia judicandi, de ejus autem judicio nemini fas esse judicare: hodiernus vero Febronius audacter Pontifici antiquissimo contradicens asserit appellationem a Papa ad generale Concilium omnibus seculis pro legitima fuisse agnitam. Uter horum fidem meretur?? Ad inepta Febronii exempla responsionem vide in *Antifebronio vindicato* **).

§. 5.

Illud Bonifacii I ad Rufum Thessalonicensem: *Numquam licuit de eo rursus, quod semel statutum est ab apostolica Sede, tractari*, fuit in romano II Concilio repetitum ***). Sicut etiam a Nicolao I hoc alterum ex eodem Bonifacio desumptum: *Nemo unquam apostolico Culmini, de cujus judicio non licet retractari, manus obvias audacter intulit, nemo in hoc rebellis extitit, nisi qui de se voluerit judicari* ****). His priscorum Conciliorum, & Pontificum decretis inhærens Martinus V, ipso fatente, licet ægre, Gersonio Constantiæ a. 1418 in publico & generali Consistorio Bullam edidit, in qua hæc continebantur: „Nulli fas est a supremo iudice, vi- „delicet apostolica Sede, seu romano Pontifice, Jesu Christi Vicario „in terris appellare, aut illius judicium in causis fidei, quæ tamquam „Majores ad ipsum, & Sedem apostolicam deferendæ sunt, declinare.“ Cum

*) Ad Dardan. Epil.

**) Tom. 4, Dissert. 12, Cap. 4.

;) Apud Harduin. Tom. 12, Col. 1125.

***) Ad Michael. Imperat.

Cum in ipsa Synodo Constantiensi Poloniæ Legati, qui damnari petebant Joannis Falkenbergii libellum, id vero a Pontifice impetrare non poterant, appellationem ad Concilium minitari præsumerent; silere illos Pontifex iussit, constitutionem de non appellando a Papa ad Concilium allegans, quo audito illi a suo ausu destiterunt. Factum hoc negare non audet Natalis Alexander, hinc Schelstratio responsiones dat quasi non suo, sed Parisiensem nomine, tam miserabiliter tortas, ut nolim inania describendo paginam implere *).

§. 6.

Pius II sub pœna excommunicationis ipso facto incurrendæ quasque appellationes a summo Pontifice damnavit in Conventu Mantuano anno 1459 per Bullam *Execrabilis*, & quidem ex generalibus hisce, quæ semper subsistunt, rationibus: „ne impunita scelera remaneant, adversus primam Sedem rebellio nutriatur, libertas delinquendi concedatur, & omnis ecclesiastica disciplina, & hierarchicus Ordo confundatur.“ Has ipsas rationes in moguntino Conventu Rudolphus wormatiensis Decanus adversus Dyetherum Moguntiæ Archiepiscopum maxime urgebat his verbis, quæ Gobelinus refert in Commentariis rerum memorabilium Pii II **): „Quem appellasti iudicem, quem provocasti tuæ causæ cognitorem? futurum Concilium, dicis, appellavi: & ubi est futurum Concilium? ubi sedet? ubi tribunal ejus requiramus? Pulchra inventa, ut impunita sint scelera, ut liceat sine metu judicia aliena invadere, is iudex appellatur, qui nusquam reperitur.“ Eandem Pii II constitutionem edito diplomate confirmavit Sixtus IV illis anathema dicens, qui a Papa ad Concilium audeant appellare: quæ Sixti Bulla teste Odorico Rainaldo in Annalibus ecclesiasticis jussu Ludovici XI in Gallia solemniter fuit promulgata ***).

§. 7.

Summorum Pontificum decretis adde testimonia gallicanæ Ecclesiæ, quæ Febroniani perhorrescere minus poterunt. Hincmarus Rhemensis Archiepiscopus ita scribit ****): „Quibus omnibus demonstratur, quia Synodus comprovincialium Episcoporum judicia, generalis autem Synodus comprovincialium dijudicationes, sive dissensiones vel probet, Z z 3 „vel

*) Ad Sec. 15, Dissert. 4, Art. 3, n. 12, &c.

**) Lib. 6.

) Ad a. 1483. *) De Divort. L. 1 edit. mœx Paris. de a. 1615, p. 462.

„vel corrigat — Apostolica vero Sedes & comprovincialium, & generalium retractet, refricet, & confirmet judicia: sicut Epistolæ Leonis, atque Gelasii, ceterorumque rom. Pontificum, & Sardicensis Synodus, evidenter ostendunt.“ Observa gradus superioritatis, quibus ille gallicanus Archiepiscopus adversariis æstimatissimus ascendit ab Episcopis comprovincialibus ad Synodum, a Synodo provinciali ad generalem, ab ipsa generali Synodo ad summam apostolicam Sedem. Ex Ivone Carnotensi inter multa tantum hic duo memorabo. De Papa Paschale II ita scribit *): „Charitatem redolentibus litteris admonendus mihi videtur, ut, se judicet, aut factum suum retractet. Quodsi fecerit, reddamus Deo gratias — Si autem in hoc languore insanabiliter ægrotaverit, non est nostrum judicare de summo Pontifice.“ Tantum aberat Ivo ab appellatione ad universale Concilium, ut expressè diceret, non esse in potestate Episcoporum judicare summum Pontificem. Item alio in loco **): „Quoniam judicia romanæ Ecclesiæ a nemine foris retractari posse eadem Ecclesia romana docente didicimus, si qui aliquando se prægravatos illius Ecclesiæ autoritate conqueruntur, hoc eis consilium damus, ut non descendant in Ægyptum propter auxilium, sed ab ipsa ad ipsam, confugiant, & inde exspectent levamen, unde se conqueruntur accepisse gravamen.“ Ita quasi in Ægyptum emigrari Ivo putavit, si extra Ecclesiam romanam oppositum illi tribunal quæratur. Enimvero Concilium utcumque numerosum romanæ Matri Ecclesiæ oppositum, nonnisi schismaticum foret conciliabulum. S. Bernardum adhuc audiamus, qui Romanos Pontifices alloquens ita ait ***): „Quis mihi faciet iustitiam de vobis? exstat quidem tribunal Christi, sed absit, ut ad istud appellem — Itaque recurro ad eum, cui datum est judicare de universis, hoc est, ad vos: vos appello ad vos: judicate & me, & vos.“ Præter Christi & proprium tribunal non aliud agnovit S. Bernardus, quo possent summi Pontifices provocari.

§. 8.

Ad hæc autoritatis argumenta, quæ in theologicis disputationibus plurimum debent valere, accedunt & alia ipsius theologicæ rationis, & experientiæ. Quale enim istud, quod sententiam Papæ judicet, Concilium cogitetur? An cum ipso Papa conjunctum, ejusque tamquam sui Capitis sententiæ consentiens? An vero Pontifici ex adverso resistens, pro-

ut

*) Epist. 233.

**) Epist. 159.

***) Epist. 213.

ut sibi unice appellantes optare possunt? Atqui hoc eo ipso jam non legitimum Ecclesiæ christianæ Concilium foret, sed ἀκεφάλον, omnique authoritate destitutum, quippe a fundamento suo, quod Christus firmavit, schismate avulsum. Certe universalis etiam Concilia præter Pontificis consensum decernentia in gravissimos errores incidisse, atque a summis Pontificibus debuisse emendari docet experientia: hujusmodi fuerunt Arminense, Ephesinum II, Francofordiense sub Carolo M., & vel maxime Basileense, quod adeo schismatis se reum fecerat. Qui concilium sibi fingunt romano Pontifici, hoc est, suo Capiti oppositum, institutionem Christi, qui Ecclesiam inseparabilem a suo fundamento ædificavit, cupiunt everfam, prout summa eruditione Princeps, & Abbas Gerbertus ad S. Blasium in libro de *Communione Potestatis ecclesiasticæ* merito animadvertit *): „Contra leges communionis in Potestate ecclesiastica Cathedra adversus „Cathedram constituitur: tribunal alterum spectatur Romani Pontificis, „& Concilii inter se ex adverso positum, alia ac alia jura prosequens, ser- „ramque contentionis ad scindendam Ecclesiæ unitatem reciprocans, fori „instar contentiosi, ac pulpiti, subselliique scholastici, ubi ex instituto „more caudicorum adversæ partes colliduntur, actiones instituuntur, „atque quis causam ceu litigiosam adversus alienam obtineat, superiorque „sit, contenditur. Quod Christus Apostolis suis prohibuit, ne more Gen- „tium dominentur, estque adversum paci ac unitati Ecclesiæ, communio- „nique potestatis legitimæ — ut adeo sicut idem tribunal, ita idem judi- „cium sit in communionem potestatis ecclesiasticæ, & si quando dubii ali- „quid, aut ambiguitatis ab hoc movetur, suspicioque maligna exoritur, „restaurato judicio numquam contraria sententia prodit.“

§. 9.

Non jam mirum fere ostingentis supra mille annis, quo tempore Christi Ecclesia stat, in quæstione fidei a Pontifice definita numquam ad Concilium fuisse a Catholicis appellatum: id solis ab hæreticis, iisque paucissimis factitatum ex historia ecclesiastica cognoscimus. Primi fuerunt seculo V Pelagiani Episcopi 15, qui oblata Zosimo P. fidei suæ professione ab eo exigebant, ut illam discutere vellet, & si quid in illa erroneumprehenderet, ipsis indicaret, secus se ad œcumenicam Synodum appellaturos. Nota dignum est, istorum licet hæreticorum, appellationem non fuisse absolutam, & ab ipsa Pontificis sententia, sed tantum conditiona-
tam

*) Cap. 17, p. 587.

tam pro casu denegandæ forsitan justitiæ. Pelagianos autem audacia, & fastu sine exemplo superavit seculo XVI Lutherus a Leone P. X damnatus: demum hujus seculi initio Jansenistæ a Constitutione Clementis XI, quæ incipit *Unigenitus Dei Filius* ad Concilium œcumenicum appellabant, quam tamen Jansenistarum temeritatem ne Galli quidem probarunt, haud ignorantes ex avita fide sua definitionibus summorum Pontificum internam mentis obedientiam deberi.

§. IO.

Si igitur divino jure ex sacris Scripturis, & Patrum traditione hætenus demonstrato suprema est apostolicæ Sedis in judicando auctoritas, ita ut nullum in terris detur superius, quo appellari posset, tribunal, ne Concilii quidem universalis; quid de illorum Publicistarum, ut mitissime dicam, audacia sentiendum, qui in re mere ecclesiastica, quasi sub inani titulo *ab abusu* ad secularia, & prophana tribunalia apostolicæ Sedis sententiam deferri posse contendunt, probantque? Neminem latet, quam mala fide a multis hodie cum hac, aut simili potestatis ecclesiasticæ arrogatione jus *advocatiæ* erga Ecclesiam, quod in Principibus residet, confundatur: aliud est enim (& hoc Advocati non tam jus, quam officium) sententiam ab Ecclesiæ supremo Capite latam fideliter exsequi; aliud vero, quod fidelium nemo potest, suo judicio supremum Ecclesiæ Caput arroganter velle subicere. Princeps gladium portat, quo Dei Ecclesiam contra hostes ejusdem protegat, atque propugnet, non quo eam in suis visceribus vulneret, dilanietque. Habuit domus Dei armatos custodes, uti Constantinum, Carolum, Magnos merito dictos, quorum memoria in æternum manebit: sed non defuerunt, qui sub specioso Advocati nomine facti sunt sanctæ Dei Ecclesiæ persecutores.

ARTICULUS II.

De historia axiomatis: Prima Sedes a nemine judicatur.

§. I.

Hoc vetustissimum esse saltem inde a quinto Seculo axioma summorum Pontificum declarationibus firmatum, res est ex historia ecclesiastica tam certo explorata, ut eam vel ipsi adversarii negare non audeant. Quare haud abs re fore existimo, hujus axiomatis historiam

cam praxin breviter dare spectandam. Symmachus P. inique apud Theodoricum Regem accusatus, ut suam contra malos delatores probaret innocentiam, sponte sua ecclesiasticæ Synodi judicio se submisit, secutus in eo non solum Damasi, sui Prædecessoris exemplum, sed & Sylvestri, ac ipsius Apostoli Pauli, qui injustis criminationibus petiti propter necessitatem probandæ suæ innocentiae ad ipsa secularia, imo infidelium tribunalia sui judicium prorogarunt. At vero Episcopi a Theodorico Romam ad Synodum vocati comparere noluerunt duplici ex capite, quod per Primatum S. Petri ipsius Papæ jus fuisset Synodum convocandi, & quod res sit haud facile exemplo probanda, romanæ Sedis Antistitem *minorum* subjacuisse judicio. Cum Rex, licet a fide alienus Pontificis consensum expetiisset, & prout acta Synodi loquuntur, Pontifex ipse Episcopis *authoritatem ordinis corrigendi secundum ecclesiasticos Canones se dare* professus esset; illi accusati innocentiam coram hominibus declarantes totam causam Dei judicio reservarunt.

§. 2.

Non deerant jam seculi sexti initio, qui in illud primæ Sedis privilegium, & in ipsam romanam Synodum invidia, ac maledicentia flagrant: hinc Ennodius, Ticinensis postea Episcopus, Apologeticum scripsit canonica Synodi authoritate probatum. Verba, quibus summæ Sedis privilegium extulit, nostris præcipue diebus summe memorabilia sunt: „Aliorum forte hominum causas Deus voluerit per homines terminare: Sedis istius Præsulem sine quæstione suo reservavit arbitrio. Voluit B. Petri Apostoli Successores cælo tantum debere innocentiam, & subtilissimi Discussoris indagini inviolatam exhibere conscientiam, Nolite æstimare eas animas de inquisitionibus non habere formidinem, quas Deus præ ceteris suo reservavit examini. Non habet apud illum reus de allegationis nitore subsidium, quando ipso factorum utitur teste, quo iudice. Dices forsitan omnium animarum talis erit in illa disceptatione conditio. Respondebo uni dictum, *Tu es Petrus, & super hanc Petram ædificabo Ecclesiam meam, & quaecumque solveris super terram, erunt soluta & in cælo*: Et rursus sanctorum voce Pontificum dignitatem Sedis ejus factam toto orbe venerabilem, dum illi quidquid fidelium est, ubique submittitur, dum totius corporis caput esse designatur. De qua mihi videtur dictum per Prophetam: si hæc humiliatur, ad cujus fugietis auxilium, & ubi relinquetis gloriam vestram?“

A a a

Plura

Plura sunt in hisce præclaris verbis attentione dignissima, quæ propriæ Lectoris meditationi relinquam. Hanc Ennodii apologiam contra Launoji cavillationes solidissime vindicavit P. Natalis Alexander *). — Mirabile autem, quod vir tam doctus non animadverterit, se quoque in Launoyo refutatum, siquidem Episcoporum romanæ Synodi iudicio Deus Sedis illius Præsules sine quæstione suo arbitrio reservavit, & illi tantum cælo innocentiam suam debeant, & huic uni, cui dictum est, *Tu es Petrus*, nulla sit in terra superior Potestas, a qua judicari posset; ergo ne œcumenici quidem Concilii. O voluntas, quantum tu in opiniones hominum dominaris, ut intellectum servitute opprimas, nec videre, quæ manifesta sunt, permittas!

§. 3.

Ne vero adulationis tibi suspecta Synodus romana videatur, noveris eundem universaliter tunc fuisse Ecclesiæ sensum, quæ unum supremum Caput totius corporis, non tantum dispersi, sed etiam collecti agnoscebat, eoquod Apostolorum Collegio, etiam si in unum congregato solus a Christo præfectus est Petrus. Et gallicana quidem Ecclesia vel ipsam romanam devotione erga Sedem apostolicam superabat. S. Avitus Viennensis universæ Ecclesiæ gallicanæ nomine ad Senatores romanæ Urbis scribens, ita effatur **): „Perlata est sollicitudini nostræ ab Italia in exemplaribus sacerdotalis forma decreti, quam de Papa Symmacho apud Urbem collecti Italiæ Antistites ediderunt. Quam constitutionem licet observabilem numerosi, reverendique Concilii reddat assensus, intelligimus tamen sanctum Symmachum P., si seculo primum fuerat accusatus, Confacerdotum suorum solatium potius adisciscere, quam recipere debuisse iudicium. Quia sicut subditos nos esse terrenis Potestatibus jubet arbiter cæli — ita non facile datur intelligi, qua vel ratione, vel lege ab inferioribus eminentior judicetur.“ Tunc vero S. Avitus, ut Senator ipse romanus, & christianus Episcopus obtestatur Senatores, ut sicut prophanum mundi Caput nulli subditorum iudicio submittere auderent, ita non amplius tale quid in summum Pontificem attentarent: *Ne minus diligatis in Ecclesia vestra Sedem Petri, quam in Civitate apicem mundi*; demum concludit: „Si in ceteris Sacerdotibus aliquid reformatione indigeat, id posse reformari; si vero suspicio adversus summum Pontificem excitetur, jam non Episcopus,

*) Ad Sec. 6, Dissert. 1.

**) Epist. 21.

„pum, sed ipsum Episcopatum vacillare.“ Verba, quæ stylo ferreo
sculpantur in silice!

§. 4.

Quæ ab Ennodio, & romana Synodo, & gallicana Ecclesia de
hoc divino summæ Sedis privilegio dicta sunt, ea sane evincunt, ro-
manum Pontificem ne œcumenici quidem Concilii judicio subjici posse,
quippe qui eminentior ab inferioribus nequeat judicari, sed Dei examini
servandus sit. Attamen hanc in rem insuper gallicani Scriptoris, ab
ipsis Adversariis merito laudati, Ludov. Thomassini observationes sunt
memoratu dignissimæ *): „1^{mo} Synodus romana non suam excusavit
„infrequentiam, non Episcoporum paucitatem, non universalis Synodi
„congregatione opus esse dixit, sed absolute rem Deo reservavit.
„2^{do} Et qui de Synodi romanæ decreto mussabant, non illis in men-
„tem veniebat, saltem universalis Synodi coalitionem implorare. 3^{tio}
„Quod impune peccaturos caussarentur, qui nullo humano coërceren-
„tur judicio, id peræque amoliebatur Synodi universalis sententiam.
„4^{to} Ennodius ait, Petri, ejusque Successorum id esse privilegium, ut
„innocentiam cælo tantum debeant: non debebunt ergo vel œcumeni-
„cæ Synodo. 5^{to} Non inultum fore idem pollicetur, si quid peccet
„romanus Antistes. An quod judex futura sit Synodus œcumenica; an
„potius, quod Deo teste, eodemque judice peccet? 6^{to} Non auffer-
„ri ait, sed differri de peccante Pontifice judicium: An ad œcumeni-
„cam usque ad Synodum? imo ad divinum usque examen. 7^{mo} Æque
„œcumenica Synodus a Pontifice convocanda, & confirmanda est.
„Quare nec in ipsum, nisi ab ipso impartitam distringet autoritatem.
„8^{vo} Æque œcumenica Synodus membrorum collectio est, etsi longe
„plurium, quorum non est de suo vertice judicare. 9^{no} Æque œcume-
„nica Synodus ovile, & grex est, etsi numerosior: nec gregis est de
„Pastore judicare, sed judicis. 10^{mo} Nihilofecius in generali, ac in
„particulari Synodo ab inferioribus eminentior judicabitur. 11^{mo} Ni-
„hilominus non Episcopus, sed Episcopatus ipse vacillabit: & in lacef-
„sito vertice Status episcopalis ipse in discrimen vocabitur. 12^{mo} Æque
„in œcumenica Synodo frustra Princeps in jus vocabitur, quod ipse
„dederit: nec legi suæ, nisi lubens subjiçietur. 13^{tio} Æque in œcu-
„menica Synodo, si primæ Sedis vanescant privilegia, ceterarum præ-

A a a 2

„roga-

*) Dissert. in Conc. Rom. sub Symmachio, §. 7.

„rogativæ Sedium, quæ ab illa proficiuntur, & conservantur, pariter inanescunt. 14^{to} Denique si divini juris est, quod cum ceterorum hominum causæ per homines terminentur, Sedis istius Præsulem Deus suo sine quæstione reservavit iudicio, adversus juris divini sanctionem nec œcumenica Synodus dimicabit.“

§. 5.

Nunc ad alia ejusdem speciei exempla; Eodem sexto seculo Pelagius I obliquis rumoribus laceratus, quasi mortis Vigiliæ Papæ reus, nulli hominum iudicio se submisit, sed propria sui purgatione cuncto populo satisfecit, nemine ad Synodi iudicium Pontificem provocare auso. Aliud seculo octavo splendidum sane exemplum non minus Gallicanæ, quam Romanæ Ecclesiæ exhibet nobis historia Leonis III; de quo Anastasius in ejus vita hæc narrat: „Fecit Rex Carolus congregari in Ecclesiâ Petri Apostoli Archiepiscopos, Episcopos, Abbates, & omnem Nobilitatem Francorum atque Romanorum etc., ut crimina, quæ adversus Pontificem dicta fuerant, examinarent. Qui universi Archiepiscopi, & Episcopi, & Abbates unanimiter audientes dixerunt: Nos Sedem Apostolicam, quæ est Caput omnium Dei Ecclesiarum, judicare non audemus: nam ab ipsa nos omnes, & Vicario suo judicamur, NB. ipsa autem a nemine judicatur, quemadmodum & antiquitus mos fuit. Sed sicut ipse summus Pontifex censuerit, canonice obediemus“ *). Tum Pontifex se ipsum publico juramento purificavit, cui omnes congregati acquieverunt, & laudem Deo dederunt. Non absimilis fuit nono seculo Paschalis I purificatio, qui geminæ cædis suspicione aspersus coram Ludovici Pii Legatis se jurejurando purgavit, quin ullus adversariorum Pontificis ad iudicium universalis Synodi appellare auderet.

§. 6.

Hoc ipso seculo universale Concilium VIII fecit illud superiore articulo allatum a nobis decretum, non licere, ne congregata quidem œcumenica Synodo in summum Pontificem absque temeritate jus dicere. Cum enim Photius Constantinopolitanus collecto Pseudoconcilio adversus Nicolaum Pontificem fulmen vibrare stupeum attentasset, propterea Successor ejus Hadrianus II in Synodo romana conquestus ita pronuntiavit: „Siquidem romanum Pontificem de omnium Ecclesiarum Præsulibus „judi-

*) Apud Thomass. Dissert. cit. §. 12.

„judicasse legimus: de eo vero quemquam judicasse non legimus. Licet enim Honorio ab Orientalibus *N.B.* post mortem anathema sit dictum; sciendum tamen est, quia fuerit super hæresi accusatus, propter quam solam licitum est minoribus majorum suorum motibus resistendi, vel pravos sensus libere respuendi: *N.B. N.B.* quamvis & ibi nec Patriarcharum, nec ceterorum Antistitum cuipiam de eo quamlibet fas fuerit proferendi sententiam, nisi ejusdem primæ Sedis Pontificis consensus præcessisset Autoritas.“ De Honorio nolim hic eam tractare quæstionem, quæ adhuc inter Scholasticos obversatur, an vera, vel etiam iusta fuerit hujus Pontificis damnatio: certum esse contendo neutiquam approbationem hæresis, sed non oppressionem hæresis ex officio debitam fuisse Honorii culpam, id quod vel Natalis Alexander docet, *Honorium ab hæresi tam vere excusari, quam pie.* Hoc autem loco observari meretur, Pontificem non in vita sua, sed post mortem, cum non amplius supremum esset Ecclesiæ Caput, fuisse judicatum, & quidem, etsi in causa hæresis, non tamen ab Episcoporum Concilio damnari potuisse, nisi summi Pontificis consensisset Autoritas. — De hæresi ut jam dicam, cujus quidem nec unicum in tota retro antiquitate invenitur exemplum, posito tamen casu romanum Pontificem in hæresin incidere; Doctores nostri admittunt posse, & debere Papæ non solum a Concilio, verum etiam particularibus a subditis contradici atque resisti, *N.B.* si per se manifesta, non primum iudicio declaranda, sed jam antea per ipsos Pontifices declarata foret hæresis; cum eo ipse hæreticus Papa jam non membrum catholicæ Ecclesiæ, minus legitimum Caput existeret: id tamen in casu quocumque dubio minime licere certum est; quia Pontifex legitimus adhuc superior maneret inferiorum iudicio non subiectus, atque a Deo positus, qui Fratres in fide confirmaret; non qui a fratribus in fide confirmaretur. Quamobrem divina ex institutione Ecclesiæ membra vel maxime in dubio casu Capiti & fundamento suo adhærere, atque consentire debent, sicque suo fundamento conjuncta per ipsius Dei promissionem ab errore immunia sunt.

§. 7.

Seculo X ab Imperatore Ottone, & romana Synodo attentatum adversus Joannem XII depositionis iudicium communi Catholicorum, ipsorum adeo Gallorum, in specie Petri de Marca calculo reprobatur, si paucos excipias sensus minus Catholici notorie jam suspectos e.g. Launojum, modernum historicum Viennensem Schmittium. Undecimo seculo

quid in caussa Paschalis II, qui in laicorum investituras extorto privilegio confenserat, callentissimus iuris canonici, uti & gallicanae disciplinae Ivo Carnotensis Episcopus scripserit, jam supra a nobis relatum est. Idem Ivo cum aliis Senonensis Provinciae Episcopis a conventu ad Pontificem iudicandum ita se excusavit *): „Non videtur nobis utile consilium ad ea „Concilia convenire, in quibus non possumus eas personas, contra quas „agitur, condemnare, vel iudicare, quia nec nostro, nec ullius hominum „probantur subjacere iudicio.“ En rationem, propter quam summi Pontifices nec ab universali Synodo iudicari possint!

§. 8.

Pro nostrae autem germanicae Ecclesiae doctrina insigne specimen ex Synodo Quinti - Lineburgensi refert Bertoldus Presbyter Constantiensis *): „Quidam Bambergensis Clericus, nomine Cunibertus romani Pontificis Primatui derogare volens in mediam Synodum se contulit, asserens Romanos Pontifices hunc sibi primatum adscripsisse, non aliunde „concessum haereditasse, *N.B. videlicet ut nullus de eorum iudicio iudicare „debeat, nec illi alicujus iudicio subiaceant.* Qui cum aperte a tota Synodo „confutaretur, praecipuo tamen a quodam laico convictus est per illud „evangelicum: *Non est discipulus supra Magistrum.* Cum enim hoc generaliter in omnibus ecclesiasticis Ordinibus observandum deputetur, ne „major a minore iudicetur, quis hoc Vicario S. Petri denegare potuit, „quem omnes Catholici pro Domino & Magistro venerantur?“

§. 9.

His demum adde, quae Philippus cum Ottone de Imperio certans ad Innocentium III scripsit apud Rainaldum **): „Si nos in aliquo vos, „vel Romanam Ecclesiam offendisse videmur, nos pro honore Domini „nostri J. C., cujus vicem in terris geritis, & ob reverentiam B. Petri „Principis Apostolorum, cujus Vicarius estis, & ob salutem nostram nos ad „satisfaciendum vobis supponimus. Si vero vos in aliquo nos, vel Imperium laesisse videmini, conscientiae vestrae super iis vos relinquimus. Cum „enim nos pie credamus, & ante passionem, & post passionem D. N. Jesum „Christum B. Petro claves regni caelorum contulisse, & tradidisse jus ligandi, atque solvendi; scimus & protestamur, quod vos, qui in locum „suum

*) Epist. 238.

**) Append. ad Herman. Contract. ad an. 1025.

***) Ad an. 1206, n. 16.

„suum cum plenitudine potestatis successistis, in hujusmodi articulis ab „homine non estis judicandus, sed iudicium vestrum soli Deo reservatur, „cujus iudicium & examen, quod sibi soli debetur, nobis non quærimus „usurpare.“ Ex his abunde patet Germanorum cum Francis consensus, summam Sedem non habere in terra supra se iudicem, ita ut ipse Petrus de Marca fassus fuerit appellationes a Papa ad Synodum œcumenicam quoad Catholicos a veteri disciplina esse alienas, & numquam admissas. *)

ARTICULUS III.

De origine opinionis statuentis Concilium supra Papam.

§. I.

Historiam axiomatis practici, *summa sedes a nemine iudicatur*, ad seculum usque tertium supra decimum deduximus. Sub hoc tempus ortis gravissimis controversiis Pontifices inter & Principes, ac Regna de negotiis maxime temporalibus, uti exactionibus pecuniarum, dignitatum etiam laicarum collationibus, sive ablationibus, audiri cœperunt Catholicorum ad generale Concilium provocationes, seu in causis gravaminum externis & politicis ad Concilia recursus, veluti a Papa ad ipsum Papam melius informandum. Bene enim hic animadvertendum est, tunc adhuc temporis neminem in Ecclesia cogitasse de Concilio universali, quod consensu Pontificis careret; siquidem priscis canonibus cautum fuerat, *ne absque Romano Pontifice Ecclesiæ convenirent*: minus Concilium petebatur, quod in Papam invitum, ceu inferiorem, aut forte etiam deponendum sententiam diceret; sed NB. quod cum, & sub Papa congregatum meliori informatione circa res facti potissimum instituenda gravaminibus mederetur. Nulla hic Papam inter, & Concilium ex adverso resistentia, neque hujus supra illum jurisdictio, sed simplex pro levamine recursus ad pleniorum causarum revisionem, prout subdito cuilibet a gravamine per ipsum Principem sibi illato ad ejusdem Consilium judicarium recurrere licet, certe sine jurisditione Consilii judicarii adversus suum Principem. Ad præsentem ergo quæstionem, an sententia summi Pontificis subiecta sit superiori ipsius Ecclesiæ jurisditioni, nequidem pertinent, quæ vulgo afferuntur exempla appellationum ad generale Concilium e. g. Friderici II Imperatoris, qui in causa suæ depositionis non solum a Papa, sed ab ipso generali Concilio Lugdunensi I a. 1245 ad aliud generalius appel-

*) De Concord. Lib. 4, Cap. 17.

appellavit: vel Anglorum Baronum, qui contra exactiones pecuniarias, si qua fides Matthæo Westmonasteriensi, sub Urbano IV a. 1264 a Papa ad Papam, vel generale Concilium Episcopis approbantibus provocarunt.

§. 2.

Ad hanc speciem jure referenda est pariter illa appellatio, quam subsequenteris seculi initio, fervente tunc acerrimo diffidio inter Papam Bonifacium VIII, & Regem Philippum Pulchrum, Galli a decretis Pontificis interposuerunt *NB.* non ad solum generale Concilium, sed simul etiam ad futurum legitimum Pontificem. Illi enim pro vero, & legitimo Pontifice Bonifacium non agnovere, partim ob gravissima crimina, in specie hæresis, ipsi afficta, partim quia vel ipsius ad Pontificatum ascensio vivente Cælestino V saltem dubia illis videbatur. Quidquid ergo sit de Gallorum appellatione, quæ res facti antea inauditi nullum jus producit; certe autem ab indubitato Pontifice ad generale Concilium non appellarunt, neque ad tale, quod ipso superius judicassent, ut falso Natalis Alexander scribit, sed ad ejusmodi Concilium, quod sub præsidio legitimi Pontificis, etiam ab ejusdem consensu vim, & robur decretorum suorum obtineret, prout patet ex libello ab ipsis Bonifacii accusatoribus Clementi V oblato, ubi ita se exprimunt: „Estis enim „vos, Pater sanctissime! Jesu Christi Vicarius totam Ecclesiam repræ- „sentans, qui claves regni cælorum habetis, nec congregatum totum „Concilium sine Vobis, & nisi per vos potest cognoscere de negotio.“ Tantum tunc adhuc Catholici, vel ipsi adeo Galli aberant a cogitatione, summum Pontificem suorum subditorum, etiam collectorum judicio subjiciendi.

§. 3.

Animis tamen in illo diffidio plus justo commotis, atque etiam exacerbatis inventi fuere quidam particulares, qui jurisdictionis in ipsum Pontificem exercendæ semina spargerent. Primus inter illos surrexit Joannes de Parisiis, qui in libro *de potestate regia, & papali* etiam Cardinalium Collegio, imo & Principi laico saltem indirecte deponendi Pontificis facultatem attribuere tentavit. Nihil itaque mirum, quod sparso jam semine exitialis schismatis apud nonnullos Gallos male erga Pontificem Regis gratia animatos principia invaluerint, antiquæ fidei & apostoli-

stolicæ Sedis authoritati contraria, quæ ipsa novitate sua satis superque falsitatis arguuntur. Neque tamen desuere inter gallicanos hujus quoque temporis Theologos, qui avitam retinerent fidem de suprema Pontificis in universam Ecclesiam authoritate: id quam clarissime apparet ex opusculo ejusdem dissidii tempore contra Bonifacium VIII scripto *), ubi Author aperte professus est omnes Christianos, etiam in unum congregatos Pontifice esse inferiores, neque in hunc posse judicium facere. Verba sunt hæc: „Summus Hierarcha, romanus Pontifex superior est omnibus, ipse vero Prælati, & Pastor est Domini gregis: — Subditorum subtractio nullo modo cadit in summum Hierarcham, nec possibile est per hominem sibi subtrahi subditos, quoniam non habet Superiorem in terris, sed omnis anima sibi subdita est, ejusque curæ commissa: neque a quopiam judicari potest, sed cunctos judicaturus a nemine judicandus est, nisi deprehendatur a fide devius: & hæc superioritas non est humano privilegio, sed divino, a quo est institutio, & qui sibi pascendi gregis curam commisit. NB. Omni enim Clero, & populo in Unum congregato manet obsequendi sibi necessitas, & non Authoritas imperandi.“ Si is ea ætate vel inimicorum Pontificis adhuc fuit sensus; quam altas radices in Ecclesia fixisse dicendum est illud Catholicorum principium, *summa Sedes a nemine judicatur!*

§. 4.

Post medium seculi quarti supra decimum, tempore pertinacissimi schismatis, quod sub Urbano VI excitatum per annos fere 40 discidit Ecclesiam, de litigantibus pro Papatu œcumenicæ Synodi judicio submittendis serio cogitari cœpit. Sed hujusmodi jurisdictio vel in dubios Pontifices adeo nova visa est, & Primatus rationi a Majoribus traditæ adeo adversa; ut non facile fuerit hanc sententiam recipere, firmoque pede stabilire. Ipse quidem Pontifex Urbanus cum tribus Cardinalibus Italis jam Schismatis initio summe expediens fore judicabat universale Concilium, cujus convocationem faciendam gallicanis Cardinalibus proposuerat. Postea per electionem Clementis schismate jam conflato ad istud subprimendum, denuo illi generalem Synodum congregandam postularunt. Hac autem Synodi convocatione, quod merito

*) Titulus libri est: *Rationes, ex quibus probatur, quod Bonifacius legitime ingredi non potuit Cælestino vivente.*

rito animadvertit doctis. Petrus Ballerinius *), Concilio illud unum jus poterat admitti, quod & ab antiquis probatum fuit, nimirum cognoscendi, & iudicandi, an, & quæ electio legitima fuerit, ut hoc remedio verus Pontifex ab omnibus agnosceretur, & intrusus reprimeretur, quod nullam jurisdictionis Authoritatem Concilio in legitimum Pontificem vindicat: tantum enim est authentica facti humani, hoc est, electionis declaratio.

§. 5.

Cum gallicani Cardinales adversus Synodi convocationem sese semper opposuissent; de aliis cogitari debebat remediis: hinc variae consultationes in conventibus praesertim gallicanis habitae sunt, in quibus aliae, atque aliae viæ excindendi Schismatis (forsitan autem non serio) propositae; sed incassum omnes, usque dum inquirendo, & disputando in plures annos res distracta, atque adeo involuta fuerit implicatissimis facti, & juris difficultatibus, ut omnis spes sublata videretur decidendi, quisnam inter duos esset legitime electus. Itaque necessitas coegit Ecclesiae ipsi in Concilio congregatae jus asserere ad ambos litigantes etiam per violentiam deponendos, si æquitatis vias refugissent. Hoc consilium primum a gallicanis Doctoribus Parisiensis Universitatis profectum, qui a. 1395 ob recusatam a Benedicto XIII, cui adhærebant, renunciationis viam, omnium tunc optimam, inter varias quaestiones hanc octavo loco discutiendam posuere, *utrum Papa subiciatur Concilio generali suae obedientiae?* Ex ipso quaestionis tenore iam manifestum fit, tantum schismatis illa tristissima epocha, ubi in partes scissa Ecclesiae obedientia duo fuerunt Capita, quorum eo ipso nullum agnoscebatur legitimum, ortam fuisse opinionem, quæ Pontifices, hoc est, duobus & incertos Authoritati Ecclesiae subiectos declaravit.

§. 6.

Nihilominus Doctorum plurimi adhuc dissenferant, neque statim ea opinio poterat invalescere, sed res dilata usque ad annum 1409, quo Synodus Pisae celebrata est. Ne tum quidem ausi sunt Patres quemquam ex duobus contendentibus sua veluti sibi propria Authoritate deponere, sed postquam communi sententia iudicarunt, ac declararunt *NB. aliis extitulis*, ambos jam esse ipso jure depositos. Quod Pisanae Synodo, id multo

*) De Potest. eccles. Cap. 5, §. 3.

multo magis Constantiensi convenit non solum duobus, sed tribus de Papatu contententibus, ut adeo certum sit utramque Synodum tantum litigantes de Pontificatu, non pacifice ab Ecclesia agnitos Pontifices suis sententiis perculisse. An binæ hæ Synodi legitimæ sint, atque œcumenicæ, & singula earum decreta a Pontifice approbata, quisve eorum sensus? in hunc scholasticum Labyrinthum ut ingrediar, jam non necesse est: erit forsitan suo tempore simili scholæ concertationi locus. Ceterum eandem materiam clarissime dilucidatam post Schelstratium invenies apud Petrum Ballerinum, Cerboni, Zachariam, qui transalpini Authores Sedi veritatis propiores præ nostris Cisalpinis (distinctio Patribus incognita) sanctæ romanæ Ecclesiæ, Matricis, & Magistræ nostræ puriora tibi lumina ministrabunt. Ego vero quo me a partialitatis suspicione purgem, cujus tamen non erubescerem, vel gallicani Doctoris nostris adhuc diebus merito suo celeberrimi judicio totam hanc Dissertationem, quæ multo mihi stetit labore, concludam. Est is Ludovicus Thomassinus, qui tantum pro difficilimo tempore nefandi schismatis hoc judicat optimum (forsitan illa tempestate unicum) restituendæ unitatis remedium, ut ipsa scilicet Ecclesia sese ex ambagibus expediret, & œcumenica in Synodo congregata inter litigantes de Pontificatu, hoc est, *non de ipsa apostolica & prima Sede, sed de ejus incubatoribus sententiam ferret*. Quod tunc autem extundit necessitas, non extra necessitatis metas effundi debet. Idem porro Thomassinus proficitur: „Ex Constantiensi Concilio evinci illos ipsos, qui Synodico judicio Pontifices substernere enixi sunt, etsi quandoque contentionis æstu („(quod singulariter de Gersone scribit) longius sint abrepti, in has tamen se tandem recepisse priscæ modestiæ lineas, ut schismatis tempore „tantum cogerentur dubii nimirum Pontifices Concilii judicium expectari.“*) Ita saluum manet, quod semper fuit catholicum: *Summa Sedes a nemine super terra judicatur. Petrus vero quidquid solverit, aut ligaverit in terra, erit solutum, ligatumve & in celo*.

COROLLARIUM V.

De jure Legatos, eosque stabiles mittendi.

Hæc demum ultima est controversia, totius, ut videtur, discordiæ fomes, quæ nostris diebus tanto scandalo ad incendium tam manifestum, tamque perniciosum inflammata est. Quo cæpi tramite, per-

B b b 2

rectu.

*) Dissert. 15 in Conc. rom. sub Symmacho §. 20.

recturus 1^{mo} de ipso jure agam Delegationum apostolicarum: 2^{do} de usu Legationum jam in primitiva Ecclesia: 3^{to} inde a Sardicensi Concilio de Legationibus in Oriente: 4^{to} de iisdem in Occidente usque ad S. Bonifacium: 5^{to} de Germaniæ observantia ab incunabulis usque ad sic dictam Reformationem: 6^{to} de eadem ad nostra usque tempora: 7^{mo} de præsentibus nunc contradictione.

ARTICULUS I.

De jure Legationum apostolicarum divino, & naturali.

§. I.

Ex quo claves regni cælorum S. Petro traditæ cum potestate illimitata quidquid in terra ligandi, solvendi; ex quo cura totius ovilis christiani Petro, seu summo Pastori omnium, non ovium tantum, sed & Pastorum ab ipso Dei Filio commissæ est; extra omnem controversiam posita, & indisputabilis res est, divino quippe Oraculo obfirmata, Petrum fuisse supremum in Ecclesia Imperantem constitutum, sive ut ne invidia verbo sit, regni cælestis clavigerum, fidelium omnium Pastorem, & Caput Apostolorum. Cum ergo totius corporis cura ad caput pertineat; hujus non jus tantum, quin potius & officium esse dignoscitur ad universa, qua late diffunduntur, membra sui regiminis alas expandere. Hoc certe firmissimo fundamento nititur universum per orbem extensa summi Pontificis jurisdictio. Quare quod ubique terrarum non potest per se ipsum solvere, aut ligare, id ipsum per alios facere necesse est: hæc ipsa est non tam pontificia potestas, quam necessitas delegationum, ex jure divino æque ac naturali profecta.

§. 2.

Tam perspicua sane hæc veritas est, ut nullus sit, ne recentiores quidem inter Canonistas, quotquot catholico nomine gloriari voluerint, qui inter essentialia, ac primaria jura divinitus instituti Primatus expresse non recenseat hoc ipsum jus Delegationum. Classicus fere per Germaniam, ac celeberrimus Anton. Schmidius ita docet *): „Principem suum representant Legati ab eo missi: unde tot insignia eorum jura, quæ passim juris gentium Doctores explanant; sic & personam summi Hierarchæ Legati ab eo in orbem christianum dimissi referunt.

*) Instit. jur. ecclæs. german. accommod. Part. 2, Cap. 1, Sect. 3, Art. 3, §§. 72, 73.

„runt. Competit ei universæ Ecclesiæ cura, & sollicitudo vi Primatus:
 „hanc autem cum exercere per se ubique ipse non possit, vel ex hoc
 „solo consequitur, jus mittendorum Legatorum in omnem orbem chri-
 „stianum ipsi denegari non posse. — Quodsi vero Pontifici jus perse-
 „ctum eos mittendi denegari a Catholico non possit; huic vicissim ex
 „altera Principum etiam supremorum parte respondebit obligatio in the-
 „si saltem certa, ne Legatos ejusmodi ab ingressu in terras suas prohi-
 „beant, aut legitimis eorum functionibus in salutem animarum necessa-
 „riis sese obstaculo ponant. Neque hic argumentum duci poterit a Lega-
 „tis aliis, cum jam per sese sat luculentum appareat discrimen: nulli quippe
 „Principi supremo quidquam in alterum itidem talem, ejusve terras juris
 „competit; cum contra Pontifici vi Primatus cura totius orbis christiani in-
 „cumbat, atque in rebus ad salutem animarum pertinentibus ejus sese
 „jurisdictio ubique protendat.“

§. 3.

Eruditi, ac solide scripti, pro suo merito in Germania summe
 æstimati libri Author Heidelbergensis, nomine Hollius hæc disserit *):
 „Summum Pontificem pollere potestate mittendi Legatos eo certius
 „est, cum id ex ipsa vi, & natura Primatus profluere satis compertum
 „sit. Cum enim ad jura Primatus pertineat cura suprema, ac generalis
 „inspectio, nemo erit, inficiari qui possit, id juris per universam Ec-
 „clesiam pro unitate fidei, ac bono disciplinæ ecclesiasticæ illi compe-
 „tere. Luculenter id adstruitur in *Extravag.*: Super gentes, & regna.
 „uno de consuetudine *inter communes*: quidquid demum de eo sit, quis
 „sit hujus constitutionis author habendus, an Joannes XXII, cui com-
 „muniter tribuitur, an vero Bonifacius VIII, cui potiori suffragio ho-
 „dierni critici adjudicant. Idem hoc jus, tamquam certum, omnibus-
 „que jam tum perspectum, probatumque supponit antiquissimus canon
 „Concillii Sardicensis, Græcis V, alias apud Dionysium VII, dum inte-
 „grum esse Papæ declaravit, ut Legatos mitteret in provincias, ubi
 „instaurandum esset judicium Episcopi &c. ac denique hoc ipsum jus
 „continua, ac perpetua Ecclesiæ etiam per Germaniam praxis ex indu-
 „bitata historiarum fide constans corroborat. *Cl. Endres ***). Ex hoc
 „ipso jure Pontificis mittendi ad regiones Legatos suapte natura pro-
 „fluit

B b b 3

*) Statistica Eccles. German. Pars I, Cap. 6, §. 29.
 **) Discurs. polit. Can. de recusat. Visit. apostol. §. 8.

„fuit jus habendi in regnis, & provinciis Vicarios, & Legatos, cum
 „id & muneris ratio, & provinciarum amplitudo manifeste exigant.
 „Nam cum his omnibus, in quos pastoralis cura, ac inspectio sese ex-
 „tendit, adesse coram non possit, [prohiberi non potest, quin per Le-
 „gatos officii sui partes expleat.“

§. 4.

Eos ipsos, qui scriptis suis pontificiam gratiam haud certe mere-
 ri quæsierunt, sed & aliquando æquitatis limites adversus summos Pon-
 tifices transgressi sunt, in testes vocemus. Zalweinius ita loquitur *):
 „Nemo utique adeo protervæ frontis erit, ut Pontifici super ipso jure
 „mittendi Legatum quæstionem moveat. Si enim hoc jus ex jure na-
 „turali, & gentium Principibus secularibus competat, cur id Pontifici
 „denegetur? Quod autem Pontifices hoc jus exercuerint, aliunde ex
 „indubitatis historiarum monumentis constat. Quoad ipsos vero Le-
 „gatos, & diversas eorum species, potestatem, & auctoritatem vide-
 „tur, quod Pontifices æmulati fuerint mores Romanorum, apud quos
 „triplicis generis erant Legati, nempe *municipales* ex decreto sui Ordini-
 „nis, cui inserti erant, alicujus negotii expediendi causa ad Præsidentem
 „provinciae, vel Praefectum prætorium missi, & de his agitur ad Tit. *de*
 „*Legationibus*. Item *Provinciales*, qui habito prius conventu a provin-
 „cia ad Principem, vel ad Sedem præfectorianam in casibus subito
 „emergentibus vel petendi consilii, vel expediendi negotii causa, vel
 „etiam ad gentes a romana Republica mittebantur, de quibus agitur
 „in Tit. ff. *de Legatione*. Et demum Legati *cum jurisdictione*, quales erant
 „illi, quibus administratio provinciarum fuit demandata, ut vices ipsius
 „Senatus romani supplerent, & instar *Speculatorum* essent, & hi ordina-
 „rie erant Senatores, & a Senatu cum Proconsule mittebantur, de
 „quibus agitur in Tit. ff. *de officio Procons. & Legat*. Horum igitur ve-
 „stigia secuti sunt Pontifices, quos antiquioribus temporibus triplicis
 „generis Legatos misisse scimus.“

§. 5.

Bambergæ juris ecclesiastici Doctor Schottius a. 1773 hæc scri-
 psit **): „Equidem jus ipsum mittendi Legatos, ceu præminentiam
 „Sedi

*) Princip. jur. eccles. Tom. 4, Quæst. 2, Cap. 2, §. 4.

**) Dissert. de Legatis Natis. Cap. 1, §. 5.

„Sedi apostolicæ pridem competentem jam agnovit Concilium Sardi-
 „cense, & universa retro Ecclesia: neque in dubium vocatur ab iis,
 „qui Primatum ecclesiasticum Pontifici romano largiuntur *). — Ni-
 „mirum Pontifex romanus vi Primatus divina autoritate fundati con-
 „stitutus non tantum est centrum unitatis, atque communionis catholi-
 „cæ, sed ei insuper incumbit generalis, & suprema cura, sollicitudo,
 „atque superintendencia in omnes Ecclesias, cujus autoritate fidei, &
 „generalis disciplinæ unitatem, puritatemque conservat, Canonum ob-
 „servantiam promovet, & tuetur, deficientes ab officio Prælatos ad
 „muneris sui executionem revocat, eorum negligentiam, & in cura
 „pastorali defectus supplet, oppressos defendit, insufficientes, ac im-
 „potentes adjuvat, verbo ea omnia exequitur, quæ Ecclesiæ universa-
 „lis, aut particularis cujuscumque salus, utilitas, necessitasve postulat.
 „Hæc autem, & similia negotia cum plerumque ita constituta sint, ut
 „personalem non raro præsentiam exigant, quam tamen Pontifex va-
 „riis distantis impedimentis per se ipsum exhibere non valet; pro-
 „hiberi is certe nulla ratione poterit, quo minus per Legatos sufficien-
 „ti autoritate pro negotiorum expediendorum diversa natura instructos
 „has muneris sui partes expleat.“

§. 6.

Inter ipsos Austriæ Reformatores Dux Eubelius hæc habet **):
 „Quam certissime jus Primatui propter necessitatem conservandæ uni-
 „tatis inhærens est, imo ut ea, quæ ad statum Ecclesiæ universalis
 „pertinent, ubivis gentium ea geri contingat, referantur ad Primate-
 „m, ut is facilius ministerium suum modo disciplinæ ecclesiasticæ confor-
 „mi impendat. — Hac etiam de causâ mittebant Pontifices romani in
 „terras remotas subinde viros, qui exquirere, quomodo fides resti-
 „tuenda, qui notarent Authores dissensionum a communione segrega-
 „dos, paucis, qui Pontificis nomine Ecclesiis, num unitas servetur,
 „invigilarent. Atque ejusmodi Legatos, Nuntiosve mittendi morem
 „non tantum antiquissimum, sed & si unitatis conservandæ necessitas
 „exigit, cum Primatu connexum quisque, opinor, lubens admittet.“

§. 7.

*) Hanc minus convenientem vocem *largiuntur*, credo Authori per inadverten-
 tiam exclidisse.

**) Introduct. in jus eccles. tom. 3, lib. 1, Cap. 3, §. 172.

§. 7.

Pehemius etiam, etsi ægre admodum a quibusdam inter Catholicos nominetur, vel naturali tamen æquitate compulsus idem Pontificis jus suam jurisdictionem delegandi agnoscit hæc scribens *): „Una non est Ecclesia, nisi ejus membra in fidei dogmatibus conveniant, nullisque scindantur schismatibus. Cum autem Primas ubique esse nequeat, officio suo conservandi unitatem satisfacere non posset, nisi ubicumque de rebus salutem universalis Ecclesiæ concernentibus causæ & negotia emergant, de his ad eundem relatio fieret. Unde relinquitur 1^{mo} penes Primatem jus esse relationes de ejusmodi causis & negotiis petendi & recipiendi, id quod tota novit antiquitas. — Ex eadem ratione Primas 2^{do} jus sibi merito vindicat mittendi Legatos, & Vicarios suæ potestatis in provinciis constituendi. Utique si Episcopi omnes suo officio fungentur, si in negotiis ad statum Ecclesiæ universalis pertinentibus debito modo se ferrent, cessare quidem hujus juris exercitium posset; sed enim homines & ipsi Episcopi sunt. Ut igitur Primas pro viribus curare queat, ne quid detrimenti capiat unitas, prædictum jus e numero essentialium omnino excludi non potest.“

§. 8.

Ad cumulum adhuc ex Febronii ore, licet Pontificibus certe infenso, testimonium percipiamus **): „Prætermittendum non est, quod Papæ pro exercitio & usu jurium suo Primatui adhærentium competat facultas habendi in provinciis & regnis Vicarios & Legatos. Hinc Innocentius I exemplo provocatus Apostolorum, qui Principes evangelii constituti ceterarum rerum causas, necessitudinesque suis discipulis curandas, obeundasque mandarunt, scripsit anno 412 Thessalonicensi Episcopo Ruffo: *Divinitus ergo hæc procurrens gratia ita longis intervallis determinatis a me Ecclesiis disceat consulendum, ut prudentiæ, gravitatisque tuæ committendam curam, causasque censeam.* epist. 13. Adde S. Gregorium M. epist. 54 & 55, lib. V nov. edit. Scilicet cum supremo Pontifici vi sui muneris incumbat cura, inspectio, & quædam superintendencia in omnes Ecclesias; is nullibi quoad hoc potest haberi pro extraneo. Quia vero ipse omnibus adesse non potest, sic prohiberi nequit, quo minus per Nuntios has suas partes expleat. Ea ratione in Cap. 20 de consuet. inter Extravag. communes „Prin-

*) Prælect. in jus ecclæs. Part. I, §. 268.

**) De statu Ecclæs. Cap. 2, §. 10.

„Principes & subditi excommunicantur, si prohibeant ingressum Legati Pontificis.“

§. 9.

Observandum jam de allegatis, haud certe præjudicii Isidoriani spectis Doctoribus, quod omnes ex universali principio divinitus fundato, *Pontificis jus esse & officium, totam regendi Ecclesiam*, vel sola rationis suæ humanæ necessaria conclusione perspexerint illam, quam ipse Pontifex habet, jurisdictionem delegari in alios posse, suo nomine ab eis in locis disitis exercendam, prout necessitas Ecclesiæ, sive utilitas, uno verbo indigentia summi Pontificis judicio ponderanda exigere videatur. Ergo denegare Pontifici potestatem suis Nuntiis facultates, hoc est, jurisdictionis sibi reservatæ quosdam actus delegandi, consensu unanimi Doctorum, etiam illorum, qui haud quaquam partibus Pontificis student, est essentialia & primitiva Primatus jura violare, divinamque institutionem prævaricari.

§. 10.

Non mirum itaque, attamen dignum memoratu est theologicæ Facultatis in Universitate Colonienſi judicium anno 1618 ad consultationem Archiepiscopi Ferdinandi latum adversus librum Marci Antonii de Dominis de *Republica ecclesiastica*. Hic Author L. 4, Cap. 12 titulum dedit *Legatos Romani Pontificis extra Ecclesiam Romanam vix ullam habere potestatem*. Censura Facultatis: *Titulus hæreticus, schismaticus & seditiosus*. Item Anton. de Dominis num. 22: *Postremis demum temporibus Legationes Romanae, & Nuntiaturæ ad avaritiam, ambitionem, & ad sola negotia terrena, & temporalia expeditæ sunt, & expediuntur*. — Nuntii vero Papæ nunc dierum ad Imperatorem, Regem, Potentatus christianos eodem pariter loco sunt, quo Regum Legati in Curii Principum secularium, pro negotiis nimirum secularibus potissimum tractandis, & indagandis commorantes. Et certe si optimo eos nomine insigniamus, sunt Oratores, sin vero, *Exploratores*. Censura Facultatis: *Falsa, seditiosa, in Romanum Pontificem, ejusque Legatos calumniosa **).

§. 11.

*) Reflexions sur les 73 Articles du Pro Memoria — de Cologne. a. 1788.

§. II.

Cum igitur inter Catholicos extra omnem dubitationem positum sit jus Pontificis suo Primatui inhærens, in universum orbem christianum mittendi Delegatos; ipsa nunc ratio, ex qua hoc idem jus profluit, singulariter adhuc considerari meretur: ea autem nulla alia est, nisi summi Pontificis in subditos suos ubivis terrarum jurisdictio, quam, cum præsens esse ubilibet locorum non possit, per alios debeat exercere. Pontificis vero jurisdictio tamquam Capitis universalis ex consensu omnium illorum, quorum hodie auctoritas plurimum valet Doctorum, exercere sese potest, imo & debet ad unitatem in fide, & disciplinam secundum canones conservandam: ad hunc ergo finem obtinendum Legatos cum jurisdictione delegata mitti a Pontifice posse in confesso est.

§. 12.

Cum porro cura conservandæ in regionibus veræ fidei, ac bonæ morum disciplinæ non momentaneum, non transiens unius diei, annive negotium, sed stabile ac omnino perpetuum sit, spectata vel generali naturæ humanæ ad deficiendum proclivitate, ne quid dicam de singulari, quæ alicubi forte invaluerit, corruptione, quod malum sæpe tenacissimum seculis vix reparabile est; sequitur summi Inspectoris pariter officium esse, disitis in regionibus stabiles loco Sui *Speculatores & Commissarios* constitutere, pro casuum emergentia competente ad malum subprimendum, ordinemque rerum servandum jurisdictione præditos. His accedit universalis Ecclesiæ sententia jam declarata *), *causas quasdam graviores summorum dumtaxat Pontificum judicio esse merito reservatas*: ad graviores ergo causas reservatas, sive interni, sive externi fori sint, eo melius, feliciusque expediendas delegari posse a summis Pontificibus quosdam in exteris locis habitantes *Commissarios*, quis sanæ rationis homo inficiabitur? Quænam enim conquerendi causa Ordinariis locorum, si, quam ipsi non habent, potestatem suo jure Pontifex vel per se ipsum, vel per suum Delegatum exerceat? Quare in comperto est & alterum jus divino ex Primatu descendens, non solum Delegatos cum jurisdictione, sed eos etiam stabiles tam pro causis, ut vocant, *voluntariis*, quam *contentiosis* in christianum orbem emittendi.

§. 13.

*) Conc. Trident. Sess. 14, Cap. 7.

§. 13.

Si vetera historiarum monumenta consulamus; ipsa Archiepiscoporum, pro Germania certe, alia origo non fuit, quam stabilita ejusmodi in certis locis delegatio pontificiæ jurisdictionis erga adjacentes in vicinia particulares Ecclesias, ita ut hodierna nostrorum Metropolitaram jura jam non alia sint, nisi ipsa Legatorum, qui nomine *Natorum* nunc veniunt, jura consuetudine ad Sedium Successores translata. Vel solum jus naturæ distat, potestatem Delegati nunquam posse in jus ipsum adversus Delegantem accrescere, sed necessario ab hujus voluntate manere dependentem, a qua pro rationum diversitate ampliari possit, aut restringi, in aliumve transferri. Quorundam antiquitus Archiepiscoporum, sive quod idem est, apostolicæ Sedis Vicariorum auctoritatem jure extinctam fuisse, inter protestanticos jurisconsultos celeberrimus Boehmerus scite observat *), eoquod illi gratiam quasi hæreditario Sedis jure obtentam, prout fit, jam non pro gratia habent, nec debitam apostolicæ Sedi reverentiam, ac dependentiam amplius exhibere vellent, sed potius ejusdem jura perturbare, & invadere tentarent. Si hodiedum natis hujusmodi Legatis Sedes apostolica sua ex consuetudine derivata jura, quæ nunc archiepiscopalia audiunt, tranquillæ possessionis gratia relinquit; profecto hæc gratia non obstat juri apostolicæ Sedis, pro temporum exigentia novos de Latere suo Legatos, quos *Nuntios* vocamus, congruente cum jurisdictione submittendi.

§. 14.

Ut non jam de jure, sed de officio loquar divinitus imposito; quis illud in ea temporum necessitate, nisi extremitate, negaverit, ubi in Clero inveterata illa vitia Simonia, aut concubinatus extincta nondum, forte ne diminuta quidem sunt; ubi summo A catholicorum scandalo unitas disciplinæ, & obedientiæ fere jam disrupta est, arrogantibus sibi quibusdam Ordinarii canonum universalium dispensationem, quidni & abolitionem? imo obligationum cum Sacerdotio junctarum abrogationem, votorum religiosorum dissolutionem, piarum fundationum verius destructionem, quam emendationem; ubi paternis monitis summi Pastoris nulla audientia præbatur, quin etiam aperte resistitur; ubi Doctores errorum, aut plane irreligionis fama divulgati non solum

C c c 2

tol-

*) Observ. 25 ad Pet. de Marca, L. 5, C. 40.

tolerantur, sed & ad publicas Academias pro Clericorum institutione convocantur; ubi præ ipsis terris protestanticis major cogitandi, legendi, scribendi non tam libertas, quam libido permittitur; ubi doctrinæ perversissimæ vel Epicurismi, vel Febronianismi, vel Socinianismi, verbo Naturalismi ex ipsis archi- & episcopalibus Sedibus, veluti ex Cathedralis pestilentia per orbem propagantur; ubi litterarum pastoralium nomine voces seductoriae, & mortiferae ad rudem populum sunt emissæ, templa ornamentis spoliata, imagines vilipensæ, devotiones plebis, etsi in se bonæ, ludibrio habitæ, bona piarum confraternitatum, vel monasteriorum direpta; ubi ipsa fidei dogmata de matrimonii insolubili vinculo, de indulgentiarum valore, de Sanctorum cultu, de diaboli tentationibus, de peccato originali, saltem in dubium vocata; ubi magnæ Provinciæ, præsertim ecclesiasticæ, occulta quadam societate hominum ad fidem evertendam conjuratorum, & philosophiæ irreligiøsæ lue jam sunt infectæ; ubi denique conspiratione tentata cum Principe generatim Ecclesiæ jurium, in specie vero episcopaliū inimico *), supremus Pastor christiani gregis ab ipsis ecclesiasticis Præfultibus ad tribunal seculare Imperii, maximam fere partem Protestantici fuit delatus; in his, inquam, rerum extremitatibus, an ad curanda hæc lethalia vulnera unus, pluresve Missionarii apostolici sint necessarij, an ad illorum a Papa missionem inferiorum Pastorum consensus sit expectandus, penes Lectorem, dicam penes ipsum mundum nunc judicium esto!

ARTICULUS II.

De usu Legationum in primitiva Ecclesia.

§. I.

„**U**sus Legationum (scribit Bambergensis Doctor Pontifici haud æquus)
 „ in republica frequentissimus, in Ecclesia quoque inde ab ejus pri-
 „ mordiis invaluit. Enimvero non tantum Ecclesiæ particulares suos ha-
 „ buerunt Nuntios, sive Apostolos, per quos mutuam inter se communi-
 „ onem conservabant, laborantibus consilio, ope, solatioque succurrebant,
 „ &

* Secus ac speraverat, iter Viennense cecidit Archiepiscopo Salisburgensi, congressus Emfani Commissario consultum: abrogandi cœlibatus sacerdotis nec Imperatori placuit, minus Principi Patri de Kollredo: hinc negavit Archiepiscopus, id suo Nomine se petere.

„& ea procurabant omnia, quæ ad communem totius Ecclesiæ salutem, spectare videbantur, sed ipsi etiam Episcopi vicaria Legatorum opera, utebantur in expediendis iis negotiis, quibus præesse ob varia impedimenta non poterant.“*) Non solum jam a primordiis Nuntii sine Facultatibus, sed etiam cum Facultatibus ab Apostolis mittebantur, teste Innocentio I: *Principes Evangelii constituti ceterarum rerum causas, necessitudinesque suis discipulis curandas, obeundasque curarunt.* Plura hujusmodi, quos Nuntios voces, vel Vicarios, vel Commissarios, vel Ministros (de voce non litigo) quorum opera Apostoli usi leguntur, nomina occurrunt, uti Lucæ, Marci, Barnabæ, Silæ, Epeneti, Zenæ, Sylæ, Sostenis, Epaphroditæ, aliorumque.

§. 2.

Etsi rarissima quidem sint, & obscurissima plerumque primævi illius temporis monumenta; quædam tamen delegate jam ab Apostolis jurisdictionis vestigia vel in sacris Litteris deteguntur. Ut enim Petrus de Marca observat**), S. Paulus Insulæ Cretæ sollicitudinem Tito, veluti suo Vicario demandaverat, quem ibidem reliquit, ut per civitates Presbyteros non tantum simplices, sed Episcopos constitueret, sicut ipse a Paulo fuerat ordinatus***). Titus igitur erga illos in civitatibus ordinatos, sibi que subiectos Episcopos tunc fere id erat, quod apud nos Archiepiscopus, non utique ratione Sacramenti Ordinis divinitus instituti, quod illis cum ipso commune fuit, sed ex humana Pauli Delegatione superior. Simili modo idem Apostolus Timotheum Ephesi remanere jussit cum Facultate supra ordinatos a se Presbyteros, sive Episcopos eidem concessa****). Quæ sane sunt exempla Apostolicarum cum jurisdictione, eaque stabili, qualis hodie *ordinaria* dicitur, Delegationum.

§. 3.

Quod Paulo, quod aliis Apostolis licuit salva Episcoporum potestate ea, quæ divinæ institutionis est, scilicet superioris suæ Authoritatis Vicarium delegare; num idem Apostolorum omnium Principi Petro non licuerit? Quin imo num dubitari potest, idem ab ipso revera factum fuisse? Certe antiquissima Orientis & Occidentis traditio, Ecclesiis Alexan-

C c c 3

drinæ,

*) Dissert. de Legat. Nat. Cap. 1, §. 4.

**) De Concord. Sacerd. & Imper. L. 1, C. 3, §. 7.

*** Tit. I, 5. ****) I. Timoth. I, 3.

drinæ, & Antiöhenæ, tamquam S. Petri Sedibus post Romanam præcipua præ ceteris omnibus privilegia & jura competere, primos illarum Episcopos Marcum, & Evodium non aliter respicere nos finit, quam hujus Apostolorum Principis Vicarios, seu Delegatos. Hinc tres quidem primæ Sedes antiquitus fuerunt, sed una tamen suprema Cathedra, tres Patriarchæ quidem, sed unus Patriarchatus in S. Petri Primatu comprehensus, prout S. Gelasius I in Concilio romano a. 494 declaravit: „Quamvis uni-
 „versæ per orbem catholicæ Ecclesiæ unus thalamus Christi sit; sancta
 „tamen romana Ecclesia, nullis synodicis constitutis ceteris Ecclesiis
 „prælatæ est, sed evangelica voce Domini, & Salvatoris nostri Prima-
 „tum obtinuit: *Tu es Petrus, & super &c.* Est ergo prima Petri Apo-
 „stoli Sedes Ecclesia romana. Secunda autem Sedes apud Alexandriam
 „B. Petri nomine a Marco ejus discipulo, & Evangelista consecrata est;
 „ipseque a Petro Apostolo in Ægyptum directus verbum veritatis præ-
 „dicavit, & gloriosum consummavit Martyrium. Tertia vero Sedes
 „apud Antiochiam ejusdem B. Petri Apostoli nomine habetur honorabi-
 „lis, eoquod illic, priusquam Romam venisset, habitavit, & illic pri-
 „mum nomen Christianorum novellæ gentis exortum est.“ Itaque
 cum Alexandriæ, & Antiochiæ primi Episcopi autoritate ceteris superi-
 ores, fuerint B. Petri Delegati; Apostolis coævæ merito censi debent
 hujusmodi cum Facultatibus Delegationes: & stabiles quidem, vel cer-
 tis Personis, ut illa Tito, & Timotheo, vel ipsis Sedibus affixæ, ut
 Alexandrinæ, & Antiöhenæ.

§. 4.

Præter illos, quos *ordinarios* hodierno loquendi more vocaveris Delegatos alia quoque ad singulare aliquod negotium restrictarum Le-
 gationum exempla suppeditat primæva antiquitas. Ita S. Clementis ro-
 mani prima testatur epistola, ad sedandas Corinthiorum discordias, qui
 sacerdotes ab Apostolis ordinatos officio suo dejicere ausi fuerant, ex
 romana Ecclesia missos fuisse abs dubio cum debita jurisdictione Clau-
 dium, Ephebum, Valerium, Vitonem, & Fortunatum *). Rcm ita-
 que, quam jure divino, & naturali demonstravimus firmissime fulciri,
 jam etiam ab ipsis Ecclesiæ incunabulis fuisse in usu historica, quæ res-
 tant ex illa vetustate, documenta loquuntur. Modum vero Nuntios
 a Latere mittendi in terris exteris fixas sibi sedes erecturos si recentiorem
 dicas,

*) Epist. I ad Corinth. in fine.

dicas, & primitiva illa Ecclesiæ ætate incognitum; ego quidem id non moror, quamvis tibi possem Marcum appellare. Tempora mutata sunt, hinc & modos rerum mutari necesse erat. Cibo ad vitam nutriendam indiget homo parvulus æque, ac adultus; alius tamen alimentorum modus adulto convenit, quam parvulo. Da nobis sanctos primi illius ævi mores sicut in grege fidelium, ita in ipsis Pastoribus; & hac tantum conditione posita jure petes ecclesiasticam politiam reduci ad primitivam illam formam debere: imo ne tum quidem id jure petes; illo enim sævientis persecutionis tempore nondum erat firma quædam exterioris regiminis disciplina, seu fixa ecclesiasticæ politiæ forma, quæ primum concessa Ecclesiæ tranquillitate ordinari, ac firmo quodam pede stabiliri poterat. Aut num tu desiderabis Episcopos & Archiepiscopos, sicut ab origine Apostolos, piscando & fabricando iterum debere suum victum mereri?? An forte Nuntius apostolicus cum splendore summum Christianorum Sacerdotem repræsentante tunc ad Principum paganorum aulas missus fuerit, cum ipsis Ordinariis locorum non licuerit se publice infidelibus præbere spectandos? Sapere oportet, sed sapere ad sobrietatem: Ne quid nimis! Si Ecclesiæ pacem amas, sufficiat tibi jam inde ab Apostolis Delegationes jurisdictionis, seu stabiles seu momentaneas, hoc est, vel ad generale quoddam *perdurans*, vel ad singulare *transiens* negotium, prout utile visum, in usu fuisse.

§. 5.

Atque hoc amplius antiquissimi ac œcumenici Sardicenis Concilii canone confirmatur, apud Græcos quinto, apud Dionysium septimo: quâ occasione istorum Canonum sedulam clarâque explicationem præc. Corroll. Artic. 3, §. 7 usque ad finem a me datam perquam cuperem relegendam. Patres enim Sardicenses pontificium jus Delegationum cum jurisdictione conjunctarum tamquam rem perspectam omnibus, atque indubitatam præposuerunt, hocque supposito integrum Papæ declararunt, si modo dignum judicaverit, ut Legatos in provincias mitteret ad judicia Episcopalia majore cum autoritate instauranda, vel etiam reformanda. Tria hic singulariter observatu digna sunt: *imo* hunc Canonem non esse novi juris Legatos mittendi institutionem, sed hoc supposito jure, tamquam quod omnibus exploratum esset, tantum declarationem submissionis erga id, quod romanus Pontifex decreverit: *2do* Patres credidisse, hoc idem jus Delegationum non præcise in romano Patriarchatu, sed in divino S. Pe-
tri

tri Primatu esse fundatum, secus non pro ipso Oriente, & quidem Patriarchalibus etiam Sedibus hunc Canonem statuere, neque tantam in causis Orientalibus auctoritatem romanis Legatis adjudicare potuissent: 3tio pontificiam jurisdictionem etiam in foro *contentioso* ab Orientalibus æque, ac occidentalibus Catholicis fuisse agnitam, pro arbitrio Papæ vel dubiis in casibus, an res tanti sit, exercendam; quanto magis in causis gravioribus fidei, vel disciplinæ dicendum est eam, quam nunc vocant *voluntariam* jurisdictionem, in Papa respectam fuisse? Hunc certe animi sui sensum satis aperte demonstrarunt Patres Sardicenses in sua synodica ad Julium P. epistola, ubi a Domini Sacerdotibus, hoc est, Episcopis sponte sua in hujusmodi causis *ad Caput, id est, ad Petri Apostoli Sedem de singulis quibuscunque provinciis referendum* statuerunt, NB. de Orientalibus etiam, non tantum romano Patriarchatui subiectis provinciis.

§. 6.

Si Concilii Nicæni etiam Canonem sextum attente, ac tranquille ponderes, suas Patriarchis Alexandrino, & Antiocheno prærogativas invenies non alio, quam S. Petri respectu confirmatas, eoque ex fine cum romanæ Cathedralis Episcopo illos fuisse comparatos, ut sicut huic præcipuus honos in Ecclesia servatus est, *quia & urbis Romæ Episcopo parilis mos est*, ita & illis antiqua consuetudo prærogativæ supra alias sibi subditas Ecclesias servaretur, hoc est, ut Alexandrinus Episcopus per Ægyptum, Lybiam, & Pentapolin supra omnes alios haberet potestatem, Antiochenus autem supra quindecim Provinciarum strictè sic dicti Orientis Episcopos. Has duas, quippe S. Petri Cathedras reliquis in Oriente omnibus Ecclesiis, ipsi etiam Matrici Hierosolymitanæ jam inde ab origine vides auctoritate prævaluisse. Unde hæc auctoritas, nisi ex Apostolorum Principis delegatione? Enimvero ex antiquissimis Ecclesiæ monumentis pro nostris diebus summe memorabile est, S. Marci tantum a Petro delegati discipuli Cathedrali ceteris, etsi Apostolorum Sedibus, superiorem jam ab initio fuisse habitam. Ita nimirum verum est eam, quæ antiquitus Patriarcharum fuisse legitur, superiorem supra alias Ecclesias jurisdictionem haud esse aliam, quam ex S. Petri Primatu seu fonte suo derivatam, hoc est, delegatam. Idem quoque de antiquissimo totius Africae Primatu Carthaginensi sentiendum ex Tertulliani Testimonio: *Si Italiae adjaces, Romam*

*nam habes, unde nobis quoque auctoritas præsto est *)*. Omnis in Ecclesia jurisdictio, ut cum S. Cypriano loquar, a Petro Apostolorum Principe est, sicut ex sole radius, sicut ex radice arboris ramasculus, sicut ex fluminis fonte rivulus. Ita Patres nostri crediderunt, ita docuerunt, ita nobis Posteris traditum est, idque Catholicum. Christus ipse in uno Petro totam fundavit, primitusque reposuit jurisditionem, eidem regni cœlestis claves tradendo cum potestate quidquid solvendi, ligandi-ve. Parum refert, an primitus in Petro fundatam jurisditionem Christus *per se ipsum* in alios Apostolos, an *mediante* Petro extenderit: hoc certum, ac de fide est, illimitatam esse in Petro jurisditionis plenitudinem, & nonnisi dependenter a Petro ad omnes alios Apostolos, illorumque Successores extensam in Ecclesia dari jurisditionem.

ARTICULUS III.

De Legationibus pontificiis in Oriente post Sardicense Concilium.

§. I.

Pace ab exteris hostibus Ecclesiæ reddita, internis falforum fratrum, seu Hæreticorum dissidiis, gravissimisque scandalis per ipsos gregium Pastores excitatis, Christi Sponsæ graviora certe vulnera diabolus inflixit. Quare pontificia potestas, quæ veluti quiescere antea videbatur Pastoribus raro admodum suo ab officio deflestantibus, jam evigilare, totaque sua autoritate quasi assurgere debuit non, ut quidam Sanctos Domini calumniantur, sese amplificandi gratia, sed ad coercendos improbos necessitate cogente. Primi Orientis Archiepiscopi, seu Patriarchæ apostolico fulmine prostrati, quantum supra omnem Ecclesiæ Principatum divina Petri Autoritas prævaleret, suo experimento demonstrarunt. Ita Nestorius Constantinopolitanus a Pontifice Cœlestino I, ita Dioscorus Alexandrinus jussu Leonis M. in Concilio Chalcedonensi, ita Petrus Fullo Antiochenus a Felice P. III autoritate Acacio Constantinopolitano delegata, ita demum idem Acacius pro suis meritis ab eodem Pontifice, patriarchalibus Sedibus sunt dejecti, quas Patriarcharum depositiones, aliasque plures contra Acacii defensores in una epistola a. 493 contexit Gelasius P. hisce verbis: „In hac ipsa causâ Timotheus „Alexandrinus, & Petrus Antiochenus, Petrus, Paulus, & Joannes,

&

*) Lib. de Præscript.

„ceteri, non solum unus, sed plures utique nomen Sacerdotii præferentes sola Sedis apostolicæ sunt autoritate dejecti. Cujus rei testis etiam ipse docetur Acacius, qui præceptionis hujus extitit executor. „Hoc igitur modo recidens in consortium damnatorum & damnatus.“ Itaque vel primarii Orientis Præsules romanæ S. Petri Cathedræ ita erant subiecti, ut ab eadem etiam exauthorari possent, ejusdemque jurisdictionem supremam ita venerabantur, ut eam sibi delegatam honori ducerent.

§. 2.

Id adhuc in specie de Alexandrina, Orientis primaria Sede ex præstanti documento quinti seculi constat, quod apud le Quien *) invenio, ubi in libello hujus Ecclesiæ nomine Anastasii P. II Legatis oblatæ hæc leguntur: „Venerabiles sanctæ Ecclesiæ, romanæ Urbis, atque „Alexandrinæ, non solum fidem rectam, & immaculatam, ex quo salutaris in eis prædicatus est sermo, sed etiam in divino ministerio concordiam servaverunt. Quippe cum ab uno fuerit in utrisque jactum „fidei fundamentum (Petrum memoramus beatum Apostolum, cujus „per omnia S. Evangelista Marcus extitit imitator) ita ut si quando „contigerit in rebus ambiguis quædam Episcoporum concilia celebrari, Sanctissimus is, qui romanæ præsideret Ecclesiæ, Reverendissimum „Alexandrinæ civitatis Archiepiscopum deligeret, ut sui curam loci susciperet.“ Exemplum hujusmodi Delegationis exhibet S. Cyrillus, qui Cœlestini P. autoritate Nestorium Constantinopolitanum damnavit, & Ephesino Concilio præfuit.

§. 3.

Quæ adhuc supersunt, genuinæ S. Leonis epistolæ testantur, magnum hunc Pontificem pluribus Delegationibus suam, quam a S. Petro haberet, superiorem jurisdictionem etiam in Oriente exercuisse. Sic pro fide vera contra Eutychianum errorem declaranda e Latere suo Legatos misit, *qui defensionem veritatis assisterent ***), quibus tamen, prout moderationi congrueret Sacerdotum, facultatem concessit, ut si condemnatus Presbyter (Eutyches) plena satisfactione corrigatur, sententia, qua obstrictus est, relaxetur: si vero in eodem insipientiæ suæ luto jacere delegerit,

*) Oriens christianus. Tom. 2, p. 335. Paris. 1740.

**) Epist. 32. edit. Ballerini.

gerit, statuta permaneant *). Alios etiam duos Legatos, Lucentium Episcopum, & Basilium Presbyterum Constantinopolin misit, quibus & Anatholium hujus civitatis Præsulem sociavit, ut lapsos Epyhesi, factique pœnitentes ad communionem cum pœnitentiæ indulgentia reciperent iis exceptis, qui in hac causa gravius cum aliorum scandalo peccaverunt: horum enim satisfactionem maturioribus apostolicæ Sedis consiliis voluit reservatam **). Neque solum ad singulare quoddam, & transitorium negotium, sed & pro generali, & stabili redintegrandæ fidei sollicitudine mox post Concilium Chalcedonense Julianum Coensem Episcopum ad Aulam imperatoriam delegavit, ut suas ibi vices suppleret ***). Hæc profecto antiquissima Nuntiorum in Oriente forma est fere ad eundem modum, quo hodieum de Latere ad magnorum Principum aulas solent delegari.

§. 4.

Bonus alias Thomassinus hoc loco dormitat, multumque fallitur, dum hanc stabilem quidem, sed jurisdictione vacuam, tantum pro vigilantī inspectione, & apud Imperatorem mediatione fuisse Legationem existimat ****). Ipsa enim repugnant formalia S. Leonis verba, quibus ad opprimendas hæreses Nestorianam, & Eutychianam Juliano singularem curam commendat sub hac tantummodo cautela, ne ordinariam causarum, quæ ad Ecclesiæ cujusque Præsulem spectant, disquisitionem perturbet: exceptio certe, seu *causarum sequestratio* locum habere non potest, ubi nulla datur jurisdictio. Præterquam quod ipsa inspectionis publicæ potestas a legitimo data Superiore jam sua ex natura sit magna quædam jurisdictionis facultas; neque etiam scopus, quem S. Pontifex intenderat, Hæreticorum ausibus resistendi, potuisset sine vigore & efficacia autoritatis obtineri. Hæc autem omnia Legationis litteræ satis aperte loquuntur: „Consulente dilectione tua de his, in quibus putaveris ambigendum, non deerit relationibus tuis meæ responsionis instructio, „NB. ut sequestrata earum actione causarum, quæ in quibusque Ecclesiis Præsulum suorum debent cognitione firmari, hanc specialem curam vice mea functus assumas, ne hæresis vel Nestoriana, vel Eutychiana, in aliqua parte revirescat: quia in Episcopo Constantinopolitano catholici vigor non est, nec multum aut pro Sacramento salutis humanæ, aut

D d d 2

„pro

*) Epist. 34.

**) Epist. 85.

****) Epist. 113.

****) Vet. & nov. Discipl. P. I, L. 2, Cap. 117, n. 6.

„pro sua est æstimatione sollicitus; cum, siquid illi inesset spiritualis industria, ita & a quibus ordinatus sit, & cui viro successerit, cogitare deberet, ut magis B. Flavianum, quam sui honoris sequeretur auctores.“

§. 5.

Frivola est quorundam exceptio, eam non fuisse *stabilem* Legati jurisdictionem, quippe quæ ad relationes quaslibet causarum a Papa *singulariter* delegari debuerit. Certum est enim, vel ipsam publicæ inspectionis a Superiore concessam facultatem jam esse generalem quamdam, magnamque jurisdictionem; ad hujus vero pro quibusdam singularibus, præcipue ambiguis casibus exercitium plane exigit necessaria Legati a suo Principe dependentia, ut hoc inconsulto nihil ille præsumat. Hinc observandum est, quod S. Leo non in omnibus, sed tantum *ambiguis* casibus suum Legatum iusserit a se consilium petere. Præterea quam inutilis sit hæc, vanaque nostris diebus cavillatio, facile quisque perspiciet: si enim pro *specificis* casibus Pontifex suo in terris alienis residenti Nuntio delegare potest jurisdictionem; cur non possit *generaliter* eandem pro casibus ipso jure sibi reservatis alteri committere? Certe non hic ullum est potestatis discrimen, sed negotiorum: alia sunt plani juris, aut minoris momenti; alia vero difficillimæ indaginis, aut gravissimi ponderis: non illa, sicut hæc a Legato ad Principem referri debere manifestum est.

§. 6.

Exemplum S. Leonis secuti posteriores Pontifices perpetuos suos in aula Imperatoris Nuntios, græco nomine *Apocrisarios*, latino *Responsales*, maxime proprio autem *Commissarios* constituerunt: & isti quidem non amplius Episcopi, sed Diaconi fuerant; siquidem cum jam fixa esset, & perpetua eorum Constantinopoli Sedes, ab Ecclesia autem sua perpetuo abesse Episcopis non liceret, potius Diaconis hoc muneris conveniebat. Itaque romani Pontifices sexti seculi, Agapetus, Silvester, Vigilius, Pelagius, Gregorius M. aliique suos in aula Imperatoria habuisse Apocrisarios leguntur, quorum magna valde in Oriente dignitas fuit & auctoritas: Episcoporum siquidem ordinationes, aliaque majoris momenti negotia ejusdem Pontificis nomine, cujus vices gerebant, sua roborabant presentia. Tantam hisce pontificiis Legatis, etsi dumtaxat Diaconis reverentiam Ecclesia exhibuit, ut plerique veluti ex proximo gradu ad summum usque Pontificatum assumerentur, uti Pelagius I., Gregorius M. Sabinianus,

nus, Bonifacius III., Martinus I. Quam longe alia tunc in veteri Ecclesia ante Iſidorum ſenſa fuerunt, quam longe major ſummi Sacerdotis vel in Legatis ſuis æſtimatio, ac hodiernis diebus non apud Iſidorianos certe, ſed Febronianos! Dic Sodes! quinam veterum illam obedientiæ diſciplinam, & ſanctam concordiam unice a JESU deſideratam corruperint!

§. 7.

Aquam cribro hauriunt, qui poſt Petrum de Marca vel in dubium vocare laborant, an iſtorum Legatorum autoritas cum quadam juridiſtione conjuncta fuerit: hiſtorica enim documenta nimis clare contra illos teſtantur. Ut ad Pelagium I redeamus; is adhuc Apocriſtarius cauſam Pauli Epiſcopi Alexandrini dijudicavit una cum Epiſcopis Antiocheno, Hieroſolymitano, & Ephesine ad eandem cauſam ab Imperatore delegatis. Rem diſſerte narrat Liberatus Carthaginenſis Diaconus ſcriptor cœvus in Breviario: *) „Miſit Imperator Pelagium Diaconum & „Apocriſarium primæ Sedis Romæ Antiochiam cum Sacris ſuis, quibus „præcepit, ut cum Ephremio ejusdem urbis Epiſcopo — venirent Gazam, „& Paulo Epiſcopo Pallium auferrent, & eum deponerent. Pelagius „cum memoratis Patriarchis, & Epiſcopis venit Gazam, & auferentes Paulum, „lo Pallium depoſuerunt eum.“ Inane effugium eſſe, eoquod hæc ſpecialis juridiſtictionis commiſſio fuerit, & tranſitoria non ſtabilis Delegatio, jam ſupra §. 5 ſatis oſtenſum eſt. Quomodo Imperator id negotii ſpecialiter committere Pelagio potuiſſet, niſi jam antea generaliter eccleſiaſtica juridiſtictione prædito?

§. 8.

Sed etiam ſtabile juridiſtictionis delegatæ tribunal, & pro foro quidem contentioſo epiſtolæ S. Gregorii plane demonſtrant. Hiſtoriam ex Fleurio **), quam Coroll. I, §. 10 jam attuli, hoc loco rememorare certe operæ pretium eſt. Adrianus Thebarum Epiſcopus a quibusdam Clericis apud Archiepiſcopum Larifæum accuſatus, atque ab eodem condemnatus, arſtoque carceri injuſte inclufus, refugium tamen ad Imperatorem Mauritium invenit, qui hanc appellationem Honorato romani Pontificis Nuntio, ſeu Apocriſtario Conſtantinopoli examinandam commiſit: ita generalem, ſtabilemque in hoc Legato juridiſtictionis a Papa delegatæ facultatem agnovit. Attamen adverſariis Adriani non

D d d 3

acqui-

*) Cap. 23.

**) Hiſt. eccleſ. L. 35, §. 27.

acquiescentibus ad Joannem primæ Justinianæ Episcopum, Illyrici Primatem, & sanctæ Sedis Vicarium caussa hæc remissa est: cumque Adrianus Primatis judicio iterum cecidisset, ad ipsum Papam S. Gregorium appellabat. Pontifex diu expectatis Justinianæ Legatis acta tam a judicio Metropolitæ, quam & Primatis ad se advocavit, novoque examini subjecit, nec non utrumque prius judicium plane illegitimum declaravit, Primati pœnitentiam triginta dierum interim imponens. Ad Archiepiscopum vero Larissæum litteras misit, in quibus sub pœna excommunicationis eidem injunxit, ut si quam amplius actionem, criminalem vel civilem, contra Thebarum Episcopum sua jurisdictione jam exemptum haberet, *apostolicis Nuntiis, qui Constantinopoli essent, judicium deferret.* En expressis verbis stabile tribunal pontificiæ Legationis Constantinopoli erectum!

§. 9.

Sunt, qui hoc tam apertum documentum prætextu saltem quodam obscurare nitantur, eoquod tota hæc caussa Thebani Episcopi utpote ex Illyrico non ad orientalem, sed ad occidentalem Patriarchatum pertinuerit. Quocunque autem se vertant, nullibi his asili locus: nam ipsum Nuntiaturæ tribunal extra Occidentis Patriarchatum, nempe Constantinopoli subsistebat; neque solum pro occidentalibus, sed quam maxime pro causis orientalibus, id quod ex eodem Fleurio mox seq. §. 28 patet. Presbyteros enim Constantinopolitanos injuriam passos S. Pontifex Gregorius a suo Nuntio ibidem tunc commorante, Sabiniano dijudicari iussit *). Quod vero hic animadversione dignius est, proprio ore se damnant Febroniani, qui quo magis S. Petri Primatum deprimere queant, eo altius Patriarcharum potestatem extollere non dubitant, illisque larga manu attribuant jus Delegationum etiam cum jurisdictione junctarum, quod tamen universali Ecclesiæ Primati, qua possunt vi, & fraude surripere allaborant. Si tanta fuit antiquitas vel patriarchalis potestas, quæ nonnisi rivulus erat ex universali flumine ab hominibus quasi alienatus; quantam oportet hodiedum agnoscere pontificiam jurisdictionem, in qua divino instituto omnis Potestatis plenitudo collecta est? Quid demum prætenso patriarchalis autoritatis nostrorum Archiepiscoporum Curialistas juvat? Si nolunt obedire Pontifici, debent obedire Patriarchæ, qui idem est: cumque antiquam as-
fectent

*) Vide hac super re ipsius Fleurii Notam cit. §. 27.

fectent disciplinam, eo amplius patriarchali dignitati submittere metropolitanicam debent, quo certius est, Patriarchis olim subiectos Archiepiscopos fuisse. Fucum faciunt Curialistæ germani, dum Archiepiscopos nostros illis antiquis Patriarchis, sive primi Ordinis Archiepiscopis, qui plures alios secundi Ordinis infra se habebant, student æquiparare.

§. 10.

Dignum adhuc reflexione est, quod illo præcise tempore, quo sub sanctis Pontificibus Leone I, & Gregorio I Legatorum romanorum auctoritas in Oriente præcipue splenduit, Constantinopoli Anatholius, & Joannes Episcopi federint, quos ut ne superbos dicam, certo tamen constat, ultra quam par erat, prærogativæ Sedis suæ studiosos fuisse. Quid rei est, quod tanti illi Episcopi propter sua jura diœcesana, quæ Nuntii quacumque facultate nunc violari creduntur, nulla tunc gravamina moverint, nec conquesti fuerint, in eadem civitate Constantinopolitana duo tribunalia ecclesiastica erigi, sibi que opponi? Quid, quod etiam agnita Pontificis Legatione humiles eidem litteras perscripserint? Quid, inquam, inde concludendum, nisi quod necessario sequitur, olim alia prorsus, quam hodie apud nos multorum sint, Ecclesiæ etiam Orientalis sensa viguisse de suprema & illimitata summi Sacerdotis in universum orbem jurisdictione, quam etsi absens, suos tamen per Legatos exercere sine ulius controversia posset?

§. 11.

Enimvero tantum aberant sancti illius ævi Episcopi, etiam si Orientales a falsa persuasionem, per summi Pontificis Legationem sua divinitus concessa jura violari, ut potius ipsi sanctis desideriis ad curanda Ecclesiæ vulnera auxiliatricem apostolicæ Delegationis operam exoptarint. Testis est S. Basilii Cæsareæ in Cappadocia Archiepiscopus, qui ad S. Athanasium scribens declaravit, quantum utilitatis ad primævam fidei & disciplinæ integritatem restituendam ex pontificia Legatione emerfurum speraret*): „Visum est mihi consentaneum, ut scribatur Episcopo Romæ, ut „quæ hic geruntur, consideret, & sententiam suam expromat: & quoniam „difficile est, ut communi ac synodico decreto aliqui illinc mittantur, ipse sua auctoritate in ista causâ usus, viros eligat ad hoc accom- „modos, ut mansuetudine & facilitate ingenii eos, qui distorti & obliqui

„apud

*) Epist. 52.

„apud nos sunt, corrigant, apte & dispensatorie sermonem attemperantes, „omniaque secum habentes, quæ in Airimino gesta sunt, ad ea rescin- „denda, quæ illic per vim gesta sunt.“

§. 12.

Demum de potestate jurisdictionis, eaque stabili, quam Pontifex suo Nomine Delegatis plena libertate committeret, neminem tunc dubitasse epistola testatur Constantini Pogonati anno 682 ad Pontificem Leonem II data, in qua Imperator pro revocanda pristina consuetudine mittendum petit Apocrisarium, qui Pontificis personam referret in *emergentibus sive dogmaticis, sive canonicis, ac prorsus in ecclesiasticis omnibus negotiis*. Quam largæ Facultates pontificii Nuntii, quas Oriens non respuit, sed dari a Papa petiit seculo ab Isidori decretalibus adhuc puro, id est, septimo! & Germania nunc seculo supra decimum octavo? — Lege verba Imperatoris apud Harduinum *): „Hortamur vestram sanctissimam Summi- „tatem, ut quamprimum mittat designatum ab ea Apocrisarium, ut in „regia nostra urbe degat, & in emergentibus sive dogmaticis, sive cano- „nicis, ac prorsus in ecclesiasticis omnibus negotiis Vestræ Sanctitatis „exprimat, ac gerat personam.“ Ex Oriente antiquo disce nunc novam, non Occidentis quidem totius, sed Germaniæ doctrinam in Curiis Archiepiscopali- bus dijudicare.

ARTICULUS IV.

De pontificiis Legationibus in Occidente usque ad S. Bonifacium.

§. I.

Jam inde a primis seculis in locis a Pontifice romano nimium diffitis, nec uni cuidam Patriarchæ, vel Primati subditis, quorum auctoritas jam ab origine non alia, quam ex illo universali fonte Petri Primatus derivata fuerat, apostolicæ Sedis Vicarii constituebantur, non tantum, quod falso nostrorum quidam asserunt, vi occidentalis Patriarchatus, quasi id juris sanctæ Sedi ab hominibus impetratum fuisset, sed vi ipsius apostolici Primatus divino jure fundati, id quod ipsæ antiquorum Pontificum litteræ non raro profitentur. In tanta, quæ hic occurrunt, documentorum copia difficilior est contrahere vela, quam expan-

*) Conc. Tom. III. Col. 1468.

expandere. Damasus, Siricius, Anastasius seculi quarti Pontifices pro toto Illyrico Thessalonicensem Episcopum tamquam Primate, hoc est, suæ apostolicæ Authoritatis Vicarius denominarunt, quorum exempla secutus Innocentius I, in eodem munere Anysium jam a suo Antecessore delegatum confirmavit, ita ad eum scribens *): „Cui etiam antea priores tanti, ac tales viri prædecessores mei Episcopi, id est, sanctæ memoriæ Damasus, Siricius, atque supra memoratus vir (Anastasius) ita detulerunt, ut omnia, quæ in iis partibus gererentur, Sanctitati tuæ, quæ plena iustitiæ est, traderent cognoscenda; meam quoque parvitatem hoc tenere iudicium, eandemque habere voluntatem te decet recognoscere.“

§. 2.

Hujusmodi delegationem pro causis cognoscendis idem Pontifex Rufo in Thessalonicensi Sede Anysii Successori concessit, simulque regiones recensuit, ad quas illa Legatio extenderetur, his verbis **): „Ut prudentiæ, gravitati quæ committendam curam, causasque, si quæ exoriantur per Achajæ, Thessaliæ, Epiri veteris, Epiri novæ, & Cretæ, Daciæ mediterraneæ, Daciæ ripensis, Mæsiæ, Dardaniæ, ac Prævali Ecclesias Christo Domino annuente censeam.“

§. 3.

Eundem Rufum ad muneris sui apostolici diligentiam Bonifacius I animat proposita ipsius S. Petri, cujus vice fungeretur, præsentia ***): „Intuetur enim te, ut epistolis tuis ipse fideliter es locutus, Beatissimus Petrus Apostolus oculis suis, qualiter summi Rectoris utaris officio: nec potest tibi esse non proximus, qui Pastor dominicorum ovium est perpetuus constitutus, aut aliquam ubivis positam Ecclesiam non curare, in quo universalis Ecclesiæ positum legimus fundamentum. Te ergo, Frater carissime! omnis cura respectat earum Ecclesiarum, quas tibi *vice Sedis apostolicæ* a nobis creditas recognoscere, ut & prava corrigas, & dissipata componas, & si quæ inter Episcopos eveniant causæ, sub divini iudicii timore distingas, ut creditis tibi a Sede apostolica gubernaculis contra omnes fluctus nascentium procellarum iuste, & prudenter utaris.“

§. 4.

*) Apud Coustant. Epist. 1 ad Anyf.
***) Epist. 5 ad Ruf.

**) Epist. 13 ad Ruf.

§. 4.

De Anastasio Rust Successore tam in Sede Theſſalonicenſi, quam apoſtolico Vicariatu ad Synodum Epiſcoporum Xyſtus P. III hæc ſcripſit *) „Nos Fratri & Coepiſcopo noſtro Anaſtaſio tantum tribuimus, quantum „Deceſſoribus ipſius a noſtris Deceſſoribus attributum. Priorum judi- „cium ſequimur hæc conſtituendo, quæ ab his novimus conſtituta, quin „& ipſum hujus probamus meriti, cujus fuerunt illi, qui talia meruerunt. „Nullus obviet ſalubribus conſtitutis, nullus præceptionibus his reſultet. „Habeant honorem ſuum Metropolitanſi ſingularum (provinciarum) ſal- „vo hujus privilegio, quem honorare debeant amplius honorati. In pro- „vincia ſua jus habeant ordinandi, ſed hoc inſcio, vel invito, quem de „omnibus volumus ordinationibus conſuli, nullus audeat ordinare. Ad „Theſſalonicenſem majores cauſæ referantur Antiſtitem.“

§. 5.

Quid ad hæc tam antiqua documenta noſtrorum Archiepiſcopo- rum Curialiſtæ? Hæc omnia, ajunt, ſine Metropolitanarum aliorumve Epi- ſcoporum præjudicio facta ſunt, prout expreſſe in ſuis epiſtolis Pontifices Innocentius, Xyſtus, Leo, alique declararunt. Bene eſt, accipio. Tunc ergo temporis, hoc eſt, quinto ſeculo, etſi ſatis ampla juridiſctione, qualem vidimus, Pontificis Vicariis delegata, Epiſcoporum tamen aut Metropolitanarum ſalva conſiſtere jura ordinaria credebantur. Atqui hoc manifeſtæ falſitatis, imo & iniquitatis convincit hodiernam prætenſionem, quaſi omnis delegatæ juridiſctionis facultas jam ſua ex natura epiſcopalium jurium violatio foret: ſummo enim Pontifici inaudito attentato prohibetur cum facultate quacumque Nuntium mittere. Quid eſt hoc, niſi ſubditos ſuo Capiti dominari, & repugnare ad violentiam uſque, toto ſiquidem Imperio ad reſiſtendum evocato?? His accedit, quod fatente Zaiwei- nio**), ſi qui forte exceſſus in Delegationibus contigerunt circa res be- neficiarias, vel judiciarias, illarum jam facta ſit ad æquum reſtriſtio tam per concordata Germaniæ, quam per ipſam Ss. Synodum Tridentinam. Super-eſt Catholicis ut credant ſanctiſſimi Papæ noſtri Pii VI aſſerto in Bulla ad Friſingenſem Epiſcopum die 18 Octobr. anno 1786: „Induci „non debes ad ullam formidinem, ne tua ordinaria jura lædantur, cum „id accidere omnino non poſſit, ſtatim ac non aliam auctoritatem habet „novus

*) Epiſt. ad Synod. Theſſal.

**) Tom. 4, Queſt. 2, Cap. 2, §. 4.

„novus Nuntius, quam quæ hactenus sine ullo ordinariorum jurium detrimento ab aliis Nuntiis fuit exercita.“

§. 6.

Neque solum in Illyrico, verum etiam in Gallia, Anglia, Hispania, Sicilia, Pontificis romani auctoritate delegati Primates, seu Sedis apostolicæ Vicarii existebant, quos brevitatis studio omnes præteribo, solis illis pro Gallia exceptis propter singularem nostræ Germaniæ, & antiquissimam a Gallis dependentiam, ita ut non solum profanæ, sed & ecclesiasticæ politiæ apud nos stabilitæ fundamentum illa gallicana videatur. Quid quod in ipsam adeo Africam, etsi paulo ante pontificiis Legatis admodum inimicam, S. Leo Potentium Episcopum misit, *qui curæ suæ vices gereret* *)? Ceterum cum africana illa controversia adversus pontificium Nuntium quotidie iterum recoquatur, præter jam dicta Coroll. præc. Artic. 4, §. 21 in tanta rei, ut illa est, obscuritate vix quidquam videtur historicæ veritati, & vel naturali æquitati conformius ad Romanos æque, ac Afros ab iniquis censuris vindicandos, quam quod laudatus Thomassinus scripsit **): „Incomperta prorsus erat Afris tunc Episcopis Sardicenfis Synodus, quamquam ei adfuisset Gratus Carthaginensis Episcopus. Itaque non facile venire poterat illis in mentem, Sardicenses Canones a Zosimo pro Nizænis sibi venditari: quod eo factum erat, quod solerent canones semper recentiores codici canonum vetustiorum subungi, in quo primo loco erant Canones Nizæni, ex quo fiebat, ut & quandoque citarentur omnes nomine Canonum Nizænorum. Ita Gregorius Turonensis Canonem Concilii Gangrensis laudavit alicubi pro Canone Nizæno. Ita dicti sunt Canones Apostolorum, dictæ sunt & apostolicæ Constitutiones. Ita Nizæni Canones dicuntur, qui in Collectione circumferuntur arabica, quia posterioribus seculis Codici Canonum Nizænorum, vel apostolicorum adtexti sunt recentiores Synodorum Canones, ita ut tota compilatio primævo semper nomine designaretur Nizænorum, vel apostolicorum Canonum. — Frustra sunt ergo Novatores, qui hic aucupati sunt anam debacchandi in romanis Præfules, eosque hac impetendi quasi conspiratione Episcoporum Afrorum. Non enim hæc erat Afrorum Præsulum conspiratio, sed hallucinatio, & stupenda historiæ ecclesiasticæ, Conciliorumque,

„&

E e e 2

*) Epist. 12 ad Episc. Afric.

**) Part. I, Lib. 2, Cap. 117, n. II. Cap. 118, n. II.

„& Canonum nescientia, facile hominibus condonanda ultra maria sub-
 „motis, & temporum difficultati, ac locorum, per quæ tunc non faci-
 „le trajici poterant in regiones longinquas monumenta litterarum: non
 „autem venditanda, quasi hinc romanis Pontificibus molestiæ quidquam
 „creari possit, a quibus probabile est Afros ipsos addidicisse, quod ne-
 „scierant, & Canones Sardicenses suis addidisse Canonum Collectioni-
 „bus.“ Non solum id probabile est, sed vere factum fuisse eventus
 docuit, cum brevi postea S. Leonis Legatum Afri receperint.

§. 7.

Hæc gallicanus Doctor Thomassinus longe alia, quam quæ re-
 centissimus Bonnenfis Mercator falsarum mercium, Hedderichus hostili-
 ter post Centuriatores protestanticos scripsit, *Canones Concilii Nizæni
 jam tunc a Romanis fuisse corruptos* *). Tanta in certis hominibus cor-
 dis malignitas sæpe ex crassa rerum ignorantia aut originem trahit, aut
 incrementum. Hedderichus certe ignorasse videtur virorum doctissimo-
 rum, e. g. Cardinalis d'Aguirre fortissima argumenta, quibus ille de-
 monstratum ibat, non tantum viginti Canones a Concilio Nizæno con-
 fectos fuisse, etsi forsitan tantum isti in quemdam veluti *extractum* sive
Summam collecti, & dispersis Ecclesiis communicati fuerint; sed Acta
 hujus Concilii a principio grande volumen implevisse, quod haud du-
 bie Romam perlatum, & longe plura seu *decreta* voces, seu *Canones*
 continuisse, dicendum est. Argumentum, quod prope ἀντιρρητον
 dixeris, epistola offert Julii I, qui a. 342, aliquot ergo annis ante Sardi-
 censem Synodum ad Episcopos Eusebianos ita rescripsit **): „Episcopi
 „in magna Synodo Nizæna congregati non citra Dei consilium prioris
 „Synodi acta in alia Synodo disquiri permiserunt, ut qui judicarent, præ
 „oculis habentes secundum futurum esse judicium, cum omni cautela
 „rem expenderent. — Quodsi hujusmodi consuetudinem antiquam sa-
 „ne, in magna Synodo memoratam, NB. scriptamque apud vos valere
 „nolitis, indecora fuerit ejusmodi recusatio.“ Ubinam in vulgatis vi-
 ginti Canonibus Nizæni Concilii hoc scriptum est decretum? Coustan-
 tius quidem Nota *b* contendit, quintum hic intelligi Canonem Nizænum;
 sed nemo non videt, quantam torturam hæc interpretatio & ipsi Cano-
 ni inferat, & inde extracto Julii adversus Eusebianos argumento. Ca-
 non

*) Differt. de jur. eccles. Germ. in Conventu Emisano explicatis.

**) Apud Coustant. Epist. 1, n. 2.

non V enim de singulari Episcopi, forsitan passione ducti, iudicio, non vero de Synodali loqui videtur; neque de alia reformatione iudicii, quam solum in provinciali Synodo: hinc toto suo robore destitueretur, & potius arma adversarii ministraret argumentum Julii ad suam romanam Synodum Orientales evocantis. Præterea post motam jam Afrorum de appellationibus controversiam, quæ S. Leoni ignota esse non poterat, ipse tamen Leo confidenter adhuc ad *Canonum Nizæ habitorem decreta* provocat *). Num id amplius fecisset, si solummodo Sardonenses Canones jus illud appellationum memorassent? — En saltem magnam dubitandi rationem!

§. 8.

Missa nunc hujus litis obscuritate ad clariora redeundum documenta, & specialiter quidem de gallicana Ecclesia, quorum compendii gratia tantum paucissima ex erudit. Selvaggio extraham **). Quinto jam seculo Arelatenſis Episcopus apostolicæ Sedis Delegatus, seu Vicarius fuerat, cui majorum etiam causarum cognitio permissa, illis tantum exceptis, quas ipse difficilius implicatas ambagibus definire sua sententia non posset. Manifeste id elucet ex epistolis Zosimi Papæ ad Episcopos Galliarum, in quibus diserte scribit, se Arelatenſi Episcopo in dijudicandis causis, quæ per Gallias exoriri possent, vices suas demandasse: *Ad cujus notitiam, si quid illic negotiorum emerſerit, referri censuimus, nisi magnitudo causæ nostrum requirat examen ***).* Id ipsum testantur aliorum Pontificum epistolæ, uti Leonis, Symmachi, Vigili, & Pelagii, ne quid de Gregorio M. dicam, de quo solo integrum librum conscribere possem, sed nolim esse diffusus in re omnibus abunde nota, qui vel a limine historiam Ecclesiæ salutarint. Legimus quidem controversias inter Galliæ Episcopos Arelatensem, & Viennensem ortas, cuinam tanta apostolici Vicarii prærogativa competeret, non legimus autem ullius Episcopi contradictionem, qua Pontificis jus suæ Potestatis Delegatos constituendi vel in dubium vocare quis ausus fuisset; sed potius usque ad S. Bonifacium, ne gallicanæ quidem civitatis Metropolitam, tantum apostolicæ Sedis Legatum, Episcopi gallicani summa reverentia apostolicis decretis se submiserunt. Unde adparet, quanto mendacio a quibusdam hodie spargatur, Delegationum

E e c 3

jus

*) Epist. 43 ad Theodol.

**) Antiq. Christ. Instit. Lib. I, Pars I, Cap. 16.

***) Epist. I, n. 3.

jus pontificium a Gallia numquam agnitum fuisse. Primus est, quem Curialistæ archiepiscopales hodie in exemplum adducunt, Bonifacio posterior Hincmarus. Res mira, superbum hunc Monachum, etsi cetera perdoctum, usque ad Archiepiscopatum Rhemensem evectum nostris diebus adeo laudibus celebrari! De hoc mox plura.

ARTICULUS V.

De Germaniæ observantia ab incunabulis usque ad Lutheri reformationem.

§. 1.

Ut quam firmissima quacumque de re judicia ferantur, optimum semper naturæ instinctu est visum, in ipsam rei originem, seu fundamentum indagare. Et quamvis Ecclesiarum ad Rhenum antiquior historia densis sit involuta tenebris; id tamen pro certo constat, ante Ludovicum, nostrum Bavarix ac Germaniæ Regem, labente nono seculo illas nullo sibi proprio regiminis jure gavisas, sed gallicano regimini sicut politico, ita & ecclesiastico subditas fuisse. Primam germanicæ Ecclesiæ propriam fundationem nostra exhibet vetus Bojaria. Avita Ducum nostrorum pietas, & erga apostolicam Sedem devotio non interrupta serie quasi cum sanguine transfusa, atque hodiernis præcipue diebus resplendens, sicut nunc singulari gloria pro conservandis Ecclesiarum Germaniæ juribus sese impendit, ita ea ipsa est, cui plures illarum suam debent existentiam, fundationem, dotationem, & respective omnes suam a gallicano jugo liberationem.

§. 2.

Ad radicem igitur magnæ hujus arboris, qualis hodie Ecclesia Germaniæ est, ut revertar, ejus plantationis primam epocham invenio seculi octavi initium. Theodo II Bojariæ Dux suscepto ad Apostolicum romano itinere redux a. 716 Legatos a Pontifice Gregorio II ad se missos Ratisbonæ suscepit, Martinianum Episcopum cum duobus aliis, Presbytero uno, altero Diacono, nomen illi Georgius, huic Dorotheus. Hisce Legatis in commissis datum, ut Ecclesias in Bojaria fundarent, regimen in tres, quatuorve Episcopos dividerent, unumque illorum præcipuum in Archiepiscopum, hoc est, stabilem apostolicæ Sedis Vicarium instituerent. Res optime consultata in illis temporum difficultatibus plenum non potuit effectum sortiri usque ad annum

num 739 per novam Legationem S. Bonifacii, magni Germaniæ Apostoli. Tunc tota Bojariæ regio in quatuor episcopales Sedes divisa, ita ut Joanni Salisburgum, Erimberto Frisinga, Gaubaldo Ratisbona, & Wiwiloni Passavium obtingeret, subditis ac relictibus cuilibet Episcopo Ducis Odilonis gratia assignatis, ipsaque jurisdictione spirituali a Gregorio P. III concessa. Papam inter, & Ducem solum tota res mutuo consensu confecta irrequisito vel Imperatore, vel Gallorum Rege *): Archiepiscopalis dignitas cum Pallio, quod erat apostolici Vicariatus signum, nisi jam tunc, certo posteriori anno 798 Pontificis Leonis III indulto Salisburgensi Episcopo collata. Hæc prima bavaricæ Ecclesiæ, tum vero & aliarum in Germania fundatio per apostolicam S. Bonifacii delegationem, Episcopis singulis speciali subjectionis juramento sanctæ Sedi adstrictis, quod unicum salubre remedium ad præcavendam disciplinam, ac fidei ruinam apostolico viro, S. Bonifacio experientia docto videbatur. Ab eodem Episcoporum Bojariæ institutio ad romanum Pontificem relata inde confirmationem recepit adjunctis ad Episcopos mandatis, ut duas per annum Synodos celebrent, in divinis officiis ritus romanæ Ecclesiæ sequantur, Ethnicorum, & Hæreticorum erroribus extinguendis operam dent, & NB. quocunque a pontificio Legato ad Concilium vocentur, prompte obtemperent **). Stupeat orbis, Archiepiscopos, qui Esse suum Pontificis indulto debent, quorum dignitas nulla est alia, quam romanæ Sedis Delegatio, qua cessante autoritate illam merito videas, optesque in umbram evanescere, Archiepiscopos hodie, ne dicam summo Christi Vicario, tantum Primate, sive Patriarchæ suo sese ex adverso opponere, & sub hoc quidem titulo, quasi jurisdictionis delegatæ Facultas juribus divinis, iisque illimitatis Ordinariorum repugnaret; quo titulo totam suæ existentie rationem una simul subruunt, ipsique evertunt. De ingratitude erga suæ Dignitatis Authorem, Protectorem, & Conservatorem, ac Patriæ Principem mundus judicet. Non est volupe mihi ad sublimiorem scopum aspicienti (foret autem facile) Palatino-Bavarici Electoris jura territorialia defendere Archiepiscoporum invasione temerata ***).

S. 3.

*) Notent sibi hoc Curialistæ archiepiscopales, qui in dubium vocare non crubescunt, an jus territoriale Ducum nostrorum, an illud Episcoporum antiquitate præcellat.

**) Greg. III Epist. 4.

***) Vide: Briefe eines Baiern zur Ausstellung eigener Landesbischöfe. Item: Meisner

§. 3.

Amplius oportet S. Bonifacii apostolicam Legationem ad Galliæ, & inferioris Germaniæ Provincias persequi. Res Ecclesiarum in miserum statum delapsas ipse in suis ad Zachariam P. litteris ita describit *): „Franci, ut seniores dicunt, plusquam per tempus octoginta annorum Synodum non fecerunt, nec Archiepiscopum **) habuerunt, nec Ecclesiæ canonica jura alicubi fundabant, nec renovabant. Modo autem maxima ex parte per civitates episcopales Sedes traditæ sunt Laicis cupidis ad possidendum, vel adulteratis Clericis, Scortatoribus, & Publicanis seculariter ad perfruendum.“ Tantis malis, ut mederentur summi Pontifices, Gregorius II & III, Zacharias, & Stephanus III, apostolici viri Bonifacii Legatione per continuos triginta sex, & amplius annos usi sunt. Erat Bonifacius, non Gallus natione, nec Germanus, sed Anglus, primum nonnisi Monachus & Presbyter, tum quidem Episcopus, sed nulli Galliæ Sedi adscriptus, amplissima tamen jurisdictione præditus, ad Concilia Episcopos & Archiepiscopos vocabat, iisque præerat, & nemo Gallicanorum Præsulum sub eo prætextu, quod jura sua ordinaria, & divina violarentur, sese opponere audebat. Ne hodie quidem Curialistæ archiepiscopales aperta fronte illam germanici Apostoli Legationem audent impugnare; sed necessariam illis tunc morbis medicinam fuisse fatentur, dum longo tempore Concilia pro disciplinæ restauratione tam efficacia negligebantur, Canones sacri ab Ecclesiis non servabantur, Vicarius nomine summi Pontificis nullus aderat, qui fideliter Romam referret, aut negligentes, & prævaricantes corrigeret, Clerici dissolutis suis moribus populum fidelem non ædificabant, sed scandalizabant, Laicique avari vel sibi, vel suis filiis bona ecclesiastica arripiebant. En tam periculoso morbo salubrem illius temporis medicinam, scilicet pontificiam Legationem! Num hodie Germania simili forsitan morbo non laborat, non periclitatur?? Anne ægrorum est de medici, aut medicinæ necessitate judicare? An ad mittendum Bonifacium in Gallias summi Pontifices reformatorum Episcoporum consensum explorare, & expectare debuerunt?

ne Gedanken über die sogenannte gründliche Entwicklung der Dispens- und Punctiatur-Streitigkeiten. 1789.

*) Conc. Labb. Venet. Tom. 8. Col. 228.

**) Archiepiscopus seu Primas intelligitur, hoc est, apostolicæ Sedis Vicarius: nam Metropolitæ etiam tunc Gallia habebat.

runt? an ut id fieret, vel a quodam Episcopo, aut Metropolita prætentum fuit? An romanus Pontifex Germaniæ Ecclesiis nunc injuriam infert, si primævo foundationis suæ jure erga illas utitur? Ad primas rerum origines, quo appellant, si nostros Metropolitans reducimus, nonne æquo jure cum ipsis contendimus?

§. 4.

Sed inquirunt post S. Bonifacii obitum Galliæ, Germaniæque Episcopi nullum amplius Vicariatum apostolicum admiserunt, quod ab exemplis Drogonis, & Ansegisi patet, quos etiam a Pontifice delegatos Vicarios-Episcopi tamen agnoscere noluerunt. Libens hæc duo exempla noni seculi accipio, inde duo demonstraturus, *1mo* nihil causam Archiepiscoporum hodiernam his exemplis adjuvari, *2do* plurimum vero aggravari. Primum quidem generale, certumque axioma est, *per mera facta nondum jus probari*. Hoc uno axioma tota quanta apologia Archiepiscoporum in Memoriali Salisburgensi suscepta, & Imperii Principibus propoſita *), uno veluti ictu prostrata jacet, nervisque destituta, quæ non est, nisi omnium adversus S. Sedem attentatorum collectio, & quorumlibet factorum semper hostilis, sæpe etiam dolosa, & falsa interpretatio, ab Authore Conſcripta non certe catholico profecta. Si subditorum resistentia jam potestate Superiorem exuat, væ Principibus! si impugnari jam idem sit, ac vinci, væ tibi sancta veritas! Hæc quidem in thesi, nunc vero in hypothesi.

§. 5.

Hincmarus Rhemenſis Archiepiſcopus, qui plura arroganter, ac violenter, imo etiam crudeliter adversus Clericos, ipsosque Episcopos attentavit, illorum Dux & Caput fuit, qui Drogoni & Ansegiso restiterunt. Non mirum, quod ille sibi Primatem præferri indigne tulerit, qui sua dominandi non tantum ambitione, sed & tyrannide totius Galliæ Primatum sibi ipsi arrogare tentaverit. Si verum est, hunc Pontifici potestatem negasse delegandæ jurisdictionis; id negavit Hadriani Capitulis, aut si ita velis, Isidori decretalibus in Gallia, Germaniaque civitate jam donatis, quas ipse in famoso Opusculo ad Nepotem faſſus est *venerabiliter suscipien-*
das.

*) Pro Memoria des H. Erzbischofes von Salzburg an den Reichstag zu Regensburg. 1789.

das. Si ergo ille sua erga Papam inobedientia transgressor Regulæ extitit; Regula est, quam nos sequimur, non hominis prævaricatio. Non possum hic silentio tegere, quod Salisburgensis Memorialis ad Imperium Concipista prætermisso S. Bonifacio suam apologiam pro Archiepiscopis ab exemplo hujus Hincmari inceperit, qui specimen fuit *superbiæ, dolositatis, crudelitatis, & duritiæ Pharaonicæ*: non mea hæc sunt verba, sed Nicolai P. I. Istine sint Patroni, & exempla Archiepiscoporum? Bone Deus, libera nos ab hoc malo!

§. 6.

Attamen utut alias iniquus ille Archiepiscopus Hincmarus, in hac tamen utraque causa Drogonis, & Ansegisi merito est excusandus: tunc enim non simpliciter de Legato jurisdictione prædito quoad quasdam causas Pontifici reservatas agebatur, sed de juribus ordinariis ab Archiepiscopis ipso Pontificis indulto jam iuste acquisitis. S. Bonifacius antea tribus Episcopis Rothomagensi, Rhemensi, & Senonensi dignitatem archiepiscopalem cum Pallio, hoc est, Apostolico, etsi magis restricto Vicariatu a Pontifice Zacharia impetraverat, quo facto illi immediate soli Pontifici, nullique amplius alteri Primati, seu Superiori Papæ Vicario subditi fuerant declarati: hinc institutio Drogonis & Ansegisi, utriusque tamquam ordinarii in Gallia & Germania Primatis merito subreptitia poterat videri, & Episcoporum renisum *N.B. debita cum reverentia conjunctum* experiri. Si ordinaria lædi contingat Episcoporum jura; nemo negaverit hisdem licere, coram Pontifice sua proponere gravamina: neque alios umquam, nisi æquos & benevolos experti sunt Pontifices. Quid hæc vero causa ad præsentem Archiepiscoporum controversiam? ubi nullius Ordinarii jus vel digito tangitur, tantum pro casibus sanctæ Sedi reservatis Facultates apostolico Nuntio concessæ sunt.

§. 7.

Non certe his exemplis adjuvatur, plurimum vero aggravatur inobedientium causa. Drogo quidem Metensis Episcopus Pontificis Sergii II, & Imperatoris Lotharii potestate suffultus facile repagula sibi obistentium perfringere potuisset, nisi ipse summa sua laude, quam vel Hincmarus non reticuit, pacem Ecclesiæ magis, quam suam cum populi scandalo victoriam adamasset, præstantissimo nostris Archiepiscopis exemplo. Neque etiam Patres Concilii Vernensis anno 844 ausi sunt dire-

Ab fronte summi Pontificis decreto sese opponere, sed potius discrimini subducere, & purgare se ipsos quaesierunt: *eoquod consensus esset expectandus eorum, de quorum jure ageretur, & quorum violentiam infirmarunt, cui resistere nec vellent, nec valerent.* Ansegisus vero Senonensis decreto Joannis P. VIII Ecclesiis per Gallias & Germanias apostolica vice Præpositus, cum ab Imperatore Carolo Calvo in Concilio Pontingovenſi anno 876 proponeretur; equidem contradictores invenit, de subreptione Pontifici facta conquerentes, postea tamen singuli Archiepiscopi dixerunt, *se velle Pontificis decretis obedire, sicut sui Antecessores illius Antecessoribus obedierunt.* Exitus hujus litis adhucdum hodie ignoratur. — Quod autem in utraque hac causa præcipuum est, nemine Episcoporum contradicente tam Droggo, quam Ansegisus in aula imperatoria *Apocrisarii*, sive ut tunc vocabantur, *Archicapellani* amplissima jurisdictione sacra per singulas totius regni Diœceses præditi fuerunt. Hanc jurisdictionis amplitudinem in Archicapellanis aulicis, quorum locum hodierni Nuntii tenent, apud Petrum de Marca, testem sibi non invisum ad sui confusionem Febroniani invenient *). Ita profecto pœniteat hosce Novatores ad veterem Ecclesiam gallicanam nos reduxisse!

§. 8.

Inde a nono seculo, & subsequētibz post Isidori Decretales præcipue Moguntinis fautoribus, uti ævo S. Bonifacii vicinis, ita ejusdem sui Apostoli spiritu adhuc plenis in Germania publicatas, jam & frequentiores Nuntiorum missiones evasisse res est, quam Novatores hodierni adeo non negant, ut ea potius suæ lamentationis, tantum non Jeremiacæ, sit materia. Scite tamen Doctor ipsis haud suspectus has retundit lamentationes inquires **): „Cumque Seculo XI omnis pene Clerus, contra quæ Episcopi nativam suam auctoritatem exerere aut non poterant, aut nolebant; huic malo medelam laturi Pontifices Legatos suos in diversas Provincias destinarunt, amplissima instructos potestate, non solum in Cleri inferioris, sed ipsorum etiam Præfulum mores, vitamque inquirendi, de modo, quo ad Episcopatum pervenerunt, cognoscendi, eosdem excommunicandi, deponendi, & id genus alia decernendi, quæ pro loci, temporumque circumstantiis necessaria judicarent.“

F f f 2

Tum

*) De Concord. Tom. 2, Lib. 4, Cap. 7, §. 8.

**) De Legatis natis. Cap. 1, §. 10.

Tum idem Bambergenſis Doctör in hanc rem teſtes vocat Baluzium, & Petrum de Marca, etſi alias romanis Pontificibus ſatis iniquos. Nempe morbo ingravescente opus est validiore medicamento, licet interdum acerbior. Sunt autem apostolici Legati quoddam Medicorum genus: si ægri reclament, nihil id, nisi ægritudinem, forsitan eo periculoso rem indicat.

§. 9.

Itaque extra dubium posita veritas historica est, quam sanctissimus noster Pius VI in sua ad Archiepiscopum Colonienſem epiſtola die 20 Januarii 1787 teſtatur: „Aliæ pariter Legationes a S. Nicolao I, qui miſit „Episcopum Arſenium in Gallias, & Germaniæ partes, & Donatum, Leonem, atque Marinum Conſtantinopolin; a Leone VII ad Episcopos „per Galliam, Bavariam, Allemanniam commorantes; a Paſchali II ad „Provincias Bituricenſem, Burdegalenſem, Auſcitanam, Turonenſem, & „Britanniam, quas confirmavit Calixtus II; atque illa præſertim Legatio „animadverti debet Adriani IV ad Hillinum Trevirenſem Archiepiscopum, ut per univerſum Theutonicum Regnum vices ſuas gereret, ibique Legationis officio apoſtolicæ Sedis auctoritate fungeretur. Ob quam Legationem „irritatus Arnoldus Moguntinus eidem poſtea acquievit, & NB. nomine Pontificis Moguntiæ Hillinus cum magna gratulatione fuit introductus. (Ipſum Honthemium, ſeu Febronium in teſtem vocat Sanctiſſimus). Ac ita jus apoſtolicæ Sedis non interrupta Nuntiorum ſerie ad „hæc uſque tempora illæſum ſervatum eſt.“ Scimus, quia verum eſt teſtimonium hoc Apoſtolicæ Papæ: falſum autem eſt, iterumque dico, falſum illud Colonienſis Memorialis ad Principes Imperii aſſertum §. 3: *Judicia Pontificiorum Nuntiorum notorie nulla inveniri poſſunt in hiſtoria eccleſiaſtica priſtini & mediæ ævi* *).

§. 10.

Sed en fulgur e pelvi! ad odium ſanctæ Sedi conſlandum diſperſa quævis colligunt facta ab inimicis, & gravamina hinc inde propoſita propter Nuntiorum quorundam non jurisdictionem ſacram, ſed in bona temporalia inſaſionem. Facta enim inimica jus non deſtruunt, neque uſus propter abuſum eſt tollendus. Fatemur & Nuntios fuiſſe homines: & nihil

*) Pro Memoria des H. Churfürſten, und Erbiſchofes von Köln an den Reichstag zu Regensburg 1788.

hil humani alienum ab illis putandum est. Breviter isthæc doctis. Zacharia expedit in Antifebronio vindicato *): „Horret animus ea recolens, quæ de episcopalis auctoritatis abusibus passim in ecclesiasticis referuntur annalibus. Quis nisi desipiat, hinc licere sibi existimet Episcopos a suis legitimis juribus deturbare?“ Speciali autem hoc loco castigatione indiget Salisburgensis Memorialis Concipista, qui hostilia quælibet contra Unctum Domini undeunde corradens, nec pudenda suorum Patrum detegere erubuit, ut adeo memoriam refricaret Eberhardi II, quæ in maledictione est. Si facta ejusmodi probrosa quidquam efficerent, Superi! quanta possemus ad confusionem Salisburgensium ex annalibus producere! Quid vero ad annales recursum in hujusmodi opus est?

§. II.

Germanicæ Ecclesiæ libertatis, quam hodie prætendunt, fundamentum est Basileense Concilium, quatenus Principum Concordatis firmatum. Ego quidem super. Coroll. 4, Art. 5 hujus asserti falsitatem jam **PLENA IN LUCE** ostendi; attamen hic prætermitti non potest, quomodo Novatores etiam dato illis, quod volunt, adhuc propriis armis se ipsos conficiant. Memoriale Colonienſe §. 8 ita argumentatur: „Si in decretis Concilii Basileensis *de causis & appellationibus* clare statuitur, ut in prima instantia Episcopi, in secunda Archiepiscopi, in tertia Nationales Judices sententiam dicant; jam nullo modo Pontifex committere potest, ut per suos Nuntios id fiat.“ Ponamus nunc verum esse suppositum, quod tamen verum non est, huic Basileensi Decreto vim pacti inesse; hoc ipso ex pacto sædisfragos se probant Novatores. Pontificia enim Potestas Nuntios cum Facultatibus constituendi, ne hoc quidem Basileensi Decreto excluditur, imo satis aperte eo ipso admittitur. *1mo* quidem hoc decretum unice spectat jurisdictionem *contentiosam*: ergo totus quantus, isque amplissimus campus jurisdictionis *arbitrarie*, quatenus pro diversis Ecclesiæ necessitatibus expedit, in libertate Pontificis manet, prout vi officii hanc jurisdictionem vel per se, vel per suos Legatos æstimaverit exercendam. *2do* In hoc decreto, quo *contentiosa* Pontificis jurisdictio restringitur, expresse excipiuntur causæ majores, quæ plures sunt, uti quæstiones fidei, translationes, depositiones, & cessiones Episcoporum, Coadjutorum concessionem, uniones, & divisiones Episcopatuum, & canonizationes. *3tio* Pariter excipiuntur causæ Monasteriorum im-

F f f 3

diate

*) Part. 3, Dissert. 6, Cap. 6,

diate Pontifici subiectorum. 4to Præter eos, qui de jure ordinario judices sunt, expresse alii nominantur judices, qui tantum ex consuetudine præscripta, vel etiam privilegio cognitionem habeant. 5to Denique falsum est, per Judices in Partibus præcise Nationales præscribi, dummodo sint tales, quibus aut de jure, aut ex consuetudine præscripta, aut privilegio aliqua jurisdictio competat. Hæc omnia ex ipsa Decreti littera tam clara sunt, ut vel Protestantici Doctores non dissideantur e. g. D. Mohlius *).

§. 12.

Unde LUCE MERIDANA clarius est, contra hoc Basileense Decretum agere illos, qui omnem jurisdictionem pontificis Nuntiis velint auferre. Quod si hoc ipsum decretum vim pacti publici, aut legis fundamentalis in Imperio habeat; quid cogitandum de hodierno molimine Facultatem quamcumque a Pontifice delegatam Nuntiis apostolicis interdicens? quid cogitandum de obligatione per Capitulationem cæsaream a. 1519 primum Carolo V imposita, inde semper continuata, a moderno Imperatore Josepho II jurejurando in se suscepta, *romanam Sedem, & pontificiam Sanctitatem* Art. 1, item *Concordata Principum*, quibus hodie prædictum Basileense decretum annumerant, verius autem Concordata Principum *Abschaffenburgensia*, in quibus delegandæ jurisdictionis facultas expresse Pontifici asseritur, Art. 16 defendendi??

§. 13.

Attingimus nunc ipsam sacrosanctam Synodum Tridentinam, omnium Catholicorum professione æcumenicam, Dei Spiritu gubernatam. Quidquid humani pulveris ecclesiasticæ disciplinæ hæc sancta Synodus invenit aspersum, studuit sane sapientissimis decretis detergere. Si quæ hodiernis diebus particularium Ecclesiarum faciem coinquant illas, non eæ certo sunt alia, quam sanctorum in Tridentina Synodo statutorum prævaricationes. Experientiam testem invoco, an romana Mater, an filia præsertim germanicæ sacrorum Canonum sint observantiores? Nuntios autem pontificios quod spectat; quos pristina ætas in illis abusus tulerit, si æquo ac sincero sis animo, fatearis oportet, singulari cura in favorem Episcoporum emendatos, illorumque potestatem justis limitibus coarctatam fuisse, ut jam omnis conquerendi, vel murmurandi

*) Untersuchung der Frage: In wie ferne Streitigkeiten in der deutschen katholischen Kirche zur reichstäglichen Berathschlagung geeignet sind. 1788.

di materia videatur ablata. Sic *Seſſ. 22 de Reform. Cap. 5* ſtatuitur: „Ut
 „diſpenſationes quæcumque, & gratiæ pontificiæ non Nuntiis, ſed Epi-
 „ſcopis NB. *tamquam Delegatis apoſtolicis* committantur pro examina-
 „an preces ſub-vel obreptionis vitio non ſubjaceant. *Cap. 7* ut Le-
 „gati, & Nuntii apoſtolicæ tam in admittendis appellationibus, quam
 „in concedendis inhibitionibus formam, & tenorem ſacrarum conſtitu-
 „tionum ſervare teneantur. *Cap. 8* ut Epifcopi *tamquam Sedis apoſtolicæ*
 „*Delegati* jus habeant viſitandi quæcumque pia loca, quorum cura ad
 „Laicos pertineat, ſolum Regibus exceptis, etiamſi illa exemptionis pri-
 „vilegio munita ſint. *Cap. 10*, ut Epifcopi quoscumque Notarios etiam
 „apoſtolicos poſſint ad examen vocare, illisque non idoneis repertis,
 „aut in officio delinquentibus ejusdem officii uſum perpetuo, aut ad
 „tempus prohibere.“

§. 14.

Seſſ. 24 de Reform. Cap. 5 decernitur: „Ut cauſæ criminum gra-
 „viores contra Epifcopos ab ipſo tantum Pontifice cognoscantur, &
 „ſi neceſſario extra romanam Curiam ſint committendæ, nulli Nuntio,
 „ac nemini prorsus committantur, niſi Metropolitanis, aut Epifcopis
 „a Papa eligendis. *Cap. 20*, ut cauſæ omnes eccleſiaſticæ, tantum
 „quibusdam ſpecialiter exceptis, in prima inſtantiâ coram Ordinariis lo-
 „corum dumtaxat cognoscantur, neque appellationes ab eiſdem inter-
 „poſitæ per Superiores quoscumque recipiantur, niſi a definitiva ſen-
 „tentia, vel definitivæ vim habente. *Item* ut Legati etiam a Latere,
 „aut alii quorumcumque facultatum vigore non ſolum Epifcopos in præ-
 „dictis cauſis impedire, aut aliquomodo eorum juridiſtionem iis præri-
 „pere, aut turbare non præſumant, ſed nec etiam contra Clericos,
 „aliasve perſonas eccleſiaſticas, niſi Epifcopo prius requiſito, eoque
 „negligente procedant: alias eorum proceſſus, ordinationesve nullius
 „momenti ſint.“ En, pacifice Lector! quam ſalubria ad levandum re-
 „media SS. Patres Tridentini ordinaverint, ut viam renovandis grava-
 „minibus præcluderent! An vero romana Sedes tam ſalubres Concilii or-
 „dinationes obſervat? Mendax fores, ſi negares. An ſalubria Tridentini
 „ipſiusque Baſileenſis ſtatuta æque fideliter in germanicis Archiepiſcopati-
 „bus obſervantur?? Dic Sodes! Quænam ergo Metropolitanis gravandi
 „materia, niſi ſi ipſa gravis ſit erga Pontificem, & Eccleſiam ſubjectio,
 „ac obedientia?

§. 15.

At enimvero eadem sacrosancta Synodus Tridentina quam benevolam sese Episcopis præstitit, tam & justam se probavit in custodiendis apostolici Primatus divinis juribus, ut Nuntiaturas cum Facultatibus junctas, etiam perpetuas adeo non reprobavit, ut expresse etiam asseruerit. *Ita Sess. 22 de Reform. Cap. 2* statuitur: „Ut de Episcopi noviter electi qualitatibus instructio Papæ facienda a Sedis apostolicæ Legatis, & Nuntiis apostolicis Provinciarum fieri possit. *Cap. 7* jus appellationes admittendi, dummodo secundum formam sacrorum Canonum Legatis, & Nuntiis apostolicis expresse vindicatur. *Sess. 24 de Reform. Cap. 20* pariter Legati, aut Nuntii cum Facultatibus agnoscuntur, tantum ut in ordinariis causis Episcopos non impendant; attamen Episcopo prius requisito, & negligente secundum Facultates suas procedant.“ Hæc igitur jura sunt, hæc leges sanctæ nostræ romano-catholicæ Ecclesiæ, in Patria nostra jam receptæ, & seculorum possessione tranquilla roboratæ. Siqui nolint his legibus teneri, corporis nostri, seu Societatis nostræ legibus noverint se non teneri invitos. Qui nolint nobiscum esse, exeant ex nobis: *Numquid & vos vultis abire?* Joann. 6.

ARTICULUS VI.

De Nuntiaturis in Germania, inde a Reformationis ævo usque ad hodiernum.

§. I.

Clamorosa nostris diebus lamentatio est, post Tridentinum Concilium nova in partibus Germaniæ, antehac incognita romanarum Nuntiaturarum tribunalia fuisse introducta. Profecto nostri Novatores sibi non constant: alii sicut universim omne, quod dicunt, malum, sic in specie Nuntiaturas Isidoro Peccatori imputant, alii contra illum ab hoc peccato purgant, magis isti Tridentino infensi, quod non uno loco Nuntiaturis, iisque stabilitis, firmum præstat præsidium. Novatores hodiernos Tridentino infensos putas tu Catholicos? — Sed ut clamoribus illorum aures præbeamus; tolle vanam de Nomine altercationem, & subito litis materiam, ceu discordiæ pomum videaris tibi sustulisse. Si enim rem spectes, in illo gravamine contra hodiernas Nuntiaturas duo falsa manifeste deprehendes. Primum est Nuntiaturas Germaniæ rem novam esse: nos enim

Art.

Art. 3, 4, & 5 jam demonstratum vidimus constitutos a Pontifice Vicarios, aut missos ejusdem Legatos in Aulis magnorum Principum residentes non novam rem, sed vetustissimam esse. Quid discordia dignum est, si Nuntios nunc vocemus, quos antiquitas seu *Vicarios*, seu *Archicapellanos* nominavit? Alterum non minus falsum est, tribunalia Romanorum Patriæ nostræ ante Tridentinam Synodum incognita fuisse. Ex quo christianam se profitetur Germania, nullo umquam tempore romana tribunalia eidem ignota fuerunt, sed illa semper in Imperio agnita, probataque, quod præc. Coroll. 4 demonstravi. En testem, contra quem excipere nec poteris, nec audebis. Is est Protoparens moderni gloriosissime regnantis Imperantis Rudolphus Habsburgicus, qui anno 1275 romano Pontifici suæ jurisdictionis protectionem his emphaticis verbis adpromisit: „Appellationes in negotiis, & causis ecclesiasticis ad apostolicam Sedem libere fiant, earumque persecutionem, siue processum nullus impedire præsumat“ (*). Romanæ ergo Sedis tribunal Germaniæ non ignota res, sed Imperii usu, pactis, & legibus firmissime fundata est. Quid criminis, si romanus Pontifex pro avertenda longi itineris molestia suum tribunal in partibus Germaniæ, quod Basileensibus in voto erat, delegat Misso apostolico, antea sibi jam bene cognito, satisque probato? cujus in jure publico peritiam si examinaveris, illa Archi- vel Episcoporum inferiorem haud certe invenies. Accedit hos Natione extraneos iudices in causis appellationum eo aptiores esse, quo e partium studio puriores. Hinc experientia teste a Theutonicis nostris plerumque major in hisce fiducia ponebatur. Vin, ut de Curialistis Nuntiorum, vel Ordinariorum quid addam??

§. 2.

Equidem inde a S. Bonifacio subsequenteribus seculis plerumque Archiepiscopi, tamquam Sedis apostolicæ Legati pontificium tribunal quasi suæ Sedi affixum tenebant, hinc gloriosum sibi titulum *Legati nati* assumentes; at hoc ipsum antiquam Pontificis auctoritatem probat, & suorum in Germania Legatorum jurisdictionem. Tribunal naturam suam non exuit, etsi pro diversa temporum ratione formam mutarit. Bonifacius in Gallia pontificio Nomine judex fuit, licet nullius Sedis esset Episcopus. Cum postea Legati, *Natos* intellige, ab officio suo descerent,

*) Lunig Cod. Ital. dipl. Tom. 2, p. 730.

scerent, non Legationis tantum, sed & propriæ pastoralis curæ; necessitas fecit, ut summus omnium Pastor alios delegaret Operarios, qui ipsos Ordinarios ad officium reducerent, eorumque negligentiam supplerent. Ea, quod nemo ignorat, tunc Ecclesiæ necessitas erat, dum grave vulnus Reformationis nostram Germaniam afflixit. Generali illa corruptione morum, ac hæresi jam grassante nihil movebantur Archi- & Episcopi, ut animum nervosque adplicarent ad malo huic remedendum; sed erant nisi ipsi morbo infecti, certe profundo sopore submersi, id quod Bavarici Legati ab experientia testes Romæ a. 1521 profitebantur: „Quod locorum Ordinarii negotium hujusmodi non, „prout est arduum & grande, ad honorem Dei — suscipiunt, & tra- „stant, quin imo circa illud torpentes, & circa correctionem criminum „personarum ecclesiasticarum scandalum inducentium negligentes exi- „stunt, & procul dubio eorum opera potius auxilio, quam impedi- „mento eidem hæresi forsan existat“ *). Nonne necesse erat ægris Medicos, hoc est, apostolicos submitti Legatos? Ita Legationum usus antiquissimus pro ratione temporis eam, quam hodieum habet, formam Nuntiaturarum induit. Quid in hac origine Nuntiorum displiceat, nisi malum ægritudinis, quod necessarios fecit, atque etiamnum facit Medicos?

§. 3.

Tres præcipue pro Germania Nuntiaturæ sunt, quarum singulæ a sua origine indagari vel maxime merentur. Prima est a. 1564 Græcii in Styria per pietatem Domus austriacæ instituta. Vix enim priori anno finita Tridentina Synodo, ut ejusdem sanctas constitutiones ad mores Cleri, populique reformandos, & pestem hæresis suffocandam, in terris suis vigere faceret pius Archidux Carolus, Ferdinandi I filius, mox regiminis sui initio apostolicum Nuntium Joannem Delfinum ad vocavit. Princeps iste Styriæ Dux sua *territoriali* potestate usus pro suorum subditorum religione conservanda id fecerat, quin vel Imperatoris, vel Imperii consensum antea sibi implorandum cogitaret: & inspiciente imperio Nuntii numero undecim tranquille Græcii ultra seculi dimidium residebant, suamque a Papa delegatam jurisdictionem exercebant, donec a. 1621 Viennam Austriæ Nuntiatura transferretur, quæ magna cum jurisdictionis amplitudine, & singulariter in Bavaricas terras
exten-

*) Apud Oesete Tom. 2, p. 275.

extensione usque ad novissimos annos substitit nemine Archi- vel Episcoporum, aut Imperii Principum contradicente. Nequidem Memoriale Salisburgense hujus Viennensis Nuntiaturæ tranquillam agnitionem audet impugnare, sed *toleratam* vocat, quam nos vidimus in terras Austriæ *advocatam*, & precibus a Pontifice impetratam. Quænam catholica auris ferat vocem summi Pastoris ex ore sui Legati resonantem *tolerari*, prout mala nobis odiosa tolerantur? non ergo benevole, ac cum obediendi promptitudine excipi? Oves sui Pastoris vocem *libenter* audiunt, non tolerant: pro dolor! vox luporum hodie *toleranda* est.

§. 4.

Tantum pro insigni suæ Sedis privilegio Archiepiscopi Salisburgenses reputabant, quod ab sua semel lata sententia non ad Nuntiaturam amplius, sed immediate ad ipsam apostolicam Sedem vi consuetudinis appellari deberet. Id, quicquid est privilegii, vel exemptionis a iudicio, Archiepiscopus sibi tamquam apostolico Legato *Nato* hæcenus vindicavit: privilegium vero, aut exemptio communem legem in contrarium supponit, prout axioma est: *Exceptio firmat regulam*. Habemus fatentem Zalweinium *): „Passim in Germania dari appellationes ad „Nuntios apostolicos, hinc inde in diversis locis residentes scimus. „Verum in hanc usque diem a Sede archiepiscopali nulla fuit concessa „appellatio ad Nuntiaturam, sed omnes appellationes recta via ad Pontifices sunt dirigendæ. Atque hoc jure utitur Ecclesia Salisburgensis „saltem ex possessione, & consuetudine immemoriali, numquam inter- „rupta, & in hanc usque diem continuata.“

§. 5.

Quod illa Græzii Nuntiatura ab Episcopis Baviaræ, ipsoque Salisburgensi tranquille agnita fuerit, documentum summe memorabile exhibent Bavarici Ducis Guilielmi cum Ordinariis inita a. 1583 Concor- data, quibus nomine Pontificis Gregorii XIII præerat Felicianus S. Agathæ Episcopus, per superiores Germaniæ partes Sedis apostolicæ Nuntius cum potestate Legati a Latere destinatus, præsentem in propria persona Georgio a Kuenburg, Coadjutore Salisburgensi, aliisque ejusdem Archiepiscopi Suffraganeis. Hoc documentum Hanfzius refert, quod sane obmutescere, sed & erubescere faciet Salisburgenses **). Quid, quod

G g g 2

*) Tom. 4, Quæst. 4, Cap. 2, §. 7.

**) German. sacr. Tom. 2, p. 639.

quod tanta amicitia inter laudatum Coadjutorem, & apostolicum Nuntium intercesserit, ut iste in ipsa Metropoli Salisburgensi suæ jurisdictionis *contentiosæ* exercitium peregerit in causâ Monachorum S. Petri de Patribus Franciscanis in locum Sanctimonialium introducendis *).

§. 6.

Vana sunt & inania, quæ in Memoriali Salisburgico opponuntur: omnia enim, & singula illarum oppositionum exempla a scopo divagantur, cum tantum probent Archiepiscopum, ejusque Suffraganeos contra Nuntiorum excessus vigilasse, ne in ipsorum jura ordinaria involarent, aut privilegia læderent; neutiquam vero illarum Facultatum, quæ soli Pontifici reservatæ sunt, delegationem impugnasse. E contrario improvidus Concipista se ipsum quasi data opera confutat exemplo Joannis Jacobi Archiepiscopi, qui suo in Styria Archipresbytero tantum in mandatis dedit, ut visitationi in Clericorum mores a Nuntio instituendæ præsens assisteret, & siquid in præjudicium suæ Dignitatis Metropoliticæ fieri observaret, cum modestia desuper Nuntium commonefaciat. Ipsam ergo visitationem, quæ insignis est Facultatis actus, admisit Archiepiscopus, nec juri suo contrariam judicavit: hoc unicum est, quod volumus; excessus seu abusus cum Ordinariorum præjudicio neque Sanctissimus Papa Pius VI permittit, neque nos defendimus. Ultimo loco ut a Memoriali Salisburgico me breviter expediam; monitum velim Concipistam, quomodo fidem suam catholicam probet, qui pag. 34 scribens: *quod Imperator Nuntio omnem a Pontifice delegatam jurisdictionem abstulerit*, aperte doctrinam tuetur jam ab Ecclesia inter hæreticas Protestantium damnatam, *Principibus jurisdictionem ecclesiasticam competere*. Nisi fidem suam probaverit ille Curialista; inter Catholicos, & fidei fratres eundem numerare non possumus.

§. 7.

Altera Nuntiatura est illa Helvetiæ, quæ natales suos S. Carolo Borromæo debet: quam sancta origo! eam Fleurii Continuator ita describit **): „Cum gravissimis ex causis (S. Episcopus) Mediolanum reverti „cogeretur; summum Pontificem impense rogabat, ut pro reliquis Diocæ- „cesibus visitatores apostolicos nominare velit: insuper eoquod idem hic „Sanctus Religionem catholicam apud Helvetios restaurari ardentissimè „votis desideraret, hinc summis precibus eundem Papam obsecrabat, ut „ad

*) Ibid. p. 644.

**) Hist. eccles. Tom. 49, p. 562 — 564.

„ad hasce regiones etiam Nuntium Apostolicum decerneret, singulari
 „munitum Facultate. — Igitur Gregorius XIII ad S. Præfulis preces hanc
 „curam demandabat Joanni Francisco Bonhomini, Novarenſi Episcopo
 „&c. Porro ab illo temporis articulo summus Pontifex semper Helvetios
 „Nuntii apostolici præsentia honorabat.“ Ita vel hujus Historici judicio
 Nuntii apostolici præsentia in quadam regione pro singulari favore & gra-
 tia romani Pontificis habebatur: hinc in Patribus nostris summa erat erga
 apostolicum Legatum reverentia, qualis in Helvetiis etiamnum est. De
 S. autem Carolo Borromæo, qui hujus Nuntiaturæ Auctor merito dicen-
 dus est, velim, nostræ Germaniæ Archiepiscopi nos edoceant, an san-
 ctus ille Mediolanensis Archiepiscopus jura divinitus cum Episcopatu con-
 juncta intellexerit, atque obſervavit, an vero secus? *Baptiſmus Joannis*
ex Deo fuit, an ex hominibus?

§. 8.

Cum postea Sixtus V pro Helvetiæ catholicis Statibus Nuntium
 delegasset Joannem Sanctorium, Tricaricensem Episcopum; is indiſtis
 Ordinum Comitibus, ut funestum Religionis statum in hisce terris curaret,
 perpetuum sædus inter Sedem apostolicam, & Helvetios pangere niteba-
 tur, prout in Fleurii historia legitur *), „tam prospero conatus sui suc-
 „cessu, ut Helvetii summam, quam poterant, submissionem polliciti in
 „sacrae Sedis, fideique obsequium semetipsos, sua bona, vitamque devo-
 „verent, ac coram altari in genua provoluti, & in ipsa Evangelii verba
 „jurantes sponderent, quod filialem hanc servitutem, cui sponte se man-
 „ciparent, fide nunquam violanda profiteri vellent.“ Ita latina hujus
 loci versio, in qua, nisi pharisaica interpretatio accedat, non est, nisi
 ardens, sed sana tamen fidei suæ devotio ad filialem sui erga sanctam Se-
 dem subjectionem; aliter tamen a quibusdam gallici idiomatis textus ori-
 ginarius producitur, ubi acris censura in Helvetios fertur, *quasi ad exceſ-
 sum usque, ac servilem quandam speciem mancipii se subjecissent.* Quid inde,
 si Fleurii Continuator anonymus tam mordacem crisin adversus Helve-
 tios tulerit? Notum est, illum scriptorem longe inferiore loco stare,
 quam Fleurius, qui ipse non raro, præcipue in *Dissertationibus*, vel præ-
 judicio, vel odio adversus sanctam Sedem abreptus historicam veritatem
 læſerat.

§. 9.

Non abs re fore judico brevem digressionem nostris temporibus opportunam: in illum Fleurianæ historiæ Continuatore doctiss. P. Alexander Carmelita Augustanus, qui eidem operi ultimam manum imposuit, hanc memoratu dignissimam fert censuram *): „Id omnino certum est, plura in Continuatore reperiri, quæ sane censoria virga perstringi merentur: hic enim Author vituperanda æmulatione Fleurium, cujus historiam continuare voluit, imitari, & assequi studiosus, pariter obvia quævis, dummodo summis Pontificibus, aliisque Præfulibus, & Monachis invidiam accerere possent, sine veritatis criterio, absque selectu ac debita moderatione corradebat, suæque historiæ intrudere, non erubescibat: quapropter haud paucos, eosque eruditos Censores, in suum sibi Caput accerfebat, quos inter Plur. Rev. atque eximius Dom. Stevart Theologiæ Licentiatus, Canonicus, atque Ecclesiæ Metropolitane Mechliniensis Decanus, nec non librorum Censor de hac continuatione sequens fert judicium: *Continuator in suis libris plures alias propositiones falsas, malignas, & reprehensione dignas exponit, adeo, ut si omnes referre oporteret, integro volumine necesse foret.* Præcipue idem Censor præter alia Continuatori objicit, quod maximam illorum gestorum, quæ allegat, partem tam ex Authoribus schismaticis & hæreticis, quam ex aliis hauserit, quorum libri a sacra Sede severe sunt prohibiti, quales sunt Syuopulus, Orthuinus, Gratius, Clemangius, Goldast, Caue, Vanderhart, Lenfant, Limbourg, Niem, Panormitanus, Platina, Dupin, Leti &c. Eundem quoque sugillat, eoquod celeberrimos quatuor Cleri gallicani Articulos, a. 1682 fabricatos, atque a Ludovico XIV revocatos amplius elogiis celebret, *quævis hi in perpetuum ignominiam, dedecus, atque Ecclesiæ gallicanæ confusionem cedant.* Denique præter plura alia, quæ idem Censor in præfata historiæ Fleurianæ Continuatore carpit, merito observat, quod de pluribus summis Pontificibus, alias tam virtutum merito, quam Sanctitatis laude celeberrimis indignum in modum disserat, ac præ ceteris Innocentium VIII a Scriptorum potissimis dilaudatum atrocibus calumniis obstruat, adeo ut credi valeat, *quod Continuator Philippi Mornay, & Furieu, qui ceteris magis furiosi Pontificum hostes, nec non impudentissimi suo ævo calumniatores erant, libros transcribere voluerit* **). Inde Authores cognos-

*) Tom. 51, pag. 6c5.

**) Si hæc de Fleurii Continuatore; qualis censura in Viennensem Schmidium ferenda? si hoc in viridi, quid in arido?

cognoscere discas, ex quibus, cœu fontibus hausta est scientia, quam plerique nostro ævo inflatis buccis deprædicant.

§. IO.

Tertia Nuntiatura est Colonienfis, eaque Metropolitanis inferioris Germaniæ durissimus lapis offensionis. Hujus origo ex propudioso facto Archiepiscopi Gebhardi de Truchses repetenda est, qui cæca libidine æstuans non solum ipse ab Ecclesia defecit, sed & malis artibus suos subditos ad deficiendum pellicere conabatur. Remedium salutis Colonienfes Catholici viva gratulatione adhucdum Nuntiaturæ apostolicæ in acceptis referunt. Auscultemus Sanctissimum Papam nostrum, Pium VI, qui a. 1775 Nuntium Bellissimum Coloniæ delegans, publico sermone ita rei pudendæ historiam narravit: „Originem hujus-
„ce ad tractum Rheni Legationis non possumus sine acerbissimo animi
„sensu mente repetere, quia repetenda ab iniquissimo scelere Gebhar-
„di Truchses, Archiepiscopi Colonienfis, quem sacrilego connubio
„junctum cum sanctimoniali Agnete Mansfeld Gregorius XIII, Antecessor
„noster pontificio suo decreto exauthoravit, dirisque devovit.
„Atque hæc causa fuit, cur non ut antea, extraordinarius Nuntius
„solum pro re nata, ac temporum necessitate ad eas Regiones legaretur, — sed ab eo tempore decerneretur, ut in iis regionibus ordinarius Nuntius constituto sibi ibidem domicilio resideret, qui sua
„præsentia aut mala præcaveret, aut certe nulla interposita mora repararet. Primus, qui hunc in modum ablegaretur, fuit Joannes Franciscus Bonhomo, Episcopus Vercellenfis“ Hæc itaque institutio Nuntiaturæ jam ab origine sua ordinariis Nuntiorum Facultatibus præditæ, quod ipse modernus Colonienfis Archiepiscopus in sua Instructione quadragesimali a. 1787 fatetur, ex eo tempore, quo Nuntius apostolicus propter apostasiam Gebhardi missus est, dispensationes pontificias ab illo petitas, & impetratas fuisse.

§. II.

Quam ob rem detecta jam fere tota ars est Memorialis *Bonnenfis* *) Imperii Principibus oblata, quod originem Nuntiorum a tertio primum Nuntio Coriolano incipit, quasi tantum extraordinarius is Nuntius

*) Bonnenfē illud Memorabile voco, quia neque *Colonienfis* Diœcesis, neque civitatis est, sed tantum aulæ electoralis.

tius fuisset, septemdecim annorum Coadjutori Ferdinando Bavarico adjunctus, & non sine consensu Electoris Ernesti, ac Capituli a. 1595 unice pro illis circumstantiis admissus. Singula hæc falsa sunt. Nam 1^{mo} Nuntius Bonhomo jam a. 1584 cum ordinariis facultatibus a Gregorio XIII fuit missus non tantum pro unico, ac transeunte casu, sed pro generali negotio orthodoxæ fidei partim restituendæ, partim conservandæ, nec solum ad Ecclesiam Coloniensem, sed ut Legationis decretum habet *), ad Moguntinensem, Trevirensensem, Basileensem, Argentinensem, Baderbornensem, Leodiensem, Luxemburgensem, ceterasque inferioris Germaniæ, Belgarum, & Duci Clevenfi, & Juliacensi subjectas Provincias. Tantum reparandæ religionis negotium non certe unius, alteriusve anni, sed experientia teste, ne unius quidem seculi, & alterius opus fuerat. 2^{do} Romanus Pontifex ad Nuntiaturæ hujus institutionem nec Colonienfis, nec alterius cujuscumque Archi- vel Episcopi consensum petiit, aut expectavit, sed officii sui curam exercens potestate sibi a Deo tradita apostolicum Legatum pro fide reparanda in has partes Germaniæ misit. Id de ipsa intellige spiritualis jurisdictionis delegatione; aliter tamen dicendum de residentia corporali, seu de loco, ubi stabilem Sedem erigere Nuntius deberet: hanc Pontifices numquam sine amicabili compositione cum territorii Domino transacta suis Nuntiis assignarunt. 3^{tio} Coriolanus non solum tamquam extraordinarius Legatus juveni adhuc Ferdinando fuit adjunctus, sed in locum Antecessorum suorum surrogatus, & æque, ac illi opportunis Facultatibus stabiliter instructus, NB. quibuscum tamen salva subsistere credebatur ordinaria Episcoporum jurisdictio. Tam longe illa tempora a falsa nostrorum aberant persuasione, Legationem cum Facultatibus jam sua natura juribus Ordinariorum præjudicare! ...

§. 12.

Videamus nunc, qua libertate, & tranquillitate apostolici hi Nuntii tam intra, quam extra Coloniensem Provinciam suum ministerium executi fuerint. Bonhomo *vita sanctimonia clarus, & rara eruditione, nullisque muneribus corrupendus* Leodii Synodum indixit, Tridentinum Concilium publicavit, reformando Clero operam dedit, & utilia fecit statuta. Gloriosum hoc de eo testimonium dant Leodienfis Synodi acta **): „Synodus Leodienfis an. Christi 1585 Sixti V. P. M. 1^{mo}, „Ro-

*) Apud Harzheim Conc. germ. Tom. 3.

**) Conc. germ. t. c. p. 498.

„Rodulphi Imperatoris gno, sub Ernesto, Duce Bavarico, Archiepi-
 „scopo Colonienſi, Epifcopo Leodienſi &c. Præſidente Joanne Franci-
 „ſco Bonhomio, Epifcopo, & Comite Vercellenſi.“

§. 13.

Bonhomini alter Nuntius ſucceſſit Octavius Frangipani, qui lon-
 go tempore Coloniae reſedit, & ampliſſimam juridiſtionem exercuit,
 antequam Princeps Bavaricus Ferdinandus in Coadjutorem Archiepiſco-
 pi eligeretur. Is plura decreta concepit in Synodo publicanda, ſed
 ante advocatus a. 1596 illa typis commendavit, atque noviter electo
 Coadjutori dedicavit. Quam ampla juridiſtione ſub Archiepiſcopo
 Ernesto ſit gaviſus, ipſe in *Epiftola dedicatoria* declarat his verbis: „Ad
 „inveterata igitur quævis mala perrumpenda, & eradicanda, omnem-
 „que nequitiam ex hominum pectoribus proſligandam, nihil ex mune-
 „re meo duxi eſſe valentius, quam ex majorum Inſtituto, ac ſacroſan-
 „cti Concilii Tridentini decreto, & SS. D. N. Clementis optima volun-
 „tate Eccleſiam juvandi cogere Cleri Cætum, in aſſiduum uſum revo-
 „care Synodos, inſpicere omnium, & maxime hominum eccleſiaſtico-
 „rum mores, diſciplinam revocare neglectam, lapſam & jacentem eri-
 „gere, adſtringere ſolutam, ornatum atque decorem domus Dei tueri,
 „omnique ſpe, ſtudio, atque labore adniti, ut quæ ſapienter, ſanctè,
 „& utiliter Canonum, Conciliorumque decretis, ac Patrum ſtatutis,
 „& definitionibus ſancita, præſcripta, & mandata ſunt, non tam ora-
 „tione, aut librorum foliis comprehendantur, quam acri, efficaci, &
 „perenni rerum gerendarum ſtudio vere appareant, & aſſiduo opere
 „exhibeantur. Quæ mihi, cum in civitate Colonienſi degebam, non
 „in votis dumtaxat erant, ac intimo, ſummoque cordis deſiderio, ſed
 „quoque in deſtinata actione, deſinitoque conſilio, ipſoque operis pro-
 „cinctu.“

§. 14.

Nuntio Frangipani ſucceſſus eſt primum Coriolanus, huic viven-
 te adhuc Ernesto Attilius Amalteus Athenarum Archiepiſcopus, Amal-
 teo Antonius Albercati, atque huic a. 1624 Aloyſius Carafa, ſinguli or-
 dinariis Nuntiorum Facultatibus inſtructi. Hodiedum celeberrimus eſt
 Carafa, qui Legationis ſuæ decennalis aſta Leodii a. 1634 typis publica-
 vit, ex quibus pro variis Diœceſibus excerpta quædam ſunt memoratu

H h h

digniſſi.

dignissima: & quidem *pro Wirzeburgensi*: „Cum oborta fuisset contro-
 „versia inter Herbipolensem Episcopum, & Fuldensem Antistitem oc-
 „casione jurisdictionis, quam ille usurpabat in S. Sixti præposituram,
 „utpote sitam intra limites propriæ Diœceseos, etsi membrum erat
 „Abbatîæ Fuldensis, & exemta ideo censebatur ab ordinaria Episcopi
 „potestate; dedi ad eos ambos finitimos Principes amicas epistolas, &
 „sum hortatus, ut animo essent mutuo, controversiamque dirimerent;
 „cum vero nihilominus eam ipsi non sedarent, intercessi autoritate.
 „Voluit tunc Herbipolensis Episcopus Legationis meæ forum declina-
 „re, quasi ad tribunal Nuntii Viennensis Episcopatus ejus, velut pars
 „superioris Germaniæ pertineret; sed ego per epistolas officiosas, & ef-
 „ficaces ostendi, Episcopos quosque suffraganeos ad proprii Metropoli-
 „tani Legationem spectare, nisi peculiariter litteris pontificiis ab ea eximan-
 „tur: proinde ipsius Episcopatum spectare ad Nuntium Rheni, ad quem
 „spectat Moguntinus Archiepiscopus, ejus Metropolitanus. Sed & ad-
 „jeci procellum electi Episcopi Herbipolensis a solo Nuntio Rheni for-
 „mari consuevisse; hoc autem esse munus proprii Nuntii, indicari in
 „Diplomate Gregorii XIV. Quocirca agnovit ille ita esse, finem con-
 „troversîæ imposuit, & de eo sponte ad me retulit per litteras sane be-
 „nevolas. Sæpe etiam, ut dispensationes in gradibus impediendis
 „matrimonia impetrare Romæ, perrogavit, & aliquanto post unum
 „e Consiliariis suis causâ officiorum pariter, & negotiorum ad me Leo-
 „dium venire jussit.“

§. 15.

Pro Colonienfi Archidiœcesi. „Dispensaverat frequentissime Colo-
 „nienfis Archiepiscopus, seu generalis ejus Vicarius, tum ut sacri or-
 „dines, si qui eis inaugurari citius deberent, extra consueta tempora
 „conferrentur, tum ut inirentur matrimonia inter consanguineos, &
 „affines tertio & quarto gradu consanguinitatis, vel affinitatis. Suberat
 „vero ei persuasio, id ex veteri seu consuetudine, seu prærogativa li-
 „cere: quod cum ego tamen adversari sacris Canonibus non ignora-
 „rem, ad summum Pontificem de ea re censui referendum esse. Tum
 „vero reperti Romæ sunt Codices indulti aliquoties concessi ad quin-
 „quennium, vel ab ineunte Pontificatu Pauli V faustæ recordationis.
 „Quo tempore Vicarius alter Episcopatus Leodiensis ferme exauthora-
 „tus est, quoniam perinde autoritate propria circa matrimonia dispen-
 „sare.

„faverat, nec deinde indultum illud postremis annis fuerat renovatum.
 „Ex quo constabat, male fuisse initiatos iisdem Ordinibus, & male nu-
 „pisse, quotquot utriusque impedimenti gratiam obtinuerant, & debe-
 „re eos omnes cessare ab Ordinum exercitio, cessare a matrimonii usu,
 „& conscientiae propriae simul, atque honori liberorum consulere. Co-
 „loniae ideo sublati est ejusmodi pravus potestatis usus, & tum cœpi
 „perinde urgere Leodii, ne Vicarius Episcopi agnatis, qui continge-
 „rent se antedictis sanguinitatis, vel affinitatis gradibus, matrimonii ve-
 „niam daret; siquidem & ipse facultatis ejus indultum ab apostolica Se-
 „de aliquoties habuerat, quod erat argumentum potestatis delegatae,
 „omnemque praescriptionis locum ei adimebat. Hinc vero factum est,
 „ut Colonienſis Elector eam utramque potestatem supplex a summo
 „Pontifice petierit, & ad septennium impetraverit pro Archidiœcesi
 „Colonienſi, pariter & pro Diœcesi Leodienſi.“

§. 16.

Pro Moguntina Archidiœcesi: „Joannes Swicardus Archiepiscopus
 „Electo Moguntinus, & S. R. I. in Germania Archicancellarius senio
 „& meritis plenus diem vitae postremum obierat; & contuleram ideo me
 „Moguntiam ad Successoris electionem, habueramque obvium extra Mo-
 „guntiae urbem cum aliquot rhedis magnum Decanum, & alios Canoni-
 „cos. Sed quia dilata electio in longiorem diem fuerat, ut ii, qui ab-
 „erant Canonici, possent redire, atque interesse Comitibus, Aschaffen-
 „burgi palatium invisere interea temporis potui: itaque Moguntia digre-
 „diens transmissio Rheno Seligenstadium veni. — Cum instarent Comitibus,
 „& triduo post essent habenda; sub Conopæo sedens in confessu Cano-
 „nicorum ego parænesin habui, & fuit ea omnium veneratio, ut dicen-
 „tem audierint aperto capite, nec tametsi rogati sapius tegere voluerint.
 „In qua significatione obsequii manserunt, dum eorum nomine magnus
 „Decanus gratias ageret, ac faceret spem electionis optimæ. — Adfuit
 „itaque dies electionis, & dum Canonici in Comitio erant, ego ac duo
 „Cæsarei Oratores in Odæi subselliis ornatis peristromate sedimus, donec
 „magnus Decanus ex conclavi egressus privatim nobis, ac dein e supe-
 „riori loco semel latine, iterum germanice populo nuntiavit, electum
 „via Spiritus S. Archiepiscopum Electorem, & Principem Moguntinum
 „fuisse Georgium Fridericum, antea Wormatiæ Antistitem, & Mogun-
 „tiae Praepositum. Postridie sum auspiciatus electionis processum, & tri-
 „duo

„duo in Commentarios omnia retuli, monitaque dedi insuper in Codice „scripta novo Principi, quæ ad optimum regimen Ecclesiæ Moguntinæ „mihi videbantur posse conducere. Habitus vero sum ab ipso Electore „in aula ejus tam honorifice, ut potuerim jam tum conjicere, ita prorsus „futurum, quemadmodum pollicebatur, cum diceret mihi abeunti supe- „raturum se Antecessores in obsequii reverentia erga S. Sedem. Et si au- „tem conabatur me diutius retinere, utpote qui affirmabat videri sibi S. „Petrum in ædibus esse, dum ego aderam Apostolicus Legatus, quanto „maturius potui, solvi Moguntia, & secundo Rheno descendi Coloniam.“

§. 17.

Veniant nunc Curialistæ Archiepiscopales, & tranquillam negent jam inde ab initio Colonienfis Nuntiaturæ in Imperio agnitionem! Quæ in contrarium exempla producit Bonnenfè Memoriale, in libello *Reflexio- num* *) solidissime scripto jam sunt ad metallam usque ossium denudata, atque inermia plane, nudaque, non sine confusione falsarii Concipistæ orbis conspectui proposita. Sicut ille Salisburgensis, ita & hic Bonnenfis Concipista monitus sit, nisi fidem suam catholicam revocando, & pœni- tendo probaverit, se jam inter domesticos fidei a nobis non numerandum, quippe qui §. 52 factum Imperatoris Pontificiæ Delegationis jurisdictionem sua terrestri Auctoritate destruentis probando, item §§. 13 & 21 Pro- testantium sensa contra pontificiam jurisdictionem amplectendo, sibi que propria faciendo in hæresin incidit jam cum Luthero damnatam, *Principi- bus in res spirituales jus competere.*

§. 18.

Quam firmum in Imperio fundamentum apostolicæ Nuntiaturæ habeant, partim ob romanum tribunal semper agnitus, publicisque pa- ctis & Capitulationibus firmatum, præc. Coroll. 4, partim ob tranquillam duorum seculorum possessionem, ex modo dictis *PLENA IN MERIDIE* apparet. Singulariter autem de *Nuntiaturis* memorandæ sunt Capitulationes Cæsareæ a Ferdinando Romanorum Rege de anno 1653 usque ad re- centissimam Josephi II de anno 1764, quarum historiam veluti ab ovo juvat percipere. Antiquissima inter Christianos consuetudo erat, Impe- ratorum privilegiis munita, ut propter majorem justitiæ fiduciam, quam in

*) *Reflexions sur les 73 Articles du Pro Memoria de Cologne. 1788. Item: Défense des Reflexions. 1789.*

in Pastoribus Ecclesiæ fideles reponabant, etiam *profanis in causis* ecclesiasticum tribunal accederetur. Etsi hoc privilegium lapsu temporum fere ubique intercidisset, quibusdam tamen in Episcopatibus, ut Leodiensi, sese conservavit integrum. Ipsa naturalis quædam æquitas dictabat, ut a sacerdotali sententia non amplius ad laicum tribunal causa vocaretur, sed ad superius quoddam Ecclesiæ judicium appellatio fieret: hinc ergo ad Nuntios quasi duce natura fieri solebat. Id iudicii ecclesiastici genus non mirum iudicibus laicis displicuisse: propterea sæpe a Camerali Iudicio Imperii prodierant *mandata cassatoria, & inhibitoria processuum ad Nuntiaturam incompetenter delatorum*, usque dum hac super re gravamen anno 1643 Imperiali Deputationi proponeretur, ab eaque probaretur. Inde demum anno 1653 celebris constitutio profecta, quæ §. 164 Recentioris Recensus Imperii gravamine contra Archi- & Diœceses Colonensem, Leodiensem, & Monasteriensem ob appellationes in causis civilibus, aut profanis ad Pontificem, & Nuntios proposito statuit, ad romanam Pontificis Sedem hoc gravamen esse perscribendum, ut suis Nuntiis ejusmodi in Imperio illicitum judicandi usum interdiceret, & evocationes ad tribunalia extra Imperium prohibendas, atque Nuntiorum absolutiones a juramentis non amplius attendendas. Superfluum fuerit annotare, hanc constitutionem expresse ad *causas civiles aut profanas* fuisse restrictam.

§. 19.

Eodem anno 1653 contigit electio Romanorum Regis Ferdinandi IV, cui primum Capitulatio de Nuntiorum tribunali quoad causas temporales proposita, & semper dein renovata Capit. Cæsar. Art. 14, §. 4: „Volumus insuper, si forte contingeret, ut causæ civiles a suo ordinario iudicio in sacro Imperio extra illud ad Nuntios apostolicos, aut omnino ad Curiam romanam avocarentur, id interdicere, & serio prohibere, atque Cæsareo Fiscali tam apud Imperii Aulicum, quam Camerale Iudicium in mandatis dare, ut contra illos, tum Partes, tum Advocatos, Procuratores, & Notarios, qui simile quid attentaverint, aut quomodolibet suam operam locaverint, post decentem accusationem vi officii procedat, quatenus transgressores his conformiter judicentur, & puniantur.“

§. 20.

Huic §. 4 propter frequenter exortas lites de causarum natura, vel *sacra*, vel *profana*, adjectus est §. 5, Art. 14 in Capitulatione Josephi I anno 1690 sub hac forma: „Et quoniam ob antedictas civiles causas inter cæsarea, & Imperii summa tribunalia, atque apostolicas Nuntiaturas frequentiores lites, & dissensiones sunt excitatæ, eoquod utrinque ab officialium alterius judicis sententiæ factæ appellationes recipiuntur, Processus agnoscerentur, iidemque per varia severa mandata summo Partium incommodo, & dispendio manutenerentur; ad huic malo præcavendum, & omnem consuetum jurisdictionis evitandum, operam dabimus, ut causæ seculares ab ecclesiasticis juste distinguantur, & occurrentes casus dubii per amicabilem cum Sede pontificia suscipiendam tractationem, & transactionem componantur, atque ita ecclesiasticæ, ac civili Potestati, cuilibet suum jus judicandi inviolabile servetur.“

§. 21.

Cæcus sit, necesse est, qui non videat, aut obstinatus, qui videre nolit, imo hætenus a Nuntiis utramque jurisdictionem tam *sacram*, quam *profanam* in Imperio fuisse exercitam: 2do tantum *profanam* iisdem Capitulatione cæsarea prohibitam: 3tio in dubiis casibus, an *ecclesiasticæ*, an *civilis* jurisdictionis causâ sit, Imperium non sibi jus tribuisse Nuntiorum judicia via facti seu violentia excludendi, sed viam amicabilis cum romano Pontifice compositionis præscripsisse, & 4to promississe, ut Pontifici jus hætenus per suos Legatos exercitum in rebus ecclesiasticis judicandi inviolatum servetur. Hæc igitur tam solemnibus *promissio* a quibusdam falso, & inique Nuntiorum *intolerantia* vocatur: est enim publica fide inita *pactio*, ab Imperatore suscepta, ac juramento firmata *obligatio*, & Imperii *lex fundamentalis*: hæc sunt, quæ ipsi DD. Protestantes hodie publicis in scriptis fatentur, & longiore jam a tempore pacifici, ac tranquillius observarunt. — Quid vero nunc inter Catholicos quatuor Archiepiscopi???? Stupens manus calamum negat — Scribendum est tamen, quod non amplius incognitum: necessitati serviendum, ac veritati; Deo magis, quam hominibus placendum. En facti speciem!

ARTICULUS VII.

De præfenti nunc controversia Archiepiscoporum coram Imperii tribunali.

§. I.

Licet Archiepiscopus Moguntinus tentata sua in Comitibus electoralibus a 1764 molimina in irritum cecidisse conspiciens, datis ad Pontificem litteris, quas supra Append. ad Coroll. 4 vidimus, submissionem suam omnimodo contestatus fuerit, & quidem in specie: „Appellationes romanas se salvas admittere, injuste se accusatum, quasi illas impeditur voluisset, modis viribusque omnibus se curaturum, ut Partis appellanti via Romam pateret, penitus se persuasum existere, præsentem Ecclesiæ disciplinam quoad appellationes ad sanctam Sedem tam necessario connexam esse cum Ecclesiarum Germaniæ libertate, ut hanc convelleret, qui illas abolere vellet, Monitum de Concordatis Principum Basileensibus se non facere suum, quin potius sua in Imperio authoritate se adniscum, ne sanctæ Sedi quid præjudicii in juribus hætenus retentis enascatur, illos esse pacis perturbatores, qui desuper novos tumultus aliquando excitarent, omnibus juris, vel facti novationibus contra apostolicam Sedem suo Archicancellarii officio se restitutum, numquam Germaniæ Metropolitanis in mentem venisse appellationes romanas impugnare, easdem celebri Artic. 14 Capit. Cæsar. in eo, quo hætenus fuerunt statu, satis esse præservatas, Recursum a Partibus ad secularia Imperii tribunalia (vel temporalium prætextu) esse pessimum exemplum, hætenus in Germania ignotum, hoc modo, quem ipse abominaretur, Pontificum, & Episcoporum jurisdictionem, & omnem Ecclesiæ libertatem eversum iri: propterea hujusmodi Recursibus in futurum se omnino obstiturum, suisque subditis severissimis pœnis interdicturum, ne recurrentibus ad brachium seculare consentiant, vel consilium, auxilium, favorem exhibeant.“ Hæc singula licet romano Pontifici Archiepiscopus Moguntinus sub contestatione sensum aliorum Metropolitanarum a 1764 sancte promiserit; quis credat, eorumdem Archiepiscoporum Officiales a 1769 Confluentiæ congregatos gravamina fecisse, quæ certum est illos fecisse, & Imperatori, cujus sensa ex aliquot indicibus collegerant, porrexisse: „Ut causæ appellationum non amplius consueto more ad Sedem romanam, ejusve Nuntium pervenire possent, & simul tota Legatorum in Germania jurisdictio hætenus exercita cessare deberet“

„ret“ *). His elapso vix quinquennio contra verbum suum Pontifici datum Moguntinos fuisse cooperatos quis crederet??

§. 2.

Sed vivente tunc adhuc Augustissima & Pientissima Matre Theresia Archiepiscopi non parum confundebantur ex ipso Imperatoris Responso. Cæsarea enim Majestas sui juramenti memor vi Capitulationis a se initæ Archiepiscopos ad romanum Pontificem remisit, ut amicabili modo eidem, tamquam summo Ecclesiæ Capiti sua proponerent gravamina **). Num ista Romæ proposuerunt? Anne vel potuisset Moguntinus post suas illas litteras Pontifici talia proponere??

§. 3.

Defuncta gloriosiss. mem. Theresia Imperatrice, cum Ecclesiæ vulnera dolorosissima Imperator jam intulisset, utramque tangens pupillam divini oculi, Sacerdotium scilicet, & Virginitatem, ita ut sanctissimus Papa afferendi remedii gratia longissimum iter Viennam susciperet; nihil commiserationis cum optimo Patre ostendentes Archiepiscopi ***), nova eidem vulnera ferire non sunt veriti, ab Imperatore impetrantes adhortatoriam illam epistolam die S. Maximiliani a. 1785 datam, qua pontificiis Nuntiis omnis jurisdictio NB. in *spiritualibus* ablata sit.

§. 4.

Obtenta hac ab Imperatore contra apostolicas Nuntiaturas Viennensem, & Colonensem epistola, mox Archiepiscopi irrequisito Imperio, iisque Principibus seu Catholicis, seu Protestantibus, in quorum subditos tranquilla seculorum possessione Nuntii apostolici jus exercebant, Archiepiscopi, inquam, irrequisitis omnibus hisce Principibus Nuntiorum jurisdictionem ecclesiasticam a finibus totius Imperii exclusam declararunt, insuperhabito jure advocatiæ, quod cuilibet Domino territoriali pro suæ ditionis Ecclesia proprium est; imo contra expressum tenorem Pacis Westphaliæ Art. 8, quo liberum juris territorialis tam in ecclesiasticis, quam politicis exercitium omnibus & singulis, æque Catholicis ac Protestantibus Statibus firmatum est: prout invictè jam ostendit Palatinus Ele-

*) Le Bret. Tom. 8, N. 29.

**) Ibid. l. c.

***) Usque ad certum tempus hic excipiendus est Eminentiss. & Sereniss. Princeps Elector Trevirensis.

Electoꝛ in sua Responsione ad Cæsar. Majestatem die 4 April. 1787. Forſitan neceſſe erit novo libro vernaculi idiomatis populum chriſtianum commoneſcere, quo inſcio & invito quatuor Archiepiſcopi immutationem Religionis Romano - Catholicæ ꝑſacere attentarunt. Docendus eſt populus in religionis negotio nullam ſe obedientiam debere hiſce a Capite totius gregis ſe ipſos ſeparantibus Archi - & Episcopis, ne iis quidem, qui territoriales ſimul Domini ſunt. Sed hæc amplius ſuo tempore & loco.

§. 5.

Colonienſi Nuntio Bellifomi interim Liſabonam promotō anno 1785, alius Mſgn. Pacca Damiatenſis Episcopus a Ss. Papa ſubſtituebatur: iſ iterato in Aula Bonnenſi audientiam petens, ut ſuas, quas vocant *credentiæ* litteras, exhiberet, inamicabili modo repulſam tulit cum ſignificatione numquam ad Archiepiſcopi conſpectum ſe, ut apoſtolicæ Sedis Legatum Facultatibus inſtruſtum fore admittendum. Cum ergo Nuntiaturæ, Colonienſis ac Vienneniſis, ſub quibus antea provinciæ Electoris Palatino - Bavarici ſteterant, via facti, non ſine gravi deſpectu apoſtolicæ Sedis antiqua ſua iuriſdictione eſſent ſpoliatæ; Elector de ſtemmate Domus Bavaricæ ſuorum Proavorum pietate animatus anno 1786 pro ſuis Ditionibus injuriam ſanctæ Sedi reſarcire ſtatuit, atque in Metropoliſ ordinarii Nuntii advocavit, ipſo etiam amicabiliter ſe exhibente Poruſſorum Rege, cui Archiepiſcoporum invaſiones in aliena jura antea perſpectæ erant. Nunc vero aſuſo veluti oleo ignis in apertam erupit flammam, hoc eſt, archiepiſcopale odium adverſus ſummam Sedem antea quaſi ſub cineribus latens jam maniſeſte exarſit.

§. 6.

Eodem adhuc anno quatuor Archiepiſcopi, Moguntinus, Trevirenſis, Coloniienſis, & Salisburgenſis per electos quatuor ſervos Curialiſtas pro deliberatione, non in Eccleſia Dei, non populo ad preces convocato, ſed in Balneo Emsano tamquam aliud agentes conveniunt, in illo balneo, quod æternum in maledictione erit, ut cum Authore *Reflectionum* loquar: „ubi quatuor iſti Prælati in quatuor Papas ſe transformant a Romano absolute independentes, ubi ſchiſma completum, & „omnis relatio ad Eccleſiæ Caput formaliter abolita eſt, ubi Capitula cathedralia in ſervitutem redacta, Episcopatus contemtibilis factus, omnes

„prærogativæ pontificiæ, episcopales, canonicales ad Metropolitanam
 „Præpotentiam devolutæ sunt, ubi œcumenicæ Synodo Tridentinæ con-
 „stanter contradicitur, ubi universæ Ecclesiæ leges dispositioni potesta-
 „tis incompetentis relinquuntur, ubi matrimonia per Ecclesiæ declara-
 „tionem nulla per dispensationes æque invalidas legitimantur, ubi disci-
 „plina ex fundamento destruitur, Hierarchia omni ex parte concutitur,
 „& unde demum, si quando insanum consilium ad effectum posset per-
 „venire, perturbatio resultaret, quæ ex Ecclesia Dei faceret Babylonis
 „confusionem.“ Hæc de famosis 23 Emsani Balnei Articulis, ut nihil
 dicam de occulte commissis, ab Archiepiscopo Salisburgensi in Aula Vien-
 nensi propositis, non tamen quasi ipse consensum dedisset: quod verene,
 an falso purgaturus se pio suo Parenti Archiepiscopus dixerit, conscii
 Emsani iudices sunt!

§. 7.

„A balneo reverſi Archiepiscopi Rhenani novam, ut putabant, in-
 juriæ a Nuntio Coloniensi, verius autem ab ipſo Pontifice paſſi eo acer-
 bius publicis in decretis adverſus apoſtolicam Sedem debacchabantur.
 Occaſio erat hæc: Impedimenta matrimonii eccleſiaſtica quæcumque,
 etiam quæ *dirimentia* vocantur, nec conſuetis *Facultatibus* comprehend-
 ſolent, diſpenſandi poteſtatem proprio jure ſibi Archiepiſcopi arrogave-
 rant, etſi id Concilii Tridentini ſtatutis adverſaretur; etſi diœceſani ipſo-
 rum libri tantam Episcopis authoritatem expreſſe negarent; etſi Pontifex
 inde a Concilio Tridentino in tranquilla & *N.B.* ab univerſali Eccleſia
 jam agnita poſſeſſione eſſet, ut ſolus diſpenſaret, etſi a ſeculo, & ultra
 ſerie non interrupta quilibet ſuorum Anteceſſorum uſque ad actualiter exi-
 ſtentes Archiepiſcopos, eosque *inclusive* has ipſas diſpenſandi facultates
 ſibi a romano Pontifice delegari fere ſingulis quinquenniis petere & obti-
 nere conſueviſſent; etſi demum in ſua Conſecratione Pontifici tamquam
 ſupremo Paſtori, & Chriſti Vicario fidelitatem & obediẽtiam ſolemni-
 juraveſſent. Quamobrem, cum de Sacramenti valore ageretur, de matri-
 monii honeſtate apud Deum & homines, de liberorum juriſus, de ſeque-
 lis, quæ ſtatim politicum æque, ac eccleſiaſticum neceſſario perturba-
 re deberent; Nuntius Apoſtolicus Sacerdotes curatos admonuit, ſimiles
 diſpenſandi facultates Archiepiſcopis non convenire. Sed Curati nihil
 iſtis monitis movebantur magis ſui Archiepiſcopi, quam longe abſentis
 Papæ timore ducti *).

§. 8.

*) Veritable etat du différent elevé entre le Nonce apoſtolique reſidant à Colo-
 gne, & les trois Electeurs eccleſiaſtiques, 1788.

§. 8.

Itaque Pontifex sua usus potestate, quam illi divino jure competere omnes Catholici consensu unanimi profitentur, Episcoporum negligentiam supplendi, & corrigendi, ubi disciplinæ, aut sacrorum Canonum non debite observantes sunt; suo Nuntio Pacca *N.B.* non ordinaria delegatione, sed speciali commissione *districte* præcepit, ut nomine & Auctoritate Apostolica Curatos instrueret, quas dispensandi facultates, & quas non Archiepiscopi haberent, quænam matrimonia pro veris, & quæ pro nullis habenda essent. Hæc instructio sermone latino concepta, ne qua confusio coram plebe Pastoribus oriretur, tantum Curatis ad debitam notitiam mittebatur, in qua simplicissimis verbis, ab omni exprobratione etiamsi justa, longe alienis facultates indicantur, quas ultra seculum singuli Archiepiscopi, ab anno 1645 Colonienfes, ab anno 1653 Moguntini, ab anno 1662 Trevirenses supplicibus precibus a sanctissima Sede impetrare consueverant.

§. 9.

Archiepiscopi autem summe indigne ferentes, romanum Pastorem hanc quasi rimam ostii invenisse apostolica voce suis cum ovibus loquendi, jam sibi moderari non amplius valebant, quominus diris inventivis vernacula lingua publicatis hanc ipsam pastorem instructionem lacerarent. Ita primus Colonienfis die 12 Decembr. anno 1786 publico decreto omnibus Parochis imperavit, instructionem a Nuntio apostolico acceptam sine tergiversatione, per primam postea sub eodem, quo transmissa est, involucro ad Auctorem suum remittere, & hujus remissionis certificatum ab Officialibus postea requirere, ad Vicariatum archiepiscopalem confestim immittendum, adjuncta gravis pænæ comminatione, siqui Parochi a romana Sede scriptum, Breve, Bullam, dispensationem, aut cujuscumque nominis rem, nisi antea obtenta ab Archiepiscopo scripta licentia, acceptare præsumserint *).

§. 10.

Similis prohibitio ex Officialatu Trevirensi 20 Decembr. anno 1786 ad Parochos emissæ fuit, sed minus adhuc temperatis vocibus. Apostolici

l i i 2

Nun.

*) Si tanti *Placiti* jus Episcopi adversus suum supremum Caput habeant; quanto justius adversus Episcopos habebunt Principes? Elector Palatinus brevi postea justissimas vices Archiepiscopis rependit decreto 6 Mart. 1787.

Nuntii, eorumque potestas a finibus germanici Imperii dicebantur *proscripti* (verwiesen), et si Archiepiscopus juramento in Consecratione sua se obligasset, *Apostolicos Nuntios recipere, audire, & reverenter tractare*. Item dicebatur Potestatem legislativam Pontifici, utpote *peregrino* Episcopo in *aliena* Diœcesi non esse; litteris apostolicis archiepiscopalem Auctoritatem fuisse *turpiter lasam*, demum quoad Regulares quædam præcautio subjungebatur de *hujusmodi furfuris*, id est, apostolicis litteris.

§. II.

Postridie, id est, 21 Decembr. 1786 Vicariatus Moguntinus mordacissimum edidit decretum, in quo reservationes pontificiæ a Concilio Tridentino expresse probatæ reprobantur, apostolica declaratio *seductoria* vocatur, & *audax attentatum, quod merito abominandum sit*. Sic ergo ex eo momento, quo Papa nimium moderato, ut multis videtur, verbo contradixit, jam aperto Marte cum Christi summo in terris Vicario hostiliter pugnant tres Archiepiscopi, quarto sibi in socium juncto. Animadversione dignum est, quod plures vel ex Protestantibus scriptores jam observarunt, nullum ex tribus Archiepiscopis ejus rei veritatem negare, quam apostolici Nuntii declaratio continet: omnes ergo, & singulos tacite fateri, a seculo & ultra has pontificias reservationes ab iisdem Archiepiscopis constanter & tranquille agnitas fuisse.

§. 12.

Insuper & ego unum adhuc observo, dispensandi in legibus Ecclesiæ universalibus potestatem ab Archiepiscopis sibi vindicari, non jure Metropolitico, sed Episcoporum ordinario. Quonam ergo vel prætextu justitiæ Archiepiscopi hanc gravissimi momenti quæstionem per se ipsos, inconsultis Episcopis, imo etiam sine diœcesana Synodo, tantum in balneo cum quatuor servis Curialistis decidere, & toti Imperio obtrudere tentarunt? Itane olim per violentiam extra provinciales, quid, quod & diœcesanas Synodos Metropolitæ dominari licuit? Quatuor Archiepiscopi anne totam Germaniæ Ecclesiam efficiunt, aut solum repræsentant? Quonam lege, vel quonam ex pacto Imperium tenetur quatuor Archiepiscoporum (secundi dumtaxat ordinis, si ad antiquitatem respicias) sine Patriarchæ sui consensu recentiora placita submisso capite amplecti? Anne Imperii Principibus sua territorialis jurisdictio tam in ecclesiasticis, quam civilibus per quatuor Archiepiscopos jam non amplius salva est???

§. 13.

§. 13.

Longius abrepti vindictæ motibus Archiepiscopi apud Cæsaream Majestatem de recepto Monachii apostolico Nuntio ipsum accusarunt unacum Papa Serenissimum Electorem, Baviaræ & Palatinatus Principem, mediante quidem Colonienſi Archiepiscopo, sed prout facta, & scripta testantur, ceteris conspirantibus. Nec dubitavit Aulicum Viennense Consilium jus territoriale Electoris Palatino - Bavarici violare Concluso 27 Febr. 1787, quo quidem Principi Electori præcepit, ut Nuntio apostolico Zoglio in Ditionibus Juliacenſi, & Montium jurisdictionem nullam permitteret, illiusque subdelegato Roberz commissionis suæ exercitium interdicere, & Cæsareæ Majestati modum præstitæ obedientiæ intra terminum duorum mensium significaret *).

§. 14.

Non defuit suo officio Serenissimus Elector, etsi haud parum gravatus, sed simplicissima, verissimaque responsione 4 April. ejusd. anni injustitiam factæ adversus se accusationis Cæsareæ Majestati demonstravit, quia 1^{mo} per Nuntiaturam Monacensem, quæ nonnisi Viennensis, & Colonienſis antiqua jura in suis terris retineret, *nova & aliena* jurisdictio neutiquam fuerit introducta: 2^{do} Judicaturæ pontificiæ nullatenus multiplicatæ: 3^{tio} & jura Archi- vel Episcoporum ordinaria nec minimum læsa. Ceterum merito Elector Palatino-Bavarus insinuvavit, ad jus territoriale cujuslibet immediati Principis restringendum non sufficere unilaterale gravamen quorundam conspirantium Archiepiscoporum, aut Electorum ecclesiasticorum, sed necessariam requiri summam Potestatem legislativam, quæ in cæsarea Majestate unacum toto consentiente Imperio consisteret.

§. 15.

Ultima igitur tentantes Archiepiscopi (catholicæ aures exhorrescunt) suam cæsaream Majestatem eo permoverunt, ut demum mense Augusto causam quatuor Metropolitaram contra romanum Pontificem, & Electorem Palatino-Bavarum Imperii Collegio stabili Ratisbonæ pro

l i i 3

summa

*) Tantam obedientiam, si Pontifex ab Archiepiscopis exegisset, quanta lamentatio!! Nonne in Ecclesia Dei major sit subordinatio, quam est Principum dependentia ab Imperatore nostri Imperii? Notum est in Imperio fere, aut vere *sovereignos* esse Principes, quibus licet cum Imperatore & bellum gerere.

summa judicatura (intellige *terrestrem*, seu *politicam*) committeret. Sic causa hæc, tota quanta spiritualis de jurisdictione divini Primatus in Ecclesia Christi ad seculare tribunal, majorem fere partem protestantium, per Archiepiscopos delata est. Obstupefcite cæli! terra contremiscat! Quis credat auditui nostro? —

§. 16.

Sententia judicum *terrestrium* judicio nondum lata est: si autem ferenda sit, secundum quas leges fundamentales, secundum quæ pacta publica, secundum quæ juramenta ad cælum facta (siqua fides amplius juramenti) judicari oporteat, jam a nobis præc. Art. demonstratum est. Judex autem solus *legitimus*, atque a Deo constitutus in hac re ecclesiastica causa inobedientium, ut molliter loquar, Archiepiscoporum, quibuscumque demum viribus reluctentur, est, & manet immutabili in possessione supremus Ecclesiæ Pastor, Christi Filii Dei Vicarius, S. Petri Successor, romanus Pontifex, Pius VI, cujus justissimum judicium pro tanti scandali ablatione ex Domo Dei fideles patienter expectant.

§. 17.

Si vero catholicos Bavarie subditos Archiepiscopi pergant a sancta Matre romana Ecclesia suis conatibus avertere, nec mature penitendo resipiscant; vota & desideria piorum subditorum sunt, ut Serenissimus, Optimus de Domo Bavarica Princeps Elector fideliter, magnoque animo in hac secunda forsitan, & tristiori Reformatione vestigia suorum Proavorum pro conservanda fide romano-catholica sequatur, & memor sit Concordatorum cum Episcopis *tantum sub ea conditione* a. 1583 initorum: „In quæ quidem Concordata eatenus consensit „pietissimus Princeps, ut tamen in casibus non expresse specificatis „sibi jus suum reservet, ac quod jam testatissimum esse vult, etiam in „expressis eo usque Conventis stabitur, dum Reverendissimi Ordinarii — „ita rem per se, vel suos administrabunt, ut catholicæ Religionis profectus, ac circa Clerum ecclesiasticæ disciplinæ nervus conservari possit: sin quid secus ipsi, aut remissius egerint — Princeps tunc pro sua „pietate; & publicæ salutis cura de opportunis, & efficacibus remediis „vigilantissime curabit semper.“ Concord. §. VII.

Deum

Deum nos subditi precamur; ut Patriæ nostræ Archiepiscopum donet vere catholicum, apostolicum, alterum Bonifacium. Amen!!!

APPENDIX.

De Isidori Mercatoris Collectione.

SPECIES FACTI.

§. I.

Veritas luce delectatur, cujus præsidio sese communicat, munitque: contra mendacium tenebras amat, sub quarum latibulo irreperit, sedemque sibi stabilire nititur. Hoc ipso indicio falsitas se prodit hodiernæ, quæ prætenditur, juris ecclesiastici reformationis. Prætextus reformandi est, quod Isidorus Mercator, seu Peccator dictus fucatis suis spurisque mercibus ita Ecclesiam, Christi sponsam deceperit, corruperitque, ut pristina sua octo seculorum integritate perdita eam indueret externam, quam etiamnum gerit, Hierarchiæ pontificiæ speciem, si Novatoribus credas, adulterinam. Hæc autem ipsa de Isidoro antiquorum Canonum, & Decretorum Collectore historia tam obscura est, tam densis involuta tenebris, ut eam dicas sub ægyptiaca nebula delitescere. Deum testor, in toto hoc conficiendo opere nihil difficilius, nihil operosius mihi accidisse, quam vel solam hac in re facti speciem referre. Scriptores de hac quæstione tantum non omnes, certe præcipuos æque antiquiores, ac recentiores pro utraque parte perlustravi, præter Magdeburgenses scilicet Blondellum Calvinistam Augustani civis perhonesti, ac perdocti favore mihi communicatum, Petrum de Marca, atque Baluzium, Vanespenium, Berardum, Natalem Alexandrum, Labbeum, Coustantium, Ballerinius, Zachariam; sed ex opposito etiam, Hincmarum Rhemensem, Antonium Augustinum, quem immerito altera pars suis annumerat, Turrianum, Binnium, Cardinalem d'Aguirre, ac recentissimum Scriptorem, cujus liber de *summa auctoritate romani Pontificis* decennio abhinc Faventiæ prodiit. Nunc autem, quo plura legi, impenſa aliquot annorum opera, eo plura me nescire vel circa solam facti speciem profiteor. Hujus ergo collectionis originem prout vulgo creditur, atque ipsis adversariis haud sane displiceat, ab initio referam; mox ejusdem fata subjungam; tum varias circa eam dubias, incert.

incertaeque quæstiones indicabo; demum præcipuas adversus eam criminationes proponam, refellamque.

§. 2.

Initio fere noni seculi per Francorum regiones publicari cæpit sub S. Isidori Hispalensis nomine famosa ad hodiernum usque diem Collectio canonum apostolicorum, & conciliarium, atque etiam decretalium epistolarum primis Pontificibus a Clemente usque ad Sylvestrum, ab hoc usque ad Gregorium M. adscriptarum. Collectio hæc teste cœvo Hincmaro Rhemenſi per Riculphum Moguntia Archiepiscopum, alterum S. Bonifacii Successorem, sanctæ Romanæ Sedi adhuc valde devotum, qui Ecclesiam suam ab anno 787 usque ad annum 814 optime rexit, ex Hispania fuit allata, atque in Germaniam, finitimasque regiones divulgata*).

§. 3.

Sors ei longe alia, feliciorque, quam recentissimis temporibus, statim a partu suo obtigit, & integra septem, vel octo per secula usque ad Reformationis Protestanticæ epocham tranquilla in possessione servata est. Ejusmodi enim decreta jam in Capitularibus Francorum, tam illis Engilramni, quam Benedicti Levitæ locum mereri visa sunt: Concilia etiam œcumenica, Episcopi primi subsellii, post ipsos omnes juris ecclesiastici Interpretes, omnes Theologi, atque Polemici eam consuluerunt, adhibuerunt, fideique dogmata per eam roborarunt. Ita jam anno 836 Concilium Aquisgranense, anno 887 Colonienſe, iterum Metense, anno 888 Moguntinum, anno 895 Triburiense, anno 992 Rhemenſe, circiter anno 1079 Ordo Romanus a Bertholdo Constantiensi conscriptus, eodem tempore Micrologus in lucem editus, circa annum 1074 Author apologiæ pro S. Gregorio VII, anno 1008 Burchardus Wormatiensis, anno 1086 Anselmus Lucensis, anno 1114 Ivo Carnotensis, anno 1151 Gratianus, demum generalia Concilia, sub Callisto II Lateranenſe, ac postremum Tridentinum iis ipsis decretis nisi *historicam*, seu *facti*, certe illam, quæ *juris*, vel *legalis* dicitur, auctoritatem attribuerunt.

§. 4.

Hincmarus ille Rhemenſis, etsi subdubitanter de epistolarum istarum non *historica*, sed *juridica* auctoritate, utpote sibi invisa, scripserit; ipſas

*) Opusc. 55 Capit. advers. Hincm. Laudun. Cap. 24.

ipsas tamen reverenter ad instructionem esse suscipiendas fassus est. Primum medio XV Seculo Nicolaus Cardinalis Cusanus non omnes certe epistolas priscorum Pontificum, sed quasdam dumtaxat, in specie illas Clementis, & Anacleti suspectas habuit, qui tempore Basileensis Concilii prius contra Pontificem stetit, postea eidem adhæsit. Altero post hunc seculo Erasmus Roterodamus simile dubium de illarum epistolarum origine, seu historica genuinitate manifestavit. Mox vero reformationis Lutheranae jam orto schismate Centuriatores Magdeburgenses non solum amplius titulos dictarum Decretalium, seu nomina Pontificum, quibus erant inscriptæ, impugnarunt, sed ipsam illarum, licet sanctissimam, ab Ecclesia jam probatam doctrinam, siquidem hæc ipsa fidei antiquæ, ac disciplinæ monumenta suis placitis novissime inventis contraria satis intellexerant.

§. 5.

Non defuerunt inter Catholicos, qui hisce ausibus fortiter se opponerent: præ aliis Franciscus Turrianus quinque libris, Coloniae a. 1573 impressis Magdeburgenses impugnavit. Opus hoc eruditione, nec non & soliditate *in toto*, quod ajunt, præstans, attamen in eo ipsis adeo Catholicis minus satisfecit, quod Author singularia quædam documenta nimium purgare a nævis studuerit, quibus tamen necessario quodam fato quælibet antiqua monumenta propter hominum perfidiam, incitiamve, aut propter ipsas temporum injurias obnoxia sunt. Adversus Turrianum maximo eruditionis apparatu assurrexit Calvinista David Blondellus a. 1627 Genevæ librum emittens, in quo Pseudoisidorus, & Turrianus misere, justoque severius vapulant. Calvinista ille immenso veluti suo labore præter animum, atque invitus catholicæ Ecclesiæ efficacissima ministravit subsidia, quæ Febronianorum mendaces hodie criminationes ex hostili licet ore confundimus: patet enim, quos ille laboriosissime inquisivit, atque invenisse creditur isidorianæ doctrinæ fontes, nonnisi puros, ac genuinos esse, tametsi alios, quam quorum titulos inscriptio præferebat. Ita ad oculos spectandas dedit sententias ex SS. Innocentio I, Zosimo, Sixto III, Leone M., Hilario, Gelasio, Gregorio M., Martino, summis Pontificibus; similiter ex SS. Patribus, Ambrosio, Augustino, Prospero, Idacio Claro, Historia tripartita, Codice Theodosiano, variisque insuper Conciliis excerptas. Hinc factum, ut Blondellus plurimos ex Catholicis ad suam de

K k k

falsi.

falsitate inscriptionum, seu *Autorum nominatorum* opinionem pertraheret, neutiquam vero ad ipsarum, quæ in epistolis, licet supposititiis continentur, doctrinarum vilipensionem. Natalis Alexander Gallicanus Doctor, haudquaquam Isidori Patronus hanc ea de re sententiam tulit Catholico dignam *): „Blondellus Author apud Calvinistas celebris hoc de argumento copiose egit, & erudite in libro, qui inscribitur *Pseudo Isidorus, & Turrianus vapulantes*, quo in opere sicut ejus criterium laudandum est, quo epistolas illas priscis Pontificibus merito abjudicat; ita ejus inculpanda est temeritas qua illas convitiis proscindit, ac lacerat nulla habita ratione veritatum, & piissimarum sententiarum, quæ in illis assertæ sunt, & exaratae.“

§. 6.

Igitur unanimi fere calculo viri inter Catholicos doctissimi, atque adeo eminentissimi Cardinales, Baronius, Bellarminus, Berronius, Bona, Sfondratus, præter istos insuper Sirmondus, Petavius, Mabilonius, Papebrochius, alique tantum non omnes epistolas illas priscis Pontificibus suppositas, vel saltem adulteratas, hincque merito suspectas censuerunt, ut jam ab allegandis illarum documentis, nisi si ex aliis fontibus hausta essent, caute abstinerent. Nihilominus isti, utut severi Censores, pontificia tamen jura, in specie illud appellationum suscipiendarum intacta reliquerunt, quid? quod & fortissime propugnaverunt optime gnari, eadem indubitatis aliis venerandæ antiquitatis monumentis, ipsisque divinis oraculis quam firmissime esse munita. Unde digna tantis viris æquitate, cognitæque veritatis studio omnes illi ita sentiebant, prout jure merito Baronius scripsit **): „Ex multis eas reddi suspectas epistolas, quæ dicta sunt secundo Annalium tomo, dum de illis singulis mentio facta est, satis est demonstratum, simulque ostensum, illis non indigere sanctam Ecclesiam, ut si falsitatis arguantur, suis ipsa destituatur juribus, & privilegiis; cum etsi illis careat, ex legitimis aliorum romanorum Pontificum epistolis decretalibus satis, superque roborata consistat.“

§. 7.

Alii contra ex Catholicis surrexerunt, quos Cardin. d'Aguirre non immerito *Hypercriticos* vocat, & sanctæ Ecclesiæ suæ non satis devotos,

*) In Hist. eccles. 1 Sec. Dissert. 2.

**) In Annal. ad a. 365, §. 8.

votos, qui eo maxime proposito epistolas illas decretales impetebant, ut jus appellationum romano Pontifici velut *novum*, & sacris Canonibus contrarium auferre valerent: inter hosce præcipui sunt Petrus de Marca, ejusque Commentator multo pejor Baluzius, Quesnellus, Dupinius, Vanespenius, ac novissime Febronius cum ingenti turba hodiernorum Canonistarum, & Publicistarum. Haud facile istorum sensu (tantum mitius de Marca judices) ab illis Protestantium, sanctæ Sedis, ac romanæ Ecclesiæ apertorum hostium distinxeris: neque enim modestius in ipsas decretalium epistolarum doctrinas, licet sanctas doctrinas, licet jam ab universa Ecclesia probatas, receptasque conviciis, & criminationibus suis debacchantur.

§. 8.

Atque ea quidem, quæ nimium atrociter Novatores nostri criminantur ut imposturas, fraudes, deceptiones nequissimas, atque spurcissimas Dei Ecclesiæ corruptiones, tam sunt incerta, obscuraque, ut vix amplius cleantea lampade illustranda. Si vel charitas ex ore istorum loqueretur, quæ malum non cogitat, nec suspiciosa est; numquid dubiis in rebus meliora præsumeret, atque etiam, si qua detecta est, falsitatem documentorum non malignæ fraudi, sed bonæ illius ævi simplicitati, aut ignorantie adscriberet? Quæstiones autem obscurissimæ hodie dum obversantur, de ipso inprimis Isidoro Collectore, quando nam vixerit, & ubi? quis fuerit, num Hispanus, & quidem prout communis erat opinio veterum ætate propinquorum, atque etiamnum aliquorum valde eruditorum est, num S. Isidorus Hispalensis Episcopus? num incognitus quidam forte patria Gallus, aut Germanus? num vel umquam Isidorus nomine *Mercator* extiterit? dein de forma Collectionis primitiva, an ab initio tantum excerpta quædam Decretalium, an integras jam epistolas exhibuerit, & quidem an tantum sub generali præscorum Pontificum inscriptione, an vero jam singulariter cum expressa cujuslibet Pontificis assignatione? denique de ipsis collectis epistolis, iis præcipue, quæ Siricium præcesserint, an generatim omnes subpositiæ, vel tantum interpolatæ? an quædam saltem in specie, si sanæ criseos cote probentur, a macula notheiæ nequeant purgari? Hæc fere omnia cum adhuc sint dubiis, ac litibus numquam forsitan finiendis obnoxia; nunc quidem missa facio, solum ac unice istis, quæ certa sunt, inhæsurus, alia forsitan occasione, si operæ pretium videatur,

K k k 2

scbola-

scholasticæ exercitationis gratia etiam illa adhuc in utramque partem iusta statera libraturus.

§. 9.

Ad statum oppido gravis controversiæ, qualis præsens est, accurate intelligendum duo sunt quam maxime digna observatu, scilicet ab hodiernis Febronianis & Authorem Collectionis Isidorianæ accusari tamquam deceptorem ad extollendam supra, quam antiquitus fuerat, romani Pontificis auctoritatem; & ipsum opus condemnari, tamquam exitiosam veteris disciplinæ corruptelam. Falsas, & plane iniquas esse duas hasce criminationes meis non tam Isidori, quam sanctæ romanæ, totiusque Ecclesiæ catholicæ vindiciis mox Deo aspirante ostendam.

Vindiciciæ adversus iniquas criminationes.

ARTICULUS I.

Isidorus non impostor, sed sincerus compiler.

§. I.

Spurias atque adulterinas epistolas priscis Pontificibus ante Siricum ab *impostore* Isidoro suppositas fuisse, cantilena est hodie vix non ex omnium ore resonans, quotquot vel a limine Juristarum, quin & Theologorum scholas salutarunt. Non enimvero motus momentis, alibi discutiendis, sed magnorum Virorum, eruditionis gloria præcellentium nominibus, hoc est, præiudicio cedens largior, quod volunt, epistolas illas Pontificibus, quorum nomina præferunt, falso esse adscriptas. Quid ergo? jamne deceptio subest? documentum vetus, etsi falso auctori inscriptum, jamne propterea sua ex origine mendax figmentum est? Nonne operis auctore posterior sæpe est tituli inscriptor? Si iste fallitur, jamne etiam suo animo fallit? Nonne sæpius est ipse deceptus, quam deceptor? Magnum intercedit discrimen inter *falso* asserta, & *fraude* conficta; præsertim hæc regula valet, dum spectat vetustatis documenta: in illorum origine assignanda error sæpenumero committitur, ipse tamen erroris author plerumque innocens a deceptione est, quippe sibi tantum *passiva*, nullatenus *activa*. Si æquum hoc iudicium ferri oportet de auctore falsæ inscriptionis veteri documento additæ; quanto magis de Collectore docu-

documentorum falso licet inscriptorum? Hoc velim discrimen inter *authorem*, & *collectorem*, quam optime notari, altissimeque imprimi: ego enim paulo post demonstrabo Isidorum, quisquis fuerit, Decretalium illarum, etiam si spuriarum, non autorem fuisse, sed tantum collectorem.

§. 2.

Prius tamen generali quadam observatione ostendam vetera documenta sæpe *falsitatis* notam mereri, nondum vero propterea *fraudis* vel *deceptionis*. Profecto si tranquilla mente, partium studio non abrepta, nulloque odio excæcata in illa priscorum tempora descendas, ubi arte typica nondum existente rariora fuerunt exemplaria manuscripta, eaque non tam exacte, quam ut hodie sit, ad unius authographi formam redacta; ubi pristina monumenta raro integra, sed diversas in lacinias sæpe jam distracta, vel sine ullo authoris nomine, vel mixtim cum alienis fuere inventa; ubi amanuensium oppido imperitorum fere unica cura fuit, quidquid alicubi inventum, vel levissimam ob similitudinem absque iudicii discretionem in unum corradendi; quodque unum ex præcipuis est, ubi doctiores etiam veterum documenta colligentes sæpe nihil minus cogitarunt, quam polemica argumenta posteris in suis scriptis contra adversarios post secula nascituros servare, sed unice vel suæ, vel suorum in fide fratrum utilitati intenti, quidquid ad ædificationem pertineret, seu ex propriis, seu ex alienis, tam in contextu, quam in notis ex margine in ipsum textum postea translatis interserere, atque etiam novas voces pro antiquatis substituere, verbo documenta vetera suis temporibus, moribusque accommodare optimo quidem, improvido tamen consilio haud dubitarunt; hæc, inquam, omnia si pacate consideres, una mecum senties, nostris diebus multa a veritate aliena posse reperiri, quæ etsi falsa sint, prout falli humanum est, neutiquam tamen sequitur, malis artibus ad decipiendum esse fabricata. Seculi nostri Tolerantia! ubi es? te in patrocinium nostrorum Decessorum invoco! Nonne in Novatoribus nostris longe apertiores falsitates, dicam imposturas, tu toleras, excusas, laudas, amplecteris, & sequeris??

§. 3.

Huc accedit, vetus documentum, etsi ex indiciis artis criticæ non immerito censetur *interpolationis*, aut etiam *suppositionis* vitio laborare, nondum tamen eo ipso jam omni sua authoritate excidisse, aut inter men-

K k k 3

dacia,

doria, mercesque *spurias* esse abjiciendum: potest enim adhuc & contento, seu materia sua esse bonum, & vera sua quacumque origine, licet falso inscripta venerabile. Ita ipsi adeo divini libri, quos e. g. Moysis, Iobi, Tobiae, Salomonis nomine inscriptos habemus, emunctioris naris criticis videntur aut ex parte saltem aliqua interpolati, suppositivi, aut omnino non illorum esse auctorum, quorum nomina praeferunt: id tamen iis ipsis libris nondum destruit divinam suam seu materiae, seu originis intuitu auctoritatem. Ut ecclesiasticis insuper documentis rem illustremus, exempla sunt notissima vulgo sic dicti Apostolorum canones, aut Athanasii Symbolum, quos nemo criticorum amplius genuinos tantorum Parentum fœtus judicat. Hæc licet *falso* inscripta documenta, ab omni tamen suspitione *fraudis* longe aliena, imo etiam propter contenta sua, & propter ipsam originis antiquitatem summe æstimanda sunt.

§. 4.

Ponamus aliquem nostris diebus Pseudocriticum, quorum ingens nunc est numerus, assurgere, nostramque Christianorum fidem in SS. Trinitatem ex eo capite vellicare, quod adulterino, falsoque prisci ævi documento, scilicet illo S. Athanasii perperam sic dicto symbolo innitatur, atque etiam propterea crimen *deceptionis* nobis intentare; prompta quidem responsione huic diceremus, symbolum illud, etsi non origine Athanasianum, venerandæ tamen ex antiquitate sua originis esse, atque doctrinam continere fidei incorruptam, id quod ex aliis certe genuinis fontibus ad evidentiam possemus demonstrare, jamque sæpius a Nostris adversus veteres Hæreticos esset demonstratum. Quodsi his omnibus insuperhabitis, & studioso quodam silentio oppressis homo ille nobis molestius instaret, & antiquam crambem recoquere non cessaret, Athanasianum haud esse illud symbolum, sed adulterinam imposturam; jam nos quidem certo animadverteremus, hanc fontium nostrorum veracium affectatam esse ignorantiam, hominemque non sinceri animi, sed hostilis, atque obstinati. Hæc de symbolo, quod Athanasii dicitur, responsio immoderatis nostra ætate calumniatoribus Isidorianæ collectionis generatim satisfacere poterit: aut si minus de dogmate, quam de disciplina exemplum arrideat, idem responsum dabimus ad Magdeburgensium, aliorumque criminatorem de sic dictis, non tamen genuinis canonibus Apostolorum. Paucis cum S. Augustino hisce cavillatoribus respondemus: *Sunt certi libri, quorum auctoritati utrique consentimus, ibi queramus, quamnam vera sint veræ Ecclesiae dogmata, ibi discutiamus causam nostram.*

§. 5.

§. 5.

In specie me nunc ad illum vertam, quisquis sit, Isidorum miserè nostris diebus a Febronianis, præquam olim a Calvinianis vapulantem, quem ab imposturæ crimine adeo vindicabo, ut ausim demonstratione evincere, illarum decretalium, de quibus controversia est, epistolarum non fuisse fabricatorem, sed tantum ante se jam extantium compilatorem. Duplici hac in re utar argumentandi genere, uno, quod *logicum* est, seu humano ex ratiocinio desumptum; altero, quod *historicum*, seu ex documentorum testimonio petitum: priore argumento ostendam, Isidorum non potuisse ex se ipso illas spurias merces, ut dicuntur, fabricare; posteriore, illum revera easdem non fabricasse.

§. 6.

Mirabilia nobis, prope dicas miracula, narrant Isidori Mercatoris accusatores, tamquam *impudentissimi nebulonis*, qui proprio malitiosi sui cerebri partu epistolas ediderit primorum seculorum Pontificibus suppositas, queis a se excogitatis fraudibus antiquam Ecclesiæ disciplinam per octo secula intemeratam subito in pejus mutaverit, corruperit, polluerit, adeoque vitiarit, ut jam inde a nono seculo novam faciem externa Ecclesiæ politia induisse videretur. Nonne mireris, qui subito Portæ inferi adversus sanctam Dei Ecclesiam, si Febronio fides, amplius per Isidorum pro sancto habitum prævalere potuerint, quam per omnes retro Hæreticos? qui fieri potuerit, ut documenta cunctis seculis incognita, recentissime primum conficta, lateque dispersa tam facilem ubique aditum, tantamque credulitatem invenerint, ut sine fraudis vel suspitione, mox summo reciperentur applausu non solum a singulis illorum temporum Doctoribus, Rectoribusque, sed etiam ab integris, iisque numerosis *NB.* Galliæ, & Germaniæ Synodis, ac ne sensim quidem quasi sine sensu, sed jam inde a partu suo, atque etiam a viris, quorum maxime intererat contra deceptionis novitatem antiqua sua canonibus fundata jura conservare??

§. 7.

Talem nobis virum historia in Hincmaro Rhemenſi exhibet, de cujus Metropolitaniſ juribus agebatur contra decretales epistolas ſibi inviſas tuendis. Is data opera earumdem authoritatem *canonicam* impugnans, ne verbo quidem *hiſtoricam* in ſuſpicionem trahere tentavit, imo
iisdem

lisdem ceu indubiliis documentis *venerabiliter ad instructionem suscipiendis* non semel, sed frequenter usus est, & in Opusculo ad Hincmarum juniorem Cap. 15 a juventute sua in hisce documentis se versatum testatur: „Inaniter putas, quod si tu hæc in tuo Pitaciolo non poneret, alii „non haberent libros, ubi ea legere potuissent. Sed quis ea, quæ non „isti, ignorat? Prius enim quam formareris in utero, illa novimus, & „antequam exires de vulva, sæpissime legimus.“ Cum ista scriberet Hincmarus ad Nepotem suum jam Episcopum, saltem sexaginta annorum senem fuisse oportet, ut adeo ejus juvenus noni seculi initio, & putatis Decretalium natalitiis respondeat, quod argumento est, Isidorianam earundem collectionem, ex quo in Franciæ provinciis apparuit, publicam plenamque fidem mox invenisse. Unde hoc, nisi quod sparsim, sive in partibus saltem separatis jam cognita fuerint, quæ hic collecta in unum totum videbantur?

§. 8.

Negant, pernegantque id Febroniani, atque ne mireris, aut incredibile iudices documenta noviter conficta, nec ullibi terrarum antehac nota statim ab ortu suo tanta omnium conspiratione pro antiquitatis monumentis recipi potuisse, Baluzius rem magis adhuc mirabilem, ac plane incredibilem, quippe certissime falsam persuadere vult asserens, cur fraus illa confictarum Decretalium non jam ab initio detegere-
tur, sed magno potius confusio novo jure, quo exarmata sint vetera jura, invehere-
tur, id accidisse *ex stupenda, ac miserabili Episcoporum, Clericorumque inscitia, & vetustorum Canonum ignorantia*. Ignorantia certe stupenda, ac miserabilis in octavi, & noni seculi Præsulibus, Virisque ecclesiasticis universis, ut adeo imperiti fuerint, quo minus spurios ingenii partus ad corrumpendam hæcenus pure servatam Ecclesiæ disciplinam recenter confictos ab antiquis traditis documentis possent discernere!! Simpliciter ergo, ac cæco modo Præsules, atque Doctores universim per secula crediderint ad solum nomen S. Isidori Hispalensis prætextum, quin vel ipsi Galli in vicina Hispania inquirerent, vel domestica scrinia lustrarent?? Da veniam Baluziane, aut Febroniane! non credo. Hanc nostris Novatoribus tam communem, acceptamque Antiquos leviter spernendi consuetudinem esse prorsus iniquam, falsissimamque calumniam, Emin. Card. d'Aguirre præstanti suo in Opere,*) fingillatim jam ostendit, unde excerpta videamus.

§. 9.

*) Collectio maxima Conciliorum omnium Hispaniæ, Romæ 1753. Tom. 1, Dissert. 2.

§. 9.

Pro seculo octavo incipit a S. Gregorio II, de quo Spondanus ad a. 731 præeunte Baronio ita effatur, *cujus si scripta extarent, resque ab eo gesta intelligentius exarata essent, Gregorio M. baud minorem existimares.* Procedit dein ad Gregorium III, S. Zachariam, Stephanum III, Paulum I, & Hadrianum I. „Qui omnes continuata serie tam ab antiquis, quam a recentibus Historicis plurimum laudantur propter sanctitatem & doctrinam: ut proinde nemo eorum sine atroci injuria dici possit laborasse ea pingui ignorantia sacrorum Canonum, aut peccasse per negligentiam in iis servandis. Lege Anastasium Bibliothecarium, Theophanem, Zonaram, Cedrenum, Reginonem, Hermanum, Sigebertum, & reliquos Historicos graves, qui eorum vitas, ac res gestas scriptis tradiderunt.“

§. 10.

A summis Pontificibus descendit ad venerabilem Bedam, ad SS. Anselmum, Marcellinum, Joannem Damascenum, Andream Crentensem Archiepiscopum, Germanum Patriarcham Constantinopolitanum, Heddium Stephanum, Etbertum Cantuariensem Archiepiscopum, Anastasium Abbatem S. Eusebii in Palæstina, & Bonifacium Germanorum Apostolum, Paulum Diaconum, Paulinum Aquilejensem, Ambrosium Ansbertum, Albinum Alcuinum, Patres Concilii Francofortiensis, Ethenium Episcopum Oximensis; ac Beatum, quibus addere potes alios quam plurimos Seculo VIII sanctimonia, & doctrina conspicuos, quorum vitas Mabillon duobus vastis voluminibus vel e solo S. Benedicti Ordine congeffit, & plures, quorum acta apud Bollandum, ejusque Continuatores copiose recensentur, & quotidie amplius prodeunt.

§. 11.

Si jam ad sanctos, doctosque viros Seculi IX oculos convertamus, multo plures fortassis occurrent, quam præcedente seculo. Ex summis Pontificibus sunt Leo III, Stephanus IV, Paschalis I, Eugenius II, Valentinus, Gregorius IV, Sergius II, Leo IV, Benedictus III, cui dein Nicolaus I successit a. 858, de quibus omnibus vel ipse Platina, cui ceteroquin Sannazario accinente

*vitasque olitusque notare
Pontificum, arguta lex fuit historia,*

LII

maxi-

maximam sanctitatis, ac eruditionis laudem non reticet, sed singulis insigne quoddam encomium adjungit.

§. 12.

Inter alios ejusdem seculi noni pietate, & doctrina præstantissimos viros veniunt Agobardus Episcopus Lugdunensis, & Servatus Lupus Abbas Ferrariensis, quorum opera ipse Baluzius recudit, Jessa Ambienensis Episcopus, Theodulphus Aurelianensis, Claudius Tauriensis, Leidradus seu Leiduardus, & Amolinus Lugdunensis, Halitharius Cameracensis, Fraculphus Lexoviensis, Prudentius Fricassinus, Ado Vienneensis, Remigius Antistodorensis, Benedictus Abbas Anianæ, Adalhardus Abbas Corbejæ, Ansegisus Abbas Fontanellæ, uterque Smaragdus, Dungalus Diaconus, Amolarius Fortunatus, totus Lugdunensis Clerus, ejusque Diaconus Magister Florus, Paschasius Rathbertus Abbas Corbejæ doctissimus, Ratramus seu Bertramus ejusdem Cœnobii, Rabanus Maurus Archiepiscopus Mogantinus, Ufuardus, Ludgerus sive Luidgerus Episcopus Westphaliensis, Arno Archiepiscopus Salisburgensis, Amalarius Trevirensis, Wlfridus Strabo Abbas Augiæ divitis, Rudolphus Monachus Fuldensis, alique plures, quorum scripta inter Scriptores Seculi IX indicavit Oudinus post Dacherium, Duschesium, Sammarthanos, Labbeum, Mabillonium, ipsumque Baluzium. Tot tantosque viros, sacrorum Canonum æque peritos utinam nostris diebus Ecclesiæ possent ostendere!!!

§. 13.

Mihi quidem præsentis Controversiæ occasione vel solum Hincmari Rhemenensis scripta diligentius Iustranti longe alia, quam vulgo nostrorum eruditorum insidet, opinio orta est de virorum illorum in rebus ecclesiasticis peritia. Hujus Archiepiscopi Opusculum 55. Capitulum ad Nepotem suum Laudunensem Episcopum legant Nostri Novatores, & me Hercle fatebuntur, virum hunc non certe ex vetustorum Canonum ignorantia Decretalibus, iisque sibi admodum exosis *historiæ* fidem tribuisse. Dignum observatu est, quod ipse Hincmarus in eadem disputatione jam se sollicitum circa apogrypha scripta exhibuerit Cap. 14, ita scribens: „In Præfatione Isidorus dicit de Apostolorum Ca-
„nonibus, quod a quibusdam dicantur apogryphi, & plures eos reci-
„piant, & sancti Patres eorum sententias synodali Authoritate robor-
„verunt,

„verunt, & inter canonicas constitutiones posuerunt, quod de quibusdam sententiis verum est, sicut alibi in hoc Opusculo potes legere *). „De Nicæno autem Concilio non est ita, ut scripsit, sicut multis authoritatibus testimoniis adprobatur.“ Ergo Hincmarus non cæco modo assertionibus Isidori historicam fidem attribuit, sed eas *critice* discutit, & earum authenticam, ubi contraria inveniret argumenta, e. g. de *Canonibus Nicænis*, rejecit. Ad hoc argumentum velim respondeant Anti-Isidoriani!

§. 14.

Idem Hincmarus Cap. 25 ad Gelasium de Martyrum passionibus, & vitis Sanctorum, de actibus beati Sylvestri, de inventione dominicæ crucis, & de inventione capitis beati Joannis Baptistæ conjunctim loquentem observat solertissime dictum: *Omnia probate, quod bonum est, tenete*, atque in ipsis apogryphis discretionem esse tenendam innuit: „De quibus quædam in totum sunt rejicienda, quædam autem propter „Hæreticorum calumnias inter apogrypha sunt computanda, sed non „penitus abominanda, de quibus viros catholicos in suis opusculis testimonio legimus assumpsisse“ **). Imo, quod maximum est, etiam ipsa illa ars, qua Blondellus putavit, Isidori fraudem posse se manu prehendere, & in qua potissimum robur posuit ex Patrum scriptis frustra illa excerpens, unde Isidorus epistolas falso inscriptas confarcinaverit, hæc Blondelli ars, inquam, ne Hincmaro quidem incognita fuit, quam tamen ipse non adoptavit, sed repudiavit, e contrario hanc veram statuens, notamque rerum ecclesiasticarum peritis regulam Cap. 20: „Hic enim est mos apostolicæ Sedis Pontificibus, ut verba Decessorum suorum quasi propria in suis ponant epistolis, sicut qui legit, intelligit.“ Eundem morem & sancti Patres, & Concilia sæpe secuta sunt, ut Nostri ab exemplis jam ostenderunt, ipsique, si nunc locus foret, ostendere possemus. Hæc eo dicta sint, ut manifestum fieret,

L 11 2

haud.

*) Singulariter adhuc hoc loco notandum, tam Hincmarum, quam ipsum Isidorum attentionem ad Apogrypha habuisse, qui Apostolorum Canones, etsi origine geminos non judicarent, Ecclesiæ tamen autoritate inter canonicas constitutiones reponi posse crediderunt. Numquid & posterior Ecclesia idem potuit circa Decretalia Isidori, licet *historice* falsa, jam tamen *canonice* valida?

**) Quam sapiens Hincmari monitum! Nonne autem & viri catholici, & sancta Concilia ex Decretalibus Isidori testimonia desumerunt? Quis ergo Catholicus ea penitus abominetur??

haudquaquam cæca ignorantia præteritis seculis Isidorianas Decretales pro antiquis documentis acceptas fuisse.

§. 15.

Miraculum vero omnium maximum, quod nobis Isidori Mastiges credendum imponunt, est illud ipsum seculum octavum nonumve, quod ab hodiernis Criticis & Philologis depingitur tamquam densa ignorantiae nube obscuratum, inter reliquos Idiotas omnes infelicibus ovis exclusos, qui fraudem tunc noviter natam, nunc vero post annos mille propatulam non animadverterint, unum protulisse albæ gallinæ filium, scientiæ omnigenæ, seu Poly-historiæ portentum, inter suos tamen plane incognitum, de cuius existentia hodieum dubitatur, Isidorum *Mercatorem*, vaserrimum omnium, quotquot umquam terra tulerit, felicissimumque impostorem, quippe qui Ecclesiam Dei plura per secula, prope annis jam mille deceperit. Dico plus quam humanæ scientiæ, ac omnigenæ eruditionis in rebus profanis æque, ac sacris portentum esse debuisse illum Isidorum, si deceptorem. Blondelli enim, qui illius vel vestigia pressit, herculeus non immerito labor censetur, eoquod iste studio quodam incomparabili omnium fere antiquorum Pontificum, Patrum, Conciliorum, Historicorum, aliaque inde a quarto seculo litteris consignata Ecclesiæ monumenta lustravit, atque ex iis phrasas, ac periodos parallelas ad confrontandum, ut sperabat, Isidorum excerpsit; quem postea laborem Labbeus ampliavit, haud dubie, si plures viri docti id operæ in se susciperent, adhuc ampliandum. Quodsi tantum opus est, Isidori vel vestigia sequi, ut immensum quoddam eruditionis mare persfretari oporteat; id nunc quidem in abundanti documentorum typis impressorum copia, licet non sine summo labore fieri potest: illis vero antiquis temporibus, ubi arte typica nondum inventa, multo rarior difficiliorque fuit librorum manuscriptorum copia, hinc necessario etiam constrictior lectio, atque eruditio; nonne sentis te Isidoro opus affingere humanis viribus multo gravius, qui immensa quadam lectione omnium fere antiquorum scripta expilaverit, atque frustra hæc excerpta non solum *analytice* extra suum ordinem, prout Blondellus & Labbeus fecerunt, disperferit, sed quod multo majus, & neque Blondellus, neque Labbeus facere potuerunt, *synthetice* in unum corpus totum collegerit, in tale totum, quod primitivæ Ecclesiæ statum locorum, temporum, personarum, negotiorum, & circumstantiarum singillatim indicatis denominationibus repræsentaret, atque hoc attentatum

tam

tam felici successu perfecerit, ut nulla novitatis, nulla falsitatis specie fraus se ipsam proderet, sed plenam fidem sinceritatis inde ab initio in Ecclesia Dei inveniret, eandemque per secula conservaret? Talem mihi vel unum in orbe deceptorem ostende, & victas tibi manus dabo. Ego vero miror, alias solertissimos viros hoc argumento, quod decretorium, seu demonstrativum arbitror, non fuisse permotos ad Isidorum ab impostoris infamia purgandum, quin potius ad atrocius criminandum nostro hoc tam *tolerante* seculo!! Nonne apologiæ fatis jam est Isidoro, a nostro seculo non *tolerari*? Apogryphas, seu corruptas alienis centonibus, vel etiam falsa titulorum inscriptione vitiatas merces (non repugno, attamen neque ut probatum accipio) quisquis fuerit, ille *Mercator* collegerit; quod autem ante se non jam existentes, ipse primitus tot, tamque diversas suis technis fabricaverit Decretales; mihi frustra fabulam canes persuasurus, ut credam *ἀδύνατον*.

§. 16.

Quas primis 36 Pontificibus ante Siricium Isidorus affinxisse dicitur numero fere 80 epistolas, tantum legi oportet, & secum ponderanti momenta jam allata fatis manifeste patebit, eas unius hominis figmentum esse non potuisse tam propter multiplicem rerum, locorum, personarum, & circumstantiarum varietatem, quam propter illorum omnium in tanta temporum obscuritate mirabilem cum aliis historiæ documentis conformitatem demtis quibusdam (si ita placet, hodieum litigiosis) anachorismis & interpolationibus, aut ut forte justo largior sim, supposititiis etiam centonibus, quæ ipsa longævæ vetustatis indicia sunt, a quibus vix, aut ne vix quidem ullum immune datur vetus monumentum. Hic tantum breve quoddam schema Decretalium oculis subjiciam: neque enim lucem refugiant, quod mendacii est; sed quod veritatis est, sciri potius desiderant, quam ignorari.

S. Clementis epistolæ quinque sunt. Prima ad Jacobum Hierosolymæ Episcopum narrat, qua ratione Petrus brevi moriturus congregatis fratribus Clementem commendans multa ei tradiderit regendæ Ecclesiæ præcepta. Altera ad eundem Jacobum tractat de sacris vestibus & vasis, vel ut vulgo dicitur, de *Sacramentis*. Tertia in MSpto Harduini titulum habet: *Omibus tam majoribus, quam inferioris ordinis Clericis, ac cunctis fidelibus*: agit de officio Sacerdotum & Clericorum. Quarta inscribitur Julio,

& Juliano, aliisque discipulis, qui malorum hominum persuasionebus aliquatenus a recta via declinaverant. Quinta Fratribus Hierosolymitanis de communi vita, aliisque de causis.

Anacleti tres epistolæ. Prima ad omnes Episcopos, ceterosque fideles agit 1^{mo} de iis, qui Sacerdotes accusant, 2^{do} ut Episcopus Deo sacrificans testes secum habeat, 3^{tio} de peregrinis, & provincialibus iudiciis, 4^{to} ut oppressus iudicio secularium appellet iudicium Sacerdotum, & de maioribus causis ad Sedem Apostolicam referendis. Altera universis Episcopis in Italia constitutis inscripta 1^{mo} de ordinationibus Episcoporum, & omnium Clericorum, 2^{do} de accusationibus Episcoporum, 3^{tio} quod minus, quam a tribus Episcopis non debeat Episcopus ordinari, 4^{to} in quibus civitatibus Prælati ac Metropolitani esse debeant. Tertia omnibus Episcopis, ac reliquis Sacerdotibus 1^{mo} de bipartito ordine Sacerdotum, 2^{do} de ordinatione Episcoporum, ac Presbyterorum, 3^{tio} de discrimine Episcoporum, & civitatum, 4^{to} ut difficiliore causæ ad Sedem Apostolicam referantur, 5^{to} de non admittendis ad accusationem inimicis, & de extraneo iudicio.

Evaristi duæ epistolæ. Prima ad universos Africæ Episcopos docet, quot Diaconi in civitate esse debeant, & de uxore ducenda. Altera ad omnes in Ægypto Fratres de mutua dilectione inter Sacerdotes & Ecclesias.

Alexandri tres epistolæ. Prima inscribitur omnibus Orthodoxis per diversas provincias, 1^{mo} de iis, qui Sacerdotes accusant, 2^{do} de confessione per vim extorta, 3^{tio} siquis adversus Rectorem Ecclesiæ querelam habuit, 4^{to} ut in oblatione Sacramentorum commemoretur passio Christi, & ut panis tantum, & vinum aqua mixtum offeratur, 5^{to} de benedictione salis & aquæ, aut ceterorum elementorum, 6^{to} de Trinitate, & unitate Deitatis. Secunda omnibus Episcopis per diversas regiones de causis & gravationibus Sacerdotum. Tertia omnibus Sacerdotio fungentibus, ut vitentur detractioes & injustæ pulsationes.

Xysti I epistolæ duæ. Prima ad omnes Christi fideles est adhortatoria ad rectam fidem servandam: agit etiam de suspectis accusatoribus. Altera universis Ecclesiis directæ 1^{mo} de sacris vasis, 2^{do} de appellanda Sede Apostolica, 3^{tio} de Episcopis Sede pulsis.

Telef-

Telephori una ad Fratres Episcopos 1^{mo} ut septem hebdomadas ante Pascha Clerici a carne jejurent, nec admittant laicos in accusationibus suis, 2^{do} de celebratione Missarum, & Hymno angelico, 3^{tio} de Episcopis honorandis, 4^{to} de accusatoribus non recipiendis.

Hygini epistolæ duæ. Prima inscribitur omnibus apostolica fide imbutis 1^{mo} de missione Filii a Patre, 2^{do} de causis Episcoporum, 3^{tio} de criminationibus Maiorum, 4^{to} de peregrinis judiciis. Altera ad Athenienses est dehortatoria a malo.

Pii I epistolæ quatuor. Prima ad omnes Ecclesias ordinat, ut die dominico Pascha celebretur, & a quibus non oporteat Episcopos accusari, atque de his, qui transgrediuntur iussu apostolicæ Sedis. Altera Fratribus Italiæ, quod non possint amplius ad humanos usus transferri, quæ semel divinis usibus consecrata sunt. Duæ aliæ Iusto Viennensi Episcopo scriptæ sunt tantum consolatoriæ, & adhortatoriæ.

Aniceti epistola una universis Ecclesiis per Galliæ provincias, 1^{mo} de ordinationibus, & causis Episcoporum, 2^{do} de Primatibus, & Metropolitanis, 3^{tio} si Metropolitanus suspectus Episcopis, 4^{to} de tonsura Clericorum, & habitu.

Soteris epistolæ duæ. Prima Fratribus omnibus in Campania de natura Filii divina, & humana. Altera ad Episcopos Italiæ, ne femina sacra vasa, vel sacras pallas attingant, vel altaria incendant.

Eleutheri epistola una universis Ecclesiis per Galliæ provincias, 1^{mo} de eccis non vitandis, 2^{do} de accusationibus Episcoporum, & Clericorum, 3^{tio} & omnium Comprovincialium.

Victoris quatuor epistolæ. Prima ad Theophilum *Alexandria*, alii legunt ex Beda *Cæsareæ* Episcopum, 1^{mo} de celebratione Paschæ, & Baptismi, 2^{do} nequis incerta judicet, 3^{tio} de causis Episcoporum terminandis. Secunda universis Episcopis per Africam de concordia & unitate. Tertia ad Desiderium Viennensem, ne Pascha cum Judæis celebretur. Quarta ad Episcopum de Paschatis celebratione.

Zephy-

Zephyrini epistolæ duæ. Prima ad omnes per Siciliam Episcopos de causis & judiciis. Altera ad Fratres in Ægypto de Episcopia spoliatis, & ordinatione Clericorum.

Callixti epistolæ duæ. Prima inscribitur Benedicto Fratri, & Coepiscopo de temporibus jejuniorum, & criminationibus Doctorum. Altera universis per Gallias Episcopis 1^{mo} de iis, qui conspirant adversus Episcopos, 2^{do} de iis, qui communicant excommunicatis, vel infidelibus, 3^{tio} ut nullus Episcopus de alterius Parochia aliquid prafumat, ac de mutationibus Episcoporum, 4^{to} de conjunctione consanguineorum, 5^{to} qui non debeant admitti ad testimonium, 6^{to} an Sacerdos post lapsum possit ministrare.

Urbani una epistola ad omnes Christianos 1^{mo} de vita communi, & quam ob causam Ecclesia possessiones habere cœperit, 2^{do} in quos usus, & a quibus res ecclesiasticæ dispensentur, 3^{tio} de invaloribus rerum ecclesiasticarum, 4^{to} de Cathedris episcopalibus, 5^{to} ut nullus communicet cum excommunicatis ab Episcopo, 6^{to} de sponsione in Baptismo facta, 7^{mo} de impositione manus episcopalis.

Pontiani duæ epistolæ. Prima ad Felicem Scribonem de honore Sacerdotibus exhibendo. Altera ad universalis Ecclesiæ Episcopos de fraterna dilectione.

Anteri una epistola Baticæ, & Toletanæ Provinciæ Episcopis de permutatione Episcoporum.

Fabiani tres epistolæ. Prima inscribitur catholicæ Ecclesiæ ministris de ritibus Ecclesiæ romanæ, & schismate Novatiano, aliisque in catholica fide suspectis. Secunda omnibus Orientalibus de novo Chrismate singulis annis conficiendo, & de Episcopis non lacerandis obtretationibus. Tertia Hilario Episcopo de accusatione contra Episcopum, ejusque ad Sedem apostolicam appellatione.

Cornelii duæ epistolæ. Prima ad omnes Christi servos de translatione corporum Apostolorum, & de Novatianis Hæreticis. Altera ad Rufum Coepiscopum, an jurare Episcopi debeant, & de causis adversus absentes.

Lucii

Lucii una epistola ad Episcopos Galliæ, & Hispaniæ, 1mo ut Episcopus semper Clericos testes secum habeat, 2do de criminationibus Episcoporum, & ut appellatio ad superiores non negetur, 3tio ut Metropolitanus sine Episcopis nihil agat, & vicissim, 4to ut contra Episcopum Metropolitanus sine Episcopis causam non audiat, 5to ne Episcopi minores majoribus se præferant, 6to de iis, qui res Ecclesiæ auferunt.

Stephani duæ epistolæ. Prima fratri ac familiari amico Hilario inscripta, 1mo de iis, qui infames sunt, 2do de reverentia Præpositis exhibenda, 3tio de vestimentis ecclesiasticis. Altera omnibus per diversas provincias Episcopis, in qua varia continentur de accusationibus Episcoporum.

Xysti II epistolæ duæ. Prima Grato Coepiscopo de æterna generatione Filii, & libera appellatione Episcoporum ad apostolicam Sedem. Altera fratribus per Hispanias de causis, & judiciis Episcoporum.

Dionysii epistolæ duæ. Prima ad Urbanum Præfectum est adhortatoria. Altera ad Severum Episcopum agit 1mo de subordinatione erga apostolicam Sedem, 2do de Ecclesiis parochianis per Cordubensem provinciam ordinandis.

Felici I tres epistolæ. Prima paterno Coepiscopo scripta de judiciis adversus Episcopos, & Clericos. Altera ad universos in Galliis Episcopos, est consolatoria de oppressis Episcopis. Tertia ad Benignum Episcopum contra eos, qui Filium minorem Patre dicunt.

Eutychiani epistolæ duæ. Prima fratribus Joanni, & omnibus per Baticam provinciam Episcopis inscripta docet, quod Christus verus Deus, & verus homo fuerit. Secunda Episcopis per Siciliam 1mo de modo recipiendi accusationem adversus Clericos, 2do de non admitendis ad accusationem Christianorum, 3tio de modo procedendi in negotiis ecclesiasticis.

Caji epistola una ad Felicem Episcopum, 1mo a quibus non accusandi Christiani, 2do Episcopum non accusandum apud seculares, 3tio de Clericis apud Episcopum accusandis, 4to de his, qui negant verbi

M m m

Dei

Dei incarnationem, 5^{to} quod ad vitam æternam perveniri non possit, nisi per Mediatorem Christum, 6^{to} de Ordinibus ecclesiasticis.

Marcellini duæ epistolæ. Prima Salomoni Coepiscopo, quod Filius Patre minor non sit. Altera universis Episcopis per orientales provincias inscripta docet varia de contentionibus inter Christianos ortis, & Clericorum judicii.

Marcelli epistolæ duæ. Prima universis Episcopis per Antiochenam provinciam 1^{mo} de subjectione erga romanam Cathedram, 2^{do} quod mala pullulantia oporteat fraterna charitate refecare. Altera ad Maxentium Tyrannum de charitate & persecutione.

Eusebii tres epistolæ. Prima Episcopis omnibus per Gallicanas provincias inscripta agit de accusationibus Sacerdotum. Altera fratribus per Alexandriam, & Ægyptum de judicandis Episcopis. Tertia ad Episcopos Campaniæ, & Tusciæ denuo de judiciis.

Melchiadis epistola ad Episcopos, Marinum, Benedictum, Leonium, ceterosque Hispaniarum, & illarum Partium, 1^{mo} de majoribus causis ad apostolicam Sedem deferendis, 2^{do} de Sacramento impositionis manuum, & Baptismi, 3^{io} de jejuniis dominicæ diei, & quintæ feriæ. Item alia hujus Pontificis nomine epistola de *Donatione Constantini*.

Constantini Imperatoris constitutio ad Sylvestrum I. Item epistola Nicæni Concilii ad Sylvestrum. Item excerpta quædam ex synodalibus gestis S. Sylvestri.

Epistola Athanasii, & ceterorum Ægyptiorum ad Marcum I de numero Canonum Nicænorum pro exemplaribus Nicæni Concilii, quia Ariani ista incenderunt. Marci ad eosdem rescriptum de missione Capitulorum Nicænorum.

Julii I epistola increpatoria ad Orientales pro Athanasio, & de illorum excessibus contra romanam Ecclesiam. Epistola Orientalium ad Julium causantium, quod in communionem recepisset Athanasium, & ceteros ab ipsis damnatos. Julii rescriptum ad Orientales pro Athanasio, aliisque.

Libe-

Liberii epistola, ut nullus in persecutionibus, quamdiu durare potest, suam relinquat Ecclesiam. Athanasii, & Ægypti Episcoporum ad Liberium epistolæ de oppressionibus Arianorum. Ejusdem rescriptum ad eosdem. Ad Felicem II epistola Ægyptiorum, Thebaidorum, & Lybiorum de infestationibus Arianorum. Rescriptum Felicis ad eosdem de judiciis Episcoporum. Alia ejusdem Papæ epistola de oppressione Arianorum.

Ad Damasum epistola Aurelij Carthaginensis, qua petit sibi mitti statuta inde a S. Petro omnium Romanorum Pontificum. Responsio Damasi ad eundem. Alia epistola hujus Pontificis ad Paulinum Antiochenum de natura Christi humana & divina. Item epistola alia ad Hieronymum de libro Psalmorum secundum 70 interpretes: Hieronymi responsum. Item epistola Stephani, & trium Conciliorum Africa ad Damasum de Privilegio Romanæ Sedis: ejusdem responso. Alia ejusdem epistola ad Prosperum Numidiæ primæ Sedis Episcopum, aliosque de Chorepiscopis. Item alia ex Synodo Romana ad Illyrici Episcopos de conservatione Nicænæ fidei. Denique alia universis Episcopis per Italiam de causis ad Apostolicam Sedem deferendis.

§. 17.

En tibi, pacate Lector! brevem epitomen diffamatarum adeo epistolarum, quas si vacat integras legere, tantum abest, ut mendacii spiritu confictas, ut potius Spiritu S. repletas, talesque sis inventurus, ad quas confingendas uni homini neque potentia fuerit, neque voluntas: non potentia propter rerum tam multiplicium cum rebus gestis mirabilem convenientiam, qualem in specie de epistolis ad Hispanos datis a Pontificibus Antero, Lucio, Xysto, Dionysio, Eutychiano, & Melchiade in laudato suo Opere Card. d'Aguirre jam ostendit, atque de reliquis generatim tot seculorum assensus firmavit: quorum in arte critica defectum si obtendas, hunc quidem falsum esse supra §. 13 & 14 singulariter ex Hincmaro demonstravi. At enimvero certum esse assero priora secula minus ex defectu artis criticæ peccasse, quam nostra posteriora a Lutheri reformatione per excessum hypercriticæ non jam artis, sed temeritatis. — Neque voluntas fingendi in illis epistolis apparet, eoque singulas legenti certe patebit, illarum Authores diversa sibi pro morum ædificatione, pro hæresum extirpatione, pro fidei confirmatione, pro disciplinæ institutione,

M m m 2

pro

pro rituum externorum ordinatione, pro variis temporum exigentis in animo proposuisse, non tantum, qui unicus Isidori scopus falso dicitur, pontificiæ Authoritatis extensionem. Nemo profecto mendax sine causa; tam innatus naturæ nostræ veritatis amor est. Nemo ita insanit, ut summi studii, ac laboris dispendio mendacia sibi nihil profutura consarcinet. Hujusmodi a scopo, ut putatur *Mercatoris*, quam longissime alienæ vel magna ex parte, vel penitus & ex toto plurimæ sunt epistolæ, uti Clementis, Evaristi, Xysti I, Telesphori, Hygini, Pii I, Soteris, Callixti, Urbani, Pontiani, Cornelii, Stephani, Xysti II, Dionysii, aliorumque.

§. 18.

Quod plures illarum Decretalium de judiciis, de contentionibus, & Episcoporum accusationibus, vel oppressionibus tractent, id sane non mirum videatur, sed illorum temporum gestis, seu genuinis historiæ documentis apprimè conveniens: quamprimum enim aucto hominum numero dilatari cœpit Ecclesiæ, prout humana indoles est nonnisi difficillime in unitate animorum, & subordinatione contineri, jam plures ortæ sunt contentiones inter subditos & Præsules, vel istorum inter se ipsos. Nihil nunc de Apostolorum vivo adhuc Domino controversiis dicam; hujusmodi exempla pluribus in locis acta Apostolorum, & S. Pauli epistolæ exhibent, ut adeo idem Apostolus propter obloquentium pertinaciam ad Ecclesiæ Principes Hierosolimam confugere debuerit. Ipsa Clementis Romani prima ad Corinthios epistola communi consensu authentica idem testatur. Quis dubitet litibus per illorum jam temporum hæreticos sæpe exortis ad Apostolicam Petri Cathedram recursum frequentius fuisse, & inde decreta emanasse? Præter illas Corinthiorum contra Presbyteros, Asiaticorum de Paschate, Africanorum de Baptismo controversias, fat nota est causa Basilidis & Martialis Episcoporum in Hispania depositorum, quæ non solum ad vicinos Gallicanos, sed & Africanos, atque Italos propagata excitasse dissidia videtur diu non extincta: hinc forsitan tot Pontificum decreta in Hispanias, Gallias, aliasque provincias, ut Stephani, Xysti II, Dionysii, Felicis, Eutychiani, usque ad Melchiadem. Acriores postea per Arianos excitatas fuisse orthodoxorum Episcoporum persecutiones abunde constat, ut sane occasionem dederint epistolis sub Sylvestro, Marco, Julio, Liberio: quæ gesta historica magnum forent argumentum pro defendenda Decretalium authenticâ; sed hoc non est, quod intendo, dicas pace mea vel adulteratas, vel omnino falsis Authoribus

ribus ex errore suppositas; tantum hoc contendo, eas cum temporum adiunctis quam optime coherere, hinc contento suo nullam fraudis suspicionem parere posse. Hanc cum rerum historia convenientiam si neges, tu vero aut inficium te, aut mendacem prodis.

§. 19.

Falsum est usque adeo, ut nihil apertius falsum, quam quod cum Vanespenio multi oggerunt, nihil in hisce epistolis reperiri de hæreticis primorum seculorum, de persecutionibus Tyrannorum, de Confessorum consolatione, vel ad martyrium exhortatione, aliisque de rebus, quibus illorum temporum sincera scripta abundant: id indicio est prædictas epistolas a maximis suis calumniatoribus non fuisse lectas, prout fieri amat, ut plerique blasphemant, quod ignorant. Atque hæc potissimum causa est, cur brevem epistolarum decretalium epitomen fecerim: unde jam colligas, siquid humanum in arte critica ratiocinium valet, illas ab uno deceptore non potuisse una omnes fabricari: revera autem easdem non ab uno Isidoro fabricatas; sed tantum collectas fuisse, quantum injuriæ temporum admittunt, post tanta scilicet documentorum naufragia, sat multis tamen exemplis nunc dabo conspiciendum.

§. 20.

Romanæ Ecclesiæ Antistites ex remotissimis quaquaversus regionibus jam a primordio in causis difficilibus, dubiisque sæpe fuisse consultos, eosque pro apostolica sua vigilantia, & cunctarum ovium cura illuc frequenter responsa emisisse, tam certum est, quam quod certissimum. Præter eas, quæ veluti ex universali diluvio divina providentia feliciter evaserunt, primorum Pontificum epistolas maximam partem a Coustantio collectas, hujus rei testis plane expertissimus ipse S. Hieronymus est, Romæ sibi id muneris a Pontifice injunctum asserens, *ut in chartis ecclesiasticis juvaret Damasum romanæ urbis Episcopum, & Orientis atque Occidentis consultationibus responderet.* Hæc autem fere omnia apostolicorum virorum tam pretiosa monumenta damno irreparabili perditæ sunt, tam propter naturalem rerum humanarum caducitatem, quam præcipue propter sævientem tunc temporis persecutionem, quæ non tantum in corpora fidelium crudelis fuit, quorum sanguinem effudit;

verum etiam in animas, quarum ad vitam æternam nutrimenta omnia sua vi, & fraude sustulit *).

§. 21.

Perpetuo tamen memoria quædam cirmeliorum tam pretioforum, atque etiam quædam, obscuriora licet-vestigia in Ecclesia Dei conservata sunt: hinc non mirum (prout fatalis illa fors vetustarum rerum plerumque est) vera fuisse falsis mixta, nec non & apogrypha inde pronata, de quibus jam supra §. 14 Hincmari Rhemensis sapientem animadversionem vidimus. Quapropter eas, quas Isidorus in sua Collectione exhibet, Pontificum omnium epistolas nolim ego tamquam authenticas, sive genuinas vindicare, sed *inter apogryphas*, si placet, per me rejicias: unice mihi demonstrandum plurimis ab exemplis sumsi, nullam hic Isidori fraudem subesse, sed Decretales easdem jam ante ipsum extitisse, quarum igitur non fabricator, sed tantum compilerator fuerit. Multa ad hunc scopum subsidia me inventurum sperassem, si alterum Constantii Tomum *de Pseudoisidorianis*, ab illo tam sæpe promissum ullibi potuisssem investigare: credere enim licet, hunc Parisiensem Monachum, quam temerarius fuit in facile rejiciendis Pontificum epistolis, tam futurum saltem fuisse fidelem in detegendis fontibus antiquis, unde Isidorus hauserit. Si tanti momenti opus promissum ipse Constantius non præstitit, a Maurana Congregatione virorum eruditionis laude tam celebrium istud adhuc sperandum existimo: facilius autem id Romæ in abundantia antiquissimorum Codicum præstari posse videtur. Pro mea quidem virium tenuitate exempla tamen sat multa jam inveni.

§. 22.

A Clemente I incipiam. Prima ejusdem ad Jacobum epistola tam antiqua est, ut a Rufino seculi quarti Scriptore in latinum idioma translata, & vetustissimis Canonum Collectionibus, nominatim Codici per Paschasium Quesnellum edito inserta, atque a Concilio Vasensi a. 442 laudata sit. Altera ad Jacobum, seu *de Sacramentis* in perantiqua Collectione ante Seculi VII finem ponenda in Bibliothecæ Colbertinæ Codice

*) Cum tot interierint antiquitatis documenta, patet, quam infirmum, nulliusque valoris sit *negativum* illud argumentum, quod multi a veterum silentio repetunt: argumentum tamen, quo Isidori oppugnatores fortius nullum habent,

dice 3368 reperitur, teste ipso Coustantio *). Tertia de officio Sacerdotis, & Clericorum pariter jam a Rufino Interprete conversa in latinum legitur in libro Recognitionum ad Gaudentium.

De duabus Anacleti epistolis decretalibus, omni sapientia plenis mentionem facit libri pontificalis sub *Damasi* nomine vulgati vetus exemplar manuscriptum, quod Romæ Achilles Staius Lusitanus P. Turriano commodavit **).

In eodem libro pontificali de S. Evaristo legitur, quod præcepit, ut septem Diaconi custodirent Episcopum prædicantem propter stilum veritatis, hoc est, propter testimonium veræ, & sanctæ prædicationis. Hanc constitutionem exhibet hujus Pontificis prima epistola ad omnes Africanos Episcopos hisce verbis: „Diaconi, qui quasi oculi videntur, esse Episcopi, in unaquaque civitate juxta Apostolorum constituta, septem debent esse, qui custodiant Episcopum prædicantem, ne aut ipse ab insidiatoribus quoquo modo infestetur, aut lædatur a suis, aut verba divina detrahendo, aut insidiando polluantur, vel despiciantur, sed veritas spiritali redoleat fervore, & pax prædicata labiis, animi cum voluntate concordet.“

De Alexandro liber pontificalis hæc habet: *Hic passionem Domini misuit in precationem Sacerdotum, quando Missæ celebrantur.* Item: *Hic constituit aquam aspersoris cum sale benedici in habitaculis hominum.* Hæc autem decreta in prima hujus Pontificis epistola occurrunt N. 4: *Ut in oblatione Sacramentorum commemoretur passio Christi;* & N. 5: *De benedictione salis, & aquæ.*

De Xysto I Lib. pontif.: *Hic constituit, ut ministeria sacra non tangerentur, nisi a Ministris sacris.* Item: *Ut quicumque Episcopus evocatus fuerit ad Sedem romanam apostolicam, rediens ad Parochiam suam non susceperetur, nisi cum formatis salutationis ad plebem a Sede apostolica.* Hæc decreta in altera ejusdem epistola continentur N. 1 & 2.

De Telesphoro Lib. pontif.: *Hic constituit, ut septem hebdomadas ante Pascha jejunium celebraretur, ut in Natali Domini nostri J. C. noctu Missæ*

*) Præfat. p. 87.

**) Advers. Magdeburg. Lib. 5, Cap. 20.

Missæ celebraretur, cum alio tempore ante horæ tertiæ cursum nullus præsumeret Missas celebrare, quia ea hora Dominus noster ascendit in crucem: & ut ante Sacrificium Hymnus diceretur angelicus, hoc est, Gloria in excelsis Deo. Hæc ipsa leguntur in ejus epistola N. 1, 2, 3.

De Hygino Lib. pont.: *Hic Clerum composuit, & distribuit gradus. Istud ex ejus epistola prima apparet: De causis Episcoporum, de criminationibus majorum, de peregrinis judiciis. N. 2, 3, 4.*

De Pio I Lib. pont.: *Constitutum de Ecclesia fecit. Tale invenitur in epistola secunda: Quæ divinis sunt assignata usibus, ad humanos usus sine sacrilegio non posse transferri. Ceterum ejusdem Pii epistolæ duæ ad Justum Viennensem, secus ac Blondello, Coustantio, aliisque Anti-Isidorianis placuit, hodieum severissimis Criticis tamquam genuinæ probantur, ut nihil de prioribus dicam, recentissime P. Placido Sprenger Banzenfi Monacho, etsi alias sanctæ apostolicæ Sedi haud satis æquo, qui in *Thesauro rei Patristicæ* Wirceburgi a. 1785 edito ita scribit *): „Certe Blondellus, qui in Pseudo-Isidoro Genevæ impresso „A. D. 1628 eas imposturæ accusaverat, postea senior, adeoque prudentior factus veterem hanc suam de iis sententiam omnino exiit, ut „ex posterioribus A. D. 1641, 1646, 1649 manifestum sit. Siquidem „in libris de Primatu, de Sybillis, & in Apologia, utriusque epistolæ „tamquam ad illum, cujus nomen præferunt, certissime pertinentis testimoniiis abutitur: quod etiam Claudium Salmasium, & Joannem „Dallæum, Henrico Hammondio reclamante, pridem secisse inferius „exponam. Cur ergo vel propter Blondellum nondum resipiscentem „suspectiores nobis sint, nihil sane causæ est.“ Si duæ istæ Pii epistolæ quidquam in favorem apostolicæ Sedis continerent; forsitan jam ea nostris Criticis sufficiens causa foret easdem inter spurias rejiciendi.*

De Aniceto Lib. pont. ait: *Hic constituit, ut Clericus comam non nutriret secundum præceptum Apostoli. Quod decretum legitur in ejus epistola ad Galliæ Episcopos de tonsura Clericorum, & habitu. N. 4.*

De Sotere libr. Pontif.: *Hic constituit, ut nulla Monacha pallam sa-crata[m] contingeret, nec incensum poneret in sancta Ecclesia. Idem decretum legi-*

*) Tom. 2, Dissert. 14, Cap. 2.

legitur in epistola secunda ad Italiæ Episcopos, ne *femina sacra vasa, vel sacras pallas contingant, vel Altaria incendant.* Admodum probabile est, hujus constitutionis editæ causam fuisse, quod ex Montani secta feminae se sacris immiscerent, ut docet Baronius ad annum 173.

De Eleutherio libr. Pontif.: *Hic constituit, ut nulla esca usualis, quæ tamen rationalis, & humana est, quam Deus creavit, a christianis maxime fidelibus repudiaretur.* Eadem habet epistola ad Galliæ provincias de *escis irrationabiliter non vitandis.* N. 1.

De Victore libr. Pontif.: *Hic constituit, ut sanctum Pascha die dominica celebretur, sicut Pius.* Idem hoc decretum continent quatuor epistolæ ad Theophilum Cæsareensem, ad Africanos, ad Dēsidērium Viennensem, ad Paracodam Episcopum.

De Zephyrino libr. Pontif.: *Hic constituit, ut præsentibus Clericis, & laicis fidelibus sive Clericis, sive Levita, sive Sacerdos ordinetur.* Idem habet epistola secunda ad Ægypti Episcopos de *ordinatione Presbyterorum & Diaconorum.* N. 2.

De Callixto libr. Pontif.: *Hic constituit jejunium quater in anno fieri, frumenti vini & olei gratia secundum Prophetiam.* Decretum hoc exstat in ejus epistola ad Benedictum Episcopum de *temporibus jejuniorum.* N. 1.

Anteri I epistola ad Hispanos, de mutatione Episcoporum tamquam genuina a Card. d'Aguirre defenditur, eoquod Patribus Concilii Toletani X a. 656, item Toletani XVI a. 693 ante oculos fuisse videtur, cum translationes Episcoporum necessitate, vel utilitate publica interveniente licitas esse, idque *canonice* fieri assererent, nempe ad *regulam* ab Apostolica Sede, præsertim in illa celebri epistola Anteri sibi præscriptam.

De Cornelio libr. Pontif.: *Sub hujus Episcopatu Novatus Novatianum extra Ecclesiam ordinavit.* Item *Hic temporibus suis rogatus a quadam Matrōna Lucina corpora Apostolorum leatorum Petri & Pauli e catacumbis levavit noctu.* S. Hieronymus etiam de script. ecclē. in Cornelium asserit, eum de Novatiano, & de his, qui lapsi sunt, epistolam scripsisse. Hanc esse Cornelii primam de translatione corporum Apostolorum Petri & Pauli, &

de Novato non sine fundamento Binius contendit: „ideoque immerito
„illam de fide & autoritate taxari, quæ probatæ fidei testem Hierony-
„mum adepta est, & ejus scripta cum rerum historia conveniunt.“

De Lucio libr. Pontif.: *Hic præcepit, ut duo Presbyteri, & tres Dia-*
cones in omni loco Episcopum non deferrent propter testimonium ecclesiasticum.
Hujus decreti fanciendi causam dedisse putantur calumnæ in Cornelium
convictæ a Novatiano. Plura memorabilia de Lucii vita profert Card.
d'Aguirre ex pervetusto Codice membranaceo, cujus exemplar quod-
dam primo editum fuit Moguntia a. 1602, deinde vero recusum a. 1609
Antwerpia typis Plantinianis Balthazaris Moreti inter opera Luidprandi
pag. 189. In hac porro vita Lucii fit mentio ejusdem epistolæ, quam
ad Galliæ, atque Hispaniæ Episcopos datam Isidorus exhibet. Hoc do-
mentum tam præclarum, etsi longius; quia tamen minus cognitum huc
transferri dignum est: „Lucius Natione Romanus ex Patre Porphyrio
„sedit annos tres: fuit autem temporibus Galli, & Valusiani usque ad
„Valerianum III, & Gallicanum. Hic primum fuit in exilio, postea
„ad Ecclesiam incolumis reversus est, demum a Valeriano capite trun-
„catur I Non. Martii. Hic ordinavit Episcopos septem, Presbyteros
„quatuor, Diaconos quatuor. Hic propter malevolos, & Sacerdotum
„persecutiones constituit, ut duo Presbyteri, & tres Diaconi Episco-
„pum in omni loco non deferant, ut juxta Apostolum etiam ab his,
„qui foris sunt, studium habeatur bonum conservari testimonium: quod
„in epistola, quam omnibus Galliæ, & Hispaniæ Episcopis destinavit,
„apud ipsos servari hortatus est. Constituit in eadem etiam, ut cri-
„minationes majorum nati per alios non fiant, nisi per eos, qui cri-
„mina intendunt, & ipsi tales ut digni sint, & irreprehensibiles appa-
„reant, & actis publicis se omni suspitione, & inimicitiiis carere doceant,
„& fidem, ac conversationem irreprehensibilem se ducere ostendant.
„Et quia hoc fieri ante quoslibet judices interdum difficile animadver-
„tit, ad alios ecclesiasticos judices, ubi major auctoritas fuerit, po-
„stulanti audientiam non negandam esse decrevit. Item in eadem jux-
„ta SS. Apostolorum, & eorum Successorum decretum præcipiendo
„constituit, ut si quislibet Metropolitanus Episcopus, nisi quod ad suam
„solummodo pertinet parochiam, nisi consilio, & voluntate omnium
„comprovincialium Episcoporum extra aliquid agere tentaverit, gradus
„sui periculo subiaceat, & quod egerit, irritum habeatur, & vacuum:
„con-

„consensu et cōsilio, & cōsilio solummodo omnium provincialium Pontificum Metropolitano Episcopo licere constituit agere, & disponere de eorum causis, & Ecclesiis, & Clericis, atque Secularium necessitatibus, aut de communibus quibuscunque negotiis agi necesse fuerit. Similiter de Provincialibus statuit, ut nihil eis segregatim, aut communiter absque Metropolitano agere liceat, nisi de his solummodo, quæ ad eorum proprias Parochias pertinent. Similiter apostolica auctoritate præcepit, ut nullus Metropolitanus Episcopus absque omnium Suffraganeorum suorum præsentia aliquorum eorum audiat causas; aliquin irritæ erunt, & ipse causam dabit pro facto. Item præcepit, ut per singulas provincias hoc Episcopi observent, ne posteriores se prioribus suis præferant, ne eis inconsultis, nisi quantum ad propriam Parochiam pertinet, aliquid agant, sed de communibus eorum causis consonam sententiam proferant, & determinent, quia aliter actæ nullas vires habebunt, nec ecclesiasticæ reputabuntur. Item in eadem epistola de exspoliatione dotis, & oblationum Ecclesiarum consultus, prius multis rationibus, & multorum auctoritate hoc genus invasionis, & rapinæ sacrilegium esse ostendit: postmodum & auctoritate, & decreto Prophetarum, Apostolorum, eorumque Successorum, & omnium catholicorum Patrum exemplis tales præsumtores, & Ecclesiæ raptores, atque suarum facultatum alienatores a liminibus sanctæ Matris Ecclesiæ anathematizat, & damnat, & sacrilegos esse iudicat, & non solum eos, sed omnes eis consentientes; quia non solum, qui faciunt, sed etiam, qui facientibus consentiunt, rei sunt, & iudicantur: par enim pœna, & agentes & consentientes comprehendet.“ Hactenus ibi, in quibus memorantur ea ipsa, quæ continentur in epistola ab Isidoro collecta. Quamobrem hanc eandem Lucii epistolam non solum ut antiquam, sed vere germanam cum Card. d'Aguires ausim defendere *): „Censeo non esse facile suppositionis damnandam, utpote quam tot seculis Ecclesia recepit inter alias Pontificum, ac perpetuo venerata fuit, quamvis hoc seculo nonnullis hominibus eruditis, etiam catholicis appareat supposita. Unde in editione novissima Conciliorum Philippi Labbe, & Gabrielis Cossartii Tom. I, Col. 721 initio hæc ipsi nota inuritur ad marginem: *Suspecta eodem jure cum aliis Isidori mercibus.* At quibusnam, rogo suspecta? nulli antiquorum: deinde ex recentioribus non Turriano, non Antonio Augustino, non Baronio,

N n n 2

„nec

*) Collect. Conc. Hisp. Tom. I, Dissert. 13.

„nec Bino, nec Saussajo, nec Francisco Macedo in *Affertore romano*
 „Vindicia III, Cap. 3, Sed. 1, pag. 130, nec Joanni Doujat, cujus
 „*prænotiones criticæ* Parisiis editas a. 1687 post hæc scripta legere licuit
 „Lib. 2, Cap. 26, N. 18, non denique aliis plurimis, nisi paucis qui-
 „busdam, & delicatis nimium, qui ob unam, aliamve difficultatem
 „occurrentem, & enodatu facilem non dubitant hujusmodi sacris, &
 „venerandis instrumentis nigrum theta præfigere, illaque arguere aut
 „*ΔΕΙΛΩ*, aut interpolationis saltem.“ Hæc doctiss. d'Aguirre.

De Stephano P. liber Pontificalis hæc habet: *Hic constituit Sacerdo-*
tes & Levitas vestibus sacratiss in usu quotidiano non uti, & nisi in Ecclesia tantum.
 Idem decretum in ejus epistola prima ad Hilarium Episcopum habetur de
vestimentis ecclesiasticis N. 4. Notum est plures ab hoc Papa epistolas fuisse
 scriptas auctoritate pontificia plenas, quæ lapsu temporum deperditæ sunt.

De Dionysio lib. Pontif.: *Hic Presbyteris Ecclesias divisi, & cæme-*
teria, parochiasque, & dioceses constituit. Eadem continet ejus epistola se-
 cunda ad Severum Episcopum.

De Eutychyano lib. Pontif.: *Hic constituit fruges, fabas & uvas su-*
per altare benedicti. Hoc idem continetur in præstanti epistola ad Joannem,
 & omnes Baticæ Provinciæ Episcopos de *proprietasibus utriusque naturæ*
in Christo, quam epistolam Card. d'Aguirre non levibus rationum momen-
 tis genuinam defendit. Certum est Eutychiano occasione valde op-
 portunam fuisse ad scribendam illam contra Paulum Samosatenum, qui
 aliquot ante annos blasphemo & putido ore effutierat, adhucque dissemi-
 nare pergebat Christum Dominum fuisse purum hominem.

De Cajo lib. Pontif.: *Hic constituit, ut omnes ordines in Ecclesia sic*
ascenderent, si quis Episcopus fieri meretur, ut esset Ostiarius, Lector, Exorcista,
Acolytus, sequens Subdiacomus, Diaconus, Presbyter, & exinde Episcopus ordina-
retur. Hæc statuta in fine epistolæ ad Felicem Episcopum occurrunt. N. 6.

Melchiadis ad Hispanos epistolam Card. d'Aguirre ut genuinam
 momentosis rationibus defendit: mihi autem hujus tanti Viri testimonium
 hoc loco sufficit, „quod hæc epistola in omnibus collectionibus tam edi-
 „tis, quam manuscriptis, etiam antiquissimis, quibus D. Loaisa usus fuit,
 „& in aliis ubique exstantibus, præsertim in Bibliotheca Vaticana inveni-
 „tur“ *).

Huic

*) Oper. Laud. Tom. 1, p. 311.

Huic Melchiadis epistolæ apud Isidorum subjungitur sub eodem nomine, ut vulgaris opinio est, altera epistola de *primitiva Ecclesia, & munificentia Constantini Magni erga eandem*: sive de *donatione Constantini*. Quod scriptum cum sit Malchiade certo posterius, in quo etiam Concilii Nicæni mentio fiat; hinc confidenter plerique *falsarium* vocant Isidorum. Sed isti nempe Aristarchi omnes præjudicio & ignorantia laborant: nam etsi hoc scriptum falso Melchiadis nomine a Gratiano allegetur, in Isidori tamen codicibus nomine omnino caret, sed post epistolam Melchiadis veluti proœmium est in sequentem *Constitutionem Constantini ad Sylvestrum*. Vide Ballerinos *). Dices forsitan, hæc ipsa *Constitutio de Constantini donatione* apogryphum documentum est: sit pace mea, de hoc jam non litigo, tantum observo, non esse Isidori figmentum, ut falso illi ab Alexandro Natali imputatur. Hujus donationis græca quædam fragmenta Balsamon producit; integrum autem documentum græce scriptum invenit P. Possinus in Vaticanis quatuor Codicibus græcis: hinc non improbabili-ter Baronius & Binius suspicati sunt hoc constitutum a Græcis confictum, postea latine redditum, & ab Isidoro fuisse exceptum. Nunc vero constat illud in gallicana etiam legi Collectione Isidoro antiquiore, quam vetustus codex Colbertinus 3368 exhibet: ex hac igitur, aliave fortassis adhuc vetustiore Isidorum exscripsisse credendum est.

Sequitur apud Isidorum, *quo tempore Nicænum Concilium habitum sit*. Hoc initium, certe genuinum, Præfationis est ad Collectionem Hispanicam, quam Ballerinii integram dederunt.

Tum sequitur epistola, vel Præfatio Nicæni Concilii *Beatissimo Sylvestro in urbe Roma Sedis Apostolicæ Antislite*. Nisi authentica sit hæc præfatio; certe tamen non ab Isidoro conficta, sed ex vetustiore collectione desumpta est, prout Ballerinii ostenderunt, etsi alias, quod de tantis Viris miror, erga Isidorum justo immoderatores. Sed quid temporum præjudicia in viros etiam summos non valent?

Postea ab Isidoro describuntur *Canones Conciliorum*, quæ insignis pars collectionis sincere descripta, ac germana hodieum censetur. Si deceptor Isidorus; quare falsas Synodos, aut falsos saltem Synodorum canones non fabricavit? — Demum epistolæ sequuntur ceterorum Ponti-

N n n 3

ficum

*) Opp. S. Leon. Tom. 3, p. 228.

ficum a Sylvestro usque ad Gregorium M. Primum jam documentum creditur supposititium *Excerpta quædam ex synodalibus gestis S. Sylvestri Papæ*. Certum est autem notumque eruditis, ea sub Symmachi ætate jam esse concinnata, & in Collectiones Italicas, Gallicasque ante Isidorum inserta, unde ab illo tantum extracta.

Quinque Pontificum, Marci, Julii I, Liberii, Felicis III, & Damasi epistolæ usque ad Siricium vulgo quidem pro supposititiis habentur, de quo disputare nolim; attamen & illas non ab Isidoro excogitatas, sed ab exstantibus jam documentis compilatas fuisse e.g. ex libro Pontificali, ex Socrate & Sozomeno, ex vetustis quibusdam collectionibus, qualem Longobardicis litteris exaratam vel ipse Coustantius memorat *), sat claris patet vestigiis; præterquam quod aliquæ illarum etiam pro genuinis hodie habentur, ut Damasi ad Paulinum ex Collectione Hispanica, ejusdem ad Illyrios Episcopos ex Theodoro, ac versione S. Epiphani in historia tripartita. Quamobrem cum firmissima sit juris regula: *actore non probante absolvi reum*; cum longe aliud sit falsa colligere documenta, quam confingere; cum insuper nequaquam ea jam in se ipsis certo falsa sint, quæ nunc a plerisque falsa reputantur; cum demum in tanta licet documentorum penuria, quanta nostris temporibus est, plurimis tamen, fere innumeris ab exemplis fidelitatem Isidori in compilando demonstratam vidimus; siquid humana valet critica, dicam, siqua inter homines justitia datur, Isidorum, quippe non fabricatorem, sed tantum collectorem Decretalium jam ante se exstantium ab infamia Impostoris absolvere necesse est. Provoco Febronianos, ab publice provoco, ut tanta in medium afferant rationum momenta *ad condemnandum*, quanta ego hucusque attuli *ad absolvendum*.

§. 23.

Judicium *absolutorium* adhuc confirmatur novo quodam reflexo argumento. Certum est ex omnium consensu, præcipue autem Hincmari Rhemensis, ad initium seculi noni anno 801 in mundum nati, adeoque coævo testimonio, collectionem Isidorianam hoc præcise tempore per gallicas, & germanicas provincias cæpisse publicari. Ita enim ille in Opusculo adversus suum Nepotem scribit cap. 24: „De libro collectarum epistoliarum ab Isidoro, quem de Hispania allatum Riculphus Episcopus „Mogun-

*) Præf. P. 80.

„Moguntinus *) in hujusmodi, sicut & in Capitulis regis studiosus obtulit, & istas regiones ex illo repleti fecit.“ Hunc Isidorum alio in loco idem Hincmarus adhuc clarius indicat his verbis Epist. 7: „Scriptum est in quodam sermone sine exceptoris nomine de gestis Sylvestri excerpto, quem Isidorus Hispalensis Episcopus collegit cum epistolis romanæ Sedis a S. Clemente usque ad B. Gregorium.“ Si verum est istud Hincmari assertum; causâ decisa est, non deceptor fuit Isidorus, sed S. Episcopus Hispalensis documentorum Ecclesiæ veterum optime gnarus, qui Seculi VII initio Hispaniam illustravit. Attamen hoc ipsum est, quod hodierni Critici nolunt fidem negantes licet non sine violentia humano iudicio inferenda, fidem negantes, inquam, Hincmaro Rhemeni, ipsius rei origini proximo, ejusdem a juventute studioso, & testi a partium studio prorsus alieno, imo & contra se ipsum testanti. Publica certe hujus rei persuasio tunc fuerit oportet.

§. 24.

Inde ergo Collectionis famosæ ortum Critici plerique repetunt, unde prima publicatio facta creditur, ex Moguntia: hinc fraus exiverit, subito latissime per Germaniâ, Galliæque regiones diffusa. Somnariæ sic licet, non item ratiocinari. Non tam facile, ac cito hominum societas, minus magnæ Provinciæ decipiuntur. Quis credat integram Collectionem potuisse publicam fidem invenire, nisi hujusmodi documenta saltem sparsim in diversis scriniis inventa, aut jam aliunde fuissent publice nota? Ut assertum suum Critici tueantur, in fraudis societatem trahunt Gallicana etiam, quæ *Hadriani* dicuntur, Capitularia utpote ejusdem tenoris cum *Isidori* Decretalibus: amplius ergo contradicunt Hincmaro de re licet domestica, sibi que odiosa testanti eod. Cap. 24: „De sententiis, quæ dicuntur ex græcis, & latinis Canonibus, & Synodis romanis, atque Decretis Præfulum, ac Ducum romanorum collectæ ab Hadriano Papa, & Engelramno Metensium Episcopo datæ, quando pro sui negotii causâ agebatur.“ An revera hæc Capitularia primitus ab Hadriano data Engelramno, an potius ab hoc collecta illi pro approbatione fuerint oblata; cum jam Hincmarus dubitasse videatur, cum alii postea viri perquam eruditi, ut Antonius Augustinus, Petrus de Marca, atque etiam Baluzius dubitaverint, cum manuscripti Codices inter se dissentiant; definire nihil ausim, sed & parum

*) Is in Sede Moguntina Lullo a. 786 successit, e vivis autem a. 814 excessit.

rum id scire interest: summa autem rei maximi momenti esse debet, scilicet hæc ipsa Capitularia jam inde a sua origine apud Gallos summe æstimata, publice probata, ab omni fraudis suspitione longe aliena fuisse iudicata. Argumentum vel ipsi Calvinistæ Blondello formidabile visum!

§. 25.

Hujus rei testem denuo Hincmarum Rhemensem habemus, qui ad Laudunensem l. c. hæc scripsit: „Si vero ideo talia, quæ tibi visa sunt, de præfatis sententiis (Hadriani) ac sæpe memoratis epistolis (Isidori) detruncando, & præposterando, atque disordinando collegisti, quia forte putasti, neminem alium easdem sententias, vel ipsas epistolas præter te habere, & idcirco talia libere te existimasti posse colligere; res mira est, NB. cum de ipsis sententiis plena sit ista terra, sicut & de libro collectarum epistolarum.“ Hoc testimonio Hincmari constat, sententias seu Capitularia Hadriani æque, ac epistolas Isidori tunc publice notas, ac omnium fere in manibus fuisse, ita ut clarissima esset utrarumque quoad originem suam, tunc adhuc recentissimam historia, & diversitas, cum illæ sententiæ in Gallia Engelramno, istæ autem epistolæ in Germania Riculpho suas cunas deberent. Neutiquam ergo (secus ac spuris partibus naturale est abscondi) occultata fuit ambarum nativitas vel inde a sua origine, sed jam tunc communis adeo, ac publici juris fuerant, ut siquis impostor tantum interpolare aliquid sive in Hadrianis sententiis, sive in Isidorianis epistolis præsumisset, statim iudice Hincmaro detestæ fraudis pœnas dedisset. Nunc vero post annorum fere Millenarium Criticis placet, haud veram esse illam, quæ primitus omnium fuerat opinio de origine Capitularum Hadriani, sed ea ipsa tenebrosum esse *Mercatoris*, spuriumque partum, decretalibus illis epistolis posteriorem. Si rationem requiras crisis adeo temerariæ contra cœva testimonia, & omnium vetustissimorum Codicum manuscripta exemplaria; nullam obtinebis aliam, nisi quia hodiernis præjudiciis adversantur, & Criticis displicent illa Hadriani Capitularia, quæ tota quanta cum epistolis Anacleti, Evaristi, aliorumque ex prima ætate Pontificum, hoc est, cum Isidori Decretalibus conspirant.

§. 26.

Sed & Hypercritici nostri ab antiquo illo Hincmaro egregie vapulant, qui ipsorum commentum de origine Capitularium juxta, ac Decretalium apertæ falsitatis convincit. Ut enim Blondello visum, atque ex assumptis suis placitis videri debuit, primum seculi noni jam fere medio Isidori epistolæ, ac brevi postea Hadriani sententiæ poterant adulterino conceptu prodire, eoquod epistolis Urbani I, & Joannis III aliquot sententiæ integræ ex Concilio Parisiensi anno 829 habito insertæ; item formulæ quædam, ac phrasæ ab Isidoro excerptæ sint ex Jonæ Aurelianensis epistola ad Carolum Calvum, qui anno 839 regnum obtinuit. Hinc vulgaris suspicio totius, ut putatur, malitiosissimæ fraudis in Benedictum Levitam Moguntinum cadit, qui libros *Capitularium Regiorum* Isidoriana peste, si ita loqui fas est, penitus infectos circa annum 845 edidit. Ehem, o boni! falli vos nimium quantum, totoque cælo aberrare Hincmarus Rhemensis harum rerum expertissimus atque testis oculatus proclamat contestans se jam a *juventute sua*, hoc est. ab ejusdem noni seculi initio in lectione istarum sive sententiarum, sive epistolarum fuisse versatum, in eodemque studio consensuisse. Vide supra §. 7. Ego vero ex Blondellianis nunc quæro, cum certum sit Decretales Isidorianas ante annum 829, multo magis Hadrianas jam extitisse, atque ex illis Parisiensem Synodum, aut Jonam etiam Aurelianensem integras sententias, phrasæque, *attamen sine illarum expressa allegatione* descripsisse; quidnam ergo de palmari argumento Blondelli, & ejus affectarum sentiendum??

§. 27.

Insuper autem integritatem suam, sive in compilando sinceritatem Capitulorum, quæ ab Hadriano nomen habent, collector probavit Cap. 6, „Siquis putaverit se a proprio Metropolitano gravari, apud „Primates Diæcefeos, aut apud Constantinopolitanæ Civitatis Sedem „agat judicium, & reliqua,, Hoc capitulum certe cujusdam Latini, vel Franco-Germani cerebro non fuit confictum: neque enim deceptor ignorare potuisset, Constantinopolis Episcopo ab occidentali Ecclesia hanc prærogativam non admissam fuisse; hinc fictioni suæ nihil roboris in sua patria hoc capitulari addidisset, sed potius detraxisset. Fuit ergo dumtaxat compiler, qui decretum hoc, prout invenit, vel ex antiquiore græca collectione, vel ex Concilio Chalcedonensi fideliter transcripsit. Nec minus injuste Benedicti Levitæ sinceritas a quibusdam ho-

Ooo

die

die in dubium vocatur, quasi quæ ille attulit in suis *Capitularium regiorum* libris decreta, non vere fuissent sinceris Capitularibus Regum Francorum constituta: hæc enim Benedicti fraus minime latere potuisset cœvum Hincmarum, istarum rerum oppido studiosum, utpote cujus magnopere intererat suas metropolitanas tueri prærogativas. Imo genuina illa esse Regum Capitularia satis aperte fassus est Hincmarus, dum Riculphum, a quo Benedictus sua desumpsit, in *Capitulis Regiis studiosum* vocavit. Abunde hæc sufficere puto ad ostendendam Benedicti Levitæ, & collectoris Capitularium Hadrianorum sinceritatem; unde certum fiat, eadem illa Capitularia jam ante Isidori Decretales in Gallia innotuisse, nec ulla fraudis suspitione laborasse. Idem & Petrus de Marca judicavit *), dum ait, *Isidorum bisce Capitulis usum in adornanda sua collectione epistolarum apogrypharum*. Quodsi hoc ita est; quomodo Isidorus deceptor? An autem revera Hadriani Capitulorum collectio tempore sit prior illa Decretalium Isidori, hoc loco non opus est, ut discutiatur. Sufficit ostendisse, utramque collectionem non mala arte, sed sincero studio fuisse confectam.

§. 28.

Quod summa rei est, Capitula illa Hadriana jam a sua origine ubique per Gallias nota, summa etiam veneratione universim, si forte Hincmarum Rhemensem in propria causa excipias, recepta fuerunt. Episcopi eadem sibi, & Ecclesiis suis pro lege observanda proposuerunt, uti Hincmarus Laudunensis, cujus in codice S. Mariæ Viridunensis exstat hujusmodi Professio „Hincmarus Deo miserante Ecclesiæ Laudunensis Episcopus his sanctorum Apostolicæ Sedis Patrum decretis obtemperandum subscripsi. Qui quoque mihi eodem authore commissi sunt, & in his, similiter sentiunt, solliciti servare unitatem spiritus in vinculo pacis, hac mecum pace potiantur. Si vero aliqui secus nolentes fieri focii hujus disciplinæ; nec habeantur participes communionis nostræ. Actum Lauduno VIII Idus Julias.„ Tanta fuit horum Capitulorum dignitas, ut etiam frequenter descripta fuerint in Regum Francorum Capitularibus testante id eximie eruditionis Antonio Augustino, & fatente Petro de Marca. Si dicas post obitum Hadriani, & Engilramni solo illorum nomine deceptos fuisse Galliæ Episcopos, & Doctores universos, ut Capitulis fraude recentissima confectis, & antiquam disciplinam, nec non & jura episcopalia divinitus instituta evertentibus cœcum præstarent assen-

*) Conc. Lib. 7, Cap. 2.

assenfum, quin illorum fundamenta vel in scriniis suis discuterent, vel publicis ex documentis perspecta haberent; non homines, sed anseres in terra tunc extitisse affirmes, necesse est.

§. 29.

Non solum autem inscitia, sed jam non dissimulanda amplius cordis malitia illi peccant Pseudocritici hodierni, qui in tanto periculo perdendæ fidei catholicæ, in quo nunc nostra Germania versatur, persuadere incautis student, malitioso consilio ad amplificandam ultra nativos limites, & Synodis provincialibus anteponendam apostolicæ Sedis auctoritatem illas decretales priscorum Pontificum epistolas fuisse confictas a quodam falsario, seu Franco-Germano, seu Romano, prout contra omnium ante se sensum, nullo prorsus ex fundamento, nisi malignæ solum suspitionis, Febronius ipso Calvinista Blondello iniquior calumniabatur. Mentis suæ propositum Isidorus, quisquis demum fuerit, haud celabat, neque enim celandi rationem habebat, sed aperta fronte ita in *Præfatione* scripsit: „Quatenus ecclesiastici ordinis disciplina in unum a nobis coacta, atque digesta, & sancti Præsules paternis instituantur regulis, & obedientes Ecclesiæ ministri, vel populi spiritualibus imbuantur exemplis, & non malorum hominum pravitatibus decipiantur. NB. Multi enim pravitate, & cupiditate depressi accusantes Sacerdotes oppresserunt.“ Tum multis in eos, & acriter invehitur, qui Episcopos accusare audent, *ut se per illas excusent, vel eorum bonis ditentur*, illudque maxime urget, quod certe iustissimum est, non posse Episcopos cogi ad dicendam causam, si fuerint rebus suis spoliati, vel gradu dejecti, suave a Sede pulsi, nisi prius restituti fuerint; additque nonnulla de accusatoribus, & accusationibus rejiciendis. Cum ergo apostolicæ Sedis auctoritatem prædicat, eo omnia refert, ut Episcopi, si se accusationibus, seu judiciis gravatos sentiant, ad illam confugiant supremam Cathedram, quæ Synodorum sententias retractare, irritasque reddere possit; quibus omnibus palam significat, se non in romani Pontificis, sed unice in Episcoporum gratiam suam formasse Collectionem. Neque id ignorarunt tunc Episcopi, magna veneratione hæc decreta amplexi, neque hodieum possunt ignorare, quibuscunque artibus Curialistæ Metropolitani fucum facere allaborent.

§. 30.

Pontifices vero romani, prout ad fulciendam suæ Potestatis plenitudinem, quippe divino jure, omniumque seculorum possessione satis tutam nullis indigent commentitiis, vel artificiosis fulcris; ita jam inde ab initio tardiores se, imo & alienos exhibebant quoad publicam auctoritatem documentis hujusmodi obscuræ, ac dubiæ originis imperiendam. Sic Hadrianus I a. 784 Carolo M. tantum Canonum conciliarium, vel ad summum, ut multis videtur, Dionysii Exigui Collectionem dono dedit: alteram illam Hadrianam de a. 785 vel solum approbavit ab Engelramno oblatam, vel pro instructione obtulit pressi Episcopi precibus impetratam. Sed neque a. 849 Decretalibus, & Capitulis per Galliam, ac Germaniam civitate jam donatis aliam ab illa Dionysiana Collectionem Ecclesia romana pro jure publico adhibuit. Sic Leo IV ad consulta Episcoporum Britanniae rescriptit: „De libellis, & „commentariis aliorum non convenit aliquem judicare, & SS. Conciliorum Canones relinquere, vel Decretalium regulas, id est, quæ habentur apud nos simul cum Canonibus. Quibus autem in omnibus „ecclesiasticis utimur judiciis, sunt Canones Apostolorum, Conciliarum — & cum illis regulæ Præsulum romanorum, Sylvestri, Siricii, Innocentii, Zosimi, Cælestini, Leonis, Gelasii, Hilarii, Symmachi, Hormisdæ, Simplicii, & Gregorii junioris. Isti omnium sunt, & per „quos judicant Episcopi, & per quos Episcopi simul judicantur & Clerici.“ Hæc epistola exstat Tom. 3 Conc. gallic.

§. 31.

Ipse sanctus Pontifex Nicolaus I suprema sua jura non aliis, quam certo genuinis decretis vindicavit, ut Innocentii I, Gregorii M. & Concilii Sardicensis: minime autem vim aliquam ad recipiendas Isidori Decretales, quod multi falso garriunt, Ecclesiæ gallicanæ intulit, tantum inanem Gallorum causationem redarguit, quod decretales illæ epistolæ in suo Canonum codice non reperirentur, quasi vero alia Pontificum decreta extra codicem obligandi robur ex se ipsis non haberent, cum vi ipsorum Canonum omnia apostolicæ Sedis Decretalia constituta essent observanda, cum præterea ipsi Galli iisdem Decretalibus, ubi e re sua esse credebant, observantiam jam exhibuissent. Ita certum est Gallos exemplo suo prævisse pontificis hujusmodi decretis auctoritatem tribuendo, & Febronii meram esse imposturam, qua suspicionem

cionem excitare nifus est, Ifidori merces studio decipiendi Romæ fabricatas fuiffe.

§. 32.

Tumultuosos audire clamores, Romanam Matrem Ecclefiam turpi fraude fuiffe deceptam, vel quod adhuc turpius, ipfam decepiſſe, has, inquam, criminationes ex ore DD. Proteſtantium audire, quippe jam declaratorum hoſtium, res nobis minus inexpectata, minusque doloroſa, ac quodammodo tolerabilior foret. At enimvero eos, qui nobiscum communi menſa fruuntur, tantis in Matrem debacchari convitiis, ejusdemque in viſcera ſævire dum videmus; non poſſumus non pro falſis fratribus illos habere, atque illorum abhorrere conſortio. — Quænam denique illa adeo execrabilis fraus ſit ab Ifidoro commiſſa? *Parturiunt montes.* Ampliaverit ille ſuppoſitiis ſuis Decretalibus ſummi Pontificis, & Epiſcoporum authoritatem divinitus inſtitutam; illam vero Metropoliticam, ab hominibus inventam reſtrinxerit! *Mus parvulus exit.* Multane fraude opus erat Romanæ Matri Eccleſiæ ad id faciendum, quod omni jure, divino æque ac humano poterat, propter frequentes abuſus arctiores limites ponere Archiepiſcoporum, & Synodorum provincialium authoritati? Quid, quod Ifidorianis Decretalibus nullum jus novum fuerit introductum, ſed eadem decreta ab indubitatis aliis Pontificibus, & Synodis ipſo demonſtrante Blondello jam fuerint inſtituta?? Hinc jam ad alteram Apologiæ partem de ipſis rebus adeo ætate noſtra diffamata Collectionis.

A R T I C U L U S II.

Merces Ifidori non mala, ſed bona; non spuria, ſed veraces.

§. I.

Ipſo hoc in limine mihi paritas animo ſubit quotidiano ex commercio deſumpta. Nihil apud nos frequentius, quam portatilia videre horologia Pariſienſis vel Londinenſis Authoris nomine inſcripto emtoribus propoſita. Vix erit amplius tam hebes, qui fidem inſcriptioni donet; nemo tamen facile noſtra Teuthonicæ licet originis horologia ſpernet, nemo illorum uſum aſpernabitur, ſed quilibet æquus rerum æſtimator dicet, ſufficit mihi rem bonam habere, cujuſcumque demum authoris ſit: uſum atten-

do, originis non sum curiosus. Dato, quia sic hodie placet, falsas esse sua inscriptione illas pontificias epistolas, quis Catholicorum illarum internum pretium inficiari audeat, quas Ecclesia Dei per plura secula suo usu ac veneratione dignas aestimavit? Quod universa probavit Ecclesia, id vituperare, Augustino teste, insolentissima est insania. Neque etiam spuriae, sed potius veraces sunt Isidori merces, hoc est, veracia continent saltem inde a quarto seculo, ac subsequenter Pontificum ac Conciliorum decreta, quod singillatim contra injustas Febronii criminationes ex libro jam saepius in decursu hujus operis laudato *) nunc adhuc sum demonstraturus.

§. 2.

In genere quidem Febroniani non cessant strepentibus vocibus declamare contra Morarchiam summi Pontificis, ejusdemque in Episcopos *Dominatum* **), quasi unico, eoque labili prorsus fictitiarum Decretalium fundamento Petri facer Primatus inniteretur. Nos vero in secunda hujus libri parte de *Monarchia ecclesiastica*, & in parte tertia de suaapte natura inde fluentibus Corollaris catholici dogmatis veritatem derivatam ostendimus ex longe purioribus, quam Isidoriani sint, fontibus divinæ potissimum institutionis, tum vero & venerandæ pristinorum seculorum traditionis, nec non *practica* etiam observantiæ. Attamen quod ante me Viri peritissimi jam observarunt, iidem ipsi, certe genuini, fontes sunt, ex quibus suas Isidorus aquas hausserat. Ex castris adversariorum præcipuus Dux Petrus de Marca de illius Decretalibus ait ***): „Sententiis & verbis legum, canonum antiquorum, & SS. Patrum, qui IV & V seculo floruerunt, si pauca demas, concinnatas esse constat., Splendidius adhuc, ac demonstrativum est ex ore inimici Blondelli testimonium, quo meridiana in luce conspiciendas dedit Isidori sententias cum antiquis SS. Pontificum, Patrum, Conciliorum, aliorumque veterum documentorum sententiis verbotenus conspirantes. *Tua Deus salus ex inimicis!* Quamobrem cum Febroniani ad priora octo Ecclesiæ secula audacter provocent, tunc puram & interruptam adhuc viguisse disciplinam salvis

*) Rom. Pontif. summa Autoritas. Faventia. 1779.

**) Vox ista *Dominatus* usurpatur ad invidiam summo Pastori conslandam. Aut num Episcopi in Clerum, populumque non dominantur? Nonne id etiam merito, si dominari idem est, ac regere, seu pascere??

***) Conc. Lib. 3, Cap. 5.

salvis Episcoporum, & Synodorum juribus contententes; haud sane illorum injuria id assumimus, propriisque armis adversus illos dimicamus, ex genuinis quarti & quinti maxime seculi documentis singillatim ostendentes, eadem disciplinæ puncta jam tunc temporis fuisse instituta, atque etiam usitata. Ad rem!

§. 3.

Imo Febronius improbat Romanum Pontificem dici *universalis Ecclesiae Episcopum*; quia sic appellatur in falsis epistolis Xysti, Victoris, Pontiani, Stephani*). Verum nonne vel Tertulliano teste**) Romanus Pontifex *Episcopus Episcoporum* vocabatur? Præterea in Concilio æcumenico Chalcedonenſi lecti sunt libelli supplices Leoni I oblati a Clericis Alexandrinis, qui eum *Patriarcham universalem* salutant. Ipsum Concilium Papam nominat *Patrem, & Caput Ecclesiae*, cui *Christus vineæ suæ curam commisit*. Archimandritæ Syriæ II numero plus quam 180 in epistola ad Hormisdam ita præstantur: *Sanctissimo, & Beatissimo universæ orbis terræ Patriarchæ*. Eodem seculo sexto Archimandritæ, & Monachi Constantinopolis, Hyersolymorum, & Orientis numero circiter 100 S. Agaptyto sic scribunt: *Sanctissimo, & Beatissimo antiquæ Romæ, & universali Patriarchæ*. Constantinus Pogonatus in sua sacra ad Donum P. missa anno 668 hunc posuit titulum: *Dono Archiepiscopo antiquæ Romæ, & universali Papæ*. Quid ergo Iſidorus peccavit? aut quam falsam mercem fabricavit?

§. 4.

Ido Febronius indignatur, majores ac difficilioreſ causas ad Sedem Apostolicam esse referendas, eoquod falsis Anacleti & Marcelli decretalibus id fuerit introductum. Sed jam Blondellus annotavit, hæc ipsa decreta ab Innocentio I, Leone M., & Vigilio esse desumpta. Petrus de Marca pluribus probat penes Romanum Pontificem jus esse judicandi sive de causis majoribus, sive etiam de Episcopis, ita concludens***): *Nihil in causis fidei, aut de regulis generalibus definiri poterat absque sententia Romani Pontificis*. Id certe decernunt plurimæ Pontificum epistolæ nullo *Mercatoris* mungonio fucatæ, ut Julii I ad Orientales, Innocentii I ad Viſtric., Zosimi ad Episc. Gall., Xysti III ad Illyricos, S. Leonis item ad Episc. Illyr., S. Hilarii ad Metropolit. Galliæ, Vigili ad Ausanum Arela-

*) De Statu Eccles. Cap. 8, §. 2.

***) Conc. Lib. 7, Cap. 6.

**) De Pudicitia. Cap.

Arelatensem, Gregorii M. ad Joannem Larissæum: quæ singula fere a nobis fusius exposita toto Coroll. II.

§. 5.

III^{to} Singulariter Febronio displicet causas Episcoporum romanæ Sedi esse reservatas ex Pseudo-Epistolis Xysti I, Aniceti, Victoris, Zephirini, Marcelli. Verumtamen præter jam allata a nobis exempla sunt multa alia hic brevissime commemoranda: S. Epiphanius testatur de Ursatio, & Valente, etsi Arianis Episcopis, eos tamen simulata pœnitentia coram Julio stetisse *): „Ursatius & Valens pœnitentiam agentes unacum libellis profecti sunt ad Julium romanum Episcopum pro ratione reddenda de suo errore, ac delicto.“ Sozomenus narrat hunc Pontificem suæ Sedis autoritate in pristinum gradum restituisse Athanasium Alexandrinum, & Paulum Constantinopolitanum **): „Cum propter Sedis propriæ dignitatem cura omnium ad ipsum spectaret, singulis Ecclesiam suam restituit.“ S. Basilus Damasus scripsit postulans ab eo, ut suam causam cognoscat, & judicet, prout ipse testatur ***): „Visum est consentaneum scribere ad Episcopum romanum, ut videat res nostras, & iudicii sui decretum interponat.“ Idem de se etiam præstitit Athanasius: item Joannes Chrysostomus apud Innocentium I. Sanctus Pontifex Leo judicavit S. Hilarium Arelatensem, & Chelidonium Vefonsiensem. S. Gregorius, quo testante Petro de Marca, *nemo peritior fuit jurium Sedis apostolicæ*, causam suscepit Andrea Episcopi Thebani, aliam quoque cujusdam Episcopi Epidauriæ. Joannes III sententiam dixit in causâ Salonii Episcopi Ebredunensis, & Sagittarii Vespriensis, ut est apud Gregorium Turonensem ****). Aliquando etiam Pontifices romani causas episcopales aliis Episcopis, vel Concilio provinciali *NB. tanquam delegato judici* demandabant. Sic Bonifacius I dicit se constituisse, Maximum Valentinum Episcopum in Synodo Provinciæ esse judicandum *****): „A decessoribus meis provinciali delegata cognitione — dilationem quidem dedimus, & decrevimus vestrum intra provinciam debere esse iudicium, & congregari Synodum. — Quidquid autem vestra Charitas de hac causa decernendum esse duxerit, cum ad nos relatum fuerit, nostra ut concedet, necesse est auctoritate firmetur.“ Cælestinus causam Episcopi Massiliensis commisit Episco-

*) Hæres. 68.

**) Hist. Lib. 3, Cap. 7.

***) Epist. 52 ad Athanas.

****) Hist. Lib. 5, Cap. 20.

*****) Epist. ad Episc. Gall.

Episcopis Provinciæ Narbonensis II, & finitimæ Viennensis, *Vestro eum audiendum Collegio delegamus* *). Gregorius M. Joannem romanæ Ecclesiæ Defensorem in Hispaniam ablegavit cum summa potestate judicandi causas Stephani, & Januarii Episcoporum in Synodis Provinciæ depositorum, ita ut solus definitivo decreto cognoscere posset de appellatione, & confirmare eorum depositionem, vel eos restituere. Hilarius quoque Leontio Arclatenfi Episcopo delegavit sollicitudinem coercendi præsumtionem Mamerti Metropolitanæ Viennensis, reservans tamen Sedis apostolicæ judicium, postquam Leontii relationem accepisset. Infinitus propemodum esse deberem, si acta omnia romanorum Pontificum in causis Episcoporum recensere vellem. Quam maxime mirandum est, Febronium ex tot, tantisque factis oppido notoriis cuncta dissimulasse: tam crassa ignorantia in isto viro esse vix potuit.

§. 6.

IVto Febronius in illis decretalibus epistolis redarguit, quod Pontificibus jus convocandi Concilia contulerint, ita ut ne Provincialia quidem sine romani Episcopi autoritate congregari possent ex Pseudoepistola Damasi ad Stephanum Archiepiscopum, cum tamen certo constet (ipso quidem asserente) priora octo Concilia œcumenica ab Imperatoribus esse convocata, *quædam etiam invito Pontifice*. Nos autem jam supra Coroll. II demonstravimus, nunquam in primitiva Ecclesiæ sine romani Pontificis consulto, & autoritate res quascumque graviores aut susceptas, aut executioni datas fuisse. Quod si ad graviores Ecclesiæ causas provincialis Synodi celebratio pertineat, uti revera nemine dubitante pertinet, tam antiqua disciplinæ observantia, quam ipsius adeo Primatus a Christo instituti ratio exigunt, ut non sine Capituli præscitu, & consensu tam magni momenti res suscipiatur. Animadversione insuper dignum est, quod Febronius de octo prioribus Conciliis œcumenicis scripsit, ea convocandi jus non Pontifici, sed potius Imperatoribus asserens, quo suo mundi Principibus placendi studio satis prodidit, non sibi animum fuisse, ut Ecclesiæ & Episcoporum sacra jura defenderet, sed tantum ut pontificia jura etiam si cum præjudicio ipsius Ecclesiæ pessumdaret. Enimvero Novatorum assensu conceditur, Synodos diocæsanæ convocare ad Episcopum, Provinciales
ad

*) Epist. 2 ad Episc. Vien. & Narbon.

ad Metropolitanum, Nationales ad Primatem, seu Patriarcham jure ordinario pertinere; nonne vel naturalis æquitas concludere deberet, ergo universale Concilium convocandi jus summo Pontifici proprium est? Si operæ pretium foret, levi brachio possem evincere, priora octo Concilia sic ab Imperatoribus fuisse convocata, ut non sine consensu, quin & desiderio summorum Pontificum. Cum enim gratia Dei dignos effecit terræ Principes, qui in sinum sanctæ Ecclesiæ reciperentur; hi suo officio se judicarunt obstrictos, ut qua possent ope terrestri, & externa Dei Ecclesiam adjuvarent, salvis ejusdem sacris, & propriis juribus. Hincmarus Rhemensis optime id perspectum habuit, cum scriberet *), *Concilia apostolicæ Sedis jussione & imperiali convocatione semper olim fieri consuevisse*. Deleat vero Febronius, quod atra bile, falsoque scripsit, atque etiam Commentario in suam Retractionem nondum expunxit, antiquitus Concilia ab Imperatoribus convocata, *quædam etiam invito Pontifice*. Quomodo universale sit Concilium sanctam Dei Ecclesiam repræsentans, quod sine consensu sui legitimi, a Christo præpositi Capitis tantum foret corpus ἀκεφάλον, καὶ σχισματικόν? —

§. 7.

Vto Febronium offendit Conciliorum confirmatio, quam Romanis Episcopis demandari putat per falsas Marcelli, & Julii I epistolas: hinc etiam ab Isidoro deceptos judicat Cardinales Concilii Tridentini Interpretes, qui canonem Sess. 24 de celebrandis Episcoporum Synodis ita declararunt: *Quæ in Conciliis provincialibus conduntur, publicari non debent inconsulto Pontifice*. At profecto pristina tempora rubore suffundunt nostros Febronianos: tunc enim in Synodis nihil attentatum, quod non ab ipsis Episcopis fideliter, ac sponte sua ad Apostolicam Petri Cathedram fuisset relatum. Ita præsertim Africanæ Synodi jam ævo S. Cypriani insignia sunt exempla posterorum memoria, nec non & imitatione dignissima. Non certe molesta hodie Episcopis foret Synodorum confirmatio Pontifici reservata, si primorum temporum exemplo parati essent proprio motu sua gesta cum sancta Sede, & Matre Ecclesia communicare. Merito suspecta res est, si Pastores particulares, & subordinati Capitis sui, & summi Pastoris conscientiam metuunt, refugiuntque. Fallebatur autem Febronius, dum epistolæ Julii I ad Orientales summarium judicavit Isidori spurium factum: est enim illa certe genuina epistola, quam S. Athanasius

*) Epist. 33.

nafius Apolog. 2 memorat, qua Julius Eusebianis exprobat, quod non consultata prius *N.B. secundum consuetudinem* sanctæ Sedis autoritate in Conciliis definire ausi fuissent. Notum est in Synodo Sardicensi id quoque fuisse statutum: sic enim eadem Synodus ad Julium anno 347 scripsit: *Hoc optimum, & valde congruentissimum judicabitur, si ad Caput, id est, ad Petri Sedem de singulis quibusque Provinciis Domini referant Sacerdotes.* Hinc antiqua fuit regula Socrate, Sozomeno, & Theodoro testibus, *ne absque sententia Romani Episcopi decreta Ecclesiis sanciantur.* Nullatenus ergo falsis decretalibus decepti Cardinales, sed Canones prisce Ecclesiæ secuti decretum Concilii Tridentini *de Conciliis provincialibus a Papa confirmandis* interpretati sunt. Generalium etiam Conciliorum confirmationem a summo Pontifice semper fuisse petitam, & obtentam res est historia ecclesiasticæ peritis exploratissima, ut adeo observante Thomassino vel tyronibus pateat, in octo primis œcumenicis Conciliis *Autoritatem, Imperiumque sacrum Romani Pontificis ubique personasse, ac plene emicuisse, omnia nuntia & imperio Romanæ Sedis altitata fuisse.* Vide, quæ in specie de Conciliis Ephesino, & Chalcedonensi diximus contra Pseudo-Bossuetum Appendice ad Partem III.

§. 8.

Vltimo Febronius ægre fert translationem Episcopi ab una Sede ad aliam inter jura Romani Pontificis numerari ex epistola, quam Antero P. suppositam non probat, sed supponit. Verum in hoc multo magis Febronii fides claudicat, cum ait *), ante Innocentium III, hoc est, ante duodecimi seculi finem nullum adesse exemplum translationis Episcoporum per Pontificem factæ. Quinto seculo Perigenes a Sede Patræ ad Metropolitanam Corinthiam translatus est Bonifacii I autoritate. Prochus antea Episcopus Cizicenus translatus est ad Ecclesiam Constantinopolitanam ex Cœlestini P. dispensatione. Felix III motu proprio jussit, ut Johannes Talaja Sedem Alexandrinam relinqueret, & ad Nolanam se transferret teste Liberato **). S. Gregorius, qui ultra quinque secula Innocentium præcesserat, prout ex variis ejusdem epistolis elucet, plurimas statuit translationes, uti Martini a Tanate in Corsica Savonam, Joannis a Lissò in Illyrico Scyllaceum in Calabria, Paulini e Taurisio in Asia, Lipari in Sicilia, Joannis e Veliterno in Arenatim: & sic de aliis Sedibus exempla occurrunt. Facta ista in omnium oculis posita vel erant Febronio ignota? vel cognita? Neutrum Febronianis honestum.

§. 9.

*) De Stat. Cap. 6, §. 6.

**) Breviar. Cap. 18.

§. 9.

VII^{mo} Non solum Febronius, sed quotquot post Petrum de Marca, Paluzium, Vancoppenium, aliosque jam numero plurimi sanctæ Apostolicæ Sedis jura iniquius lacerarunt, omnes eo maxime decretales Isidori epistolas infestarunt, ut jus appellationum ex universo orbe suscipiendarum Romano Pontifici abriperent sub specioso prætextu, novum esse hoc jus, antiquis canonibus contrarium, & fictis tantum Xysti, Zephyrini, Fabiani, ac aliorum Pontificum epistolis introductum. Nos vero contra hos plerosque jam non catholice sentientes, uti antea Christianus Lupus contra Marcum Antonium de Dominis, hoc ipsum jus appellationum tamquam in Primatu divinitus instituto comprehensum, hinc a quolibet Catholico necessario admittendum, toto Corollario IV vindicavimus, ubi data laboriosissima opera, nimirum pro tantæ rei gravitate ex documentis certe authenticis per omnia retro secula Orientalis æque, ac Occidentalis Ecclesiæ observantiam dedimus manifesta in luce conspiciendam. Quo præcipuo totius controversiæ de Isidorianis decretalibus puncto rem omnem esse confectam credimus, atque evidenter demonstratum, falsam non solum, sed & summe iniquam esse catholicæ Ecclesiæ accusationem, quod fraudibus sese irretiri permiserit, suamque pristinam & puram regiminis disciplinam recentiori ævo per fictitis Isidori epistolas immutari, ac vitari. Attendant juniores nostri juris ecclesiastici Candidati, quo demum prætensa falsitas Isidori Decretalium, & tam clamorosa illarum criminatio tendant, rem scilicet non jam inter disciplinæ variabilis limites contineri, sed ipsum dogma catholicum de jure, eoque admodum *prædicto* divinitus instituti Primatus in discrimen vocari.

§. 10.

VIII^{vo} Sed & dispensationem Pallii, quod Metropolitanis a romanis Pontificibus antiquo more conceditur, improbat Febronius, eumque in finem Pelagii I a. 555 ad apostolicam Cathedram evecti decretum tamquam ex *Isidoriano promptuario* profert, quo Pontifex declarat: „Ut „quisquis Metropolitanus ultra tres menses consecrationis suæ ad fidem „suam exponendam, Palliumque suscipiendum ad apostolicam Sedem „non miserit, commissi sibi careat dignitate“ *). Noluit hic animadvertere Febronius pœnam intentatam eo potissimum tendere, ut Metropolita-

*) Epist. 1 ad Vigilium.

politani suam fidem profiterentur. Jam vero sola Pallii collatio eum offendit. Missa quaestione, an illa praecise ad Vigilium epistola sit genuina, hujus Pontificis aliae extant certe germanae, nullaue suppositio- nis macula fordatae epistolae, quois idem Pontifex jure suo, & decesso- rum suorum exemplo dispensasse Pallium cognoscitur. Quomodo id ju- ris Pelagius sibi vindicaverit ex falsis Isidori mercibus, qui hunc duo- bus & amplius seculis praecessit? Ipse Baluzius confitetur *), a Pelagio honorem Pallii unacum Vicariatu delatum fuisse Sepaudo Arelatenſi a. 556 ad ejusdem, & Childeberti Regis Gallorum instantiam. Non er- go nisi maligno conviciandi animo asseri a Novatoribus potest, ambi- tionis pruritum Pontificibus dedisse causam Pallii dispensandi. Hac de re eximium habemus monumentum S. Bonifacii Episcopi Moguntini, qui a. 742 Concilium germanicum celebravit interventu Carolomani, & Optimatum Regni Francorum, in quo inter alia hoc statutum legi- mus **): „Decrevimus autem in nostro synodali Conventu, & confes- „si sumus fidem catholicam, & unitatem, & subjectionem romanæ Ec- „clesiæ finetenus vitæ nostræ velle servare, sancto Petro & Vicario „ejus velle subijci, Synodum per omnes annos congregare, Metro- „politanos pallia ab illa Sede querere, & per omnia praecepta Petri „canonice sequi desiderare, ut inter oves sibi commendatas numere- „mur. Et isti confessioni universi consensimus, & subscripsimus, & „ad corpus S. Petri Principis Apostolorum direximus.“ Audiant atten- te Febroniani, Episcopos Germaniæ synodaliter congregatos cum S. Bo- nifacio honoris loco habuisse Pallium pro suis Metropolitanis a Papa querere, praecepta Petri sequi, & inter oves romani Pastoris adscribi.

§. II.

IXno Denique Febronius sustinere non potest clausulam illam Pontificibus familiarem, quippe ipsius judicio ex Pseudo-Epistolis Pii, & Fabiani desumptam: *Salva in omnibus apostolica Sedis autoritate*. At nonne hæc eadem, aut similia a sanctis Pontificibus longe ante tempora Isidori dicta, & publicata sunt? nonne in genuinis certe epistolis occur- runt apud Cælestinum, Leonem, Hilarium, Symmachum, Hormisdam, Gregorium M., qui pro tuendis pontificiis juribus strenue steterunt, ne- que tamen ad eadem tuenda falsis documentis indiguerunt? Cum Siri-

Ppp 3

cus,

*) Supplem. ad Lib. 5. Pet. de Marca Cap. 38, n. 4.

**) Collect. Labbe. Tom. 8. Col. 281.

cus, Simplicius, Bonifacius, Xystus III, Leo, Hormisdas Vicarios suos in variis regionibus constituerunt, præcipuam sibi auctoritatem semper referebant, omnia diligenter ad ipsos referri jubebant, causarum difficultium decisionem apud se fieri volebant, alios omnes in partem sollicitudinis, se vero solos in plenitudinem potestatis vocatos esse, nemine tunc reclamante, sed unanimi omnium consensu profitebantur. Dignum est hoc loco singulariter rememorari solum Gelasii P. assertum *): „Cuncta per mundum novit Ecclesia, quoniam quorumlibet sententiis ligata Pontificum Sedes B. Petri Apostoli jus habeat resolvendi, utpote quæ de omni Ecclesia fas habeat judicandi, neque cuiquam de ejus liceat judicare iudicio: siquidem ad illam de qualibet mundi parte Canones appellari voluerint, ab illa autem nemo sit appellare permixtus.“ Si hoc unicum Seculi V superesset testimonium; causa Febronii, suorumque affectuum omnium jam perdita foret.

§. 12.

Hæc igitur singula sunt, & omnia criminationum capita adversus difamatas adeo nostra ætate Isidori epistolas. Filii hominum iusta iudicate! si plane nova forent, & incognita prorsus antiquis hæc decreta, iustumne propterea vel Acharonta moveri? — Quid vero cum ad evidentiam usque demonstratum sit, ea pluribus seculis, quæ sancta viguit Ecclesiæ disciplina, ante Isidorum jam extitisse, & sanctis certe viris suam originem debere?? Nonne proprio ore adversus se ipsum sententiam edixit Febronius ita scribens **): „Si in hoc erro, fateor me scripsisse totam errorum congeriem? Tam monstruosa errorum congeries jam non semel, sed sæpe, & a multis publica in luce detecta, jamque ab ipsis Germaniæ Archiepiscopis ante paucos annos condemnata, ut nostris diebus tot affectus invenerit, sanctæ apostolicæ Sedis conviciatores, qui fieri potuissent credas, nisi quo ducantur errorum, contentionum, dissidiorum, & inimicitiarum spiritu, qui idem est carnis spiritus, satis manifestarent?

§. 13.

Dato etiam, seu nimium liberaliter contra rei veritatem adversariis permisso, quod volunt, per decretales Isidori epistolas novam omnino, ac veteribus incognitam regiminis, sive iudiciorum formam in Ecclesia

*) Epist. 13 ad Episc. Dardan.

**) Cap. 8, §. 2.

clesia fuisse introductam; jamne propterea corruptela foret hæc disciplinæ externæ, seu juris ecclesiastici immutatio? Ea disciplinæ natura est, qua se a divina fidei morumque regula, eaque immutabili discernit, ut pro varia temporum, & adjunctorum ratione mutari, ac innovari possit. Vetus Ecclesiæ seculis vigeat disciplina canonibus præscripta illi temporis accommodatis: hisce tunc jus vetus constabat omnino observandum, nisi iusta de causa, & quod præcipuum, ab autoritate legitima pro temporum vicissitudine abrogatio, vel immutatio facta fuerit. Quod si contigerit necessitate, vel utilitate publica exigente, posterius licet, modo tamen a legitima potestate præscriptum jus, verum firmumque est: atque etiam, si forsitan apogryphis, falsisve ex documentis originem traxisset, non idcirco jus falsum foret; suam enim legalem vim & auctoritatem non præcise ab historico facto, sed ab authentica Potestatis superioris institutione accepit. Hanc si neges veritatem oppido claram, ac pertinaciter pergas erroris gravissimi, ac corruptelæ ad perniciem usque contagiosæ dicam impingere œcumenicis non solum Conciliis, verum etiam universali per orbem diffusæ Ecclesiæ, a quibus hæc ipsa decreta, licet forsitan *historice* falsa, *legalem* auctoritatem nacta sunt; nos quidem tuis disertiis nec latum unguem ab Ecclesiæ Catholica auctoritate dimovebis, tu vero jam palam nostri in fide catholica fratris titulo, ac juri renuncias.

§. 14.

Non veritatis, sed contentionis studio a Febronianis repetitur illud Vincentii Lerinenfis aureum dictum, „hoc esse catholicum, quod semper, quod ubique servatum; antiquitatis religionem novitatis profanitati anteponendam.“ De materiis fidei & morum ad immutabile jus divinum pertinentibus generale hoc est, firmissimumque principium: secus si de juribus externis pro temporum, locorum, circumstantiarum varietate mutabilibus. Neque plus roboris habet, quod plerique cum Febronio ad nauseam usque oggerunt, „de divinis, non alterandis agi Episcoporum juribus, quos Deus posuit Ecclesiam regere; nullam ergo Romanis prodesse præscriptionem, cessionem, consuetudinem, possessionem, aut quamcumque hominum conventionem.“ Falsum esse demonstravimus, ab Isidoro episcopalem fuisse restrictam potestatem, sed ille dumtaxat intentus erat Metropolitaram excessibus restringendis ad Episcoporum favorem, quibus proin tam accepta fuit hæc ipsa decretalium colle-

collectio. Verumtamen & hoc largiamur; idem Dominus N. J. C., qui in Apostolis Episcopos instituit, ut suam Ecclesiam regerent, omnibus unum Caput præfexit Petrum, qui regeret universos: ea ergo, quæ in Episcopis est, regendi potestas non independens, sed Petri subordinata regimini est, vel amplianda suo in exercitio, vel coarctanda, prout pro majore fidelium bono expediens videatur summo totius gregis Pastori: *Simon! pascere oves meas.* Quodsi quoad usum, & exercitium ipsa potestatis plenitudo in summo Pontifice certos intra limites constringi per pacta, & concordata potest, uti nostra Germaniæ testantur; quidni illa Episcoporum possit, sua ab origine jam per ipsos Apostolos limitata, atque etiamnum certe per Archiepiscopos restricta *)? Si arctiores a summo Pontifice nunc positi sunt limites, quam olim, Episcoporum potestati; quid inde æquo judicio concludas, nisi eam esse nostrorum temporum necessitatem, quæ ab illa apostolica Petri Cathedra, ceu totius fundamento Ecclesiæ arctiorem exigat dependentiam?

§. 15.

Sed novi hujus juris, ut ajunt, abusus sint, qui tantos excitarent clamores. Abusus quidem, qui hodie defendat, scio Catholicorum neminem: *tolerantiam* vero circa ipsos potestatis abusus, sive melius *patientiam*, atque *obedientiam* erga Superiores etiam discolor præcipit S. Apostolus. Semper difficile est hominibus subesse: ea tamen necessitas est ab illo nobis injuncta, qui homines super capita nostra imposuit. Ceterum præsumtio vel in dubiis casibus stat pro legitimo Superiore. Quid, si abusum prætextu adversus archi- vel episcopales Curias insurgerent inferiores Clerici, Laicive? — Quis autem in mundo pressus unquam fuit, cui æquas, & benevolas aures sancta Mater romana non præbuerit? — Possem hic testes provocare A catholicos, Scriptores æquitatis amantes. Quam belle diversis in locis apud Zalweinium illustris Senkenbergius loquitur? nolim talia ad aliorum confusionem exscribere. Tu vero, fidei Frater! caveto, ne novum jus, vel ipsum adeo juris abusum nomines, quod inde a multis seculis sancta Concilia instituerunt, & dilecta Chri-

*) Pone episcopalem Potestatem nullatenus restringi posse; atque omnem Archiepiscoporum jurisdictionem, ipsumque existendi jus sustulisti,

Christi sponsa, semper Virgo intemerabilis (catholicam hanc esse novimus Ecclesiam) tot seculorum observantia venerabile fecit, non temere amplius violandum.

§. 16.

Non possum præterire exemplum ad rem peropportunum, quod ex Ecclesia græca, nullis utique Iſidori præstigiis fascinata Petrus Ballerinius affert *). Quid in Oriente circa Constantinopolitanæ Sedis prærogativam contigerit, satis ex historia notum est. Hujus Episcopus ante medium Seculi IV simplex adhuc fuerat Metropolitæ Heracleensis Suffraganeus, nulla jurisdictionis autoritate in alium quempiam Antistitem præditus. Imo etiam Canones Nicæni cavebant, ut Patriarchis, aliisque Sedibus præcipuis sua jura integræ servarentur. Nihilominus cum imperialis Sedes Constantinopolin esset translata, atque idcirco hæc civitas Romanæ æmula *junior Roma* appellari cœpisset; a. 381 in Synodo Constantinopolitana hujus Episcopo decretus fuit honoris Primatus post Romanum salvis adhuc cujuscunque juribus. Sensim vero concurrentibus ex toto Oriente ad eam urbem, in qua Imperator residebat, pluribus Episcopis ob varias causas & occasiones, facile fuit ibidem Episcoporum Synodos congregari, in quibus gravioreſ quæſtiones deciderentur, & ordinationes Episcoporum cum consensu Metropolitanæ, & Imperatoris ab ejusdem urbis Antistite peragerentur. Ita non solum Nestorius, sed etiam S. Joannes Chrysostomus, Atticus, Sisinius, & S. Proculus, Constantinopolitani Præsules de Episcoporum causis, & appellationibus ex variis orientalibus provinciis ad se delatis passim judicarunt, & aliquot Episcoporum ordinationes fecisse leguntur. Hæc certe antiquioris juris immutatio fuerat, quæ NB. sub eo juris titulo invaluit, quod juniori Romæ ad instar veteris non solum honoris, sed & jurisdictionis prærogativa competeret, prout colligitur ex Concilio Chalcedonenſi Act. 16, ejusdemque Relatione ad S. Leo.

*) Vindicæ Author. Pontif. Cap. 5, §. 3.

§. Leonem *). Et quamvis romani Pontifices, alique Archiepiscopi initio contraxissent; usu tamen & consuetudine sensim nova regiminis forma obtinuit contra antiquum jus Archiepiscoporum, expresso licet Canone Nicæno suffultum. Posthac nemo amplius de jure Constantinopolitani Patriarchæ etsi recentiore dubitavit, neque in Concilio Florentino ulla de eo mota est quæstio. Num hodie Febroniani quæsitum hoc jus Constantinopolis Archiepiscopo supra alios Orientis Episcopos contentiosum facere, vel abripere adderent? Quomodo autem se opponere contra jus summorum Pontificum, qui universalis Primatus privilegio supra Episcopos, & supra usum, atque exercitium episcopalium Facultatum divinæ institutionis potestatem, & jus certissimum obtinent, nec non in ejusdem juris exercitio diuturna plurium seculorum consuetudine, & Conciliorum etiam generalium approbatione fulciuntur?? Quid respondebunt huic non meo, sed doctiss. Petri Ballerinii argumento?

§. 17.

Enimvero si ex Orientalium cessione atque consensu Constantinopolitanæ Sedi nullo per se jure in alienis Diocesisibus gaudenti, sed inde a pristino ævo alteri Episcopo subjectæ, sensim tamen accrescere potuit jus quoddam legitimum, quod neque summi Pontifices, neque occidentalis Ecclesia in Concilio Florentino congregata cum Græcis orientalibus ad unitatem redeuntibus, propter inveteratam, & tranquillam possessionem amplius rescindendum judicarunt; quidni saltem pari æquitate utamur erga apostolicam Petri Cathedram, universali jurisdictionis Primatu a Christo donatam, relinquendo illi ex veteri possessione, aut quod hodie multis placet, ex voluntaria Episcoporum cessione eadem Privilegia, quæ Patres nostri a seculis agnovere, & juramenti Sacramento ad hunc usque diem obfirmata sunt? His demum accedit (quod vel coram mundi judicio Febronianam causam prosternt) si, ut volunt, pristinorum temporum jus restitueretur, eo ipso patriarchalia romani Episcopi jura pleno in

*) Hinc confunditur commentum Novatorum romanos Pontifices calumniantium, quasi seculoribus primis seculis dominandi cupidine jurisdictionis in alios Episcopos amplitudinem sibi arrogasset.

in vigore reviviscere debere, quæ Archiepiscopos Germaniæ, & universim ejus Ecclesias pactis publicis recentiorum temporum multum sublevatas, ætiori forsitan vinculo Patriarchæ romani dominatui, quam nunc Pontificis sentiunt, in causis ordinationum, confirmationum, appellationum, visitationum, ac generatim judiciorum obstringerent, & graviori jugo subjicerent. Neque enim Metropolitani nostri umquam Patriarchæ, hoc est, primi ordinis Archiepiscopi fuerant, sed inde a sua origine simplices, seu secundi ordinis tantum Archiepiscopi, & ad summum sanctæ apostolicæ Sedis Legati, ex cuius gratia traxerunt, quicquid privilegii habent, & Authoritatis in alios Episcopatus. Quo incautos rapiunt amplificandæ suæ Dignitatis studia, ad majorem sui humiliationem, confusionem!!

§. 18.

Quod vero unum est omnium maximum, quid coram Christi judicis tribunali respondebunt ex Febronii secta Novatores, qui unius Capitis a Domino instituti regimen, seu *Monarchicum* antiquitus ab Ecclesia pro fidei dogmate agnitum *) negantes, & obedientiam nili jam verbo, certe manifestis actibus reculantes, dilectæ Christi sponsæ vestem unitatis pulcherrimam dilacerantes, eandemque, quantum in ipsis est, propudiose ad hostium suorum ludibrium denudantes, divinam institutionem Ecclesiæ profanant, numquam tamen ab inferi portis exsuperandæ? Atque hæc vulnera optimæ Matri, his temporum æumnis jam nimium afflictæ addunt, quæ grassante per Germaniam, & ultra irreligionis, quam *Illuminativum* vocant, perniciofa peste, nec ipsis Sanctuarii Intimis jam parcente, ad fideles oves, atque adeo Pastores in puritate fidei conservandos singularis cura, & sollicitudo summi Pastoris cum omni potestatis plenitudine requireretur; quæ morum infra gentilem fere honestatem delapsorum ruina in particularibus Ecclesiis longe aliud reformandi studium exigeret, non sane ad suæ dignitatis cum pontificæ Sedis ignominia amplificationem, sed ad publicæ pœnitentiæ in Clero, populoque humilitatem, ac vitæ emendationem; quæ ad sustentandam episcopalis

Q q q a

palis

*) Vide totam hujus libri Partem II.

palis auctoritatis a Potentibus hujus mundi graviter depresso infirmitatem opus esset quam fortissimo apostolicæ Cathedræ fulcro, totiusque Ecclesiæ immobili fundamento. His, inquam, difficillimis, prope dicas extremis temporibus, cum sanctæ Dei Ecclesiæ miseriis nihil ad condolendum moti, sed potius facti audaciores Febroniani nova vulnera romanæ Matri ex Sedibus episcopalibus feriant; nonne multorum jam satis fundatam opinionem confirmant, *Febronianismum* nunc esse larvam ad contegendum *Illuminatismum*? prout illa S. Evangelii regula non fallit, quæ ex fructibus dijudicandam asserit, & cognoscendam esse arborem. — O Febroniani! certo certius constat inter vos esse illuminatos: attamen nondum vos omnes tam profunde estis delapsi. Quotquot igitur prælucentem adhuc divinæ fidei facem aspiciatis, cogitate hoc esse indicium, unde suos Christus fideles discipulos cognoscat, & cognosci ab aliis voluerit, mutuam inter se dilectionem, & animorum concordiam, quam ut eo meliori modo stabiliret optimus simul, ac sapientissimus Pastor, unum voluit esse omnium gregem sub uno Pastore, SUI in terra Vicario, cui soli curam totius ovilis cum plenissima clavium potestate quidquid solvendi, ligandive commisit, UT SIT UNUM OVILE, ET UNUS PASTOR. Amen! Amen! Amen!

INDEX.

A.

- Abusum* prætextus. [pag. 488.](#)
Acceptatio decretorum Basileensium, p. [93](#)
 &c. *Ejusdem* instrumentum, p. [329](#) &c.
Advocatus jus, p. [368.](#)
Africane appellationes, p. [311](#) &c. & Le-
 gationes, [p. 403.](#)
Afrorum dependentia a Roma, p. [251.](#)
Agapet P. decretum, p. [277.](#)
Agathonis P. decretum, p. [277.](#)
Alexandrinus Patriarcha sub Romano, p. [394.](#)
Ancyranæ Synodi Can. IX explicatur, [p. 252.](#)
Ansegisi exemplum, p. [409.](#)
Antiocheni Can. XIV, & XV explicantur,
 p. [289.](#)
Apocryphi quales fuerint, p. [396](#) &c.
Apostoli cur Petro subordinati, p. [8.](#) —
 Non omnes honore pares, p. [15.](#) —
 Omnibus quomodo ligandi potestas da-
 ta? p. [7](#) &c. — Quomodo inerrantia
 promissa? p. [17.](#) Omnium cœtu supe-
 rior Petrus, p. [18.](#) Illorum potestas cur
 a Petro non restricta? p. [28](#) &c. Erant
 Petro obediens, p. [32.](#) in præsentia
 Petri tacerunt, p. [36.](#) Omnes a Petro
 instructi, p. [39.](#)
Apostolatus ab Episcopatu distinguendus,
 p. [54.](#)
Appellationes a Papa prohibita, p. [156, 361](#)
 &c. — Ad Papam licita, p. [271](#) &c.
[417.](#) Illarum moderatus usus, p. [345](#)
 &c. Intermedia non necessaria, p. [347](#)
 &c.
Archiepiscopi restringendi, p. [387](#), 491.
 Pugnantes contra Pontificem, p. [431](#) &c.
Ariflocraticæ an cum Monarchia mixta?
 p. [103](#) &c.
Affenburgense pactum, p. [334](#) &c.
Asiani num jussu Victorii, resistunt? p. [185.](#)

- Athanasius* ad Papam appellans, p. [285.](#)
Augustini doctrina de clavibus cœlorum,
[p. 5, 91.](#)
Aviti Viennæ sententia, p. [370.](#)
Aulicum Viennæ Consilium quam iniquum,
 p. [437.](#)
Axioma falsum Nœocanonistarum, p. [106.](#)

B.

- Ballerini* de appellationibus, p. [274.](#)
Barbel, fallax Scriptor, p. [102](#), [229.](#) —
 Genuina fassus, p. [338.](#)
Basileensis Concilii confessio, p. [183, 234.](#) —
Ejusdem decretum de causis, p. [325](#) &c.
[413.](#) De eodem sententia Gallorum, p. [75.](#)
Basiliidis causa, p. [283.](#)
Bavarie Episcopatus quomodo instituti?
 p. [193.](#) — *Ejusdem* Legati contra Or-
 dinarios, p. [418.](#)
Beellarmini nova doctrina de mixta regimi-
 nis forma, p. [106.](#)
Benedicti XIV decretum, p. [345.](#)
Bernardus de appellationibus, p. [278, 351,](#)
[366.](#)
Blondelli liber contra Isidorum, p. [441.](#)
Bonifacii P. I decretum, [p. 217,](#) 218, 256,
[276, 364, 401.](#)
Bonifacius Germaniæ Apostolus, p. [194,](#)
[205, 208, 407](#) &c. [485.](#)
Bonosi causa, p. [308.](#)
Bossuetus M. an Defensionis Author? p. [122](#)
 &c.
Bossuetus Trecentis Janseuista, p. [124.](#)

C.

- Cæciliani* causa, p. [284.](#)
Canonista hodierni plerumque Atheologi,
 p. [2.](#)

Capitulario Josephi II. p. 354. — aliorum Cæsarum. p. 428 &c.
Causæ majoræ ad Papam. p. 210 &c. 326, 479.
Chalcedonensis Concilii historia, & gesta. p. 162 &c. 199.
Chrysostomus ad Papam appellans. p. 298.
Claves cælorum quo sensu datæ toti Ecclesiæ? p. 5, 91. — quo sensu Petro? p. 6.
Clementis I Authoritas erga Corinthios. p. 184, 279.
Clericorum inferiorum appellatio ad Papam. p. 316.
Cælestini I statutum. p. 188, 258.
Colonienfis Synodi declaratio de Matrimonio p. 268. — Facultatis theologicæ censura. p. 385. — Memoriale ad Imperium. p. 412 &c. 423 &c. 428. — Decretum adversus Nunciaturas. p. 435. — Nunciaturæ origo. p. 423. & tranquilla possessio. p. 424 &c.
Concilia ad quid, & quomodo valeant? p. 45, 117, 397. — Nihil sine Papæ consensu. p. 213, 224, 247, 481 &c. Jerosolymitanum quale fuerit? p. 43, 47.
Concordata Germaniæ. p. 92 &c. Item p. 329 &c. — Bavarica cum Episcopis. p. 438. *Concordatis* quam fideles Papæ. p. 230.
Confirmatio quid sit? p. 46, 140. — Conciliorum ad quem pertineat? p. 195. — Episcoporum ad Papam. p. 225 &c.
Confluentis Conventus. p. 431.
Consensus bene distinguendus. p. 140, 170. — universalis male exigitur. p. 143 &c.
Constantiensis Concilium quo sensu supra Papam? p. 118 &c. 139, 379. — decretum de causis. p. 323.
Constantinopolitana Ecclesia quantum Romæ subdita. p. 194. &c. — contra jus antiquum elevata. p. 489. — Concilium I quale fuerit? p. 198. — Conc. II p. 201. — Conc. III p. 202. — Conc. IV. p. 204, 363.

Cornelius P. quomodo dispensaverit? p. 245.
Cyprianus de unitate. p. 50 &c. — quo sensu scripserit, omnes Apostolos fuisse pares? p. 5 &c. — Ejusdem error inexcusabilis. p. 139, 185, 282.
Cyrillus ad Papam referens. p. 217.

D.

Damasus P. decretum. p. 250, 276.
Declarationis Gallicanæ vitia. p. 79, 110 &c. — Ejusdem defensionis Author quam malæ fidei. p. 78.
Definitio fidei an conveniat romanæ Ecclesiæ? p. 157.
Disciplina vetus qualis fuerit? p. 239, 267. — variari potest. p. 487.
Dispensationes ad quem jura pertineant? p. 231 &c. — Matrimoniale. p. 259 &c. 434 &c.
Dominatum non quemlibet Christus prohibet. p. 15, 104, 478.
Dragonis exemplum. p. 409.

E.

Ecclesie universalis professio de romanæ fide infallibili. p. 120. — dispersæ, & collectæ distinctio. p. 119.
Ekkii Commentarius in verba Christi pro Peto orantis p. 16.
Electorum mos vetus. p. 229.
Emilianus Conventus. p. 433. — Pundationis prima propositio. p. 26. — De appellationibus p. 349.
Epheſini Concilii historia, & gesta. p. 159, 198.
Episkia quomodo a dispensatione distinguitur? p. 232.
Episcopi quo sensu positi, ut regerent Ecclesiam Dei? p. 11. — nomen Presbyteris commune. ibid. — quomodo Apostolorum successores? p. 14. — missi an cum plenitudine potestatis? p. 95, 488. — quare primi in Hierarchia nominantur? p. 27. — jam ab initio limitatæ

mitate jurisdictionis. p. 14, 28, 30. — an jurisdictione immediate a Christo, vel tantummediate? p. 49 &c. — non quidem Ministri Petri, huic tamen subiecti. p. 55, 485. — qualis jurisdictione ex Galilorum doctrina? p. 67 &c. 117, 141. — illorum consensus ad quid valet? p. 117, 206 &c. — depositio ad quem spectat? p. 193, 480. — confirmatio ad quem? p. 225 &c. — translatio ad quem? p. 483. — non habent jus dispensandi. p. 235. — olim disciplinæ tenetissimi. p. 248.

Eubel de Legatis, p. 382.

Eugenii IV indulta. p. 98 &c. 321 &c.

Examen circa Religionem quoduplex? p. 142.

Exemptio Monasteriorum. p. 321, 327.

F.

Facultates delegatæ jam antiquit. p. 402. *Falsitas* documenti veteris non statim fraus. p. 444 &c.

Febronius vapulans per totum.

Fides Petri non deficiens. p. 16. — est fulcrum Apostolorum. ibid. — quomodo Petra Ecclesiæ? p. 90, 153. *Fidei* causæ ad Papam. p. 222 &c.

Flavinius ad Papam appellans. p. 300 &c.

Flowry Continuator qualis? p. 422.

Florentinum Concilium de Primatu Rom. Pontif. p. 68, 80.

Francfordiensis Conventus. p. 96.

Fundamentum Ecclesiæ Petrus, p. 149 &c.

G.

Galli erga S. Sedem iniqui. p. 2. — quo sensu Papam fallibilem dixerint? p. 118.

Gallicana sententiæ de Primatu. p. 67 &c. 236. — libertates quam fideles. p. 82 &c. — Cleri comitia pro Papa. p. 111. — Ejusdem sententiæ recentiora. p. 112, 117. — disciplina circa matrimonii disputationes p. 259 &c. — de appellacionibus. p. 273 &c. 313 &c. 370.

Gelasii P. rescriptum. p. 258, 307, 364, 390, 393, 486.

Germania Episcopatus quales ab initio? p. 194, 229, 406, 485. — quam beuolenti Pontifices? p. 230. — disciplina vetus de iudiciis. p. 317. — recentior. p. 319 &c.

Græcorum possessio de fide Rom. infallibilit. p. 120.

Græciani Imperat. lex de iudiciis. p. 212.

Græuina Græuorum. p. 97, 279.

Gregorii M. insignis statutum. p. 190, 398. — alia facta. p. 481, 483.

H.

Hadriani Capitularia. p. 471 &c.

Hieronymi dicta de Pontifice. p. 210, 214.

Hilarii P. decretum. p. 220, 258.

Hincmarus Rhemenfis *bonus* Criticus. p. 450.

— ejusdem sententiæ. p. 224, 356, 441, 470 &c. — violentia. p. 409.

Hispania reuerentia erga romanam Ecclesiam. p. 256.

Holl de Legatis. p. 382.

I.

Iansenista a Papa appellantes. p. 368. — fraus aduersus Rom. Sedem. p. 123 &c.

Infallibilitas de ea inanis questio. p. 444. — nec non & subdola. p. 137.

Innocentii I statutum. p. 187, 216, 227, 257, 276, 401.

Iosephi II rescriptum. p. 432.

Irenæi testimonium de Rom. Ecclesia. p. 210.

Isidori Mercatoris historia. p. 439 &c.

— Collectionis antiqua authoritas. p. 440.

— minus tamen apud Romanos. p. 476.

— Non fuit deceptor, sed sincerus compilator. p. 447 &c.

— decretalium epistolularum recensio. p. 453 &c. 462 &c.

— Collectionis scopus pro Episcopis, non pro Papa. p. 475.

— Merces non spuria, sed bona. p. 477 &c.

Judeus Episcoporum Papa. p. 212.

Judi

Judices in partibus quales? p. 327 &c.
Julii I autoritas in Orientales. p. 189,
212, 275, 284. — epistola genuina.
 p. 482.
Jung falsus Doctor Moguntiz. p. 239 &c.
Jvo Carnotens. de appellationibus. p. 366.
 374.
Juramentum Episcoporum erga Papam.
 p. 208 &c.
Jurisdictionis in mediatam, & immediatam
 falsa distinctio. p. 8, 19 &c. 207, 327.

L.

Legati nati quomodo defecerint. p. 417.
Legationum jus. p. 379 &c. *Legatio* stabili.
 p. 386.
Legislativa potestas in Pontifice. p. 182 &c.
Leonis M. statutum. p. 188, 218, 228, 258.
 394.
Leonis IV rescriptum. p. 476.
Liberius P. appellatus. p. 297.
Libertates Gallicanæ quid sint? p. 82.
 — unde habeant originem? p. 84.
 — quo jure nitantur? p. 85.
 — quantum extendantur? p. 87.
 — quid profuerint? p. 88.
Lucii P. decretalis genuina. p. 466.
Lugdunense Concilium de Autoritate Rom.
 Eccles. p. 157.

M.

Marcion appellans ad Papam. p. 280.
Martini I statutum. p. 123.
Martini V concordatum cum Germanis.
 p. 324, 364.
Marrimoniales dispensationes. p. 259, 434
 &c.
Mediana tantum jurisdictio an sit illa Petri?
 p. 8.
Memoriale ad Imperium Colonienſe. p. 412
 &c. — Salisburgens. p. 409 &c.
Metropolitanorum origo. p. 226, & distinctio.
 p. 227.

Miraculis Petrus præ aliis Apostolis excellens. p. 36 &c.
Missio Episcoporum an cum plenitudine potestatis? p. 35.
Modus rerum murabilis. p. 391.
Moguntie honoratus Nuncius. p. 427. —
 Archiepiscopi litteræ. p. 355 &c. 431.
 — decretum adversus Nunciaturas.
 p. 436.
Moguntinus Levita an Author decretalium?
 p. 473.
Monacensis Nunciaturæ origo. p. 433.
Monarchia optimum medium ad unitatem.
 p. 64. — quod duplex? p. 66. — ex doctrina gallicana. p. 75. — an sit mixta
 cum Aristocratiâ? p. 103.
Monasteriorum causæ. p. 321.
Monitum electorale ad Joseph. II. p. 353.

N.

Nicænum Concil. I. p. 197. item II. p. 203.
Nicani I Can. V. p. 287. Can. VI. p. 392.
 — An tantum 22 Can. ? p. 404.
Nicolai I rescriptum. p. 476.
Nicolai V pactum. p. 101, 334.
Nunciaturæ Viennensis origo. p. 418 &c.
 — Helvetianæ. p. 420.
 — Colonienſis. p. 423.
 — Monacensis. p. 433.

O.

Obediencia Papæ debita. p. 145, 182, 208.
Optima regiminis forma qualis? p. 108.
Optati Milevit. sententia. p. 50.
Ordinarius an Papa? p. 202.
Orientalis Ecclesia in causa Photii. p. 194.
 — dependentia a Rom. Pontif. p. 218,
 231.
Oves Christi etiam gentiles. p. 21 &c.

P.

Palatini Electoris rescriptum. p. 322, 437.
Pallii concessio. p. 484 &c.

Papa

Papa quomodo fallibilis? p. 118 &c. — habet jus ferendi leges. p. 182. — est Episcoporum iudex. p. 212, 480. — potest dispensare. p. 234. — appellationes suscipere. p. 272 &c. — Legatos mittere. p. 380. — ejus consensus Concilii necessarius. p. 213, 224, 247, 481 &c.

Patriarchalis dignitas unde? p. 56. & qualis? p. 220, 245, 393, 491.

Pebem de Legatis. p. 384.

Pelagius ad Papam appellans. p. 309.

Petra nomen Simoni datum. p. 4.

Petrus Apostolus universim praepositus.

p. 17. — Pastor universalis constitutus.

p. 19. — inter Apostolos solus loquitur. p. 34. — solus iudicat. p. 36. —

visitat universos fideles. p. 37. — miraculis prae aliis Apostolis excelsit.

p. 38. — in Concilio Ierosolymitano praevalet. p. 43. — Simonem Magum triumphat. p. 60. — Christi Vicarius est. p. 61. — fundamentum Ecclesiae.

p. 149 &c. **Petri** iurisdicção suprema, & illimitata. p. 6, 7. & immediata.

p. 8. — fides non deficiens. p. 16. — Apostolatus excellentior. p. 35, 37.

Petro data promissio. p. 3 &c. — subordinati Apostoli. p. 8. — soli concessa privilegia. p. 29 &c. — mysterii facta revelatio. p. 39. — Ad **Petrum** Paulus se confert. p. 41. — Pro Petro singulariter orant fideles. p. 40.

Pborii causa. p. 194.

Pii I decretalis genuina. p. 464.

Pii II statutum. p. 365.

Pii IV rescriptum. p. 270, 342.

Pii VI rescriptum. p. 402, 412.

Poenitentia lex qualis sub Cypriano? p. 244.

Pontificum decreta. p. 187.

Presbyteri olim externa iurisdictione praediti. p. 13, 56. — adversus Episcopos.

p. 238.

Provinciales Synodi quam subiectae? p. 276, 284, 314. — tantum a Pontifice delegatae. p. 480.

R.

Reformationes tempore quales Ordinari fuerint? p. 418.

Relationes ad Papam antiquissimae. p. 211 &c. 482.

Reservatio casuum conscientiae. p. 221.

Romanae Ecclesiae prerogativae. p. 59. & infallibilitas. p. 120.

Rudolphi Habsburgici promissio. p. 417.

S.

Salisburgense Memoriale ad Imperium. p. 409 &c. 420, 428.

Sardicenses Concilii Can. III, IV, V. p. 292, 391, 403. — aliud statutum. p. 483.

Schleisswein de Monasteriis. p. 322, 326.

Schmidt Canon. de Legatis. p. 381.

Schott Bamberg. de Legatis. p. 333, 388, 411.

Siricii P. statutum. p. 187, 188, 250.

Socrates, & **Sozomenus** graeci testes pontificiae Authoritatis. p. 213.

Spirensi liti historia. p. 352 &c.

Spisler de Concordatis German. p. 315.

Symmachi causa. p. 369.

Superioritas Conciliorum supra Papam quo

sensu? p. 118 &c. 132.

— quam recenter excoigata. p. 371 &c.

T.

Thomassinus de usu dispensationum. p. 237.

— de Authoritate Pontif. p. 371, 379.

— de Nicenis Canonibus. p. 403.

Trevi

Trevirensis documentum de matrimonio.

p. 266.

— Archiepiscopi mandatum, p. 343.

— decretum adversus Nuntios, p. 435.

Tridentinum Concilium quam favorabile

Episcopis, p. 239, 343.

— de matrim. dispensat, p. 268.

— de Authorit. Pontif. p. 274.

— de Legatis, p. 414.

I

V.

Valentiniani Imperat. lex de judiciis, p. 315.

Vasipensius de veteri disciplina, p. 267.

Victoris I autoritas, p. 279.

Vigilii P. decretum, p. 220, 277.

Unitas qualis a Christo instituta? p. 107.

Universalis Pastor an Papa? p. 479.

Wirczburgensis differentia cum Nuntio.

p. 426.

X.

Xysti III statutum, p. 189, 402.

Z.

Zachariae P. decretum, p. 229, 317.

Zalwein Scriptor fallax, p. 222, 287.

— de appellation, p. 273.

— de Legatis, p. 382.

Zofimi P. statutum, p. 188, 189, 217,

210, 405.

<i>Pag.</i>	<i>Lin.</i>	<i>Errata.</i>	<i>Corrige.</i>
16	29	debitationis	dubitationis
30	11	fuerit	usus fuerit
44	14	suam	Christus suam
46	29	verbo : Ecclesiæ	verbo Ecclesiæ <i>fixe</i> :
47	32	fidei obstat	fidei instat
50	11	granets	granda
—	19	Quare si quis	Quæ si quis
64	8	Tunc	Tunc
65	26	Nondum	Nos dum
69	16	regulam	regalem
77	30	<i>ex insania</i>	<i>ex insania</i>
78	3	<i>de moderno usu</i>	<i>de moderato usu</i>
81	32	& communionem	& communem
94	3	excepto	exceptio
95	24	in Concilio	ex Concilio
111	32	est, reliquæ	est reliquæ <i>sine</i> ,
118	5	ad fidem	ad finem
—	15	in ipsa Sede	ab ipsa Sede
120	11	vulgarem	particularem
130	27	asservari	asservari ait
136	8	& dogma	non dogma
143	31	apud <i>Dissenſionis</i>	apud <i>Dissenſionis</i>
—	—	Authorem <i>queras</i> .	Authorem <i>queras</i> dissolutam.
154	10	Domine illud	Domine illuc
160	1	proſcripſerit	præſcripſerit
162	5	loco, quod	loco, quo
182	26	in alia	inter alia
187	3	fuiſſe	fuiſſe patet
—	7	moverint	noverint
207	13	ſed <i>immediata</i>	ſeu <i>immediata</i>
—	33	abneget	Pontifici abneget
224	8	Epifcopo	Epifcopos
230	10	ſuſpecto	haud ſuſpecto
244	22	legi	legis
—	29	in proprio	improprio
247	16	& plena	de plena
251	1	recipiendo	recipiendos
287	15	ut Catholicis	ut Catholicis
295	21	directoria	decretoria,
298	15	Orientis <i>sine</i> .	Orientis <i>cum</i> :
373	23	eo ipſe	eo ipſo
388	<i>in Nota</i>	Commiſſario conſultum :	Commiſſario : conſultum
417	22	e partium	a partium
453	21	anachoriſmis	anachoriſmis



CXX 5 : C²





